



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3504/A






Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3504/A




Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3504/A



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3504/A





23682

A. XLI.

14j

3504
A

Felice
Paris

SE

DES

POP

PRO

touch

de

M.L.A.

C. M.

sur

gde

AVEC

plu

pro

des

DEVI

con

Le

me

Pour

leg

AVEC

23682
SECONDE PARTIE

DES ERREURS POPULAIRES, ET

PROPOS VULGAIRES,
touchant la Medecine & le regime
de santé, refutés ou expliqués

PAR

M. L'AVR. IOVBERT, CONSELHER
& Medecin ordinaire du Roy, & du Roy de Na-
uarre, premier docteur regent, Chancelier & Ju-
ge de l'Vniuersité en Medecine de Mompellier.

AVEC DEVS CATALOGVES DE
PLVSIEURS AVTRES ERREURS OV
propos vulgaires, qui n'ont esté mancion-
nés en la premiere & seconde edi-
tion de la premiere partie.

ITEM

DEVS AVTRES PETIS TRAITES,
concernans les Erreurs populaires, avec deus
Paradoxes du mame auteur.


Le tout reueu, corrigé & augmenté, par l'auteur
mame, pour la seconde edition.

A PARIS,

Pour Lucas Breyer, tenant sa boutique au
second pillier de la grand' salle du Palais.

1580.

AVEC PRIVILEGE DV ROY.





A

MON TRES-HONNORE

SEigneur, MONSEigneur

*de Neufville, Seigneur de Villeroy, con-
seiller & secretaire d'estat du Roy,
grand tresorier general de l'ordre
de sa Majesté, Berthelemy Ca-
brol, son tres-humble ser-
viteur, Salut.*



Monseigneur, j'ay
eu mon refuge à
vous, pour me
sauver du mes-
cōtenteemēt que
M. IOVBERT
a receu de moy : à raison d'une se-
conde partie de ses Erreurs popu-
laires, que ie faisois imprimer, com-

A ij

EPISTRE DEDICATOIRE.

me à la desrobee, voyant sa resolution de n'en mettre plus en lumiere. Il m'a surpris cheus l'imprimeur, fort indigné de mon entreprise. Touttesfois quand il ha entendu, que ie vous en voulois faire vn present, il ha esté tellement satisfait, que sur le champ il ha permis à Lucas Breyer, marchant libraire (auquel ie m'en estois adressé) de passer outre: luy dōnāt ancor deux beaux discours, traduits de ses Paradoxes Latins, par Isaac Ioubert son fils aîné. En quoy i'ay cogneu par effect, le grand respect qu'il vous porte, & la venerable autorité que vo^r auez gagné sur luy, par voz bien-faicts & merites en son endroit: ainsi qu'il proteste souuent & en priué & en public, vous estimāt l'vn des meilleurs segneurs & amys qu'il ayt en

EPISTRE DEDICATOIRE.

France. Pource (dit-il) que sans
vous auoir iamais faiët aucun ser-
uice, ne aus vostres, luy auez tou-
jours en tous ses affaires esté si gra-
cieulx, bening & fauorable, qu'il ne
pourroit rien plus attendre d'un
auquel il eut seruy toute sa vie.
C'est vostre grâdeur, Monseigneur,
de faire ainsi acquisitiō d'un grand
nōbre de seruiteurs bien affection-
nez, & tels que ie cognois ledict
sieur I O V B E R T: lequel ne s'epar-
gnera iamais à rendre le bebuoir, au
moindre qu'il ayt obligé. L'un de
ses moyens est (qui n'est à mespri-
ser) d'honorer la memoire de ses
bien-faiëteurs par ses éscripts. Dōt
ie m'assure, que s'il eut de soy mis
cet' œuvre en auant, il la vous eust
donnee, plus-tost qu'à autre que ie
sache. Ell' est dōc vostre de bō droit

A iij

EPISTRE DEDICATOIRE,

& mesmes veu la permissiõ de l'auteur : qui est vn expres cõsentemẽt comme sil la vous donnoit, & que ie la vous presentasse de sa part. En quoy vous plaira aussi considerer, l'extreme desir que i'ay d'estre cognu de vous, m'insinuant par ce moyen en voz graces, & me presentant à vous faire tref-humble seruice, quand il vous plaira m'honorer de voz commandemens.

Monseigneur, vous me cognoitrez en cela de si ardente affection, que vous le pourriés desirer du plus cõfident & asseuré seruiteur que vous ayez eu iamais : emeu à cela, tant des propos de mondict sieur I O V B E R T, que de la commune reputation de voz rares & excellentes vertus, qui vous ont rendu tref-aggreable au Roy nostre sire, & aus

autres princes de ce royaume, maniant les plus grans & importans affaires de la Couronne, autāt heureusement que prudemment, avec vne merueilleuse dexterité, accompagnée de singuliere confidence & discretion, loyauté, rondeur, integrité, syncerité & preud'hommeie, diligence, patience, vigilāce, promptitude, hōnesteté, gentillesse, grace, bonté, douceur, humanité, benignité, courtoisie, modestie, generosité, constance, magnanimité, liberalité, excellente memoire, subtile inuention, profond & sain iugement, discours solide & graue, tref-bon auis & conseil: & toute autre vertu requise à vostre estat, condicion, & charge. O qu'vn grād Roy est heureux, d'auoir vn tel cōseiller aupres de sa personne! O in-

A iiij

EPISTRE DEDICATOIRE.

finimât heureux le Monarque, qui
 en auroit autant qu'il y a de grains
 en vne belle grenade, cōme le grād
 Roy Darius souhaittoit autant de
 Zopyres ! Heureuse la patrie, heu-
 reux le peuple, qui a telle adresse,
 pour obtenir de son Roy ce qu'il
 en peut requerir iustement, ou an
 attendre fauorablement, adresse
 autant facile, autant seure & verita-
 ble, qu'on ayt iamais eu en France,
 d'un personnage tant accostable,
 affable, sans reproche, & digne de
 sa charge, qu'il en fust onc au mon-
 de. Monseigneur, ie serois trop pro-
 lixe (ie le voy bien) si ie voulois ra-
 conter seulement la disiesme partie
 des louables actions qu'on rappor-
 te publiquement de vous : outre ce
 que ie ne m'en sçauois dignement
 acquitter. Aussi ie pense, qu'il vous

EPISTRE DEDICATOIRE.

fera plus agreable, de ietter incont-
 nent voz yeulx, sur les beaux &
 plaisans discours de M. IOVBERT,
 sçachant, que vous avez par cy de-
 uant prins grãd plaisir à la premie-
 re partie, que luy-mesme fit publier
 y ha vn an. Je croy que vous ne
 l'aurez pas moindre de cette-cy:
 mais quoy que ce soit, vous plaira
 interpreter en mieux mon hardies-
 se, & agreer le present que ie vous
 fais en toute reuerance & humili-
 té: en vous baissant les mains, &
 priant Dieu que vous doint, Mon-
 seigneur, le comble de voz meil-
 leurs desirs, en parfaicte santé, tref-
 longue & heureuse vie. De Paris
 ce 3. de Feurier, 1579.

EPISTRE DE B. CABROL, MAISTRE IVRE
en la faculté de Chirurgie, de
l'Vniuersité, Cité, & Ville de
Montpellier, Chirurgien ordi-
naire du Roy.

REPULSIVE DES ENVIEUX
*& venimeux propos tenus contre l'Au-
teur des Erreurs populaires.*

ADDRESSEE AV TRES-
VERTVEUX, MAGNIFIQUE ET
Genereux Seigneur, M. ANTOINE
DE CLERMONT, Baron de MON-
TOISON, & gentilhomme de la
chambre du Roy.



N DIT bien vray commune-
mant, qu'Enuie ne mourra
iamais. Car elle fut angeandree
de Lucifer, dez le commence-
mant du monde: & n'aura ia-
mais fin, nomplus que les diables d'anfer, peres
de calomnie & detraction, dont ils portent le

Epistre Apologitique.

nom. Ie l'ay quelquefois sentie bien piquante,
& fascheuse au mon endroiect: mais ie me suis
tousiours consolé, & ay prins meilleur courage,
de ce que ie me voyois en telle affliction, com-
pagnon des plus gens de bien, des plus vertueux,
studieux, & sçauans qui soient au monde: Et
de ce que i'ay tousiours ouy dire, qu'il n'y a per-
sonne exempt d'Enuie, que le miserable: &
qu'il vaut mieux estre suiect à Enuie, qu'à pi-
tié. Mais ce que i'ay senty en moy de ses piqueu-
res & morsures, n'est rien au prix des assaulx &
alarmes qu'elle a donné à M. IOVBERT,
deuz qu'il a commencé de paroistre, auoir repu-
tation, & estre tenu entre les plus doctes & ra-
res personages de sa profession. Ce fut premiere-
ment, quand on eut publié la premiere Decade
de ses Paradoxes sans qu'il en sçeut rien: & plus
encores, après que l'ayant recognue & aduouee,
il l'a feist reimprimer, y adioustant la seconde.
Bon Dieu, quelles detractions & calomnies luy
excita Enuie, à l'occasion de ceste oeuvre-là! Ie
le sçay bien, pour l'auoir veu, au grand desplai-
sir de ses amis, & de tous ceux qui cognoissent
sa vertu, valeur, & prend'homme. Cela neant-
moins luy succeda tres-bien, & luy donna grand
bruiect: tout ainsi que la palme se rehaulse &

Epistre Apologitique.

releue, contre le fardeau qui la presse, & tasche à la deprimer. Tellement que pour le iourd'huy ses Paradoxes sont en telle vogue, & en tel prix, que iusqu'au plus profond d'Allemagne on les desbat, & soustient: comme l'on void par les escripts des plus sçauants de ce temps. Toutesfois ledict Sieur IOVBERT, ayant promis un grand nombre de tels Paradoxes (suiuant le roolle qui est à la fin de sa premiere Decade, en la seconde & troisieme edition) n'a pas voulu poursuiure cest argument, comme desdaigné & iustement courroucé des meschancetez que l'Enuie luy auoit suscité. Vray est qu'en diuerses oeures, comme il luy vient à propos, il deduit ses autres Paradoxes: mais ce n'est qu'en passant, & non pas à plein fond: dequoy les studieux sont fort marris. Ainsi est-il aduenu (de mal-heur) à l'une de ses dernieres oeures, qui sont les Erreurs populaires & Propos vulgaires, par luy expliquez & corrigez, iusques au nombre de soixante chapitres: en promettant encor plus de trois cens, comme il appert du Catalogue, qu'il a faict quant & quant publier. Mais ayant entendu par vrais rapports, qu'il en soustenoit grand Enuie, detraction, & calomnie, voire que

Epistre Apologitique.

sa reputation en estoit aucunement diminuee
enuers plusieurs, bien marry a deliberé & s'est
resolu de quitter cest argument: ia-soit qu'au
iugement des plus sensez & vertueux, qui en
parlent sans aucun transport d'affection, l'œu-
re soit tres-digne de louange: & qu'on en doit
desirer la continuation, pour le grand bien qui
en reuiendra au public. Ils excusent tressage-
ment, & interpretent benignement tout ce que
les medisans y reprenent: & mitiguent douce-
ment l'aigreur de leurs morsures. De sorte qu'el-
les ne peuuent nuire aucunement à la reputa-
cion de l'auteur, ne la diminuer tant soit peu:
ains au contraire, l'augmanter: comme la vertu
verdoye de la blessure: ou comme les plantes qui
portent des larmes (ce sont, resines ou gommes)
de bonne odeur, ne les produisent pas, qu'elles ne
soient feruës & blecces. Les principaux chiefs
des reprehensions (pour ne dire plus morsures) de
ceux qui taxent M. IOVBERT, de s'estre ou-
blié en son œuvre des Erreurs populaires, sont
deux. Le premier, de ce qu'il l'a dedié à la Reine
de Nauarre, tres-vertueuse, & genereuse prin-
cesse, vray miroir & patron d'honneur, veu
qu'il auoit à traiter au commencement de son
œuvre, des matieres grasses (comme on dict)

Epistre Apologitique.

Et parties honteuses, escriuant de la conception, generation, groisse, Et enfantement. Le second, que tout cela eust mieux esté en Latin, que en François, pour deux raisons: l'une, que ces propos ne sonnent tant mal en langue estrangiere, qu'en vulgaire: Et que les femmes Et filles, qui en sont plus honteuses, n'en eussent eu la cognoissance. L'autre, qu'il n'est pas bon de diuulguer nostre art au peuple, Et de luy faire entendre, ce dont les medecins se veulent Et doyuent preualoir: qui est, l'intelligence de plusieurs choses que le peuple faict Et dict, sans scauoir pourquoy, ny à quelle raison. Quant au premier, il est suffisamment respondu Et satisfait en la seconde edition de l'oeuvre, tant par Louys Bertrauan, que par l'auteur mesmes, qui a bien voulu d'abondant changer d'adresse, Et presenter tout le procez à Monseigneur de Pibrac, Chancelier de ladicte Dame, pour choisir Et trier les propos desquels sa maiesté peut auoir cognoissance, Et en iuger sans nul scrupule: ledict seigneur se reseruant le reste, comme estant plus propre à sa condition. On dit, que M. IOVBERT faict par ce moyen une amende honorable. Vrayement cela est honorable Et fort louable, de surmonter soy-mesmes, Et se

Epistre Apologitique.

commander tant, que de n'user de la liberté commune des escriuains, au ce que le moindre des lecteurs pourroit estre offensé. Et quoy? en familier propos, on dict bien à tout coup (pour peu qu'on veulhe contredire à quelqu'un, voire estant inferieur à soy) pardonnez-moy. Faut-il craindre de le dire à une Princesse, ou à autres de tous estats, quand on entend qu'ils sont aucunement offensez? S'il y eut iamais occasion de dire, pardonnez-moy, c'est quand on pense faire quelque plaisir ou service, & il est tourné au rebours. Ainsi d'un propos qu'on aura dit pour risée facetieusement, lequel sera prins autrement, on s'excuse en disant, pardonnez-moy, ie ne pensois pas mal dire: ou, ie n'y pense aucun mal, ou ie ne l'entends pas comme vous leprenez. Et bien! Voila des reparations & amendes honorables: desquelles il ne faut auoir honte, comme de celles que on faict pour absolution ou expiation d'un forfait: qui est vne peine criminelle & de contraincte, Mais le faict dont il est question est tout autre: sçauoir est, d'un qui ayant bonne intention de plaire, honorer & servir, en reçoit pour recompense vne detraction & calomnie publique, enuers les plus grands, iusques à la

Epistre Apologitique.

personne de la Princesse, à laquelle son œuvre est dediee, vouee & consacree en toute humilité, reuerence & deuotion. Quant au subiect, i'en ay ouy parler gens de toutes qualitez: de tous ordres, rangs, degrez & estats, qui pour moy n'abstenoient pas d'en dire librement leur aduis: mesmes que la plus-part ignoroient l'affection que ie porte à M. IOVBERT. I'en ay bien peu rencontré, qui n'estiment infiniment son œuvre, & desirent la continuation: disans, que c'est le plus bel argument qui ait esté proposé de long tams, ensemblement vrile & delectable: qui sont les deux principales conditions d'un œuvre parfaicte & accomplie. Et quant à la nuncupation, qu'il n'y ha point eu de mal, ains au contraire, tout honneur & respect: toutesfois que M. IOVBERT (comme il est sage, prudent, discret & aduise) ha tres-bien faict de changer son adresse, pour contenter chacun: ainsi qu'il proteste en son epistre à ses amis & bien disans. Ie viens au second chief: qu'il eust mieuz valu escrire ces choses en Latin, pour les deux raisons que i'ay dictes. Touchant a la premeere, il y a esté aussi suffisamment satisfait par le Sieur IOVBERT, en la susdicte epistre, où il remonstre pertinem-

Epistre Apologitique.

finement, que les plus chastes femmes du mode
le peuuent bien lire : & qu'elles n'y apprendront
rien que choses vertueuses, & de leur deuoir en
mariage: & leurs maris aussi. Quant aux filles,
elles n'y peuuent rien entendre, de ce qui concer-
ne les œuures de la chair, si elles sont bien pucel-
les de corps & d'ame, par maniere de dire. Mais
d'abondant, pour contenter chacun, ainsi qu'en
tout le reste, il a depuis retrenché tout ce qui
pouuoit tant soit peu offencer les plus scrupuleu-
ses consciences: sçachant, qu'il ne faut pas seule-
ment abstenir du mal, ains aussi de l'apparence
d'iceluy: qu'il faut quicter & reiecter tout ce que
peut scādaliſer autrui, iusques à se desmembrer
soymesme, se couper bras & iambes, arracher
son œil propre, comme dit IESVS CHRIST, Matth. 18.
s'ils sont en scandale. L'autre raison est, qu'il ne
faut ainsi diuulguer les propos de la Medecine,
ne les randre tant familiers & clairs: d'autant
que le peuple en pourroit abuser, sçachant plus
qu'il ne luy appartient: tellement qu'il vouldra
desormais contester avec les medecins, presque
tous les poincts de la medecine: Ceux qui disent
cela, sont gens modestes, discrets, & vertueux,
amis de M. IOVBERT, qui le luy ont dict fa-
milierement, par maniere d'aduis. Mais il sem-

B

Epistre Apologitique.

blet n'auoir pas bien leu son epistre, Au lecteur
d'esprit libre & studieux: en laquelle il re-
monstre, qu'il ha antreprins ceste besongne, pour
cōtenir le peuple ex limites de sa vocation, & le
persuader de n'attenter rien au faict de la Mede-
cine: qu'il ne soit plus tant outrecuidé & pre-
somptrueux, que de coustume: qu'il entēde mieu
ce qu'il a retenu des anciens medecins, pour en
user sagement en ce qui le concerne, & est de sa
capacité: qu'il ne donne plus tant de peine aux
medecins, de luy faire entādre son deuoir quand
il traicte & sert les malades: & generalemēt que
le peuple sçache bien, ce qu'il sçait, ou pense sça-
uoir, & quicte les erreurs qui l'ont tant possédé.
Desquelles remonstrances & exhortations l'œu-
ure est toute pleine, sans entrer plus auant en
discours, que de la portee des idiots. M. I O V-
BERT sçait tres-bien, que les misteres ou secrets
de la Medecine, & les principaux points de l'art
(propos obscurs & d'importance) ne doiuent estre
communiqués ou descouverts aux prophanes.
Ainsi nomme-il en quelque lieu, tous ceux qui
ne sont iurez & affermētez en l'eschole de Me-
decine: suiuant le sacré serment d'Hippocras, le-
quel il ensuit iournellement, en faisant iurer tous
les ans un grand nombre d'escoliers, qui veulent

Epistre Apologitique.

Donnyr les leçons en l'Vniuersité de Mōtpellier, ou y
prendre aucuns degrez. Luy qui en est Chance-
lier & iuge, auquel l'estroicte obseruatiō des loix
& statuts est en singuliere recommandation (si
onques elle fust à aucun de ses predecesseurs) n'a
garde de faillir en cela. Aussi n'est ce pas diuul-
guer ou enseigner la Medecine aux prophanes, q̃
de les instruire à biē faire ce qu'ils fōt, & leur ex-
pliquer ce qu'ils sçauēt sans intelligence, par ma-
niere de dire. Et puis? qui pourra trouuer mau-
uais, que chacun en particulier sçache entretenir
sa santé, pour n'auoir tant souuent besoin du me-
decin? Dirā-on, que M. Charles Estienne, &
apres luy M. Ian Liebault son gendre, personnes
tresdoctes & humaines, ayent mal faiēt, d'es-
crire en François leur maison rustique, où il y a
beaucoup de remedes familiers, & qu'on dict
vsuels, non seulement à conseruer la santé, ou se
preseruer de plusieurs maladies, ains aussi d'en
guerir plusieurs? Ainsi le liure intitulé Thre-
sor des pauvres, est bien veu & receu de tous.
Ainsi la belle œuvre de M. Simon de Valam-
bert, touchant la nourriture & maladies des
enfans: & plusieurs autres semblables, qui ne
sont qu'en langage François. Au contraire,
il seroit de besoin, que tout ce dont le peuple est

Epistre Apologitique.

capable, cōcernāt sa santé, fut en langue vulgaire, pour son profit : sans luy enuier ce bien, qui est d'une Enuie totalement ennemie du genre humain. Seroit-il bon, qu'on n'eust iamais diuulgué & monstré au peuple, l'usage du bled & du raisin, à faire du pain & du vin: de cuire la chair, & apprester les autres viādes : ains que certains hommes eussent tenu cela secret entre eux, à fin que tous les autres passassent par leurs mains, & fussent à leur discretion, pour auoir du pain, du vin, & de la viande? Ainsi (pour monter plus hault, des viures terrestres du corps, aux celestes appartenās à l'ame) on se plaint d'aucuns Theologiens, qui ne veulent permettre qu'on traduise la sainte escripture en vulgaire, affin que le peuple ne l'ayt que par leur bouche: priuans les ignorās de ceste pasture spirituelle : laquelle toutesfois eux-mesmes proposent & expliquent en pleine chaire, autant profondemāt, siebtilemāt, & distinctemāt qu'ils peuuent. Et quelle difference y ha il, de lire les mesmes textes a-part dās sa maison, ou de les ouyr souuent reciter publiquement & en vulgaire? Je ne trouue pas grād difference de telles rigueurs, d'avec celle qui empêche le peuple de sçauoir pour sa prouision, autant qu'il peut comprendre de l'art, qui enseigne

Epistre Apologitique.

à viure sainemēt, & se bien gouverner en maladie, sous la conduicte & l'ordonnance des medecins. Et (ie vous prie) qu'escript M. IOV-BERT, sinon ce que presque tous les iours remonstrent & inculquent les medecins aux malades, ou à leurs amis, parens, alliez, seruiteurs, gardes, & autres assistans? Est-il plus mal fait de l'escripre, que de le dire? Ne veut on pas qu'il soit bien retenu? Et voyci le moyen, de le meētre par escript: car la voix se perd, & l'escriture demeure. Ainsi ie ne vois pas, que ceste reprehension ayt lieu, & soit mettable, ou ie ne l'ay pas bien comprins. Voyla les principaux chiefs (ce me semble) des censures que i'ay ouy par-cy, par-là. Il y a bien un autre poinct, duquel M. IOV-BERT est fort absurdemēt calomnié: c'est pour les depositions des sages femmes, que aucuns osent dire, auoir esté inuentees par luy-mesmes. Il refute bien cela en l'Epistre, à ses amis & bien disans, nommant celuy qui luy a fourny celles de Paris & de Bearn. Quant a celle de Carcassonne, ie sçay bien qu'il l'a eue d'un qui estoit principal Secretaire de Monseigneur le Mareschal Dampville, qui la recitoit souuent pour plaisir. Et M. IOV-BERT est bien empesché d'entendre seulement les termes, desquels

Epistre Apologitique.

Usent ces sages femmes: pour les sçauoir accommoder aux diuerses parties du membre qui distingue le sexe. Car il n'est pas en peine d'y trouuer autant de pieces, qu'en mettēt les matrones. Nous en demonstons ez publiques Anatomies seize, ou dix & sept: que ie reciteray de l'ordre qu'elles se presentent. ¹ C'est l'os Bertrād ou Barre, autrement dict l'os Pubis ou du penil: ² le poil qui couure la susdicte partie: ³ la motte, de quelques vns appellee Mont de Venus: ⁴ les deux lebures ou babines, qui sont la bouche ou emboucheure: ⁵ les deux pterigomes ou aisterōs grands, nommēs vulgairement landies: ⁶ les deux moindres aisterons dessous les grands, qu'on appelle Nymphes, d'un mot grec: ⁷ le Tentigo, ainsi nomme de Falloppe: qui est comme vne verrue au haut de la motte, couuert des grands aisterons. C'est la teste & balane ou gland du Clitoris, lequel rapporte au membre viril: ⁸ ledict Clitoris, compose de deux nerfs cauerneux: ⁹ deux muscles qui le bendent & font dresser: ¹⁰ l'orifice de la vescie, qui est vne valve charnue: ¹¹ cinq ou six caruncules ou carnositez, semblables à verrues: ¹² le grand canal respondant à la longueur du membre viril, ayant force rides circulaires: ¹³ le Hymen, qu'on nomme la Dame du milieu:

Epistre Apologitique.

¹⁴ la bouche ou entree de la matrice, ou amarry, aspre & comme dentelee, ressemblant à la bouche d'une lamproye: ¹⁵ le col de l'amarry: ¹⁶ l'orifice interne, qui est l'entree dans l'amarry: ¹⁷ le fonds & corps de l'amarry, sans aucune distinction de sellules ou logettes. Je taife les testicules, & les aïles qui les soustiennēt, avec les vaisseaux spermatiques: d'autant que ces parties là sont par derriere, cachees à nostre veue, si on ne fend le vètre. Tout le demeurāt est manifeste & voyable en la femme entiere, sans luy faire aucune incision. Le miroir matrical nous les descouure toutes. Et qui en voudra auoir le passe-temps, pour plus grande assurāce de mon dire, ie les luy monstrey volontiers (qu'il me pournoye seulement d'un subiect) cōme ie les ay monstrees publiquement aux escolles de l'Vniuersité en medecine de Paris. Il ne faut dōc pas se mettre en fantasie, que ce soient choses feinctes & controuuees: mais ie cōfesse bien, avec M. IOVBERT, que ie n'entends pas les termes des matrones, & que par cōsequēt ie ne les sçay appliquer aux susdites parties. Ainsi ce sont toutes calomnies, maudictes impostures & detractions, que l'Enuie passe & trāsie a esclacé cōtre ce bō Docteur & maistre, voyāt la grand vogue & depesche qu'auoit son

B iij

Epistre Apologitique.

traicté des Erreurs populaires: lequel a esté imprimé dans six mois, en quatre diuers lieux: sçauoir est, à Bourdeaux, Paris, Lyon, & Auignõ: & en chasque lieu on n'en a tiré moins de seize cens. Ce liure a eu si grande reputation, que n'estant au commencement qu'à dix ou douze sols, il s'est depuis vendu iusques à un escu, voire à quatre francs: tout ainsi qu'en la cherté (espece de famine) le prix du bled se haulte tous les iours. Que plus est, chacun demande aux libraires & imprimeurs, la suite de cest œuvre: & mesmes son auteur est iournellement importuné de remettre le surplus en lumiere, au-moins de cinq en cinq liures (s'il ne veut tout à un coup) suiuant le departement qu'il en a faict: outre ce qu'il promet dauantage. Mais il est si despité, & se ressent tellement des susdictes piqueures, comme il est homme de grand cœur, extremement ialoux de son honneur, qu'il a souuent pensé, ie le sçay bien, de brusler tout ce qu'il en a faict. O quel dommage! Tant y a qu'on ne l'a peu encor fleschir, & faire condescendre à la publication des autres parties: qu'il tient si secrettes & serrees, qu'il n'y a moyen de les voir, ou auoir en simple communication. Car ie m'assure, & il s'en doute bien, que plusieurs entreprendroient fort vo-

Epistre Apologitique.

lontiers de les faire imprimer à la desrobee, sans luy en demander congé. Or voyant ceste sienne resolution (pour ne dire, obstinacion) ie me suis auise de faire imprimer quelques chapitres, que i'auois autres fois eu de luy, m'ayant faict ceste faueur que de m'expliquer certaines propositions, desquelles ie desirois l'intelligence & son auis. Il n'y en ha pas grand nombre, mais la plusspart des chapitres sont fort longs, & contiennet beaucoup de chefs: tellement que qui les voudroit departir par le menu, il n'y en auroit guieres moins de trante. M. IOBERT les auoit trassez, long tams auant qu'il publiast la premiere partie des Erreurs populaires: & sont de certaines matieres, qui ont eté depuis rangees par leur auteur, en la diuision de toute l'œuvre, & generale & particuliere, pour tenir lieu, l'un au septieme liure, l'autre à l'onzieme, dix & settieme, vinttieme, vint & troisieme, vint & cinquieme, vint sisième, & ceus qui s'ansuiuet iniques au trantieme. Ie ne me suis pas autrement soucié de leur ordre, puis qu'on ne peut auoir autre chose pour le presant de leur auteur, ainsi qu'il auoit promis. Il en faut vser cōme d'un mauuais payeur, duquel on prend ce qu'on en peut retirer. Ie me

Epistre Apologitique.

Suis contenté, de faire suivre & observer son orthographe, comme si l'ouvrage sortoit de sa main. A quoy s'est fidellemēt & tresuolōtiers employé Christophle de Beauchastel son neveu: auquel i'ay faict donner pour son vin, autant de doubles escus, qu'il ha doublé de chapitres. Ie scay bien que M. IOVBERT ne serapas content de ce que i'an ay fait, mais i'y ay esté poussé d'une bonne affection & intancion, qui me pourrōt faire trouuer grace auuers luy: mesmemant quand ie l'auray faict, de l'aduis de quelque sien grād amy: & que l'œuure sera bien imprimée à sa fason. Car bien souuāt la circōstance faict, qu'il n'y a point de mal en ce qui de soy et reprochable, cōme on dit, du bon dol. Et pour ce i'ay pansé de vous en cōmuniquer, Mōsieur, vous (di-ie) qui auez credit, & pouuoir d'appaiser ledict sieur IOVBERT, quād il se plaindroit de cette mienne antreprise: d'autant que ie voy biē qu'il vous respecte, reuere, honore & cherist singulieremant: vous etant si amy & seruiteur, qu'il n'en pourra auoir aucun deplaisir, s'il scait que vous l'auiez trouué bon. Ains au cōtraire, il me scaura gré de l'auoir fait, quand il verra que ç'a esté apres vous auoir déclaré mō dessein: ensamble à messieurs de la Roche & de Beau-

Epistre Apologitique.

fort voz treschers freres, messieurs de la Baume, de Mõperoux la verune, de vontais, de Pardilhan, du Moutet, de la Coste, de Brette, de la Bastie: messieurs de Sagnes, Reuol, les deus Girards freres, du Vaure, Alian, Renier, & autres ses amis, qui voyent plus cler an cet affaire que luy, comme ceus qui sont hors du ieu. Et outre ce que ie le decharge par tel moyen, du pansement qu'il en pourroit auoir, ancor ie luy cause ce plaisir, de l'exẽpter & vindiquer des morsures & piqueures de la maudite anuie (qui seule arreste le cours de toute l'œuure, pmise d'un bel ordre] en prenant sur moy toutes les indignations des malins enuieus. I'ay aiouté à cette segõde partie des Erreurs populaires, vn Catalogue de plusieurs diuers propos vulgaires, que i'ay colligé de plusieurs. Et celuy qui m'en ha le plus fourny, pour les cõmuniquer à M. IOVBERT, ç'a esté M. Guillaume Capel, docteur an Medecine de Paris, hõme tres-docte & humain, fort curieus des choses plus gentilles. Je ne doute pas que M. IOVBERT ne recoine de bon cœur ledit Catalogue, ayât inuité to⁹ les lecteurs à luy enuoyer de toutes parts, les fantances vulgaires qui ne sont an son roolle. Ainsi ie le gratifieray au moins de cela, que le luy donne comme pour mon symbole.

Epistre Apologitique.

Monsieur, ie vous supplie tres-humblement
vous tenir prest pour ma deffiance, si par fortune
i'ay à encourir reproche de ceste antreprise:
& me parer de vottre targe, qui et la bonne
grace de M. IOVBERT, lequel aime & esti-
me infinement la vostre. Qu'il sache par vous.
que ie ne l'ay fait sans conseil, & que i'y ay esté
contraint de l'utilité publique: laquelle i'ay pre-
feree à mon plaisir particulier. Car ie le sentoy
bien plus grand, me voyant seul iouyssant &
possesseur de ce fruit. Mais ie l'ay mieus aimé
departir à ceus qui en sont desireus, pour le goust
qu'ils ont prins, à ce que l'auteur en ha luy-mes-
me publié. I'y ay aussi esté inuité, pour auoir de-
quoy faire un presant à Monseigneur de VIL-
LE ROY: auquel ne pouuant rien offrir du
mien, qui fust digne de sa grandeur, i'ay am-
prunté des fruis d'un qui luy est tres-affection-
né seruiteur, & qui n'en sera pas mal content,
(ie m'an asseure) quand il s'en aduifera. Mon-
sieur, ie vous baise les mains, priant Dieu qu'il
vous doint l'accomplissement de voz meilleurs
desirs, en parfaite santé, longue & heureuse vie.
A Paris ce vinttieme de Iannier, mil cinq cens
soixante dix & neuf.



INDICE DES CHA-

PITRES ET MATIERES, CONTE-

*nues an cette segonde partie des Erreurs po-
pulaires, & propos vulgaires.*

i. **Q**U'E l'on se peut & doit souuant passer
du vin : dont il n'est tant necessaire, que
cuide le vulgaire. pag.1.

ii. Contre ceus qui pansent, toute fieure estre
de froid, hor-mis celle qu'on nomme *chaude*.
D'où procede le frisson, & le retour des fieures
terminees. pag.11.

iii. Du morfondement, & l'arfondement : &
commant le peuple s'abuse, cuidant que tous les
maus des trauailleurs (ou la plus-part) soit de
morfondement. pag.22.

iiii. Pourquoy ordonne-l'on de boire du vin
pur, à ceus qui sont fort echauffez : & de pisser
auant que se mettre au repos, quand on ha fort
traualhé. pag.27.

v. Qu'il faut souuant changer de linge aus fe-
bricitans. pag.36.

vi. Que les fames tuent les febricitans d'asti-
nance de boire, abondance de viures, & an-
nuyeuse couuerture Et quel regime il conuient
observer aus febricitans. pag.42.

vii. Contre ceus qui ne permettent aus febrici-
tans, de boire durant leur accez : & les autres,

Indice des chap. & matieres.

qui veulent qu'ils boiuet chaud, pour suer plu-
tost & mieus. pag. 58.

viii. Des boulhons & orge-mondez qu'on ba-
lne à minuit, ou le matin, fort indiscrettement.
pag. 60.

ix. Si c'est mal fait de boire à l'heure du cou-
cher. pag. 66.

x. S'il faut boire aussi chaud qu'on ha le sang,
mairmement an æté: & s'il et mauuais de raffrai-
chir le vin. pag. 71.

xi. Contre ceus qui se plaignet an æté de la cha-
leur des nuis, & ce pendant ils couchet sur la
plume, les fenestres fermees. pag. 76.

xii. Que les boudins ne valet rien gardez: &
que de là et venue la coutume d'an faire des
presans. pag. 80.

xiii. Contre ceus qui craignet par trop la sai-
gnee, & ont opinion que la premiere sauue la
vie. pag. 84.

xiii. Qu'on peut saigner les fames grosses, les
ansans, & les vieus. pag. 92.

xv. Contre ceus qui temerairement & trop sou-
uant vsent de la saignee. pag. 99.

xv. Que la purgacion peut conuenir à toute
saison, voire durant les iours caniculiers. pag.
103.

xvii. Commant il se faut gouuerner le iour que
on prand medecine. Si on peut dormir apres.
De l'heure du boulhon lauatif. Des repas qui
conuiennet à ce iours-là. Et pourquoy on ne

Indice des chap. & matieres.

doit sortir de la chambre. pag. 109.

xviii. D'où auient communement, que les plus
cheris meurent le plus souuant. pag. 124.

xix. Contre ceus qui disent, que mort ne fut ia-
mais sans regret. pag. 128.

xx. Contre ceus, qui pour auoir le ventre lache,
marchent piés nus sur vn lieu froid, ou boinet de
l'huile en quantité : & qu'et-ce qu'auoir bon
ventre. pag. 131.

xxi. Sauoir-mon, si les huitres & les truffes ran-
det l'homme plus galhard à l'acte Venerien.
pag. 135.

xxii. Contre ceus qui iugent de la suffisance des
medecins, par le succez, qui et deu souuant à
l'heur, plus qu'au sauoir. pag. 145.

xxiii. Que le vulgaire n'estime rien, si on ne
guerit contre son opinion : que les derniers
remedes ont tout l'honneur, & bien-heureus
le medecin qui vient à la declinacion du mal.
pag. 147.

xxiiii. Des importuns & soupsonneus, qui ca-
lomniet les procedures du medecin. Des outre-
cuidez & presumptueus, dangereux aupres de
vn malade. pag. 151.

xxv. Que ce n'est le profit des malades, d'auoir
plusieurs medecins d'ordinaire. pag. 157.

R A M A S de propos vulgaires & Erreurs
populaires, avec quelques problemes, enuoyez
de plusieurs à M. I O V B E R T. pag. 159.

E X P L I C A T I O N de quelques phrases &

Indice des chap. & matieres.

mots vulgaires, touchant les maladies principales.	pag. 191.
Fleurs, Flus, flus Menstrual, Mois, Menstrues, Perdemant, Rhodais, Chemise, Doit avoir, cas, Malade, Male semaine, Tams, Cardinal, Marquis.	pag. 191.
Auorter, affouler, bleffer, dessarrier, gaster.	pag. 193.
Des uerdiat, des-antourat, des-ourat.	pag. 194.
Retalhat.	pag. 195.
Mal de Maire.	pag. 196.
Dysanterie, Eprenfas, Seintegne, Cague sangue.	pag. 196.
Nephritique, Phrenetique, Colique vanteuse, nephritique & pierreuse.	pag. 197.
Colique, Mascion, colique d'estomach.	pag. 198.
Goutte, Dessante, Rheume, Catarrhe, Goutte naturelle.	pag. 199.
Sciatique.	pag. 199.
Squinance, Morceau d'Adam.	pag. 200.
<i>Noli me tangere.</i>	pag. 200.
Saigner du nez.	pag. 201.
Migraine.	pag. 201.
Lunatic, & tenir de la Lune.	pag. 202.
Mal caduc, Mau de terre, Mal S. Ian, Mau de las passeras, Haut-mal.	pag. 203.
Mau-loubet.	pag. 204.
La male bosse.	pag. 204.
Escannar.	pag. 205.
Aualisque,	

Indice des chap.& matieres.

Aualisque, Euanouyr, Spasme, Palmaison. pag.
205

Deiuner, Boire, Refsiner, Gouter, Soupper.
pag. 206.

Grasse matinee. pag.207.

Panfer vn malade. pag.208.

Remedes Metaphoriques & extrauagans. pag.
209.

Pour la multiplication de semance, & la fecon-
dité. pag.209.

Pour anfanter plus aisement, & pour ampecher
l'auortiffement. pag.211.

Pour rompre la pierre dans le cors. pag.212.

Contraire à la memoire. pag.224.

Des remedes superstitieus ou vains, & cerimo-
nieus. 214

Pour arreter tout flus de sang. pag.215.

Contre la iaunisse. pag.216.

Contre la goutte grampe. pag.216.

Pour faire sortir plu-toit les dans aus petis an-
fans. pag.216.

Pour ne vomir point sur mer. pag.216.

A faire perdre le lait. pag.216.

Contre toute fieure. pag.217.

Contre la fieure quarte. pag.17.

Pour faire perdre les verruës. pag.217.

Pour guerir de l'hydropisie. pag.218.

Contre le masclon. pag.218.

Contre le mal de maire. pag.218.

Coniuracion de l'amarry. pag.218.

C

Erreurs populaires

P ^R OPOS FABVLEVS.	pag. 219.
De la vipere.	pag. 222.
Du Bieure, dit Castor.	pag. 224.
De la Salamandre.	pag. 224.
De l'Ours.	pag. 226.
Deus Paradoxes de M. Ioubert, traduits par Isaac son fis.	

Quelles poisons ne peuent estre balhees
à certain iour, ne faire mourir à certain tams.
pag. 229.

Qu'il y a raison, que quelques vns puissent
viure sans manger, durant plusieurs iours & an-
nees. pag. 244.

CATALOGVE DE PLUSIEURS
diuers propos vulgaires, & erreurs populaires,
colligez de plusieurs, & donnez à M.
IOUBERT, par M. Barthe-
lemy Cabrol.

1. Souppe deuant & souppe apres, fait viure
l'homme sans ans, ou pres.
2. Quand la feulhe monte & retombe, l'hom-
me aussi tombe & retombe.
3. Il ne se garde pas bien, qui ne se garde tou-
iours.
4. Les gourmans font leur fosse à belles dans.
5. Il faut mourir avec son sang.
6. Boire apres sa souppe, fait voir trouble.
7. Il conuient donner à boire à ceus qui ont le

& propos vulgaires.

poumon roty, de peur que la chair ne tienne au pot.

8. Bien venant, bien getant. Il vaud mieus fourmage, que boullie.

9. Homme gouteus, fine d'argeant.

10. D'un pauvre sang il an faut plus titer.

11. Hachis, geles, & perdris, font ecarlate d'estomach.

12. Ians delicats, font le pont aus anes de santé.

13. Fame maigre, tauerne de sang.

14. Le serain epais angeandre catarrhes.

15. Il n'est que vielhe filhe, pour faire force anfans.

16. Ni an froid, ni an chaud, tirer du sang il ne faud.

17. Dormir sur la boullie, angraisse les anfans:
& andormir sur le tetin, les fait euelher matin;
& dormir sur lait, c'est souhair.

18. Clystere de lait nul mal ne fait.

19. Le iour de la medecine et vne grand' feste:
car il faut iuner la veille.]

20. Vn œuf frais nettoye le cœur.

21. Gateau, charge d'estomach: & vinaigre, an-
nemy de Nature.

22. An flus de vautre, ne faut que l'eau y an-
tre.

23. Qui boit verjus, pisse vinaigre.

24. Mal de cœur, veut dormir.

25. Les piés chaus, & la teste, au demeurant vi-
uez en beste.

Erreurs populaires

26. Les maladies anique, font aus medecins la nique.
27. S'il est vray, qu'un ladre ne sante rien : & qu'il ait force sang.
28. S'il et vray, que les reuerances fort basses & contraintes, avec la compression du cors, sont cause de la gibbosité à plusieurs filhes : & que les ansans l'ayet plus du coute droit, à cause des nourrices.
29. Qu'il n'et pas bon, de tenir longuemant les ansans bandez & garroutez dedans leurs langues, & sur tout an aré: que cela les peut randre suiets à la pierre, & autres maus.
30. Que l'impaciance des malades, rand quelque fois les maladies longues, & quelquefois mortelles.
31. D'où vient que la continuacion du poisson, et plus facheuse, que de la chair.
32. Pourquoi dir-on, les apostemes sont apozemes?
33. Si c'et bien dit, que de prandre tous les iours chemise blanche, amaigrit: & le filer des fames, & l'usage d'huile de nois..
34. S'il et vray, que d'etre souuant rond, & fort raiz, on et plu-tost chenu, & le poil an deuient plus epais.
35. Contre ceus qui tiennet, que le cœur croit d'une dragme tous les ans, iusques au cinquantieme: & que puis il decroit.
36. S'il est vray, que des gemeaus l'un et inepte

& propos vulgaires.

à angeandrer : & samblablement des gemelles,
l'une et inepte à concevoir : & si les gemeaus
n'an peuvent faire d'autres.

37. Et-il vray, que les enfans nais à set mois, ou
autrement avant leur terme, sont toujours ma-
lades, & an dangier de mourir, iusques à tant
qu'ils ayent attaind le terme qu'ils deuoient se-
journer dans le ventre.

38. Et-il vray, que les enfans de set mois, naissent
sans ongles : & ceus desquels la maire grosse ha
mangé force sel.

39. Si se peigner le Vandredy, fait mal de taite:
& si c'est mal-heur de prandre chemise blanche
ce iour là.

40. Le Vandredy et le plus beau, ou le plus laid
iour de toute la semaine: & iamais ne fut Same-
dy qu'on ne vit le Soleil.

41. D'où vient qu'une piece de fer, ou de verre
mise parmy le charbon ardent, ampeche d'an-
lourdir la taite?

42. Pourquoi et-ce que tous enfans sont nains:
c'est à dire, cours de bras & de iambes, à pro-
portion du cors?

43. D'où vient que la tous s'emeur', si on tou-
che vn peu avant le dedans de l'oreille : & l'e-
ternuement, si on pique le nez?

44. Pourquoi se moutret plus grans, ceus qui
releuent d'une grand' maladie: mame ayant fait
grand' abstinence?

45. Contre ceus qui estiment, que c'est sine de

Erreurs populaires

santé, d'auoir froid apres le repas.

46. Comment peut causer des opilations, l'etre fort serré de cors.

47. D'où vient que la culiere de fer ampeche les pois & le rys de cuire.

48. Qui nourrit plus, la chair froide, ou la chaude?

49. Peut-on ouyr crier l'enfant, dez le vautre de sa maire?

50. Pourquoy et estimé mauuais le lait calhé dans l'estomach, veu que l'on digere bien le calhé & le fourmage?

51. Et il vray, qu'une heure de dormir auant minuit, vaud mieus que trois apres?

52. Qui veut etre long tams vieux, faut qu'il commence de bonne heure.

53. Assez fait qui rien ne fait, ez maladies perilleuses.

54. La medecine, & la guerre, se font à l'œil.

55. Pourquoy dit-on que les beueurs d'eau n'ont iamais besoin des piés d'autrui?

56. Pourquoy dit on, que le vin et de melancholie leuain?

57. De guerir auoir volonté, et partie de la santé.

58. Où il y ha & ieunesse & richesse, là il y ha maladie à largesse.

59. Et il vray que durant la famine commune on ait plus de faim, qu'an autre saison, ia-soit que particulieremant on n'ait faute de viures?

& propos vulgaires.

60. Contre ceus qui conseilhet & ordonnet l'acte venerien, contre la grauelle, pierre, & autres maus de reins.

61. S'il y a raison de dire, qu'il ne faut verser de l'eau, an la chambre de celuy, qu'on ha talhé pour la pierre.

62. Commant vne fame peut viure sans matrice, aussi bien qu'un homme sans mentule & genitoires.

63. Du grand abus que l'on commet, an l'absurde vsage de la Mumie faussement appelée.

64. Que les myrobolans ne sont de telle, ne si excellante vertu, que le vulgaire les estime.

65. S'il est bon, que les enfans commencent bien-tost à manger du pain bouilly, de la souppe, de la chair, & autres viandes solides.

66. Quelle chair rotie et plus saine, & plus fauoreuse, lardee, bardee, flambee, ou graissée?

67. Douù vient, que les beuueurs d'eaus sont grans mangeurs?

68. S'il est possible de cognoitre par la couleur, saueur, tenacité, ou autres qualitez manifestes, que la terre lemmie & sellée, soit legitime & bonne.

69. Et-il vray, ce que plusieurs fames soutiennent, que la saignée du iarret fait plus rude la peau, & le teind plus grossier?

70. Que la cōsequāce n'est pas certaine, du foye chaud l'estomach froid: & qu'on accuse sou- uant à tort le foye, d'estre chaud intamperemāt.

C^e iiij

Erreurs populaires

71. Contre ceus qui iugēt estre fine de grand^r santé, de ne cracher, ou moucher point.
72. Qui et melheur contre le rheume & catar-
rhe, de coucher haut ou bas de teste?
73. Erreur de ceus qui disēt, le medecin deuoir
tout au malade, & le malade au medecin rien
qu'vn peu d'argent.
74. Pourquoi dit-on, qu'vn bon medecin et
roujours mauuais, & vn bon homme est mau-
uais medecin?
75. D'oū vient que ceus guerisset plus aisement,
de leurs playes, vlceres, ou autres maladies, des-
quels les taches des linceus ou autres linges
s'efacet aisement à la lexine?
76. Etant vn maimē passage des viandes & des
breuuages, vn maimē receptacle, & vne maimē
raison ou cause du gout d'iceus, d'oū vient que
on trouue communement melheur le brouēt
chaud, & le boire frais: & tant des chairs que
des fruis, les vns sont trouuez melheurs chaus,
les autres frois.
77. Comment peut le salpetre raffraichir l'eau,
veu qu'il et chaud, & aisement se conuertit an
feu?
78. D'oū vient, que sur la mer on ha si grand ap-
petit?
79. S'il et vray, qu'vn clystere laxatif puisse ex-
citer au coīt s'ce que plusieurs disēt auoir fanty
quelque fois?
80. Comment les pucelles peuuet estre suiettes

& Propos vulgaires.

au mal de maire, voire auant leur puberté.

81. Que plusieurs gouuernent beaucoup mieus leurs cheuaus, que leurs personnes, dont c'est bien dit, qui veut viure sainement, ait pour soy tel pansmant, que de son cheual ou iument.

82. Si les palles couleurs des filhes sont contagieuses, & qu'une autre les puisse prandre, pour coucher ou se bangner ansamble.

83. Qu'un estomach debile & froid portera mieus l'eau pure, que le vin verd ou aigre.

84. Pourquoi dit on, que le mouton nous fait anuiellir sur toutes viandes: & que le fromage nous an garde?

85. S'il est vray, que les aigrais ou verins pochés an l'œil esclarcissent la veue?

86. Que c'est bien dit, qu'il ne faut toucher aus yeus & au nez malades, que du coude.

87. Contre ceus qui croyet, la douleur de dās reuenir plus forte qu'au parauant, si on iette au feu la dant arrachee: ou que l'on mette sur le sang qu'on an ha randu, de la braise ou des sandres chaudes.

88. Que les choses grasses n'engraissent pas, cōme l'on panse.

89. D'où vient que d'une poulalhe noyré, le boulhon an est plus blanc? & d'une chieure noire le lait an est meilleur?

90. Pourquoi est ce, que les personnes blanches sont plus delicates?

91. Qui est plus sain, l'huile ou le beurre?

Erreurs populaires.

92. Pourquoy dit on, que le feu et bon an tout tams : & s'il et sain de se chauffer?
93. Pourquoy dit on , faire iambes de vin : & que les cheuaus an vont mieus, quand les cheuaucheurs ont bien beu.
94. D'où viét qu'on pese plus à iun, que apres le repas, & mort que vif?
95. Si c'et etre bon compaignon , que d'auoir toujours vn boyau vuide pour ses amys.
96. S'il et vray , que le coît soit dangereux , au coît de la Lune.
97. Et-il vray , que les gras & les bossus viuet moins que les autres , & ceus qui ont les dans cler semees, & les genous pointus?
98. Et-il vray, que morte la baite, son venin et mort aussi?
99. D'où vient , que les petits sont commune-
mant plus coleres que les grans, & ont volon-
tiers plus d'esprit?
100. Si la fumee de la chädelle ou lampe etain-
te fait deuenir ladre : & si elle peut faire auor-
ter vne fame.
101. D'où vient que l'eau du puis deuient mel-
heure, si on y iette des petis poissons?
102. S'il et possible, que l'homme exerce l'acte
venerien, dans le bain chaud ou froid : & que
la fame consoiue du bain auquel l'homme ayt
spermatifé.
103. Et ce bon fine , quād vn malade s'amaigrit
fort, & dez le commancement de sa maladie?

& propos vulgaires.

104. Peut on cognoitre, si vn homme et puceau?

105. Et-il vray, que si vne fame anceinte porte vn anfant à baptême, bien tost mourra, ou cet anfant, ou celuy qu'elle ha dans le ventre?

106. Si celle qui ha fait des gemeaus, peut guerir de la desnouëure, comme l'on dit: & si le settieme anfant male guerit des ecruelles, tant qu'il et puceau.

107. D'où vient, que les vns se portet mieus an hyuer, les autres an æté: & quel'on engraisse plus an hyuer?

108. Pourquoy et ce, que d'auoir bù, on chante mieus?

109. S'il et vray, que l'argeant & le pain ne donet ou apportet iamais la peste.

110. Qui bien mange, fiante & dort, ne doit auoir peur de la mort.

111. Des Polognois malades, voire à l'extremité, qui se leuet & vestet, à l'heure que les medcins les doiuet visiter.

112. Si les bouches anleuees, ou antamees, denotet que le mal s'an va.

113. Pourquoy et ce, que communement chacun obserue ce qu'il ha mouché, & nompas les autres excremans: si ce n'et parauanture quel que melancolique?

114. Par où faut il antamer l'œuf par la pointe, le gros bout, ou le milieu?

Erreurs populaires

115. Faut-il boire à chaque œuf vne fois, ou d'auantage?
116. Et-il plus sain, de se faire tondre le premier Mardy de Mars, qu'un autre iour dudit mois, ou d'un autre mois.
117. Qui moins en fait, trompe son cōpagnon.
118. On ne s'anyure pas volontiers de son vin.
119. Qui peu mange, prou mange : & qui prou mange, peu mange.
120. Commant se peut on morfondre par les yeus, par le nez, la bouche, & les orelhes.
121. S'il et vray, que ceus qui ont eté talhés à cause de l'hernie, ne peuuet depuis angeandrer.
122. Pourquoi dit on, qui ne peut manger qu'il boyue.
123. Et-il vray, que les bains naturels ne valet rien, ou qu'ils sont dommageables, à ceus qui ont u la verolle.

& propos vulgaires.

CATALANS.

- Q** Vi mingeo porc, mingeo sa mort,
2. Dono e capon, es rouiours de seson.
3. Qui non ha lou ventre dur, non pot dormir segur.
4. Entre la merdo, & lou pis, se nourris lou bel fils.
5. Non fais iamaïs Kion, de ta bouco.
6. Assais fay, qui ren non fay.
7. Qui non flouris, non grano.
8. Qui se vay dormir en sed, se leuo en santad.
9. En lun, & en iulhet, ne fenno ne caulet.

ESPAGNOLS.

Vna a Zeintuna es de oro, la dos es de plata, la terZera es de plomo, la quarta es de hierro.

ITALIENS.

1. Salata ben salata, poco aceto, & ben ogliata.
2. Vesti caldo, mangia poco, beue assai, & viueray.
3. Vegliar à la luna, & dormir al sole, non fa ne pro ne honore.
4. Per tutto April, no te discuprir.
5. Da sancto Luca, metti la man in bocca.
6. Bon vino, cattina testa, & fauola longa.
7. Vin di fiasco, la matina buono, la sera guasto.
8. El pesce guasta l'acqua, la carne l'acconcia.
9. Chi non se gouuerna un anno, e cinque anni dapoï senZa allegressa.

Erreurs populaires

10. Chi mal cena, peg gio inghiotisse.
11. Chi non fa come fa l'occa, la sua vita é triste & poca.
12. Frommag gio, pere, & pan, sonno pasto da vilan: frommag gio, pan & pere, son pasto da canagliere.
13. Bisogna vn matto, e vn sauo, a tagliar del frommag gio.
14. El pan sutto, fa diuentar muto.
15. El vino à la sauer, & il pan al color.
16. Chi mangia el cauolo, e lascia il brodo, piglia il cattiuo, e lascia il buono.
17. Tre cose buone fa la Zouppa: fa patire, fa dormire, & fa la gangia rossa.
18. Chi vuol esser bene vna settimana, laui se la testa: chi vn mese, ama l'el porco: chi vn anno, tolga moglie: chi sempre mai, si faccia prete.
19. A mal mortal ne medico, ne medicina val.
20. Ad ogni cosa remedio, excetto a la morte.
21. Chi va piano, va sano: & chi e sano, va lontano.
22. La mano al petto, la gamba al letto.
23. El mag gior fastidio ch'habbia vn vecchio, é di non cagar tenero.
24. Chi va al letto senZa cena, tutta la notte si dimena.
25. Vn pasto buono, vn triste, e vn meZano, mantiene l'huomo sano.
26. Chi fa quel fatto troppo, scola i fageoli: & chi nol fa, non ha figliuoli.
27. Chi lo fa quanto ei puol, nol fa quando ei vuol: & chi piu lo fa, manco lo fa.

& propos vulgaires.

28. Chi mangia carne e pesce, la vita gli rincresce.

29. Vino amaro, tien lo caro.

30. A tavola non s'invecchia.

L A T I N S.

1. A pane biscocto, à medico indocto, à fulgure & tem-
pestate, defende nos Domine.

2. Caseus laudatur non albus, nec argus, nec Magdale-
nus.

3. Ala mala, coxa noxa, cropion dubium, collum remo-
ta pelle bonum.

4. Vinum lymphatum, citò potatum, generat lepram.

5. Summa medicina est, nunquam uti medicina.

6. De casco barcam, de pane bartolomaam.



L'IMPRIMEUR AV
LECTEUR DE
bonn' ame.

AM Y Lecteur, ie dois bien estre excusé enuers toy,
attendu ma bonne volonté, si i'ay en plusieurs en-
droits fallly contre l'orthographie de M. IOBERT,
d'autant qu'elle m'ha esté fort nouvelle à ceste foys, &
difficile à imiter. Dequoy iet'ay bien voulu aduertir,
affin que tu n'imputes à l'auteur, quelque deffaut en
l'observation de ses reigles, ou de n'estre par tout sem-
blable à soy. l'espere de faire mieux vne autre fois, si
i'ay cest hōneur d'imprimer encores de ses œuvres Fran-
oises: te priant ce pendant de corriger toymesme les
fautes plus notables, & qui peuent troubler le sens
(lesquelles me sont eschappees) comme s'ensuit.

ADVERTIS-



ADVERTISEMENT SVR
L'ORTHOGRAPHIE DE
M. IOBERT.



L retriéche tant qu'il peut toutes
tes lettres superflues: c'est à dire,
celles qui ne sont prononcées au
langage François: entendant par
François, nompas toutes les lan-
gues auxquelles commande le très-Chrestien
Roy de France (à qui Dieu doit bonne vie
& longue) ains la Courtisane, ou des lieux es-
quels on parle mieus. Car lesdites lettres ne
sont poit superflues en quelques prouinces du
grand Royanne de France, qui les prononcēt
en leur parler vernacule. Exemple, le, *E*, super-
flu en ces mots *Lienē & Eane*, pour dire *lien*, ou
liē, & *eau*, est bien prononcé en Poiteuin. Le, *s*,
qui est superflu an dis mille mots François, et
prononcé en Gascon, Languedogeois, & Pro-
uensal. Ainsi presque de toutes lettres que le
François omet & taïse en son parler, vous les
oyez prononcer en diuerses prouinces de ce
Royaume. Là où *G*, doit sonner, comme *I*, con-
sonante, deuant vn *A*, ou vn *O*, il entremet vn
E, ou il écrit le mot par vn *j* longuet, signifiant
consone. De cetuy-cy, vous en auez l'exem-
ple au mot *jans*, au lieu de *gens*: affin que s'il e-

D

criuoit *geans*, comme il escrit *mangeans*, on n'en-
tédit les grans hōmes dits *gigantes* en Latin. On
ne trouuera pas estrange qu'il escriue *mangeoit*,
mot dissyllabe, veu que tous escriuet *George*,
aussi de deus syllabes où le *E* n'est point ouy.
Il escriroit bien *manjoit* par j long & conso-
nant: mais on pourroit equiuocquer, & pren-
dre ce mot pour celuy qui signifie tenir en
main, ou toucher de la main. Il escrit par *lh* les
mots esquels on prononce *L* liquide, comme
fil y auoit *li*. Exemple *filhe*, *galharde*, comme
fil y auoit *filie*, *galiarde*: mais il ne faut faire que
vne syllabe du *ie* & *ia*. Ce que l'etranger ne
comprendra si bien, que d'estre vne fois auer-
ty, que *lh* & vne *l* liquide ou coulāt, tout ainsi
que s'il y auoit vn *l* apres. Il faict escrire *forz*,
con, *men*, *sou* (au lieu de *fol*, *col*, *mol*, *saul*) ainsi
qu'on les prononce. Il retrenche les *N* des
tierces personnes plurielles *tiennent*, *dirent*, *furent*:
& tant d'autres, come on peut voir en l'Apo-
logie de son orthographie cōposée par ses an-
fans. En quoy certainement il y a grand' epar-
gne de lettres: & par consequent profit à la
Republique, entant que les liures imprimez
de cette façon, seront à meilleur marché, au-
moins de la dixieme part. Car il y a bien au-
tant de lettres rabbatuës. Ce qui est fort confi-
derable, attēdu la multiplicité des liures qu'on
ha pour le iourd'huy, par benefice de l'Impri-
merie: lesquels il seroit bon de reduire en plus

petit volume, & imprimer en moins de lettres
qu'on pourroit, voire qu'une signifiast tout un
mot, ou une sentence: à l'imitation des lettres
Hieroglyphiques des Ægyptiens (chose bien
inuétée) afin qu'on en peust iouyr à meilleur
marché. Outre ce, qu'un gros liure deplaist, &
donne pensément à celuy qui en desire la le-
cture: car on n'a pas plu-tost commencé un
liure, qu'on en voudroit voir la fin. Vous ver-
rez bien d'autres raisons en la suditte Apolo-
gie(œuure non moins vtile, que gentile & de-
lectable) & en la declaration des abus que l'on
commet en escriuant, mise en lumiere par tres-
excellent personnage, maistre Honorat Ram-
baud, homme tresdigne de louange immor-
telle, pour l'extreme desir & ardente affection
qu'il a de profiter au Public, plus sans compa-
raison qu'à son particulier. Son liure est nou-
uellement imprimé à Lyon, par Ian de Tour-
nes. Quand M. IOVBERT en parle, il dit qu'on
ne le pourroit assez estimer: tant est de bonne
grace, & preignant de raison le discours de ce
bon homme, lequel il cognoit familièrement
& aime extremement.

Maius Io captas nostris IOBERTE camænis,
Io triumphe, fas Io.

Aur (clari soboles patris) è stige Maona solue,
Aur monstra clauâ figere

Desine: vel fuerit tantis ingrata tropais
Nostræ camæna seculi.

Monstra quidem Alcides stupido metuenda popello,
Partu deorum discidit.

Monstra sed errorum tu Coa cuspide scindis,
Turba timenda Delphica.

Ergo tuis ut Io par sit IOBERTE triumphis,
Emitte Plutus è fauis

Maonidem: patris solium vel Apollinis, aulans
Stellis coruscant scandito.

IO. EDOARDVS de Monin, Burg.

Κενροπίδας νοσέοντες ἰδὼν ἐπιδήμιον ἄλγος.
Ἐξέσῳσε καὶ Κεῶς Ἱπποκράτης.
Ἀγνοίῳ νοσέοντες ἰδὼν ἐπιδήμιον ἡμᾶς,
Σῶσεν ἸΟΥΒΕΡΤΟΥ Δεύτερος Ἱπποκράτης.

ἸΟΥΝ ΠΥ ΖΗΓΛΑΝΣ.

Illudit miseris varius mortalibus error:
Et nullum errores non genus artis habet.
Sed non quàm medica, damnosior error in arte:
Vnde salus doctis, mors rudibusque venit.
Non ducis indocti duplex datur error in armis:
Cui semel erranti tota caterua perit.
Non sibi commisso medicus bis aberrat in agro.
Errorem cuius mors aliena luit.
Ergò magna tuis, decus ô IOBERTE medentium,
Gratia debetur tempus in omne libris.
Qui non contentus præcepta docere medendi,
Quæ schola doctorum, Regis & aula prober:
Errores etiam, quos ignorantia vanis
Inuexit populis in sua damna, doces.
Quod pietas est si qua viam monstrare vaganti,
Quam pius arte tua est vita tuenda labor.

IO. AVRATVS Poëta Regius.

D iij

Chacun monstre sa faute, un monstre à faire
mieux.

Infinis sont de mal, un chemin de bien faire.

De IOVERT & l'aui, & l'exemple à mieux
faire,

Tance de faire mal, apprend de faire mieux.

C'est bien faire, auertir l'egaré d'aller mieux.

Le remettre au chemin, est encore mieux faire.

Auier l'homme cheu de sa cheute, est bien faire:

Et luy tendre la main, est faire encore mieux.

Tant de lampes estaindre, Apollon n'a que faire,

Menteuses & couleurs, apries de les faire

Pallir aux yeux trompe, sinon qu'il luyse mieux.

En vain l'homme deffend, & reprend de mal-faire,

Sinõ qu'en faisant mieux, il enseigne à mieux faire.

Bien faict qui bien reprend, & mieux faict qui faict
mieux.

D V P E R R O N.

tre à fure

ve.

le à mieu

lur.

u fait.

u.

u.

u.

u.

u.

u.

u.



Le peintre & le graveur representent fort bien
De ta face les traits : mais tu sçais encor mieux
Par ta plume exprimer & mettre sous noz yeux
L'image de ton ame, où il ne manque rien.

I. GVICHARD. DOCT. MED. DE MOÏP.



LA SECONDE PARTIE
DES ERREURS POPVLAI-
RES, ET PROPOS VVL-
gaires, touchant la Mede-
cine, & le regime
de santé.

PREMIER CHAPITRE.

*Que l'on se peut & doit souuent passer du vin : dont il
n'est tant necessaire, que cuide le vulgaire.*

SANS doute le vin est
tres-bon alimât, qui non
seulement angeandre de
soy beaucoup de sang,
ains aussi fait mieus dige-
rer les autres viures, re-
uient tost les esprits, susci-
te la chaleur naturelle, &
luy donne vigueur, antretient l'humeur radi-
cal, epurge les excremans liquides par sueurs
& vrines, dissipant an fumee les plus subtils,

qu'on nomme fuligineus. Bref il est infinimât profitable, à qui an vse moderement & à propos. Mais si on abuse de sa bonté, an le prenât plus pour plaisir, que par necessité, Il fait tout le contraire, engendrant mille maus au cors & à l'esprit: qui ont pour leurs causes prochaines, des crudités, phlegmes, froideurs, opilacions, & autres indispositions totalement contraires aus qualites du vin. L'experiance le demontre suffisamment, quand nous voyons que les yurognes sont fort sujets à catarrhes, mal caduc, apoplexie, subeth, stupeur, paralysie, trablemant, gouttes froides, hydropisies, & samblables. Il faut donc vser du vin avec discretion, accommodant le naturel de ses proprietes, au besoin que nous en auôs: Et premierement les ansans qui sont bien nés, an doiuent abstenir, parce qu'ils ont naturellement si grâd chaleur & humidité qu'on ne leur peut augmenter ces qualitez, sans euidant preiudice de leur santé. Outre ce que le vin ramplit fort la teste de vapeurs: dont eschaufant leur ceruelle bouilhante, il andommage leur esprit. Passez les dis & huit ans, le vin est permis an bien petite quantité, & plus aus filhes qu'aux garçons, contre l'opinion vulgaire: & il le faut augmenter de peu à peu, iusques au quarantieme an. Je dis de peu à peu: car autrement il trouble l'antandement, & l'elourdit ou rand furieux, prouoquant la ieunesse à cholere, luxu-

Chap. premier.

3

re, & toute lasciueté. Aus vielhars il est fort propre, & leur est comme le lait aus anfans. Mesme Platon (diuin philosophe) disoit, que Dieu l'auoit donné aus hommes, pour remede contre l'apreté de la vielhesse, medecine bien salutaire. Car il les fait raieunir, hoblier les ennuis, soucis, soupçons, & chagrins, les randant plus maniables an remolissant leur rude & dure condicion: tout ainsi que le feu attandrit & rand malliable le fer. De ce propos on peut antandre que le vin n'est pas tant necessaire, que plusieurs ne s'an puissent bien passer, non seulement estans malades, ains aussi an pleine santé. Car aus complexions chaudes nommé-mant & aus ages de mesme, il est nuisant: parce qu'il augmante leur chaleur outre sa deuë proportion, an danger d'y mettre le feu, qui brulera tout l'edifice. Mais laissant à part telles raisons, leueus montrer par vne anquete, que l'on vit commodement, sainement, & longuement, voire an tout age, an tout lieu & toute saison, avec l'abstinence du vin. Le monde est d'anciëneté diuisé an trois parties (au iourd'huy on y aipute la quatrieme, & la cinquieme) desquelles l'Europe que nous habitons est selon les Cosmographes, si petite à l'egard des autres parties, que si tout le monde n'estoit qu'une cité, cōme Paris, l'Europe de sa part n'y auroit qu'une maison ou deus: l'Asie, l'Afrique & l'Amérique se partiroidnt le reste. Or ce peu de

terroir, et l'endroit où il se boit plus de vin. Car aus autres pays, où il n'y croit point de vignes, où les ians s'abstienet de ce breuuage) si ce n'est à cachettes) par l'ordonnance de Mahōmet: duquel la secte ha prins telle etandue, que les Chretiens ne sont qu'une poignée de ians, comparés à si grande troupe. An sont ils plus mal sains, foibles ou delicats? Non: ains au contraire, nous admirons leur force. Ne dit on pas Il est fort comme un Turc? Quant à l'agilité, adresse, viuacité, & autres vertus corporelles, ils ne cedet point aus Chretiens, s'ils n'an amportet le pris, outre ce qu'ils viuēt sainement, & paruienet à grand' vieillesse. Si on dit, que l'Afrique & l'Amerique sont pays trop chaus pour l'usage du vin, mais que aus lieux frois ou tamperés, on ne peut bien viure sans tel breuuage: ie repondray qu'une part de l'Asie et egallement temperee, & sous le melheur climat de l'opinion des plus renommés Geographes. Ce qui est vers le Septentrion, gele de froid: ce neantmoins le vin par tout est incognu, & par tout on vit commodement. Que dirons nous, si an notre Europe Chretienne aussi, on trouue infinies personnes qui n'an beurent iamais? & d'autres qui n'en boyuet guieres souuant, comme ez pays Septentrionaus & frois, où il ne s'an recueilt point: & apporté d'alheurs, il est si cher, que les pauvres ians n'en tatet sinon les bonnes festes? car leur or-

Chap.^r premier.

5

dinaire et de l'eau pure, ou de la biere, ceruoise, citre, poyré, poimé, & autres breuuages artificiellement préparés de grains, ou de fruis. Ils ne viuent pas moins pour cela que les riches: ils sont autant sains & galhars, sauf le plus. An noz montagnes (i'antans de celles qui sont vn peu loin des coutaus & des plaines qui produiset le vin) les pauvres ne boiuet que de l'eau pure, & si viuet plus longuement, etans moins souuant malades, que ceus du bon pays: auquel se trouuet encores plusieurs qui, ou de natiuité hayssent le vin, & l'abhorret estrange-ment, ou qui l'ont depuis quitté de leur gré, ayans egard à leur santé? comme pour euitier les rheumes, catarrhes & gouttes. Tellement que si nous colligeons de cette diuision, le nōbre des vin-beueurs, nous le trouuerōs si petit, que du monde party an mille, à peine les dis an seront. On n'oit pas dire pourtant, que nous viuions plus long tams, ou plus sainemāt à tout notre vin, que les autres des régiōs plus chaudes, plus froides, ou tamperees. Ce neantmoins le vulgaire ignorant, & sur tout le pay-
sant, ha telle affection au vin, que sans luy il ne panseroit viure. Sain & malade il an veut toujours, meme etant malade de fieure ardante. Si on le luy defand, per ce qu'il augmente euidamment la brulante chaleur, & redouble l'excessiue alteracion, la douleur de tete & des reins, mettant le patient au dangier de frene-

fic, il a opinion qu'on le veut mettre bas & affoiblir à ce que le mal dure plus longuement. Ces pauvres gens cuidet parfaitement que le seul vin soutiét toute la force. Dõt pour chasser la maladie, ils cherchet à boire du meilleur: Il me souvient d'auoir pansé y a vint & cinq ans, vn jantilhomme pres Aubenas an Viua-rez, qui me vouloit prouuer, que luy ayant grand'fieure & continue, à raison d'vne vraye pleuresie, n'en deuoit abstenir: disant que le Vin ha prins son nom de Vie, comme s'il estoit de son essance. Et quand i'auoys refuté cela, il me repliquoit ainsi: Commant est-il possible, que le vin, si bon & gracieux à toutes personnes, iusques aus plus incognus, fit mal à moy qui toute ma vie l'ay aymé & caressé extremement? Ne seroit-il pas bien mechât, & non pas bon, comme chacun l'estime? Voila les beaux propos que tienet les plus abilles d'entre les idiots, qui ne suiuet qu'vn appetit sansuel & brutal. Les autres cuidet simplemant de faire leur profit, n'etans emeus d'aucune volupté, non pas memes trouuans pour lors bon gout au vin, non plus qu'à vne medecine: dont ils meritet de leur naïue simplicité, qu'on les ote de cet erreur. Qu'ils sachet donc, que les Medecins interdisent le vin au deus causes principalement: l'vne, quéd le malade ha grand'chaleur par tout le cors, ou an quelque partie. Ne santes vous pas euidammât que le vin echauf-

se? Si vous plaignes d'etre comme dans vn feu, n'vses rien de ce qui peut augmanter la chaleur. Quelqu'un me repondra, qu'on le trampe, ou (comme on dit) laue si bien, qu'il n'ha plus gout de vin. Et dequoy sert il d'oc, si l'eau abbat totallemant sa force? Vous direz, qu'il corrige l'eau de sa qualite, & le peu de substance qui est parmy, recree & maintient la vertu du patient. Il faut donc que ce peu de vin retienne son naturel, en proportion de sa quantite: dont il nuira toujours quelque peu. C'est parler à toute rigueur, nompas au Medecin dous, humain & amy de nature: lequel outre les susdittes considerations, doit auoir egard à la coutume, & cupidite du malade: & se souuenir de la santance du bon vieillard, qui dit si sagement. Le boyre & le manger vn peu pires, mais plus agreables, doiuent estre preferes à leurs contraires. Et luy meme donne ez maladies aigues, qui sont avec fieure continue, du petit vin, qu'on nomme oligophore, lequel nous pouuons contrefaire avec force eau & peu de vin. Je diray bien d'auantage, que le vin fort trappé desaltere mieus, raffraichit & humecte plus que l'eau pure, ainsi que Galen remontre de l'oxycrat, en ceus qui ont grand soif. Car le vin, & le vinaigre fait plus auant penetrer l'eau, qui raffraichit & humecte: dont il s'ensuit, qu'on l'an desaltere mieus. Et de fait, si ie ne craignois l'abus & l'importunité (car si

on an permet vn doit aujourd'huy, demain on
 an veut deus) & le reproche qu'on an peut an-
 courir, ou pour le moins la suspicion d'auoir
 mal procedé, quand apres il suruient quelque
 accidant de la nature ou ordinaire de la mala-
 die (lequel on rapportera à vne goutte de vin)
 i'an permettrois quelque peu aus febricitans
 qui an ont grand desir: & ie m'assure qu'ils s'an
 porteroit mieus. Mais nous craignons tant de
 choses, que nous aimons mieus que le malade
 andure quelque deplaisir, que si l'honneur du
 Medecin an estoit interessé. Car on abuse fa-
 cile nant de ce qui est plaisant: & si on permet
 quelque chose qui soit vn peu suspecte au vul-
 gaire, tout est calônié. Outre ce qu'il y a beau-
 coup d'autres moyens de sustanter vn malade
 fort debile, exans de tout dangier ou soupçon:
 comme sont potages, consumés, coulis, pressis,
 destils, eau de chair, œufs frais & moulets, qui
 nourrisset bien plus qu'un peu de vin. Vray
 est que le vin cause la digestion, & facile di-
 stribution des autres choses qu'on prand: il re-
 cree, reioit, fait mieus dormir, & si desaltere
 mieus etant bien trampé, que ne fait l'eau pu-
 re, ou avec du syrop. Seulement ie remontre,
 de ne s'y affectionner tant, qu'on en veulhe
 boire com ne que ce soit, & mesmes qu'il sante
 au vin, quand les Medecins le defandet: ou
 (que pis est d'an boire à la derobbee, comme
 pour nous tromper. Nous essayons par tous
 moyens

Chap. premier.

9

moyens de retirer le bois, qui brule, & oter les charbons, pour etaindre ce feu: & eus au contraire, y verset de l'huile. Ils ont egard à la foiblesse: mais commant est-ce qu'on remettra la force au cors, si la chaleur que le vin augmente est ce qui l'affoiblit? On void que la chaleur de l'été, du bain, ou de l'etuve, nous rend tous laches, vains & abbatus. La fièvre cause semblable effet, plus de sa simple qualité, que du fardeau des mauuais humeurs. Si an meprisant noz raisons, ils vouloint à tout le moins antandre aus auertissemens que Nature leur donne, ils s'y porteroient plus sagement qu'ils ne font. Car comme l'estomac etant plain d'humeur, le plus souuant nous perdons l'appetit (ce que denote, qu'il n'y faut plus rien mettre, que cela n'an soit hors) aussi quand le vin nous samble amer, ou d'autre mauuais gout, comme il auient presque an toutes fièvres, il faut soupçonner, que pour lors il n'est pas profitable, & que le cors n'an a besoin. Car Nature a balhé vne rude cognoissance à l'estomac, & à sa bouche (qu'on appelle vulgairement le cœur, à l'imitacion des anciens Grecs) de ce qui nous est cōuenable, avec l'appetit qui nous en auertit, afin que nous regis par elle, si nous etions bien sages & hobeissans, d'un instinct qu'elle donne, sachions nous gouverner sains & malades. Mais l'intemperance des hommes est telle, que nonobstant ces ad-

E

monitions, ils veulent suiure vn autre desir. Je tiens cela pour ordinaire, que quiconque est tant malade (sur tout ayant fièvre) fane le vin de mauuais gout, il meprise & offance Nature, s'il antreprend d'an vler. Mais ie ne dis pas au cōtraire, qu'on n'an puisse boire, si on le trouue bon. Car la segonde occasion qui nous contraint à le defandre, ne luy fait pas toujours perdre sa friande saueur. C'est le rheume ou catarrhe, lequel lors qu'il est loin de la bouche, n'y peut imprimer mauuaise qualité: ce neātmoins le vin et à bō droit prohibé an telle affection, pource que les humeurs fondus, subtiliés & echauffés de la chaleur du vin, defluet plus aisement: & que la mesme qualité elargit les passages, an dilatant les pores & conduis. Outre ce que le vin et si fort penetrant, que nous le fantons quelquefois iusques au bout des ongles, aussi tost qu'on l'ha beu. Dont rancontrant par chemin des humeurs gros, pesans & tardifs à se mouuoir, il les pousse, agite & rand fluides. Pour ces raisons, nous conseilhōs aus rheumatics, catarrhéus & gouteus, d'an abstenir. Ce n'et pas pour nottre plaisir, comme si nous delections à gehenner les personnes, & à les traiter rudement. C'et le mal qui nous montre dequoy il s'agrandit, & nous le remoutrōns aus malades. N'est ce pas vne lourde faute, de balher au mal les armes, desquelles il vous battra? Doncques il

conuient se ranger à cette conclusion; que le vin n'est pas tant propre à l'homme, qu'il ne s'en doive souuent passer, en santé & en maladie: veu mesmes qu'il y a infinité de ians qui n'en burent iamais, & ils n'en viuent moins saine-
mant. C'est vne grand' erreur, de l'estimer si conuenable à soutenir noz forces, que nuisant de sa qualité, on ne le veulhe pas quitter. On fait des boissons delicates pour les plus delic-
cas, au lieu de vin: comme et l'hippocras d'eau (nommé Boucher) & l'eau de coriandre. La ptisane & l'hydromel seront pour le commun. L'antans de l'hydromel aigueus, & nompas du vineus, ainsi nommé vulgairement, de ce qu'il ressamble à la maluoisie de saueur & forteur. Dont il n'excite guieres moins les fluxions, que le vin. L'aigueus est proprement dit Melicrat, & le vineus Hydromeli, selõ Dioscoride. *Lib. i. c. 12.*

SECONDE CHAPITRE.

*Contre ceus qui pensent, toute fieure estre de froid, hors
mis celle qu'on nomme chaude. D'où procede le
frisson, & le retour des fieures terminees.*

L'A BVS que l'on commet du vin
es fieures, comme nous venons
de moustrer, n'est pas seulement
fondé sur l'entretien de la for-
ce, ains sur vn autre erreur du
vulgaire, qui pense que la fieure soit maladie

froide. Sa raison est [à mon auis] que ce mal est
causé de froid, & vient avecques froid: sinon
[parauanture] la fieure continue, qu'on nom-
me pour ce respect fieure chaude. Car volun-
tiers apres vn grand trauail ou exercice, qui ha
fort echauffé le cors, si on est surpris de froid,
il y ha danger de fieure. Et de fait le peuple
ne ressoit guieres autre cause du mal, qu'il ap-
pelle Morfondement. Si la fieure est terminee,
comme la quarte, tierce, ou quotidienne, soit
simple, soit double, ou composée: par ce que
l'accés commence par frisson, rigueur, tram-
blement, ou horripilation, il cuide propre-
ment, que le mal soit la froideur anclose dans
le cors, laquelle il faut vaincre par chaleur, na-
ture luy enseignant qu'un contraire repousse
l'autre. Doncques ces bonnes ians ont opi-
nion, que la fieure soit ce grand froid causé de
froid. Tellement que si on leur demande apres
l'accés, fil ha gueres duré, ils repondront, vne
heure ou deus pour le plus: n'estimans que
la chaleur qui vient apres le froid, soit du
conte. Voila pourquoy tout leur dessain est à
se rechauffer: dont ils se couurent fort, chauf-
fet des pierres & tuilles pour les piés, boiuet
de bon vin pur, humet des boulhons epissés,
saffranez, avec du fromage fort vieux, & pi-
quant comme poyure. Brief ils n'essaient que
à surmonter le froid, & prouoquer bongré
maugré la sueur: comme si le mal estoit d'hu-

meur gelé & glacé, qu'il fallut fondre & convertir en eau. Ainsi quand ils commencent de sentir la chaleur : ils estiment que la fièvre est passée, & ne faut plus qu'attendre la sueur. Parquoy les mieus auisès d'entr'eux, andurent patiammant la gehenne d'estre presque étouffés de couuertes durant la grand' chaleur, pour epraindre l'humeur, tout ainsi qu'on presse vne eponge à deus mains. Ils panset, que l'importune chaleur qui tant & si longuemant les annuye : apres le frisson peu durable, n'est que de leur procedure & gouuert : ayans par tous moyens voulu subiuguer le froid, qu'ils tiennet seul pour essance du mal. Dont depuis ils nourrisset la chaleur ardante le mieus qu'il leur est possible, iusques à la sueur. Il ne se faut donc ebahir s'ils vset de l'epicerie, puis qu'ils ont telle opinion. Mais les pauurets sont au tresgrand' erreur, quant à l'essance de leur mal : & de là pullulet ces fautes. Car ils ne sauuet pas, que la fièvre soit l'ardante chaleur, & le froid son precursor, ou le trompette qui signifie sa venue : ce que ie leur feray antandre bien aysemant par ce discours, au remontrant la cause de si diuers effais. Notre peau est toute percee de petis trous, lesquels on ne peut apercevoir, si ce n'est par la sueur qui an sort, & du poil qui an occupe la plus grand part. Nature bien auisee l'a fait ainsi, pour donner libre passage aux fumees excitees de

notre chaleur, lesquelles sans cela l'etoufferoient, comme on void mourir le feu à faute d'estre euanté. Ces fumées sont samblables à fuye, noires, grasses, de matiere brulée, inuisibles de leur subtilité, si ce n'est par effort, qui est la saleté, noirceur & graisse qu'elles rendent à noz chemises & autres vestemens. Aussi en hyuer, pource que le froid serre & condense, la peau des mains (qui sont plus decouvertes pour notre usage, qu'autre partie du cors) est rude & noire dudit excrement retenu. Car il ne se vuide pas bien, quand le cuir est constipé. C'est donc l'usage, & dequoy nous seruet les pertuis de la peau, sauoir est, de donner lieu aux fumées, vapeurs & exhalacions continuelles de la chaleur, qui toujours travaille au cors sur les humeurs, les apretant à nourriture. Si ces trous deuient bouchés, ou tant serrés que la fuye y demeure, ne pouvant passer à trauers, notre chaleur deuient aigre, piquante, forte & brulante outre mesure, comme le feu couuert de sandre: & si l'on dure longuement ainsi, ces excremens l'etouffent & accablent. Or quand nous auons travaillé, la chaleur augmentee echauffant les humeurs, excite & pousse dehors beaucoup d'exhalacions: desquelles les humides souuent deuient eau, & font la sueur: les seiches s'en vont en fumée. Lors il est de besoin, que les pores (ainsi appellons nous les pertuis de la

peau) soient ouuers à commandement . Car si le froid les surprand & constipe , l'echauffement conceu & permanent fera de la chaleur naturelle (qui est douce , benigne , & molle) vn feu corrompant les humeurs . De cela procede la fieure continue (que le vulgaire appelle Chaude) quand le desordre imprimé aus humeurs , perseuere quelques iours sans intermission , ne cessant pas aussi tost que sa cause est abolie . Car les exhalacions suscitees à grand tas , requieret d'estre vuidees : & le sang trop echauffé demande rafraichissement . Quelque fois la matiere corrompue du feu allumé par la constipation du cuir , se perd à vn accès de fieure , qui termine en sueur : mais certaine portion de chaleur estrangiere (qu'on peut dire empireume , comme trace & vestige du feu) restee du premier desordre , apres vn laps de temps renouuelle semblable inflammation & corruption d'humeurs . Ce que fait les fieures intermittantes de douze heures , d'un iour , ou deus : qui ne faillet d'auoir leur retour ordinaire , iusques à tant que la mauuaise qualité imprimée du premier echauffement au cœur , soit antierement etainte & abolie . Voila comment le froid exterieur cause les fieures , d'une forte chaleur , qui ambrasee dans les humeurs perseuere bien longuemant . Ainsi d'un contraire naît l'autre , par accidant . Car la froidure serrant le cuir , ampesche la transpiration , qui

doit entretenir la chaleur naturelle, an sa deuë mediocrité. Il ne faut donc panser, que la fieure soit vn mal froid, par ce qu'elle peut venir de froid: veu mesmemant qu'il y a prou d'autres causes, que le peuple soupçonne à bon droit & ressoit entre les occasions de la fieure: comme quelques viâdes mauuaises, la cholere, la tristesse, les vers, la chaleur du Soleil, & semblables, qu'õ ne sauroit faire auenir au vulgaire morfondemant. Outre lesquelles la crudité, opilation, pourriture, aposteme interne, chaleur de l'air alterante, le mouuement excessif, le veiller trop longuemant, & autres causes incognues au peuple, n'an font pas moins. Toutes reuienet à ce point, d'angeâdrer beaucoup d'exhalacions, an corrompant les humeurs: ou d'echauffer par trop le sang, les esprits, ou parties solides, d'vne chaleur pernicieuse, qui et la propre essance de la fieure. Elle ne sera pas donc froide, comim' on l'estime, de ce que le froid exterieur quelque fois an est cause, puis que nous la voyons plus souuât prouenir d'vn autre moyen. Mais comment seroit il possible (dirés vous) que la maladie etant chaude, soit avec horipilation, rigueur, frisson, & tramblemant, iusques à cliqueter des dans? Cecy est l'autre cause d'erreur aus idiots, qui ne voyâs d'où procede vn si estrange accidât, qu'ils estiment pl' facheus que tout le demeurât, s'y arrestet antieremât, & le nômet la fieure. Parquoy

il leur faut enseigner, qu'est ce qui meut tel accidant, & qu'il signifie, pour abolir les fautes que les pauvres jans y commettent imprudamment. Le commun des medecins (duquel ie ne me veus departir pour maintenant, n'ayant affaire qu'au vulgaire) tient, que des fieures intermittantes, qu'on appelle vulgairement, terminees) la chaude qualite feureuse corrompt l'humeur contenu dans les vaisseaus: & quand il est si difforme & gate, que nature l'ha en horreur, les veines le iettent dehors d'une grand' secousse, & le repadet parmy la chair, les nerfs, peaus ou membranes, & autres parties sensibles. Cette matiere et si cuisante, & se meut si roidemant, que les androis où elle passe en ont telle douleur, qu'il semble qu'on les pique, déchire, detrache ou ecorche. Il ne faut pas trouver estrange, qu'un humour chaud de pourriture ou autrement, cause frisson & rigueur: car l'eau bouillante ietee a l'impourueu sur un cors nud, le fait trambler aussi bien que la froide. Les scintilles du feu en font de mesme, & si on est piqué seulement d'une eguille bien vive, tout le cors se retire. Ainsi les parties sensibles irritees de l'humeur cuisant & brulant, secouet toute la personne, quand elles taches en sepraignant de rejeter ce que leur est mis sus. De là vient le bailher, l'etirement ou pandiculatio, & la tous, qui presignifiet l'acces: lequel dure apres tels accidans, iusques à ce que

la matiere soit cōsumee & dissipée an fueur ou fumeë. Car le froid n'et, sinon tandis que l'humour et poussé d'un lieu à autre violāmant, & qu'il cōmance mieus à pourrir an lieux etroits : car depuis que les mambres l'ont ja accoustumè, vn peu apres sa venue qu'ils refusoient, ils n'an sont plus tant offences. Et quād la matiere et plus inflammeë, sa chaleur poursuit tout le cors, apres auoir gaigne le cœur. Ce desordre continue toujours an augmantant, iusques à l'extreme corruption de l'humour : lequel subtilié de la chaleur, se perd an fin, partie visiblemant, partie inuisiblemant, quād la declination approche. Dōques le mal de fieure termineë, n'et sinon d'humour pourri & corrompu de mauuaise chaleur, dont il deuient brulant, & brule si longuemant qu'il soit aneanti. Le frisson qui precede, et la moutre ou arriuee des matieres qui font l'acces. Tellemant que c'et grād erreur, de tenir le frisson pour essence de fieure, nompas l'ardeur qui s'an ansuit: yeu mesmes que le nom denote euidamment, auquel des deus il la faut assigner. Car fieure n'et ainsi nommeë de la froideur, ains de ferueur, a l'imitation des Latins, qui la deduiset d'ebullicion, comme les grecs de feu.

Je panse auoir suffisamment ansegné, que la fieure, d'où qu'elle procede, & de quelque espeece que ce soit, et toute fondée an chaleur: tellemant que les pauures idiots abusent de l'e-

chauffemant, gehennet leur cors an vain, am-
piret leur mal, & se tuet souuāt à force d'espif-
serie, vin pur, & couuertes. Ils cuidet tout
estre de froid, & qu'il ne faut que bien suer. La
fieure continue & ardante, qui n'ha point de
frissons, ils l'appellet fieure chaude: comme
sil y an auoit de froides, ne sachās pas ce que
le mot de Fieure importe. Et si on me deman-
de, pourquoy donc les continuēs n'ont aucun
trablemant? le repondray ce que tient not-
tre ecolle, que sa matiere et corrompue tou-
te dedans les veines, & ne sort pas aus mam-
bres plus sansibles, sinon quelque fois à l'an-
tiere terminacion, qui et aussi suiuiue d'une ri-
gueur. Reste d'antandre (comme plusieurs
sont curieus de le sauoir) d'oū vient que les
fieures intermittantes ont leur retour à mes-
me heure: l'une tous les iours, l'autre de deus
an deus, & l'autre an trois iours vne fois. Je
suis contant de leur an dire l'auis commun des
medecins. C'et, que nostre cors ayant besoin
de quatre diuers humeurs, pour nourrir tant
de parties qu'il ha fort dissamblables, il an an-
geandre plus d'un que d'autre, selon qu'il leur
appartient: tellemant qu'il fait grand quan-
tité de sang, & moins de flegme, beaucoup
plus toutefois que de cholere, & plus de cete-
cy que de melancholie. Or sil auient que le
phlegme pourrisse, etant corrompu de la cha-
leur fieureuse, tous les iours ce mal reuiendra.

Car le flegme s'angeandre aisement an peu de tams, dont il et fort copieus. Nous n'auons pas tant de cholere, & ancor moins d'humeur melancholique, pour faire si promtemât reuenir les acces: il faut plus grand seiour pour an assembler quantité. Posons le cas (par maniere d'exemple) que tous acces requieret vn' once de matiere. Au premier, ce qui l'auoyt prouqué est deja consumé: Le segond ne peut reuenir, que l'humeur ne soit de nouveau amassé, an telle porcion que puisse molester nature, sauoir est (comme nous supposons) quād l'once y fera toutte: car la dimye, ne les trois quars ne peuuet exciter ce feu. Le flegme dans sis heures deuient si abundant, qu'à peine le reste du iour occupé de l'accès quotidien, an peut venir a-bout. Il faut plus de trâte heures à faire l'once de cholere, requise aus acces de la tierce: & deus iours pour renoueller ce peu d'humeur melancholique, causant la fieure quarte. Car on croid, que les humeurs se corrompet & deuient febrifiques de peu a peu, nompas tout a-coup: & que durant les intermissions, il s'an vície autant de l'amas qui et de long tās au cors, qu'il an faut pour vn acces, s'il ne s'angeandre nouuellement tout depraué, pendant les traies paroxymiques. Parquoy si l'once et touiours preste a mesme heure, la fieure reuiendra touiours à meme point, & sera de mauuays guerir, comme dit Hippocras. Or

bien souuât elle et retardee ou deuanee, parce que noltre cors andure mille changemens des choses que nous faisons, vuydons, y receuons, ou appliquons: de sorte que la simple quartre peut par vn grand desordre deuenir double, & triple: c'est si on angeandre tel amas de melancholie, que l'once y soit antiere tous les deus iours, tout ainsi qu'an la tierce: ou chaque iour, comme en la quotidienne. Car l'essence des fieures (sinon des simples) n'est pas touiours conforme à leur appellacion: & nous n'estimons tierce, toute fieure qui reuiet le troisieme iour, ne quotidienne celle qui est ordinaire. Mais i'antre vn peu trop auât aus difficultes, & plus que n'ha besoin le populaire: lequel se cõtatera bien de sauoir, que les acces des fieures terminees suiuet la quantite de l'humeur qui les cause, ainsi que nous auons deduit. Je pourrois alleguer plusieurs autres raisons, si mon Discours estoit pour medecins. Je m'an passe fort de legier, & ne recherche les grans subtilites que meriteroit la dispute. Si ie vouloys mieus sonder ces propos, il faudroit mettre an doute tout ce que nous auõs dit des causes du frisson, qui preuiet la chaleur. Car c'est la commune opinion, laquelle nous refusons an noz Paradoxes: comme aussi tout ce qu'on dit de la pourriture des humeurs febrifiques. An quoy ie suis tresbien soutenu par maitre Simon Simonee, tres-docte & subtil

philosophe medecin, qui ha excellāmant elaboré le sujet que i'auois seulesmant ebauché.

Il est tams de conclurre, qu'il ne faut plus distinguer la fieure an froide & chaude, veu que le mot de Fieure importe ebullicion. C'est vn ardeur & inflammacion, qui ne peut andurer le mot de froide pour surnom: & ce mot chaude, y et supeflu: car il n'y an ha point d'autre. La chaleur, & nompas le froid, elt le vray mal auquel il faut remedier.

TROISIEME CHAPITRE.

Du Morfondement & Larfondement: & comment le peuple s'abuse, cuidant que tous les maus des trauailleurs (ou la plus part) soit de Morfondement.



Ource que nous auons cy dessus mancionné vne cause de mal, qu'on appelle Morfondement, auquel le vulgaire rapporte presque toutes ses maladies, & principalemāt la fieure: ce sera bien à propos de remoutrer que c'est, & qu'il ne le faut pas estimer si commun. A ce que ie puis comprendre des remedes que y font les paysans, & des propos qu'ils an tiennent. Le Morfondement est, quand apres vn grand trauail, echauissant tout le cors iusqu'à suer, on est surpris de froid. La fieure an pro-

aient bien aysemant à ceus qui sont replets & abondet an excremans, si leur cuir est aisé à constiper, par les causes deuant dites. Aus autres, les chairs an deulet iusques aus os, cōme si on auoit tout brisé: il y a lassitude & pesanteur, avec peine de respirer. Cecy et le plus ordinaire au mal de Morfondement: & il auient, de ce que les vapeurs emeuës par la chaleur, ne pouuant trauerfer la peau resserree du froid, demeuret parmy les nerfs, muscles, & randons qui font le mouuemant: dont ramplis & ampechés, ils manquet à leur office. La douleur qui s'an ansuit, et comme si toute la chair estoit piquee d'epines, ou ecorchee, ou pleine d'apostemes, anflée ou tandue, selon la qualité des exhalacions, vapeurs & fumees. La difficile respiration prouient, de ce que le poumon et surpris de l'air froid apres l'echauffement: car ses tuiaus s'anroidisset, de sorte qu'on ne les peut aysemant dilater ainsi que de coutume: & pource les morfondus an deuient pouffifs. Autresfois les pores du cuir sont tant ouuers, que le froid penetre iusques au dedans, saisit & assiege les veines: lesquelles il peut non moins boucher ou oppiler, que le petit froid constipe les trous du cuir. Et cela donne commencement aus fieures, qui sont d'obstruccion interne, par la seule constriccion. Quelquefois il les anroidit, de sorte que quand ez violans efforts

elles ne peuvent consantir, s'antr'ouuret par le bout, ou creuet an quelque androit. Ainsi le sang verse ou coule an quelque cauite, où il se calhe & deuient noyr. Ce qui auient plus cōmunemant au poumon & au vantricule. De là s'ansuit, qu'on crache, ou vomit du sang an l'espece du Morfondement, que le vulgaire craind le plus: car il pāse que le sang sort ainsi noir & calhé des veines, où le froid penetrant l'ha congelé. Mais c'et vn erreur bien facile à reprouuer: premieremāt, de ce qu'il ne pourroit passer l'estroit du bout des veines, quand il seroit deja calhé: & faudroit vne grand' rōpure aus gros lopins qu'on an vuide. D'auantage, il et impossible, que le sang gele dans les veines pour la froideur: autrement, quand on ha les parties extremes, piēs & mains frois cōme glace, nous pourrions croire que le sang y et fige. Ancores plus facilement se calheroit il au cors des trespassez, où toutesfois il demeure toujours liquide: comme nous voyōs par les anatomies, au bout des dis ou douze iours. Ce n'et pas la tiedeur des veines (quoy que die Aristote) qui garde le sang de calher. Car tout le cors et assez chaud, & neantmoins an nul autre lieu, que dans ses vaisseaus, le sang peut estre gardé qu'il ne soit pris. C'et vne propriété & naturelle condicion, qui rand les veines ainsi conuenables à conseruer le sang. Dez aussi tost qu'il an et hors, an quelque lieu qu'il

qu'il tombe, il calhe necessairement: & si c'est dedas nostre cors il se fait mille maus semblables à ceus du venin. Donques il faut bien ampecher que ce mal-heur n'auiene: & quand on le peut soupçonner, il conuient faire par tous moyens que le sang demeure fluide, ou qu'il se degeler, comme pretand le populaire. Qu'ainsi soit, incontinant qu'il se trouue vn peu mal, apres s'estre echauffé & soudain rafraichi trop vite, se doutant que son sang ne commence à calher, ou qu'il soit deja pris, il vse de la mumie, de la pois, du persil, d'eau de nois, d'eau ardent, moutarde antiere avec du vin pur, du souffre, ou du saffran, de la sariete an poudre, ou du suc de berles, & semblables choses qui peuuet fondre le sang: ou d'eau de patte avec du mithridat, ou du chardon benit, & des fleurs de geneste, pour exciter la sueur: les autres boiuet d'eau sel an faison d'eau benite, ou de l'eau sandree comme lexiae. Il y a plusieurs autres grans secrets, pratiqués antre les pauvres jans: desquels le but n'est autre, que d'echauffer & degeler le sang, qu'ils soupçonnet toujours estre calhé par leur Morfonde-mât, soit il avec fieure, ou sans elle: car il peut causer ces deus maus ansamble, ou separés.

De ces propos ie veus conclurre, que le propre du Morfondre est, de refroidir le sang dedans les veines. Je dis, que c'est vne proprieté dōnee à cette cause, & que peu ou point d'au-

F

tres maus font la mesme congelacion : car il faut que la peau , & tout le cors soit bien ouvert , tellemant que le froid n'y treuve aucun ampechemant. Ce qui auient proprement par l'occasion fuditte. Et voila que i'estime vn vray Morfondemant, auquel peuuet proffiter les remedes que fait le populaire. Car quant aus fieures, elles ont tant d'autres moyens qui les produiset (comme nous auons dit au precedant chapitre) que c'est vn grand abus au peuple, d'alleguer toujours cetuy-cy d'un ordinaire. La fieure et plus souuant d'alheurs, que de Morfondemant, & luy seul peut causer le calhemant du sang, hor-mis la cheute: mais c'est d'une autre faison. Parquoy il faut vser de ce mot an la plus propre finification, & ne l'accommoder ainsi cōmunemant à toute occasion de fieure. Car le Morfondemant peut causer deus sortes de maus: l'un desquels ne prouient d'autre chose, & l'autre et cōmun à plusieurs. Dōques les jans abuset fort de son appellacion, & se trompet lourdemant, quand ils rapportet là toutes fieures, & plusieurs autres maus, qui ne prouiennet aucunemant de froid, interne ou externe.

Il y a vn autre mal ou accidant, qu'on nomme Larfondemant, an quelques lieux où i'ay esté : & diset estre Larfondu, celuy qui an ses excremans (comme vrine & fiente) rand la graisse fondue, tout ainsi que du Lard, d'où

vient l'appellation. Cela et aus fieures ardantes, que les Medecins appellet colliquantes: parce que l'extreme chaleur dissipe les membres solides, & les amoindrit peu à peu, les acheminant à l'hectique. Lors que le peuple les cognoit Larfondus, il n'an espere plus de guerison: & pense que l'occasion de ce desordre, nommè Larfondemât, et excès an choses trop chauffantes, ou de matiere venimeuse: tellement qu'il y a notable differance du Morfondemant, au Larfondu, mesmes selon le vulgaire, qui et l'inuanteur de ces noms.

C'est bien assés discouru, pour moustrer l'erreur de ceus qui preschet tant leur Morfondemant, & ne sauet qu'il finisse: neantmoins ils luy referet la source de tous maus, ou peu s'an faut. l'ay dit, que c'est le froid surprenant la chaleur emeuë du trauail, comme le vulgaire l'antand. Mais si c'estoit après le bain, le courrous, ou autre echauffement, il ne changeroit pourtant de nom: car nous auons egard à la seule chaleur, d'où qu'elle procede & vienne.

QUATRIEME CHAPITRE.

Pourquoy ordonne l'on de boire du vin pur à cèus qui sont fort echauffes, & de pisser auant que se mettre an repos, quand on ha fort traualhé.

F ij

28 Des traualhés & echauffés



Ceus qui ont fort traualhé on
 dōne à boire du vin pur, vou-
 lant (à mon auis) ampecher &
 detourner la cause du Mor-
 fondemât, laquelle on consti-
 tue an froid soudain surprenāt
 la chaleur, dont le sang se congele. Leur intan-
 cion est bonne, & ils font mieus qu'ils ne re-
 pondet : car ils diset que cela raffraichit, &
 garde qu'on ne se morfonde. Premieremât, le
 vin echauffe euidammant : commant peut il
 donc raffraichir ? S'il le fait, c'est par accidant :
 tout ainsi que si on disoit, que le feu refroidit
 nostre cors parce que nous deuenōs plus frois
 apres que nous y sommes chauffés, quand de-
 puis nous sortōs à l'air froid. La raison est, que
 les pores ouuers à cause de la chaleur, donnent
 antree à son contraire, plus facile qu'au para-
 uant. Ainsi le vin peut raffraichir, an etaignant
 de sa grande chaleur, la moindre qui est pro-
 uenue du trauail, & antretenant la naturelle an
 sa condicion. Nous pouuons aussi dire, que la
 fraicheur est causee du vin pur, s'il ampesche
 que le froid surprenant la chaleur, n'angean-
 dre la fieure, qui bruleroit le cors. Tierce-
 mant, il raffraichit aussi, quand il fait que l'e-
 mocion, & la chaleur imprimee, s'appaise pe-
 tit à petit, & nompas tout a-coup. Ce qu'ap-
 porteroit vn grand dangier, comme fait toute
 mutacion vite & soudaine : car nature ne la

peut andurer, sans offance & deplaisir. Nous pouuons aussi dire, que si on boit de l'eau quand on est fort echauffé, il y a dangier d'hydropisie, comme dit Galen. Ce que le vin ampeche de sa chaleur potentielle, qui antretient la naturelle du foye & de l'estomac: neantmoins les raffraichissant de son actuelle froideur, quand il est prins de mesme. D'auantage, le raffraichissement quelques fois finisse nouvelle prouision de viures, & quelque reparation. Car on dit proprement raffraichir, pour auitailler, ou renoueller les munitions. Item il finisse racouter & ajancer le vieus: comme quand on dit, raffraichir le bord d'une robbe. Or telle sinificacion conuient bien à nostre propos. Car le trauail fait grand' dissipation des esprits & vapeurs du sang: dont les esprits qui restet antiers, sont las & dessechés. Le vin pouruoit à tous ces maus, recreât les esprits, reparant leur dōmage, & an angeandrant de nouueaus, etant subtil & vaporeus. Voila comment il raffraichit le cors, l'auitalhant d'espris, esquels nostre force consiste. Donques par toutes ces raisons, le vulgaire dit bien mieus qu'il ne panse: & fait encor plus sagement, d'ordonner le vin pur aus echauffés. Le second point de leur reponce est, qu'ils pretendet d'ampecher qu'ō ne deuieue morfondu. Il y a double morfondement, cōme i'ay dit par cy deuant: L'un, quand on est sur-

*Lib. 5. des
lieus aff.
ch. 6.*

pris de froid, contipant noltre peau, & augmentant la grand' chaleur ardâte, de sorte que la fieure s'an ansuit. L'autre calhe le sang, nō pas dedans les veines (comme le peuple croid) ains celuy qui se verse & s'epand dans l'estomac, les boyaus, ou alheurs. Car il et impossible (sinon, parauanture, par quelque rare & secrette occasion de mal) que le sang vienne â se congeler dans ses vaisseaus naturels, Mais hors d'iceus, tout incontinant, ou bien tost apres il se calhe. A ces deus especes de Morfondemant, conuient propremant le vin, etant sutil, penetrant, & echauffant, comme le desordre requieit. Car la penetracion conduisant la chaleur, tient les pores ouuers contre le froid, iusques à tant que la vapeur emeuë ait passé son exhalacion, & que la fumee de sang echauffé ne soit point retenue. Par ce moyen la fieure et detournee, quand il n'y a point de constipacion, ne dedans ne dehors. Quant à la calheure du sang, le mesme vin l'ampeche d'vne chaleur futile, qui antretient l'humeur an son etat rouge & liquide. Car si le froid l'ha vne fois surpris, il deuient noir, etant comme amortie sa vermeilhe viuacité: & il s'amasse tout an calhas, qu'on ha grand' peine à dissoudre: lesquels sont si dangereux, & causet de tels accidans, qu'on les met au ranc des venins. Car le cors an deuient froid & quasi mort, le pous debile & comme

ant: foible
accompa
c et bion
que le sang
dilatation
femant, ou
quand le
congele
remedes
du Mort
tremant
qu'on le
y est ord
Cet tre
desquel
cice font
peuple
du corps
seigne
nu, p
rams
fre: le
la peut
rastra
qu'ext
tenant
tant a
qui an
mieu
de ce

nul: foiblesse saisit le cœur d'euanouiffement, accompagné de sueur froide, & cæt. Parquoy c'est bien fait de pourvoir, quand on preuoit que le sang peut sortir des veines (ou par leur dilatation & rarité, compagnes de l'échauffement, ou par leur déchirement & rompure, quand le froid les ha anroidies) qu'il ne soit congelé. A ce danger le vulgaire oppose les remedes que nous auons produis au chapitre du Morfondement, mais il n'an fait pas dextremant vser. On y a recours dez aussi tost qu'on se ressent du Morfondement: & le vin y est ordonné, auant que sentir aucun mal. C'est tresbien fait d'an balher aus personnes, lesquelles du long & penible trauail ou exercice sont echauffés, auant qu'ils se reposet. Le peuple n'ha pas inuanté ce bon remede: C'est du conseil des Medecins qui l'ont autrefois enseigné, & comme bien facile les jans l'ont retenu, prattiqué, & continué iusques à nostre tams. Plusieurs ne sauēt pas à quoy cela profite: les autres n'antandēt point commandant cela peut faire ce qu'ils pretandēt. Ils parlet de raffraichir, & du Morfondement, sans sauoir qu'et ce, ne l'un ne l'autre. Ils verront maintenant plus clair an leur besogne, & y seront tant assurés, cognoissant par raison le fruit qui an reuiēt, qu'ils pourront beaucoup mieus vser de ce preseruatif. Mais à propos de ce mal, auquel tous les maus des labou-

32 Des traualhés & echauffés.

reurs & autres trauailleurs sont rapportés, il me souuient d'un qui disoit, Tous maus sont de Morfondement, parlant de toutes maladies an general: Vn bon homme luy repondit an son patoys, Non és pas l'escaudadure: c'est à dire, la bruleure; cōme du feu, de l'eau bouillante, & samblables. Car il est bien certain, que ce mal n'est pas de Morfondure.

Voyons maintenant, pourquoy il est ordonné de pisser auant que se mettre an repos. Quand on ha traualhé, ou de cheminer longuemant, ou de courir & tracasser, les bonnes jans conseilhet de pisser auant que se reposer. Ce qui est fort bien auisé: & croy aussi qu'ils tienet ce regime de leurs grans peres, qui l'auoint eu des anciens medecins, comme tout ce qu'on fait de bien ancores pour le iourd'huy à l'antretenement de santé. On l'ha ressu de pere an fis, d'un si long tams, qu'on ne fait plus d'où ce peut estre venu: toutesfois il est fort vray-samblable, que les vieus Medecins l'ont ansegné. Mais le vulgaire n'antand pas la raison de ce qu'il fait, & ansuit toujours vne coutume, soit bonne, soit mauuaise. Cette-cy est des plus louables: dont ie veus remoutrer, dequoy elle peut estre proffitable. Quand nostre cors est echauffé, les humeurs deuient piquans & fors, de la chaleur qui les rand plus subtils. Et de là vient, qu'on fant comme des epines par tout le cors, apres

vn grand trauail, pour peu qu'on soit de complexion chaude. L'vrine par consequant an est plus cuisante: ce qu'on aperçoit bien an pissant. Car elle chatoulhe plus aigrement son passage, & fait certaine horreur comme frisson au cors, mesmemant sur ses dernieres gouttes. Etant ainsi mordicante, elle pourroit andommer la vescie, si on la retenoit plus longuemant, & par laps de tamps l'ecorcher (mesmes ez cors mollets & tandres, comme ceus des anfans) y causant vn vlcere. C'est donc bien fait de vider soudain la vescie, sans attendre qu'elle an soit plus sollicitée. Car on ne sant pas finemant ce que peut nuire à notre cors, quand il est echauffé. I'ay vne autre raison, qui n'est guieres de moindre pois: c'est qu'on doit craindre durant l'echauffement, que l'vrine ja dessandue an son vaisseau, ne soit retirée des autres parties, & nuise au cors de sa mauuaise qualité. Car les mambres vuides, & eschauffés du trauail, attiret de tous coutés les humeurs quels qu'ils soient. Les parties voisines de la vescie, an peuuet retirer quelque porcion, conuertie an vapeur, laquelle traaverse les pores fort dilatés. Or c'est vne mesme matiere, de la sueur & de l'vrine: dont quand on ha fort perdu de la sueur, il est à craindre que pour ramplir le vuide, l'vrine n'alhe de suite. Et si elle se repand par le cors, elle l'abreuue mal, comm' étant humeur du tout inutile & superflu, qui absoluemant ha titre d'excremant. Il la faut

dōc vuidier incontīnāt. Et ce faisant on cuitera
deus maus: l'vn est, le dāgier qui prouient de sa
piquāte forceur: & l'autre, de ce qu'elle pour-
roit estre reprise du cors. Le peuple sauoit biē,
qu'il se faut ainsi gouuerner: maintenāt qu'il an
saura la cause, il le fera mieus obseruer aus fiēs.
Oltre les susdites raisons, nous an pouuōs alle-
guer vn autre qui est de grāde importance: car
ce regime preserve de la pierre. Quand le cors
est bien echauffé, tous les cōduis sont si ouuers,
que la grosse matiere y passe: car la chaleur di-
late merueilleusemāt. Or les passages & tuyaus
de l'vrine etant fort elargis, grande matiere e-
pesse vient avec elle dans la vescie. Ce sont les
phlegmes visqueus, & la crasse ou lie de la cho-
lere, dequoy se font les pierres, moyēnāt la cha-
leur desséchante, tout ainsi que la fange est an-
durcie par le Soleil, quand son humeur an est e-
beu. Durant l'agitation & mouuement du cors,
parmi l'vrine sont portés, & penetret à la vescie
ces gros humeurs: lesquels se departet & sepa-
ret de la porcion aigueuse, lors qu'on se vient à
reposer, & que l'vrine aussi se pose. Car la pesan-
teur de la matiere fait, que le plus epais tōbe au
fond de peu à peu: & ainsi par apres la propre
sustance de l'vrine est vuidee, laissant dans la ve-
scie les crasses qu'elle y ha conduit: lesquelles y
sont retenues de leur viscosité, outre le pois qui
les y arrete. Si cela reuiert souuāt, qu'on traua-
lle mal à propos (sur tout bien tost apres auoir

mangé) & qu'on laisse au repos l'urine ainsi cō-
fuse, au peu de tans il y a l'estoffe & assés de quoy
faire vne pierre. Car aujourdhuy il s'en amasse
le gros d'une lentille, demain autāt, & ainsi d'or-
dinaire: de sorte que tātost y en a assez pour fai-
re vn grand ampelchemāt. Donque il faut ran-
dre l'urine quād on est echauffé, autāt que le se-
jour donne loisir aus gros humeurs de pouuoir
estre sequestrez, & reduis au fond du vaisseau.
Si on pisse incontinent, on void l'urine trouble
du melāge des susdites matieres. Et si on la met
dans vn verre, ladicte separacion faite on verra
qu'il demeure au fond vne epeisseur, samblable
à celle que nous disons rester dās la vescie, si on
differe d'uriner. Par ce discours il est facile d'an-
tandre, combien sert aus enfans de ne tenir leur
urine (mesmes quand ils ont tracassé, sur tout a-
pres le repas) pour les preseruer de la pierre: à la-
quelle ils sont plus suiets que les grans (i'antans
de celle qui vient à la vescie) à raison de leur in-
satiāble voracitē, & du trauail desordōné à heu-
res deconuenables. Des trois raisons que i'ay
randu, de l'institution vulgaire à faire pisser
ceus qui sont echauffez, mesmemant les enfans
quand ils ont trauailhé, celle cy est la plus vr-
geante. La seconde ha quelque apparence: &
la premiere encore plus. Quoy que ce soit, la
coutume en est fort louable, & doit estre bien
observee de tous ceus qui sont curieus, &
soigneus de leur santé. Je peus encore aiou-

ter vn' autre raison, qui ne sera des moindres, à mon auis. C'est, que l'vrine contenue dans la vescie, depuis qu'elle est echauffee, rand chaleur au cors. Dont pour se rafraichir bien & sainement, il est bon de la vuidier. Et quoy ? nous vuidons & versons vne partie du sang echauffé par la fieure, pour rafraichir le cors: tout ainsi que nature d'elle mesme souuant decharge la teste boullante d'vne porcion de sang qui flue par le nez: dont s'ansuit vn grand soulagement & rafraichissement. Il n'an faut moins panser de l'vrine, laquelle on ne plaint de vuidier & reietter.

CINQVIEME CHAP.

*Qu'il faut souuant changer de linge
aus febricitans.*



NOSTRE chaleur naturelle (principal instrument de toutes actions requises à soutenir la vie) fondee en humidité, iamais ne cesse d'ouurer, preparant nourriture au cors, cuisant les humeurs, & triant le bon du mauuais. Le bon est appliqué aus membres qu'il faut alimenter: le mauuais est reietté aus lieux ordonnés pour receuoir les excremans, desquels y en ha plusieurs sortes, & diuers receptacles: Les plus deliés & subtils excremans (qui seruet à mon propos) n'ont autre vaisseau que la peau: & ne

font que fumees ou vapeurs, eleuees des matieres que nostre chaleur elabore . La legereté les porte du plus profond du cuir qui antourne le cors, comme toutes exhalacions gagnent le haut. Or le cuir antre ses vsages, ha cetuy-cy bien propre & necessaire, d'admettre sans contredie ces menues superfluités, qui luy sont anuoyees de toutes pars : & an les receuant comme rare, cler, ouuer, & spongicus, il leur donne passage tout outre parmy ses pores & meats inuisibles, affin qu'elles se dissipet an l'air: Si ce n'est la portion plus gluante & epaisse, qui s'ampeche an ses detours, & par succession de tams deuient poil. Tels excremans font la sueur, & les fumees qui tachet noz chemises & autres vetemens, d'une saleté noire, grasse, & visqueuse. Ils sont fort copieux an ceus qui ont la chaleur piquante, pour la secheresse de leurs cors : à raison qu'elle brule beaucoup plus que l'humide: par ce que l'ardeur seiche conuertit beaucoup de matiere an sueur & an vapeur fumeuse . La chaleur moite, comme celle des ansans, an resoud dauantage . Mais ce n'est qu'une exhalacion douce, suaué, & tant futile qu'elle se perd inuisiblement, comme les fumees de l'eau chaude . Le bois rand vn feu plus ardant que la chaleur de l'eau, & iette vne fumee si epaisse, qu'elle fait de la suye bien solide: & de sa substance brulee, les charbons an fin deuient sandre . Telles superfluités abonder an l'aage de virilité: les fames & les ansans, comme

erans plus mols, an ont beaucoup moins: dōt ils ne s'antet ainsi au bouquin, ou à l'épaule de mouton, quād ils sont echauuez. Car telle puanteur vient de ces excremās secs, qui pour les susdites raisons) sont fort copieus en æté, & ez hōmes passé l'adolescence. Si dōc la chaleur seiche produit grād amas de fuye (vapeur noire, grasse & puāte les fieures sont fort propres à l'augmāter en grāde quātité. Aussi de fait nous voyōs, que les chemises & lineeus des febricitās sont sales incōtināt: parce que leur mal est de chaleur naturelle, conuertie an feu sec & ardāt. Or ces fumees sont mieus pour nous, dehors que dedās nostre cors: & pourāt Nature tressogneuse de nostre bien, voulāt purifier le sang, fait que cette infeccion se vuide aussi tost qu'ell'est nee. Et à ces fins, ell'ha dōné aus arteres deus mouuemās: l'vn pour reietter & pousser hors, cōme an s'espaignāt, les superfluités de la bruleure: l'autre, pour recevoir de la fraicheur an s'elargissāt. Car rien ne cōserue mieus la chaleur naturelle, que de vider les fumees, qui la pourroint etouffer: & d'euanter le sang, qui est son domicile. Puis qu'ainsi est, & q̄ ces excremās doiuet estre vuidez pour la pureté des humeurs & esprits q̄ an seroient troublez, il faut antretenir le passage du cuir net & ouuert, an gardāt tressogneusement qu'il ne soit ampeché. Aquoy seruoient propremāt les friccions & bains, que les anciēs Grecs & Romains vsoient cōmunemāt. Dauantage, il

faut auiser, que ce qui nous antourne, cōme le linge & tout abilhemāt soit biē net: afin que les ordures que le cors y a ia trāsmis an s'epurgeāt, n'an soient retirees par l'ouuerture des arteres, q succet indifferāmāt tout ce qui se presante. Elles ont reietté ces immōdes fumees, par leur cōtraccion. Si vous andurez que la peau ait toujours ce fumier aupres d'elle, certainemant les arteres le reprādrōt: car elles tiret de tous cotés l'air, soit bon soit mauuais, suaue ou puāt, net ou infait. Dōc il fait bon chāger de linge apres auoir sué, de peur que l'humeur superflu ne soit ēbu du cors, qui s'an est vn coup dechargé: cōme le linge noir & sale nous rād ce qu'il an ha pris. Puis donc qu'il est tant necessaire, que ces matieres se vuidet pour raffraichir notre chaleur, il est fort dōmageable qu'elles retourner au dedās. N'est ce pas grād sotrise, de sauoir qu'il est profitable que toutes telles immōdices soient poussees dehors, & puis les laisser au lieu d'oū elles y puisset aisemāt r'antrei? Il ne faut point douter, q̄ cela ne corrópe de sa puante qualité, l'air qui est entre noz linges & le cors. Les arteres en s'ouurāt l'attiret tel qu'il s'y rancōtre: & introduiset quāt & luy pesse mesle, ce qui s'y trouue mixtioné biē futil. Qu'ainsi soit, sortāt nud de l'etue, mettez vo' an lieu pleī de pouf siere emeuē. Vous santirez tātost quelq̄ chose vo' piquer (cōme epines & eguilhes) par tout le cors. C'est le pl' menu de la poudre, q̄ les arteres

an succeans l'air, attirer par les pores fort ou-
uers. Doncques il faut estre bien soigneus de la
condicion de l'air qui nous touche, comme de ce
qui ha trafic avec noltre chaleur, & nourrit noz
espris. Or l'air qui adhere aus drapeaus sales, ne
peut estre bien net. Et si les arteres le remettent
dans le cors, c'est vn erreur pire que le premier.
Il faut donc bien souuāt renouuelet le linge qui
nous touche, pour reietter ce que y est posé: &
non seulement en prendre souuāt d'autre blanc
& net, ains aussi qui soit bien odorant. Car cela
rand l'air ambiant agreable à noz esprits, lesquels
se delectet & restaurent de bonnes odeurs: tel-
lement que si on y prend garde, vous verrés que
on et tout recreé, reiouy, & renforcé d'auoir
changé de linge & d'habillemans: comme si ce-
la renouuelloit noz esprits, & la chaleur natu-
relle, que l'infeccion retenue randoit acroupis,
etonnés, confus, broullés, troubles & mal à leur
aise. Car ils requierent vn extreme pureté, netteté,
& syncerité (comme ils sont celestes & diuins)
pour mieu faire leur deuoir & moutrer leur
puissance. D'où est venu donc la sorte opinion
du vulgaire, qui n'ose changer de linge aus ma-
lades, & les contraint andurer bien long tams vn
orde puanteur, comme porceus se veautrans
dans la bouë. Parauanture qu'il fut quelque fois
deffandu, de les remuer fort souuāt durant les
fieures, de peur qu'ils n'eussent froid: depuis les
bonnes jans antandēt, que le linge blanc leur
soit

soit domageable. O grand erreur, duquel
procède la cruauté & barbare tyrannie qu'on
vise anuers les pauvres malades ! Il n'y a rien
qui les reuiene plu-tost, & qui augmâte mieus
la force naturelle, que de les tenir nets par tous
moyens qu'il et possible : & que leur draps
soint de suaue odeur, & icelle raffraichissante
pour les fieureus, comme de roses & sambla-
bles. Toutes les fois qu'on refait le lit de celuy
qui ha fieure, il seroit expediant qu'on luy
changeat de linge, linceus & chemise. Car la
fieure en seroit plus courte, & le mal plus aisé.
Nous voulons purger les humeurs par mede-
cine, affin d'estaindre la chaleur qui les brule.
Il ne faut donc estre moins curieus, d'epurger
les fumees & sutils excremans qui antretienent
vn tel feu. Et quoy ? sans auoir aucun mal, il
peut auenir que de coucher dans les linceus
d'vn febricitant, on an prandra la fieure, pour
peu qu'on y fut préparé. C'est à cause que noz
arteres an attirant l'air, mettet dans notre cors
la qualité mauuaise des excremans imprimee
aus linceus : dont la chaleur naturelle an de-
tient febrile. Feront-ils moins de mal à celuy
qui les ha salis ? Aumoins ils antretiendront le
desordre ia auenu. Sus donc que l'on change
d'auis, & que les malades ne soint plus mole-
stés de cette fascherie, d'estre confis & comme
anseuelis dans leurs ordures & immondices,
puis que cela ne leur profite rien, ains au con-

G

traire leur fait grand mal. Il faut souuain changer de linge aus febricitans, & autres malades, quand il est sale: & panser que les patures patians ne doiuent moins estre commodement que les sains, sauf le plus: car il les fait traiter mignardement, afin qu'ils puissent mieus soutenir & supporter la facheur de leur mal.

SISIEME CHAPITRE.

Que les fames tuent les febricitans d'abstinence de boire, abondance de viures, & annuyeuse couuerture. Et quel regime il conuient observer aus febricitans.

AYANT decouvert & corrigé l'erreur, de ceus qui se chauffent par trop ez fieures, par l'usage du vin, de l'epicerie, & force couuertures passans tout leur mal estre vn morfondement: & de ceus qui ne veulent permettre qu'on leur change de linge. Pour conclurre ce propos, il sera bon de remoustrer aussi aus importunes fames, les trois notables fautes qu'elles y font, en gheuant les malades d'abstinence de boire, contrainte de manger, & grand fardeau de couuerture. Le populaire au general tient cett' opinion, & use de tel regime: mais sur tout les fames vienent à vn excez qui est insupportable, & travaillent plus les patians, que ne font le reste du peuple. Cela prouient d'une condition naturelle, qui les meut à outrepasser les bornes de mediocrité.

& estre touiours excessiues plus que les hōmes;
an leurs affecciōs & œuures. Car si elles aimer,
c'est an perfeccion, comme elles hayssent mor-
tellemant. Si elles s'adonnent à l'auarice, ell' et
extreme: si à folle depāse, c'est la mesme prodi-
galité. An douceur, mansuetude, & bonne gra-
ce, si elles veuler, sont excellantes: tout ainsi an
colere & an depit, moutret vne grand rage. Le
que le dis pas pour les blamer (comme la plus
part des hommes se delecte à medire du sexe fe-
minin, qui et le rafraichissemant & vraye conso-
lacion de ce monde) ains pour declarer la cause
de leur abus. Mesmes ie feray bien antandre à
ceus qui an detracter, & amenet telles raisons
pour moutret l'imperfection des fames, qu'ils
les vantent ignorammant. Car ces affecciōs ex-
tremes, ne procedet que d'un esprit sutil, pene-
trant & abille, anchassé dans vn cors mol, deli-
cat, & bien purifié. Qu'ainsi soit, nous voyons
d'autres matieres aisemant andurer diuerses qua-
litez & mutacions, à raison de leur syncerité.
Le seul blanc receura toutes couleurs en sa
perfeccion, comme la fame ressoit indifferan-
tes meurs. Et tout ainsi que l'eau est iugee tres-
bonne de sa legereté, laquelle on estime d'une
facilité à estre soudain bouillante ou refroidie:
ainsi j'affirme, que la complexion des person-
nes qui se changent promptemant, & soudain
passent d'un extremité à l'autre, est simple, pure,
& nette. Car le contraire vient d'une pelan-

44 Du regime des Febricitans
teur, epeffeur & crasse, qui fait la coutumace
& immobilité. Les fames sont d'une substance
tant deliée, clere & syncere (temognee de leur
mollesse, tandreur, beauté & delicateffe) qu'el-
les ont grande promptitude, & excéder les hom-
mes tant au soudaine apprehension, qu'au su-
perlatiue affection. Parquoy elles ont moins
d'arret en leurs propos & deliberacions, à rai-
son de la mobilité, qui procede d'une legere-
té, suiuant la pure simplicité, de laquelle aussi
est doué le ciel par dessus tous les autres cors.
Aussi la vitesse de leur antandement à cōpran-
dre toutes difficultés & les resoudre, est telle,
que les hommes n'y peuuent auenir. Et pour-
tant on meprise leur reponse, si elle est preme-
ditee: & dit on qu'il faut prandre le premier
conseil d'une fame, auant qu'elle y ait pansé.
Car elles ont cette perfeccion, d'estre prōptes
& fort futiles: dont elles peuuent incontinant
resoudre vn fait. Si elles y pansent à loisir, font
mille discours variables & diuers: parce que
leur esprit aigu & penetrant, ne se contâte soy-
mesmes, & touiours vouldroit mieus aiancer la
besogne, de sorte qu'il broulhe & gate tout.
Ainsi vn bō peintre qui ha le cerueau galhard,
fera vn beau portrait à sō premier dessain, qui
contantera les ians. Si on ne le luy ote soudain,
il y trouuera quelques trais à refaire, & ne ces-
sera point qu'il n'ait ampiré son ouurage. C'est
donc grāde louāge aus fames, d'estre si prōptes

& abilles: puis que cela prouiet de leur matie-
re fort futile, qui les fait appellervolages. Mais
ce n'et pas vitupere, d'auoir vne si excellante
legereté. Elles ne s'arrettet guiere auant que
d'etre aus extremités, où les hōmes ampechés
de leur pesanteur, ne paruienet si aisemāt. Voi-
la pourquoy nous trouuons les fames tant ex-
cessiues de nature, non seulemāt quant à leurs
meurs, ou affectiōs, ains au seruice des malades,
où ie m'arrete pour le presant. Car si nous or-
donnons vn bain chaud, elles feront qu'il bru-
lera. Nous antandons que la chaleur soit tiede,
& il suffit que l'on n'y sante froid: Elles pāsēt
puis que la chaleur y et requise, tāt plus il y an-
aura, tant plus il proufitera: & de fait vous di-
riés, que c'est pour peler vn cochō. Si nous de-
fandons aus malades le boire demesuré, s'il est
serui de fames, il mourra de soif. On dira, nour-
rissés-le bien: c'et assés dit, il sera tout farcy de
viandes. Commandés-vous qu'il soit couuert?
vo^o le verrés desormais etouffē. Ainsi presque
an toutes choses elles passēt notre ordōnance,
tirant à superfluité, ne pouuant tenir le milieu.
Il leur faut remoutrer ces fautes, afin qu'elles
s'en abstiēnet. Le Theologien & le Philosophe
moral precherōt contre les meurs, & diront q̄
les extremes sont viciēses, la vertu cōsiste au
milieu. Le medecin fera cognoitre les maus
qui suiuet leur excés, comme i'ay proposé de
faire en ce lieu. Ie ne parle qu'aus ignorātes, &

à celles qui vsent de telles procedures: dont les plus sauantes n'an seront offancees. Il suffit que i'ay bien excusé le naturel de toutes: ie ne repràs que les erreurs, & qui ne s'an tiendra coupable n'a rien à voir an ce discours: Mais retournons au chemin, duquel ie me suis vn peu detourné, pour faire antandre aus fames, que ie ne blame, point leur sexe (lequel m'est tres-agreable) ains pour le randre plus parfait, ie veus essayer de luy faire perdre, ce qu'on y peut calomnier.

Prenât garde à la fasson de seruir les malades, i'ay colligé des poins notables, où les idiots erret cōmunement, & sur tout aus Febricitans: cōme quāt à changer de linge, & à vser de vin, dequoy i'ay fait deus chapitres à part. Quant au manger, boire, & courir, les fames antr'autres y sont tāt abusees, qu'an pāsant bien soulager, sustanter & guerir tost leurs patiās, elles les gehenet, accablet estouffet, & randēt souuāt incurables. A leur dire, touiours ils boiuēt trop, ne mágēt rien, & ne sont iamais prou couuers. l'espere qu'elles perdront cet erreur qui les auugle, apres auoir leu mes raisons. Mais par ce que ie veus'outre la remoutrāce que i'an feray, dōner au vulgaire vn petit regime, cōmant il se faut cōduire ez fieures, le melheur sera de mettre tout ansamble, pour ne faire si long propos, qui pourroit annuyer. Ioint qu'anseignant le denoir qu'on doit aus fieureus, on pourra bien cognoitre l'ignorāce du peuple? car le droit nous moutre le tort. Donc en balhāt

les memoires de se bien gouverner ez fieures, ie m'aquiteray par mesme moyen de ma promesse, & taxeray modestemāt ceux qui font autremāt.

Je suppose touiours, qu'un Medecin ordōne, ainsi q̄ presant il void an estre de besoin, les purgacions, la saignee, & autres remedes qu'il faut approprier aus maus particuliers, aus qualitēs des p̄sonnes, humeurs, ages, liens, saisons, &c. Mō instantion n'est, que de discourir sur le traitemāt du malade, an ce que nous cōmettons le plus souuāt aus fames qui les doiuent seruir. C'est anseignement leur sera profitable, si le veulent bien apprendre, releuerōt les Medecins de la peine que ils ont à le redire tous les iours, & supplierōt à ce que les Medecins peuuent quelque fois oublier, ayant diuers malades à panser. La fieure est vn mal chaud, cōme signifie le nom, lequel l'ay deduit par cy deuant du mot feu, ou ferueur. Elle tient tout le cors vniuersellemant, apres auoir saisi le cœur, source de la chaleur naturelle, qui pour lors deuient si ardante, de sa qualitee augmentee, qu'on en brule estrangement. Le cœur de sa nature est echauffē plus, sans comparaison, que nulle autre partie du cors. Dont les arteres ne le peuuent rafraichir suffisamment de leur seule operation. Il ha fallu que nature l'antourna de poumons, à mode d'euantoirs ou soufflets, qui luy communiquent l'air frais, & soudain le vuidet etant echauffē, avec ses fumees. Or quand cette ardeur est plus grande que de coutume, il

faut halener plus souuât, & haleter pour suue-
 nir à la necessité du rafraichissemât, & chercher
 l'air plus froid: car autremât on ne peut amor-
 tir l'excès de la chaleur. Si donc ez fieures tout
 le cors brule, & le feu procede du cœur, on ha
 grand besoin de fraicheur an l'air de notre de-
 meure, tout ainsi que l'on et cōtraint de respi-
 rer fort menu. Les ignorâs qui pāsēt to^r leurs
 maus prouenir de morfondemât, & que la fie-
 ure soit de froideur, chaufet la chābre tāt qu'il
 leur et possible, fermās toutes les ouuertures,
 & allumans gro- feu, aupres duquel ils loget
 leurs malades, cōme pour les rotir. Tellemant
 que l'air tiré de leurs poumōs, echauffe dauā-
 tage leur cœur, augmāte le mal, & souuāt d'vne
 fieure terminee, il an fait naitre la fieure cōti-
 nue. Nous supposons icy, la saison de l'été, an
 laquelle les fieures sont plus frequātes: & mes-
 mes que la saison soit fort ardante, cōme durāt
 les iours caniculiens: autremât il faut rabbatre
 an proporciō, vne partie de ce que nous dirōs
 pour bien rafraichir l'air. Nous dōques ansui-
 uant les raisons precedantes, ordōnons que le
 Febricitant soit en vne chambre spacieuse &
 euātee, de sorte que l'air y soit fort à comman-
 demât. Aus cabinets & garderobbes on ha tan-
 tost echaufé l'air anclos, & si on y demeure lōg
 tās, il faut reprādre les fumees que notre pou-
 mon y ha vuidé. Les sales sont plus propres à
 notre intācion: les lieux bas & an voute (pour.

ueu que l'estage soit sec) encore plus commodes. Le lieu etant bien choyfi, il faut ampecher tout ce qui le peut echauffer. Qu'on ne permette donc y antrer multitude de jans, ne aucun chien: car leur haleine rand grand chaleur. Qu'il n'y ait point de feu, nompas mesmes de la chandelle alumee, si on s'an peut passer. Que les rayons du Soleil n'y antret aucunement, voyre que par dehors ils ne touchet pas aus vitres. Le melheur seroit, qu'au lieu où repose nostre malade, y eut des fenestres de deus ou trois coutés: affin que quand le Soleil donne à l'vne, on tienne les autres ouuertes, pour auoir toujours la fraicheur: de laquelle il faut etre sogneus, & memes d'ã faire toujours prouision dez le matin. Le soir redonne samblablement du frais, qu'il ne faut mepriser. S'il y a quelque porte d'où vienne vn ioly vant, elle doit toujours etre ouuerte, mais a-demy, pour randre le vant plus fort. Et si cela ne suffit, il faut vser d'euantoirs, & agiter l'air de la chambre, comme on fait d'vn sac moulhé, qui toujours ebranlé de secouffe, rand l'air mobile & bien frais. Le mouuemant y et requis d'ailleurs: c'est affin que l'air qui touche le malade, soit continuellement repoussé de telle agitation, & qu'vn autre plus frais luy succede. Outre l'emocion (qui raffraichit euidammãt, comme il appert des vans) on vsera de diuers artifices à mesme fin. Prenez de l'eau du puis

50 Du regime des Fieures
bien froide, & qu'on la verse cōtinuellement
d'un seau à l'autre, an la renouellant de coup
à coup. Cela bat l'air, l'humecte, & refroidit:
& le bruit venant aus oreilles du malade qui
ne peut dormir, quelque fois l'induit à som-
meilher. Il faut aussi moullher d'eau froide le
paué à toutes heures, l'arroufant par dessus de
bon vinaigre. Les plus riches y repandront du
vinaigre rosat, d'eau rose, ou d'eau de violettes
de Mars: car l'odeur fraiche mitigue la cha-
leur, & reuiet les esprits. Le parterre soit tout
semé de roses, violettes, pampins de vigne, lai-
tues, feuilles & fleurs de Nenuphar, qui aurōt
trampé an l'eau bien froide, eau rose, & vinai-
gre rosat. La chābre soit garnie de ramee, mes-
memant des branches de saule toujours frai-
ches: car elles venant à secher, nuiset. Le lit
ordonné au malade (posé au lieu plus frais &
obscur de la chambre) soit grand & spacieus,
affin qu'il s'y pourmene à l'aise, an muant sou-
uant de place, comme l'on et contraint de fai-
re. Outre ce il faut vne couchette pour raf-
fraichissement, quād le lit et tout echauffé d'v-
ne longue demeure: aussi pour le refaire com-
modement, car les malades doyuet etre tenus
fort proprement: ancor tout leur deplait, du
mal qui les rand difficiles. C'et aussi pourquoy
il leur faut vne grande netteté, qu'ils ne fantet
rien de puant, que les couuertures soient fort
molles & douces, sans ordure & sans rudesse:

Chapitre sifieme.

51

les linceus bien delies, bien blancs, & de suau
odeur, lesquels il faut renouueller tous les
iours, si le malade ha grand' fieure, ou s'il sue
abondamment. De coucher sur la plume, c'est
bien folie à ceus qui se plaignent de la chaleur,
veu qu'elle echauffe euidamment. l'accorde
qu'il est necessaire, que les fieureux ayent quel-
que lit mol, pource qu'ils sont prou cassés &
rompus de la maladie: mais il faut que ce soit
de chose moins rechauffante, comme et le
cotton, la layne ou bourre, dequoy on fait
des matelas qui sont bien fort doulhets. Il y
ha matiere plus fraiche an la balle ou balouf-
fe & pouffiere d'auoyne, d'orge, milhet, & au-
tres. le coucheroye volontiers sur la paille
fraiche, pour estre mieus à mon ayse. Quel-
ques vns mettent sur la coëtre leur mattelas,
pour coucher plus fraichement & mollement:
mais ie ne voudrois point de plume, an sorte
que ce soit: pource que la chaleur penetrant
iusques là, y et longuemant antretenue. Des-
sous le linceul il fait bon mettre à l'adroit des
reins du malade vne piece de camelot à ondes,
ou vne peau de marroquin, ou d'à faire vn car-
reau fort plat, à demy plein de baloffe, pour se
coucher dessus. Plutarque dit, qu'an Babylo-
ne les plus riches dormoient, pour grand de-
licateffe, sur des sacs de cuir pleins d'eau, aus
grâdes chaleurs de l'été. Telle froideur no^e et
vn peu suspecte ez fieures: & il vaudroit mieus

(parauanture) ramplir ces sacs de vant, à mode de ballon, comme i'antàs qu'an Italie quelques seigneurs ont de tels lits. Mais ce sont choses rares, desquelles on se passe fort aysement. l'estime bien vn lit pandu à cordes, pour deus commoditez qu'on ha d'estre branlé: l'vne et, qu'il donne vant & raffraichit, pour les causes susdittes: l'autre, que l'agitacion sert à les andormir, comme dans vn berceau. Le ciel du lit soit vn peu haut, affin qu'o ait plus d'air. Les lits de cãp, qui ont leur pailhon fort bas, presset tant vn malade, qu'il n'y peut halener. Si les fenestres ou les portes iettet du vât droit contre le lit, lors qu'on veut raffraichir la chambre, il faut tirer les rideaus (qui autremant ne seruet de rien) de peur que le froid ainsi roide ne surprenne le cuir, & cõstipe les pores, d'où il faut que sortet les fumees de l'ardante chaleur. Car nous ne voulõs pas refroidir par dehors: cela ne seroit qu'augmanter le feu interieur. Nous demandons l'air frais pour le poumon, qui euante le cœur ambrásé de la fieure. Parquoy tout le cors, hor-mis le visage, doit estre couuert selon la qualité de l'air, affin que la peau soit toujours bien ouuerte. Il ne faut pas aussi accabler les patians d'vn fais de couverture: car se tourmant ne sert de rien, & les altere d'auantage. Suffit qu'ils soient autãt couuers, que la constipacion du cuir an soit ampeechee, & soit gardé libre passage aus vapeurs

& fumees : & non moins à la sueur , quand elle veut sortir . Donques ils ont assez du linceul , à la grande ardeur : sur la declinacion , quand ils commancet à santir la moiteur (laquelle signifie la sueur estre pres) il les faut bien couvrir davantage, pour ayder à la chaleur au vuidange de cet humeur : nonobstât la facherie d'andurer ce tourmant . Mais on doit estimer, que c'est le reste des matieres qui ont fait le paroxysme : & que si on en retient quelque portion , on sera beaucoup plus long tams à estre bien net de fieure: car tant qu'il y en demeure vne goutte, le cors en est emeu. Donc se persuadant, que c'est la vraye terminacion, il faut supporter patiamment l'annuy, & ne se decouvrir point. Car si le cuir est constipé , la sueur retenue, l'acces dure plus longuemant : & est quelque fois d'agerous, qu'une fieure terminee deviene continue, par la retencion des excremâs, & cōstipacion de la peau. C'est donc' alors que les couuertes sont à propos, quand on est pres de la sueur, nompas durant l'acces & brulante chaleur, comme on dispose les importunes fumes. Car pourueu que le cors ne sente par dehors la fraicheur de la chambre, & qu'on soit vn peu couuert, tout hors-mis le seul visage, on s'en doit contanter, sans gehenner ainsi les malades. Au commencement de l'acces, quand ils sentent frisson, rigueur, & horripilacion , on les doit tant couvrir qu'ils veullet : & en cela faut

suiure leur desir, echauffer les piés avec dra-
peaus, tuyllles, & pierres, faire par tous moyes
de couuerture & applicaciõ (nompas de breu-
uage echauffant, cõme fait le vulgaire, car ils
ne sont que trop chaus au dedans, qui les rend
fort alterés) que ce facheus trablemant passe
vite. Quand le chaud cõmance à regner au de-
hors, & que les couuertures annuyet, il an faut
oter de peu à peu, mettant le malade à son ayle
le mieus qu'il et possible, iusqu'à ne laisser que
vn linceul dessus luy. Voyla commant il se
fait conduire ez fieures terminees. Touchant
aus cõtinuees, qui ont toujours samblable cha-
leur, ou peu s'an faut, & dure tant qu'ils soient
gueris du tout: il s'y faut gouuerner selon sa
qualité, & couvrir si peu les malades qu'ils n'ã
soient pas plus alterés, leur laissant iustemant ce
qui et requis pour ampecher la surprinse du
cuir. Donques si le chaud et ardent, on ne les
couurira nomplus qu'au milieu des acces des
fieures terminees: & il ne faut pas suiure l'avis
des fames: car iamais les malades n'ont prou
de couuerture à leur gré. Mais il faut bien no-
ter les reigles qui s'ansuiuet, pour antandre
quand, cõmant, & combien nous deuõs rafrai-
chir l'air, & moderer la couuerture: d'autant
que la saison, l'heure, & l'espece du mal (où git
grande varieté) font, qu'à tout propos et re-
quise bonne discrecion, parce qu'on ne peut
limiter iustemant par escrit la quantité des re-

medes, &
comme ne
An ce
tretien
aus pour
c'est un
de peur q
pas an pe
chose
malade
tre, ne
Il ne faut
pres du
alles qui
froid, q
difficile
per la pe
rant la
confid
malad
de la fi
frais q
nous y
propor
Quand
chose
fait et
chaleu
brulan
peut

medes, & il y faut vne grande obseruacion, comme nous deduirons presantement.

An ce fait noltre but n'est autre, que d'entretenir l'ouuerture des pores, & permettre aus poumons iouyr de la fraicheur. Dont si c'est an hyuer, il nous faut estre plus couuers, de peur que la peau ne se serre: & ne sommes pas an peine de rafraichir noltre air, ains tachons à le tiedir, affin que quand l'impatient malade se tourne dedans le lit, l'air qui y entre, ne surprene le cuir, de sa froideur gelee. Il ne faut pas aussi, que le malade soit mis aupres du feu, comme an vset les payfans: c'est assés que l'air de la chambre ne soit pas autant froid, que porte la saison. An æté il est bien difficile de le refroidir tant, qu'il puisse constiper la peau, (si on est couuert d'un linceul) durant la grand' chaleur. Or an cecy il faut bien considerer la grandeur du chaud qu'andure le malade, & de l'air qui l'atourne: car si l'ardeur de la fieure est extreme, nous randrons l'air tât frais qu'il nous sera possible: si ell' est moindre, nous y trauaillerons moins, obseruant la deue proportion à l'opposicion des contraires. Quand la chaleur de l'air est moderee, peu de chose suffit à l'amortir: si ell' est excessiue, il la faut cōbatre de plusieurs sortes. Dōques si la chaleur de la fieure, & de l'air, sont de mesme brulantes, il ne faut rien oublier de ce qui les peut rafraichir: si sont moindres an proporciō.

Car on doit comparer les choses presantes, & egalier les remedes aus maus, sans se tenir toujours à certain point. Nous ne serons donc au soucy de raffraichir nostre air, sinon l'été: & alors plus ou moins, selon sa qualité. An hyuer il le faut moyennemāt echauffer. Le printams & l'automne il est assez moderé: de quoy nous deuons contanter. Car tel à nostre egard est nommē frais, tresēouenable à noz fieures. Ainsi est il des couuertures, qu'il faut accommoder aus condicions de l'air: c'est que an été il en faut moins, an hyuer dauantage: la saison tamperée tient le milieu. La nuit aussi et ordinairement plus fraiche que le iour, dont il faut estre mieus couuert, tant pour tant, la nuit que le iour. Et quand on dort, parce que les membres exterieurs se refroidissent, il faut auoir plus de couuertures quell'heure que ce soit: mais bien peu dauantage, si elles annuyent le malade fort echauffé du mal. Pour mieus faire il faudroit attendre que le malade fut andormy, & adonc luy jetter quelque chose par dessus: car si on le couure auant qu'il antre au sommeil, quelques fois cela le fache tant, qu'il en perd tout moyen de reposer. Moyennant la discretion, dressée d'un bon sans, par ces limitacions on pourra disposer & ordonner facilement des couuertures, & du raffraichissement, an toutes les especes de fieures, à tout'heure & toute saison. A quoy il faut aiouter la complexion
des

des jans, l'age & le sexe, qui suiuet le tempera-
mant. Car d'une mesme fieure, les vns seront
plus echauffés, les autres moins, selon que leur
chaleur avant la fieure estoit grande ou petite.
Ceus qui l'ont douce, & fort suauë, comme les
fames & les ansans, ne sentent pas telle ardeur
que les ieunes de trante ans, desquels le cors et
de soy mesme plus ardât. Et de ceus cy les san-
guins ou choleric, surpasset les autres en cha-
leur. Les vieus sont frois, dont ils ne peuuent a-
uoir les fieures si ardantes, comme dit Hippo- Hippo. 14
cras. Outre ce, à raison de la seicheresse leur liu. 1.
cuir et fort serré : aus fames & aus ansans, la
grand mollesse ampeche les pores d'estre ou-
uers. Les ieunes tiennet le milieu: d'ot il et mal
aysé de constiper leur peau. Par ces deus rai-
sons il ne faut pas tant craindre de raffraichir
bien l'air, quand vn ieune homme de comple-
xion fort chaude (& qui an santé mesme sam-
ble tout feu) ha fieure, comme si il estoit d'autre
temperamât: ne qu'à vn bon vieilhard, ou ieune
enfant, ou bien à vne fame. An cecy il y a
ancores plusieurs distinecions : car toutes fa-
mes, tous vieus, & tous ansans, ne sont pas d'une
condicion : les vns sont plus chaus que les
autres. Ainsi et il (pour faire brief) de toutes li-
mitacions, où il faut auoir egard d'approcher
le plus pres qu'on peut, de la portee d'un cha-
cun. Car il n'est pas possible de mettre an rei-
gle ces particularites. Il suffit bien qu'on sache

H

an general les cōdicions necessaires à bien cō-
duire les fieureus. Quant et de l'air & couuer-
tures, ie l'ay deduit si amplemant, que le dis-
cours an et prolix. Mais ie seray plus brieuf à
poursuiure le demeurāt, auquel pourront ser-
uir les raisons dessus alleguées, pour peu qu'o
ait d'inuancion à les sauoir accommoder.

Ce chapitre n'a point esté acheué, mais les deus ou
trois qui s'ensuiuet, y peuuet seruir, & estre accom-
modés.

SEPTIEME CHAPITRE.

*Contre ceus qui ne permettent aus Febricitans de boire
durant leur acces : & les autres qui veulent qu'ils
boiuent chaud pour suer plu-tost & mieus.*



Ay alheurs remoutré cōmant
il se faut gouuerner ez fieures,
pour auoir mieus & plu-tost
la raison, icy ie toucheray suc-
cintemant l'erreur de ceus qui
ampechet de boire les fieureus durant l'accès,
soit par force, ou par leurs remoutrances. No-
tre Hippocras dit bien en ses Aphorismes, que
ez accès il faut abstenir : mais c'est des forbi-
cions, & autres viandes : car il ajoute, qu'il est
nuisible d'aministrer pour lors de la viande.
Mais quant au boire, il est tresnecessaire pour
amortir la fieure quand ell'est an sa grand vi-

*Aph. 11.
liu. 1.*

Chapitre septieme. 59

gueur : & mesmes Galen ordonne de boire *Liv. 9. de la meth.*
 grand' quantité d'eau froide, au plus haut de *ch. 5.*
 la fieure ardante, & des fieures synoches. Or
 l'estat d'un accès repond à l'estat de toute la
 fieure cōtinue. Et quel dangier y ha il de boi-
 re vn bon trait quand l'accès et au sa vigueur
 Mais au contraire, cela profite grandement,
 & amortit plu-tost la fieure comme quand on
 jette force eau au feu. Ancor faut il auiser,
 que le breuvage du Febricitāt soit bien froid
 (nompas chaud, ainsi que plusieurs veulet) af-
 fin que le malade en suë plu-tost Car ceus qui
 l'ordonnet chaud s'abusent doublement: c'est,
 que de boire chaud, on ne desaltere point: &
 que le boire froid emeut autant ou plus la
 sueur, que feroit le chaud. Ce que chacun peut
 eprouver a part soy, s'il en doute: & il verra
 que tant bien echauffé & alteré, s'il boit bien
 frais, la sueur luy en viendra au front, quand
 bien ce feroit an hyuer. Dont puis que il y a
 & plaisir & profit, nous permettons, voire
 nous ordonnons aus malades qu'ils boyent le
 plus frais qu'ils pourront: & vn grand trait ou
 deus, selon que l'accès durera. Le vulgaire ha
 cela de mauvais, que cōme tout luy et suspet,
 à cause de son ignorance, & qu'il craint mes-
 me ez choses où il y a toute assurance, ainsi ne
 peut il accorder aucun plaisir aus malades,
 craignant de complaire à leur volonté, com-
 me si elle estoit toujours deraisonnable.

H ij

60 Des boulhons & orge-mondés
HVITIEME CHAP.

*Des boulhons & orgemondés qu'on balhe à
minuit, ou le matin, fort indiscrettement.*



Es boulhons & orgemondés, le plus souuant on importune les malades, qui n'y prenet aucun plaisir: & quelque fois on romt fort indiscrettement leur sommeil, par l'aministratiō de telle nourriture, ou à minuit, ou sur le matin: laquelle ne peut tāt valoir, que feroit vn bon dormir. Voila cōmāt le vulgaire et iniuste an deus fortes: l'vne, quand il ne permet au fieureus de boire raisonnablement: & l'autre, quand il le presse de viures mal à propos.

Certainement il n'y a rien de si bien ordonné, qu'on n'an abuse facilement: & sur tout, quand c'est de chose qui plait aucunemāt: mais ancor plus, si cela mesme ha quelque espece de alimant. Car le propos des viures et si plausible & agreable, que le vulgaire l'ambrasse tres-volōtiers. Le nom des drogues luy et fort odieus & horrible, mesmes tout ce qui viēt de chez l'apotecaire, sinon le sucre, l'ippocras, les biscuiteaus, le pignolat, les tartres de Massepā, confitures, & autres friandises. Dequoy ie ne m'ebays pas, ne le reprans aussi: car cela et fort naturel. le suis homme, & ressans l'infir-

mité commune: ie ne suis estrangier ou aliené d'aucune humanité. Je say que les medicamás sont contraires & annemis du bon naturel: & que s'ils estoient familiers ou amis de Nature, ils ne feroient tels effais, ains surmontés de nostre cors, seroient cōuertis an sa sustāce. Dont l'horreur que nous en auons, et chose fort naturelle, & non reprehensible. Ce que i'ay dit, et cōme an passant, affin qu'on ne m'estime Rhabartatif & facheus droguiste, veu mesmes que i'an vse bien souuant pour moy, cognoissant le besoin que i'an ay. I'ay voulu seulemant toucher ce point, tāt pour excuser le cōmun auers quelques medecins, qui n'ont grand pitié de ceus qui ne se peuuet accōmoder aus medecins: que pour accuser les delicas outre mesure, qui ne vouldroient que des boulhōs ou orges-mōdés pour se guerir, ou preuenir le mal. Ancores n'an vset jls ainsi qu'il appartient: car pour vn tel dejeuner ils ne rabbatet des autres repas ordinaires. C'est ce que ie veus reprendre, & leur remontrer commant les medecins l'antandent (au-moins ceus qui l'ont premiere-ment institué) & commant ie l'ordonne. Ces boulhons & orge-mondés de la minuit, ou du matin, sont pour triple occasion. L'une, an faueur de ceus qui ont faute d'appetit, & ne peuuet guieres manger à diner, ou à soupper: mais sur tout à soupper: auxquels pour recompance on donne quelque chose a la minuit,

62 Des boulhons & orge-mondés
ou le matin ansuiuant. La seconde et presque
samblable, de ceus qui ont grand faim & sont
presque insatiabls, comme au releuer d'une
grand' maladie. Car d'autant qu'ils ont l'esto-
mach affoibly. & ne peuuet tât digerer, qu'ils
pourroint bien mager à vne fois, on leur con-
seille de partir les repas: & parce que la nuit
(à cause du dormir, qui retarde la coccion de
l'estomach) on ne digere si bien que le iour,
nous ordonnons qu'ils souppet legierement;
& pour recompense, nous leur donnons sur le
matin vn boullon: comme si on gardoit le po-
tage du soupper, qu'on en auroit rabbatu, au
landemain matin, apres qu'ils ont dormy. Ce

Decad. 1. que ie dis, que le dormir retarde la coccion de
Parad. 8. l'estomach, et iustissamment prouué an mes pa-
radoxes, par viues raisons: desquelles i'an tou-
cheray vne, pour autant qu'elle sert à ce pro-
pos. C'est, que du diner au souper, commune-
ment il n'y a que huit heures: & du souper au
diner ansuiuant, il y en ha seize: sans qu'on ayt
plus de faim apres, qu'apres lesdittes huit heu-
res: supposee ancores, que ces deus repas soient
de mesme an qualité, & quantité, du mager &
du boire: brief qu'il n'y ayt autre differance,
sinon que l'un de ces repas est suiuy de la nuit
& du sommeil, & l'autre non. La troisieme oc-
casion est, pour alterer ou preparer le cors par
ce moyen delicat: sauoir est, le raffraichir, ou
humecter, inciser & attenuer les humeurs, de-


sopiler, faire vuidier le grauiier & les pierrettes des reins, prouoquer les fueurs ou menstres, & autres petis menus affaires, de moindre importance qu'il falhe mettre au besogne les remedes plus fors & mal plaisans. Dequoy vous verres vser infinies personnes au printàs, mesmemât ez moys d'Auril & de May, mais avec telle indiscrecion, qu'il leur fait plus mal que bien. Dont i'ay esté contraint de remontrer cette faute, suiuant le deuoir de ma charge. La faute et principalemant au ce, qu'ils ne rabbatent rien du diner & souper ordinaires, pour ces boughons & orge-mondés. Car s'ils dinct & soupent autât que de coutume, il est certain, que l'andemain matin l'estomach n'est pas vuide: & par consequant le boughon rancontre des matieres cruës, qu'il recrudist encore d'auantage: & les arrete pour se digerer aussi, iusqu'à la venue du diner: lequel se melant parmy cela, prand le vice & contagion de crudité. Ce qui est derechief rancontré du souper. Tellemant qu'il n'y a point de fin à tel desordre, generatif de flegme, si aucun le fut iamais. Si le boughon et de choses aperitiues, incisives & attenuantes, prouocatiues d'aucune excrecion, il fait bien pis. Car il pousse, anfonce & precipite les restes du souper cru dans les veines & arteres, où elles font des oppilacions, & causet des catharres, fieures, & autres mille maus: qui est bien pire, que si les humeurs crus

64 Des boulhons & orgemondés.
sejourner ou croupisset dans l'estomach & les
boyaus, où ils causent la colique, des tranchées
& bruit de ventre, dedain, mal de cœur, vomis-
sement, & semblables. Donc, quiconques
voudra user de ces boulhons alteratifs (com-
me et aussi nostre orge mondé) pour bien fai-
re, qu'il soupe legierement, à ce que l'esto-
mach ait digéré plu-tost que de coutume, &
qu'il se trouue pour lors vuide. Il faut faire,
comme si on gardoit vne partie de son souper,
pour landemain matin. Et quand on dineroit
apres, vn peu moins que de coutume, ce seroit
le mieus fait du monde. Voila comment il se
faut gouverner en ce fait, pour en sentir prof-
fit, & non dommage, comme il auient à la plus
part de ceus qui en abusent. Aucuns s'en trou-
uent bien, à cause que par faute d'appetit, ils ne
mangent guieres à diner, ny à soupper: qui est la
premiere occasion cy dessus expliquée. Et ie
ne doute point, que les premiers auteurs de ce
regime ne l'ayent ainsi antandu & pratiqué. De
cela mesmes on peut apprendre, que quand on
ha à prandre landemain quelque lulep, Apo-
zeme, ou Sirop (choses preparatiues, pour la
plus-part) il faut auoir legierement souppé,
affin qu'elles rancōtrent l'estomach vuide. Au-
tremant si ce sont choses aperitiues, elles pre-
cipitent les crudités aus veines & arteres, en au-
gmentant la cause du mal que nous voulons
combattre. Et quand cet inconuenient cesse-

roit (d'autât que toutes telles drogues ne sont penetratiues) il ne faut pas qu'elles rancontret quelque chose dans l'estomach. Car cela romt la force du remede, le detrampant mal à propos. Je remoutrera y ailleurs, combien il est requis d'auoir l'estomach vuide, lors qu'on prend medecine : & que plusieurs font mal, de manger & boire le soir auparauant, de tout à leur plaisir, esperans que la medecine amportera toutes les superfluitez. Tels propos se peuuent aisement accommoder à cetuy-cy. Car quoy que ce soit, boulhon, orge mondé, lait d'anesse, ou d'autre animal, iulep, ou autre droguerie, s'il ne trouue l'estomach vuide, & dechargé de la viande du souper precedant, ou il ne fait guieres de bien, ou il apporte grand detrimant. Si on me demande, que sert-il d'auantage de prandre des boulhons alteratifs & les orge-mondez au matin sans autre chose, qu'à diner ou à souper avec les autres viandes, veu que toute et alimât, qui se peut accorder avec le reste? Je respons, comme par cy deuant, que si telles choses se melet avec des autres, ou leur vertu se diminue, ou (si elles sont aperitiues) conduiset la viande auant sa meure concoction, hors l'estomach, & font plus de mal que de bien. Dont il vaut mieus que chaque chose soit prise à part, & de ne confondre les viandes avec ce qui est medecinal.

66 Du boire quand on se couche
NEUVIEME CHAPITRE.

si c'est mal fait, de boire à l'heure du coucher.

 Ette coutume et an Frāce (au moins
ez melheures maisons) d'auoir tou-
iours le vin de la colacion, & n'etre
iamais la nuit sans vin à la chambre:
combien que plusieurs abstienent de cette beu-
uette: les autres boiuet quelquefois, les autres
d'un ordinaire, à l'instant qu'ils se veuler mettre
au lit, plus par coutume, que cōtrains de la soif.
Le vulgaire de Lāguedoc ha vn commun pro-
uerbe contraire à cela: que qui se va coucher an
soif, se leue an santé. A quoy il samble que Hip-
pocras s'accorde bien, disant an ses Aphorismes:
Ceus qui la nuit ont appetit de boire, si ayans
grand soif ils s'andormet là dessus, ils font bien.
Mais on pourroit interpreter son dire, de ceus
qui s'euelhet an soif, nompas des autres qui ont
soif auant que dormir. Car il y a plus d'appa-
rance, de ne permettre de boire sur-nuit, & au
premier reueil, qu'auant le dormir. Et quant à
moy, ie ne trouue pas fort mauuais, que ceus
qui ont accoutumé de boire à leur coucher, le
continuet: ainsi que i'ay veu faire à feu mon pe-
re, plus de vint ans. Et i'ay ouy dire, qu'une des
plus nobles & illustres maisons de France, le
pratique ordinairement, ayant cette opinion,
que cela fait à la santé: de sorte que ses ansans y

sont nourris. Il est vray que la coutume est vn tyran qui ha grand' force, & bien souuent plus de pouuoir sur nous, que la Nature mesme. Cōbien que cette cy est legitime gouuernante, & & l'autre par vsurpacion. Toutesfois il ne faut pas mespriser la coutume, à cause du pié & auantage qu'elle a gagné sur nous. loint que (comme dit Galien) ceus qui s'acoutument à quelque chose, pour la plus-part elisent vne coutume conuenable à leur naturel, d'autāt qu'offancez coup à coup de ce qui ne leur conuient, ils le repudiet. *Liv. 5. de la cons. de santé.*

Toutesfois quelques vns, ou vaincus de la volupté & douceur, ou ne santant (par grand' folie] d'an estre offancez, continuet an mauvaises coutumes. Mais il y an ha peu de ceus cy: il y an ha plus qui n'y perseueret point. Et an vn autre passage, Il n'y a personne si stupide [dit-il] que etant offancé grandemāt de boire de l'eau froide, veulhe tirer cela an long vsage. Car an etant offancé & malade euidammant, il an abstiendra totallemāt. On pourra bien repondre, qu'il y a fort peu de ians qui veulhet commander à leurs appetis, voire qui veulet s'abstenir de chose q̄ ce soit, si les Medecins ne la leur deffendet expressement, & mesmes que ce soit par escrit. Autrement il leur samble n'y estre pas tenus. Voila la grand' reuerie, ne vouloir s'abstenir de ce qu'on eprouue & confesse estre nuisant à son naturel, sinon que le Medecin l'ait expressement deffandu: ancor y a-il bien affai-

Liv. 9. de la meth. cap. 10.

68 Du boire quand on se couche
re de le persuader. Vne sage personne & tam-
perante, luy-mesmes se fera aisement vn regi-
me de santé, sur ces experiances & observa-
tions, an la qualité & quantité de toutes cho-
ses, plus assuré que le plus sauant medecin du
monde, s'il y veut antandre sans se flatter au-
cunement. Mais laissons à part la coutume, &
mesme la nourriture, dez l'anfance: voyons s'il
y a quelque apparance de raison, qui persua-
de ou permette de boire quand on se va cou-
cher. Il me samble qu'on peut deffandre telle
procedure, an faueur de ceus qui y prennent
grand plaisir, & le font volontiers. Car, com-
me dit Hippocras du boire & du manger, ce
qui et vn peu pire, mais plus agreable, et me-
lheur que le contraire. D'auantage, supposé
qu'il y ait grand trait, depuis le soupper ius-
ques au coucher (comme de trois heures pour
le moins) la digestion et à demy faite. Dont il
n'et pas mal fait, de prandre vn peu de vin. Car
il s'accorde & accommode bien avec ce qui et
à demy cuit, le vin n'ayant besoin de long se-
jour à etre digeré: veu que c'est vne liqueur
facile à transmuier, & qui parfait la digestion.
Ainsi il ne retarde pas ce qui est ja fort auancé,
ains sera aussi tost prest à sortir de l'estomach,
que l'autre: à qui d'abondant il fera ce bien, de
le conduire plus auant: de sorte que le chyle
an penetrera mieus au foye. Aussi les plus aui-
sez, de ceus qui vset d'vn tel regime, le font

(comme i'ay antandu) pour cet egard, que la distribucion se fasse plus soudain, & le foye an soit humecté. Dequoy il s'ansuit (de leur auis) qu'on an repose mieus, & le dormir et plus plaissant. A cela fait aussi la douce vapeur du vin, laquelle humectât, le cerueau, andort plus fermement: par quel moyen, la seconde digestion et heureusement accomplie, & il s'en an suit quantité de bon sang. On ne peut icy objecter que la crudité, qui est à craindre, pour l'interrupcion de la coccion que l'estomach ha bien auancé. Mais ce n'est pas du boyre (& mesmemant du vin) comme d'un autre chose qui seroit de longue cuitte, ou qui epaissiroit d'auantage le chyle: lequel a raison de ce, pourroit trop sejourner, & estre mal aysé a distribuer. Le vin qu'on boit, et comme l'eau qu'on ajoute a vne souppe epaisse, qui autrement brulerait dans le pot. Et pour n'interrompre sa cuitte, les bōs cuisiniers la detramper avec du bouillon chaud, ou de l'eau bouillāte. A quoy repond le vin, qui de sa chaleur naturelle antretient, & fait mieus continuer la digestion, sans que telle interrupcion soit de durce, ou preiudiciable. Car soudain apres, la cuitte recōmance de plus belle, & est parfaite plus aisement: l'estomach se vuide mieus, quand son chyle est plus liquide, & le foye an ha melheure part. De cecy on peut colliger & conclurre, que telle collacion ne peut conuenir, sinon à

70 Du boire quand on se couche
ceus qui boiuent peu à leurs repas, & sur tout au
souper, lesquels mangeans bien, ne sont pas alte-
rez. Tels ne font pas mal de boire quelques heu-
res après, & ie pense qu'il leur est sain. Toutes-
fois ie n'ecris cecy, pour persuader à aucun de
recevoir cette coutume: moins voudrois-je ac-
querir la reputacion, d'auoir par mes raisons in-
troduit pour vn regime de santé, le boire après
souper, comme auocat des collacions nocturnes
(aussi vaut-il mieus de beaucoup, boire à ses re-
pas competamment, & à proportion de ce que
on mange) mais ie remontre par ce discours, que
ceus qui ont telle coutume, sont fondez en quel-
que raison: & s'il y sont nourris d'enfance, ils le
peuent sainement entretenir. Aussi, qu'il ne faut
l'ebayer, de ce qu'ils ne s'en trouuent mal. J'auois
vne tante, sœur de mon pere, mariee à Condrieu
an la maison des Villars, qui mourut fort aagée.
Elle ne falloit iamais de boire l'allant coucher,
vn grand trait d'eau, dans laquelle auoit tram-
pé vn gros quignon de pain, auiron vne heure
au parauant. Et continua cela plus de quarante
ans, toujours se portant bien. On dit pourtant,
qu'an fin elle mourut hydropique: ce que luy
pouuoit estre auenu d'autre occasion. Mais ie
n'approuue pas ce boire d'eau, à l'heure du cou-
cher: & moins ancor ce que font plusieurs filhes
& fames, trop suiettes à leurs appetis & fanta-
sies: qui ne font difficulté de boire deus ou trois
grans verres d'eau pure, simple, & froide, à l'heu-

re du coucher. Elles s'an vantet quelque foise
mais il n'y a pas touiours de quoy s'an rire, mes-
memant quand de ce desordre, elles ont ande-
puis vn mauvais estomach, le foye & la rate
pleins d'oppilacions: d'où procedet les palles &
vilaines couleurs, courte haleine, battemant de
cœur, suffocation de matrice, & à aucunes le vi-
ce de sterilité.

DISIEME CHAPITRE.

*S'il faut boire aussi chaud qu'on ha le sang, mesmement
en até: & s'il est mauvais de raffraichir le vin.*



A plus-part des opinions vul-
gaires, font doctrine de vielhes
ians, qui ayans vecu longuemât,
& veu beaucoup de choses, veu-
let tout reformer, & ranger les
autres à leurs appetis, sans distin-
guer des ages. Ainsi d'autant qu'ils sont tous
morfondus & frilheus, ils vouldroint que cha-
cun se verit & couurit de mesme eus, & ab-
stint de mille choses qu'ils santet nuisibles à
leurs personnes: comme le boire frais en até,
& diset, que chacun doit boire aussi chaud
qu'et son sang. Laquelle proposicion i'accor-
de, pour leur respect seulemant: car ayans le
sang froid, comme aussi tout le cors, ils n'ont
besoin de grand' fraicheur. Mais le ieune hom-
me qui ha le sang boulhant, ne seroit iamais de-

salteré s'il beuvoit ainsi chaud, n'ompas mes-
 mes ainsi tiède qu'et le sang tameré an æté.
 Car la soif et vn appetit de froid & humide: &
 et causee non naturellemant de tout ce qui e-
 chauffe, ou qui desseiche. Commant donc la
 peut-on appaiser, sans fraicheur humectante:
 L'experiâce demoutre assez cuidammant, que
 si on boit chaud, c'et à recommancer: parce
 qu'on ne se desaltere pas. Pour conclurre ce
 propos, ie diray ancores ce mot, que s'il estoit
 sain de boire autant chaud qu'on ha le sang, les
 vielhes ians auroint à boire beaucoup plus
 frais que les ieunes: chose par trop absurde, &
 ridicule. Il y a vn' autre opinion plus commu-
 ne & d'apparance, de ceus qui aprouuet bien
 le boire frais, tel qu'il sort de la caue ou du
 tonneau, & l'eau venant du puis ou de la fon-
 taine, mais n'ompas que l'vn ou l'autre soit raf-
 fraichy. Donques on sera commandé de la dis-
 posicion des caues, selliers, puis, & fontaines:
 tellemant que qui les aura fraiches, il an aura
 le plaisir, & les autres soustiendront vne grand
 facherie pour leur santé, quand ils n'oseront
 raffraichir le vin, l'eau, ou tous deus. Mais (ie
 vous prie) qu'importe-il de mal, que le breu-
 uage soit frais, ou de l'air qui le contient, ou de
 l'eau dans laquelle il trampe? Si l'eau n'et mal
 saine de sa froideur quand elle sort du puis, de
 la fontaine, citerne, ou riuiera, elle ne randra
 pire le vin qui an sera alteré & raffraichy. Le
 fuis

suis contant qu'il ne soit pas si sauoureux, mais il ne fera pas moins sain, que celuy qui sortira frais d'une caue bien froide: veu que le rafraichissement ne luy peut apporter aucune mauuaise qualité. Reste que ce soit la seule froideur, que l'on decrie tant, d'où qu'elle procede. Mais quoy? il y a du vin rafraichy, qui est moins froid qu'un autre sortant du tonneau, lequel on ne condamne pas. Et que ne crie l'on encore plus, du boire glacé qu'on fait an hyuer? Et il possible de boire si froid an æté, qu'il gele ainsi les dans, & souuant ampesche de boire si long trait, qu'on voudroit bien? Toutesfois vous n'oyez personne, qui vulgairement reprouue cela: ains au contraire, la plus-part trouue mauuais, qu'an hyuer on echauffe le vin, ou l'eau. Sont-ce pas des ians du tout contraire à Nature, qui la veulet forcer à mode de geans? Noz cors an æté sont boulhans, brulez & asseichez: nous ne boirons pas frais, & abondamment pour resister à l'intamperature & inclemance de l'air, qui conuertit noz humeurs dous an amertume [qu'on appelle cholere] de quoy procedet les fieures tierces & ardantes, les dysanteries, & autres diuers maus qui regnet an æté? Et an hyuer, que nous sommes transis & contraints de froid, tous rheumatiques & morfondus, nous boirons de la glace? Les appetis non recherchez, ains spontanees, sont pour la plus-part conduis de Nature, à laquelle

74 Du boire quand on se couche
ils appartenet. Dont il leur faut cōplaire avec
raison & mesure: cōme de resister au froid par la
chaleur, & au chaud par son cōtraire. Autremāt,
les saisons de l'annee nous causet mille maus,
par l'alteracion de l'air: lesquels on peut preuenir,
par le droit vſage des choses que Dieu nous
donne au tams opportun, & lors qu'elles cōueni-
ent. Et ce au vain, ou plu-tost d'une grand' pro-
uidāce de Nature, que les puis, fontaines, & ca-
ues sont plus fraiches au été, plus chaudes au hy-
uer? Et qui n'a telle cōmodité de soy, ne la doit
il pas contrefaire par artifice? Et ce au vain, que
les fruis humides & frois sont produis au été, &
lors qu'ils nous sont necessaires, au hyuer point:
& que adonc le vin cōmance d'etre en sa force,
venant bien à propos pour nous armer cōtre le
froid? La ramee faisant vmbrage nous defend
du Soleil au été. Elle ne seroit pas ainsi propre
au hyuer: aussi ne l'auōs nous pas naturellemāt.
Qui n'a de l'ombre au été, au moyē des bocca-
ges, tonnes & treilhes, fait-il mal de la cōtrefaire
d'une frescade? Certainēmant cōme il est proffi-
table d'vser au été de ce qui raffraichit, & au hy-
uer de tout ce qui echauſſe, ſuiuant la raison na-
turelle, & l'auis des plus sages (qui sont les plus
sauans) aussi est-il bien proffitabile, d'employer
ce qui ha de-fait les qualites requises. Mais que
faut-il tant s'arreter, à impugner des erreurs si
grossieres, & des personnes qui n'ont proposi-
cions certaines ou repondantes l'une à l'autre,

ainsi qu'il appartient à vne vraye doctrine? Car
an samblable fait, telles ians se contrediset fort
lourdement: cōme des fruis qu'on mange pour
se rafraichir. Y a-il psonne qui ne trouue mau-
uais qu'on mäge des cerises, prunes, figues, rai-
sins, melōs, & sãblables, tãdis qu'ils sont chaus
du Soleil? On les fait rafraichir, les vns dãs v-
ne caue, les autres dans l'eau froide. Et pour-
quoy ne boira-on aussi bien du rafraichi, pour
se desalterer? Il y a biẽ des artifices qui peuuet
estre suspects, cōme de mettre dãs le vins ou de
la glace, ou de la neige: item de trãper les bou-
telhes dans l'eau qui ait du salpêtre cōbiẽ que
le salpêtre ne soit tel, qu'õ n'an puisse biẽ aual-
ler sans dãgier. Mais de trãper les bouteilles an
eau simple, qui soit bõne à boire, quel mal y a-
il, puis qu'on boit bien d'icelle mesme eau, &
seule, & avec du vin? Ou quel dãgier y peut-il
auoir, q̃ le vin & l'eau soient rafraichis an Pair
du puis? Quelcũ pourroit icy obietter la Coli-
que: & biẽ, ceus qui y sont suiets, ou q̃ se trou-
uet autrement offancez de boire froid, qu'ils ab-
stiẽnet non seulement du refroidy, ains aussi de
celuy qui est frais de soy mesme. Car c'est le de-
voir, & vne grãd' sagesse, de n'vser de chose q̃
on ait qlquefois eprouuẽ nuisante à sã nature:
mais d'y rãger les autres, il n'y a point de raisõ.
Ou il faudroit, q̃ le fourmage fut du tout cõdã-
nẽ, pource qu'il nuit aus graueleus: & q̃ chacun
abstiat du vin, parce qu'il fait mal aus gouteus.

76 Du dormir fraichement en été.
Y ha il rien plus iniuste & tyrannique, que de
vouloir assuiettir a ses appens ou fantimans, les
autres qui sont de differante complexion? A
cela vienent les bonnes ians, qui reprouvent le
boire frais, & conseilhet a tous de boire autant
chaud qu'on ha le sang.

ONZIEME CHAPITRE.

*Contre ceus qui se plaignent an été, de la chaleur des
nuis: & cependant ils couchent sur la plume,
les fenestres fermées.*

NOUS voyons plaindre ordi-
nairement les ians en été, de
l'extreme chaleur de la nuit,
plus que du iour, an vn mesme
lieu, comme dans la maison, &
mesmemant ez chambres où
lon couche. Lesquelles si on considere, sont
comme des fours, ayans l'air etouffé, à faute de
les euenter souuât, & tenir tout ouuert aus heu-
res que le Soleil n'y donne point: & de les ra-
fraichir souuant d'eau bien froide, avec vn peu
de vinaigre, & force feulhes, à qui an ha la com-
modité. Car de laisser les chambres durant l'æ-
té, en mesme estat qu'ez autres saisons, il ne se
faut pas ebayr si on y brule. Que pis et, la plus
part des ians couchent sur la plume, tout ainsi
qu'an hyuer: & ne font differance des lis, sinon

quant à la couuerture qu'ils prennent plus legiere an æté. Rien ne sert de m'alleguer, que tous n'ont le moyen d'auoir des matelats à part les coittres: car il vaudroit ancor mieus coucher dessus la palhe, ou dessus la poussiere de blé, ou de l'auoine (chose fort delicate) qu'on nomme autremant Balouffe. On y et vn peu plus dur que sur la plume, mais la fraicheur & l'aïse qu'on en ressoit, recompanse bien cela: mesmes que le sommeil y et plus gracieus, suau & paisible, sans comparaison. Et an toutes choses, il n'y ha que l'accoutumance. Que la palhasse soit bien plainne, & la palhe bien remuee, on y et assez mollement: & au reste bien fraichement, avec vn plaisir nō pareil du plaisant dormir qu'on y prand. Vn autre erreur non moindre et, de tenir les fenestres fermees toute la nuit: mesmes quand on ha commodité de rideaus, ou de pavillon, qui deffandent du vant, si parauanture il s'eleuoit randis qu'on dort. Car quant au froid simple, il ne le faut ainsi craindre: veu qu'il n'et iamais si froid an æté, les fenestres etans ouuertes, qu'il et an hyuer tout etant bien fermé, mesmes avecques des chassis, dans vne chambre natee & tapissee, an laquelle tout le iour y ait eu bon feu. Qu'ainsi soit, il vous faudra encore plus de couuerture etāt au lit (sur peine de sentir froid) qu'il ne faut an æté, les fenestres etant ouuertes. Si on ne craind pas vn tel froid de la chambre an hyuer, pourquoy le craind-on an æté: lors

78 Du dormir fraichement en æté
mesmes qu'il ne peut estre dit proprement froid,
ains tiede & tâperé? De craindre le serain sous
vn couuert, & lit ancourtiné, c'est abus: com-
me on peut aisement comprendre du discours
que i'an ay fait ailleurs. Car il n'y ha aucune
qualité an l'air exterieur du serain, dont il le
faihe ampecher d'antrer aus chambres. Il n'y a
que la fraicheur ou qualité fraiche, bien re-
quise au repos & dormir plaissamment. Et qui
et celuy, qui ayant à choisir an æté de deus
chambres, l'une bien chaude, l'autre bien frai-
che, etans sur vn mesme plancher, ne choisit
plustost la fraiche? Donc si on peut commode-
ment rafraichir celle qui est chaude, comme an
tenant les fenestres ouuertes, depuis le Soleil
couché, iusques an matin, quel mal y aura-il?
supposé, que l'air libre de la rue ne soit pire
(sinon meilleur) que celuy de la maison anclos
& etouffé. Ceus qui couchent aus champs, gar-
dans le betail, ou les fruis, & les soldas an cam-
pagne à l'ansigne des estoilles & de la Lune,
contre vne haye, ou sous vn arbre, ou an des
petites loges & cabanes, pour se garantir seu-
lement de la rosee & du vant, dorment sans com-
paraizon plus sainement (outre le plaisir inesti-
mable) que ceus qui s'anferment dans les mai-
sons. I'experimante le samblable, avec toute
ma famille, & les habitans de ma maison: y
ayant mis la coutume, de laisser ouuertes les
fenestres de toutes les chambres au gros de l'æté.

té, durant la nuit : & les tenir bien closes, avec des contrefenestres, tout le iour. Si on craint d'estre surpris la nuit de quelque fantimant de froid, qu'on ait au pié du lit vn' autre couuerture de secours. Et combien de fois auient-il de mesmes an hyuer, qu'on s'euelhe pour le froid que l'on sent extraordinairement suruenir? à quoy on remedie de mesme sorte, sans faire grand cas de cela. Mais on repliquera, qu'il et pire an æté, d'autant que les pores sont plus ouuers de la chaleur du iour. Et bien, il y a remede, à se couurir dauantage dez l'antree du lit. Car il et raisonnable, que lon se couure plus ou moins, selon la fraicheur de la chambre. Ce pendant on ha cette recreacion & ce profit, que l'air qu'on inspire et frais, & non estouffant: ce qu'il faut principalement rechercher. Car nous ne voulons pas, que le froid touche le reste du cors echauffé: ains seulement le visage, pour la bouche & le nez, par où nous respirons. Aussi c'est le vray moyen de rafraichir tout le cors, an raffraichissant le cœur, le poumon, & le cerueau, le tout par dedans. Car le froid surprenant par dehors la superficie du cors, an constipant les pores, redouble la chaleur, & donne plus grand malaise, alteration, inquietude, lassitude, & autres facheus accidans, à cause de laditte chaleur, conceue aus antrailhes & aus iointures.

{ I iij }

DOVZIEME CHAPITRE.

*Que les boudins ne valent rien gardeZ : & que de là es-
venue la coutume d'an faire des preJans.*



Le sang et estimé mauuaise vian-
de, de quelque animal que ce
soit, & comme qu'on l'aprete:
parce que tout incontinant qu'il
et hors de son lieu (ce sont les
veines & arteres, qui seules ont pouuoir de le
contregarder an son integrité) il commâce à se
corrompre & gater. Dont qui an veut vser, il ne
doit attandre longuemant: Car touiours il de-
uient pire. La friādise ha mis beaucoup de vian-
des à l'vsage de l'hōme, qui sont mauuaise nour-
riture. La chicheté & pauureré an ha introduit
d'autres, qui sont autāt pernicieuses. Le sang de
beuf et bien de celles qu'on vse plus par grand'
nécessité que par delicateffe, veu le peu de gout
qu'il y ha. Celuy de mouton vaut bien mieux,
comme sa chair et plus friande. Mais de vray, le
melheur ne vaut rien à manger, & seroit bon
qu'on les ietta à la mode de Frāce, où le sang de
tels animaux n'est point ressu antre les alimans,
ains réputé poison ou excremant. Des brebis il
et pire que des moutons, tout ainsi que leur
chair. Quant à celuy des boucs, ie ne panse pas
qu'on en vse, sinō an medecine, pour dissoudre
les pierres de la vescie: à quoy il et estimé pro-

pre etant bien preparè. Le sang des chienres ha
 etè de requete & prise de l'ancièneté (cōme te-
 moigne Homere) estimé friandise. On y me-
 loit beaucoup de graisse, & de cela on ramplif-
 soit les boyaus ou le vandre de tels animaux:
 d'où ie pāse que noz boudins ayent leur origi-
 ne. Mais il ne se faut prādre au gout, & moins
 au iugement des jans de ce tams là, qui ne co-
 gnoissoint pas ancores les viādes plus suaves,
 & de facile digestion, comme dit Galen. Au-
 iourd'hui on ressoit ledit sang, & melé de per-
 fil, ou autres menues herbes, avec le gras du
 lard, il est estimé de bonne sorte, plus que les
 dessusdis, auxquels on n'ātremele rien. Le sang
 des agneaus & des cheureaus et appretè com-
 me le precedant: & et d'autāt plus delicat que
 leur chair et friande: dont celuy du cheureau
 precede l'autre. Mesme appareil sert au sang
 des poulets, poulles, & chappōs: lequel est pri-
 sé sur tous autres de nostre tams. An Italie on
 ne saigne point la poulalhe, ains on luy romt
 le cou, où il s'amasse beaucoup de sang, & fait
 cōme vn boudin, qu'on estime fort sauoureux.
 Et de vray il en est bien melheur, que si l'air y
 auoit touché: car la peau du cou le cōserue, &
 garde de corōpre. Les anciens ont fait grand
 cas du sang des lieures, ou leuraus: mesmes au
 tams de Galen, tel sang estoit le plus recōman-
 dè, & comme viande tres-delicate, qu'on fai-
 soit cuire avec son foye. Le sang des porceaus

*Gal. liu. 3.
 de la fac.
 des alim.
 ch. 18.*

aujourd'huy ha les pl^s gr^s h^oneurs, veu qu'il et departy & presanté aus plus prochains amis, an forme de boudins. Le peuple ha obserué de longue-main telle coutume, ne sachant bonnemât pourquoy il le faut ainsi pratiquer. Il le prend comme symbole de beneuolance & amitié: ou bien parce qu'õ an ha beaucoup, on an veut faire part aus autres, attendât mesme gratuité. Ce que sert d'an auoir long tams de frais, quand chacun à son tour veut randre la pareille. La premiere cause et honneste, car aussi pour faire presant de boudins, qui soit plus h^onorable, on y ajoute vne p^ene de foye, & aus vns la ratelle, aus autres vn des filets, ou bien des hautes coutes: les moindres sont, où il y a du rognon, ou du poumon. Tout cela et couuert de la coiffe ou crepine, laquelle on talhe an autant de pars, qu'on veut ordonner de presans. Toutes ces pieces sont l'anrichissement de noz boudins: lesquels principalement signifiet (si on le veut ainsi prendre) quelque affecti^o cordiale, & cheric, c^ome le sang. Lequel denote aussi l'amour: parce qu'il sort du foye, où Platon luy ha d^oné siege. D^oques on veut moutrer vn line d'amitié, quãd on anuoie du sang: mesmes tel qu'on estime & sain & delicat. L'autre raison ha lieu antre ceus qui prisent l'atretien de sant^e, & obseruet diligemment la qualité des viandes. Car le sang quel qu'il soit, ne peut guieres durer sans estre cor-

rompu de l'air. Et pourtant on ha auisé de mettre celuy des pourceaus (qu'on estime si delicat) dans les boyaus, qui de leur epaisseur le contregardet mieus. Dont les melheurs boudins, sont ceus qu'on fait le sang etant ancores tiede. Depuis on le fait parboulir, tant affin qu'il se garde mieus (comme la viande cuite) que pour le pouuoir departir commodement. On met parmy le sang, pour le preseruer plus lōg tams, du sel, du thym, & serpoulet. Aucuns y aioutet du fenoul, les autres vsent de mario-laine, persil, hyfop, & autres herbes menuës, de bon odeur, excepté la sariete, parce que le peuple estime faussement, qu'elle peut ampecher que le sang ne s'epaississe quād on le cuit, veu qu'on le donne aus malades, pour dissoudre le sang calhé. La graisse n'y et pas hobliee an bonne quantité, sinon des chiches fames, lesquelles on taxe honnetement, an les nommant bonnes menageres, quād elles y ont bien epargné la graisse. Mais si les boudins ne sont gras, ils sont mal sains, d'autāt qu'ils sejourner long tams à l'estomach, & sont tard digerés, à cause de leur apreté & seicheresse. La graisse les fait mieus glisser: dont ils an sont moins dangereux: comme les autres viandes mauuaises, quād elles n'arrettet gueres au cors. Quoy qu'ō y fasse, le melheur et d'ā abstenir du tout, ou an vser fort sobremant, & que les boudins n'aient passé un iour ou deus pour le plus tard.

Voila pourquoy l'institution et bonne de les distribuer. Car de les garder longuemant, ils deuient tant pernicious, qu'on les peut bien nommer poison. Vne fame de Mompelier jadis an moutra l'exemple, comme l'on dit. C'est, qu'elle mourut suffoquee pour auoir mangé des boudins gardés. Elle pansoit bien menager, de n'an donner à personne, & ne manger autre viande tant qu'ils pourroint durer. A peine les eut elle acheué, qu'elle mourut, de meme qu'on meurt d'une poison.

TREIZIEME CHAPITRE.

Contre ceus qui craignent par trop la saignée, & ont opinion que la premiere sauue la vie.



'Autant que le sang, et le tresor de nature, alimant des esprits, & le sujet de la chaleur naturelle (qui gouuerne le cors an toutes les operations) on fait bien de l'auoir cher, & le garder sogneusement, comme état necessaire à l'antretien de noz forces, & conseruacion de santé: dont il ne le faut laisser perdre facilement, an faisant peu de cōte: mais aussi on doit obseruer deus choses principalemant: l'une, qu'il soit bien pur & net de toutes immondices: l'autre, qu'il n'abõde rien trop, ancor qu'il soit bon an toute

perfeccion. Parce que fil et depraué, immonde, & laid, il nuit plus qu'il ne proffite. S'il et demesuré, il met les vaisseaus an dāger de creuer, & la chaleur de s'etaindre. Parquoy il ne faut rien craindre quand il et si copieus, d'an vuider vne partie, pour faire place au nouveau qui s'angeandre incessamment. Aussi quand il et echauffé & boullant, à cause de la fieure, si on ne luy fait ouuerture pour expirer (comme on donne vant au vin nouveau) il met la personne an grand dangier, & la tourmente estrangemāt. Quand il et corrompu des mauuais humeurs, & an grand' quantité, auant qu'il soit du tout gaté, ou an vuide quelque porcion, affin de nettoyer plus aysemant le reste par medecines : lesquelles separet & triet de parmy le sang lesdits humeurs, & les chasset dehors : dequoy elles meritent le nom de purgatiues. Il ne faut donc pas decrier simplement la saignée, comme ennemie de nature, & l'auoir an telle horreur que plusieurs l'ont (suiuans Erasistrate, qui appelloit sanguinaires, & estimoit meurtriers, ceus qui la conseilhoient) puisque vn grand nombre de maladies qui procedet des sudittes causes, ne peut etre aboly, sans recourir à ce remede. Quand la fieure et fort vehemante, le visage inflammé, & les veines anflees, la saignée n'et elle pas requise? Si on et estranglé d'vne Squinance, ou suffoqué d'vne inflammation de poumon, ou

36 De ne craindre la saignée
d'une vraye pleuresie, il n'y a rien qui secou-
re plu-tost, & interrompe si promptement le
mal, que la prompte saignée: laquelle gene-
rallement conuient à tous desordres fais d'a-
bondance & surcharge de sang, quel qu'il soit,
bon ou mauuais. Je m'esbay de quelques vns,
qui prandront plus volontiers vint medeci-
nes, que d'andurer vne saignée leur etant ne-
cessaire, veu sa grande commodité, & non
moindre facilité. Car on y peut obseruer iu-
stemant la mesure, qu'il nous plait de vuidér:
on l'arrete quand on veut, & elle peut estre
reiterée pour n'affoiblir le malade à vne fois.
La medecine n'est pas de mesmes. Car bien sou-
uant elle vuidé plus qu'on ne voudroit, & il
n'est pas à nostre puissance, de la faire cesser
quand il nous plait. Ce sont de grandes in-
commodités, outre le mal de cœur, l'angoisse
d'estomach, & les grandes extorsions de van-
tre, qu'elle donne le plus souuant. Or quand
on est phlebotomé, si on voit sortir du mau-
uais sang, il se faut persuader que le meilleur
demeure dās le cors: & se reiouit de telle vui-
dange. Si le vuidé est beau, croyés que le de-
meurant est encore plus louable, & que cela y
estoit de superflu. Quelqu'un pourroit iuger,
que ce moyen de curacion est contre le deuoir
de Nature, laquelle ha soin de conseruer le
sang comme vn sien tresor. Auquel nous re-
pondrons, que c'est elle mesme qui nous ha

enseigné, qu'il faut an plusieurs maus vser de ce remede. Car le flus de sang menstrual aus femelles, nous moutre euidamment, que l'abondance peut estre domageable, si elle n'est tantost euacuee. Et pourtant Nature mesme luy ordonne passage, nompas vne fois l'an, mais tous les mois. Et si pour quelque ampechemât ce sang et retenu, la fame s'an trouue mal. C'est vne reuerie de panser qu'il doit estre vuidé, comme etant du tout inutile, mauuais, & venimeus, veu qu'un enfant an et fort bien nourry dedans le vautre de sa mere. Autrement, pourquoy feroit-il supprimé durant la groisse, pouuant bien estre mis dehors sans toucher à l'enfant? C'est par les veines du cou de l'amarry, par où se purget celles qui ont encore plus de sang, que leur fruit n'an peut consumer. Pline raconte, que les herbes touchees de tel sang meuret, & le fruit choit des arbres sur lesquels monte la fame menstrueuse: que l'yuoire an perd sa lueur, & le fer son tranchant: que les chiens pour an auoir gouré deuiennet anragés, & s'ils mordet quelqu'un apres, il n'an guerira iamais. Les autres diset, que le sang des ladres n'est pas pire que cetuy là. Je ne croy rien de tout cela: car il faudroit que les femelles eussent de plus estranges maus, qu'elles n'anduret par la suppression de leurs menstres: outre ce que l'enfant an seroit mal nourry. Il est donques plus superflu de quantité

*Liv. 7.
ch. 15.*

88 De ne craindre la saignée
que de mauuaise qualité, si ce n'est d'estre cru &
phlegmatique. Celuy qui sort par les hémor-
rhoïdes et souuent plus mauuais, que le sang
menstrual: car c'est de la melancholie, le pire
des humeurs, & qui versé à terre la fait boullir
côme le fort vinaigre. Mais il est rarement syn-
cere & pur. Car tout le plus gros sang aborde
aus veines hemorrhoidales, pour estre mis de-
hors, quand Nature l'a ainsi ordonné, au grâd
proffit de tout le cors. Voila deus sortes de
vuidange de sang, faites par Nature, qui mou-
trent bien euidammât ce que nous deuons fai-
re, quand nous cognoissons le besoin, & que
Nature n'y peut pas auenir. Et si on dit, que ces
cas proposés le sang est vuidé à raison de son
vice tant seulemant, on accorde par là, que la
saignée est profitable, quand le sang est ansam-
blemant vicieux & an grand abondance. Car
s'il n'est que vicieux, il est retenu au cors pour
la prouision de sa nourriture, & n'est point re-
ietté. Mais que dirés vous, de ce que bien
souuent le sang n'est pas corrompu, Nature
en met dehors vne porcion, pour soulager les
veines qu'il anfle outre mesure, & allegier le
cors d'une grieue pesanteur? C'est le profit
que plusieurs sentent de saigner par le nez. Dôt
si nous voulons ampecher & desaccotumer
Nature de ce passage là, il luy faut donner au-
tre yssue par certains laps de tams, ainsi que
nous le voyons abonder. Car autrement d'a-
uoir

voir clos le passage, sansuiuroint plusieurs maus: comme des veines qui se creueroient dās l'estomach, au poumon, ou ailleurs: dequoy procedet le cracher & vomir de sang à quelques vns. Quoy? plusieurs maladies, autremāt dangereuses, guerisset par grande effusion de sang au iour critique, & le mal de tæte souuāt se perd, apres qu'on ha saigné du nez. Tous ces exemples moutret bien, que suiuant l'œuure de Nature, les medecins (qui ne sont que ses ministres) doiuent quelque fois amoindrir la quātité du sang, qui menace diuers maus, ou les cause de fait. Serōs nous moins dociles que les bêtes deraisonnables, lesquelles aprises de nature cognoisset l'vtilité de la saignée? Plinē ecrit, que l'Hippopotame se sentāt fort replet, *Lin. 8. ch. 26.* cherche des cannes talhees fraichement, & trouuant vne bonne pointe, il la presse contre sa cuisse, pour ouurir la veine: par ce moyen allegeant son cors, qui sans cela deuiendrait tost malade. La chieure aussi ayāt la veue trouble, se blesse an l'œil d'vn ionc poinctu, voulāt *Lin. 8. ch. 50.* decharger cette partie d'vne porcion de sang: ainsi que le mesme auteur recite. Il y a beaucoup de personnes, qui ne reprenet la saignée, sinon pour autāt qu'ils ont veu mourir des jās, apres qu'on les auoit saignés. Mais leur argument samblera fort legier (ou plu tost ridicule) si nous sommes persuadés (cōme il et vray) que toutes maladies ne sont pas guerissables, pour

90 De ne craindre la saignée
le regard du sujet. Et que celles qui sont neces-
sairement mortelles, meprisent tous remedes
dont la saignée, bien qu'elle soit sagement or-
donnée, ny peut de rien seruir, comme l'effet
temoigne. Mais qui veut neantmoins attribuer
l'occasion de mort à la phlebotomie, pource
que la mort l'a suivy, on luy pourra dire par
sensible raison, que les jans meurent pour auoir
dîné, souppé, ou dormy, d'autant qu'ils meurent
quelque tans apres. Si on voyoit mourir vn
homme ce pendant qu'on le saigne, il y auroit
grand' apparence que tel remede n'y conue-
noit pas, ou qu'on l'a mal aministré. Toutes-
fois il faut toujours prandre an la melheure par-
tie, ce que nous est incertain, & n'accuser legie-
rement de faute le medecin qui ha ordonné la
saignée, bien que le mal n'ayt prins fin à l'auā-
tage du patient: & panser, que la malice &
grandeur de la maladie, & nompas le remede
anichilant ses forces, l'a precipité à la mort.
I'accorde bien, que plusieurs fois on saigne
mal à propos, & que les medecins ignares y
cōmettent de lourdes fautes: toutesfois le vul-
gaire n'an peut, ne doit iuger. Ou il fera sou-
uent grand tort aus plus sauans: car de tous in-
differammāt, il an dira autant. I'an ay oy d'au-
tres qui disent, ne se vouloir accoutumer à cet-
te faſſon de remede, le reseruāt à quelque grād
& extreme besoin, cōme pour l'immināt dan-
ger de mort. Car ils ont ferme opinion, que la

premiere saignée sauue la vie infailliblemât. Il
 et biē vray (& il faut ainsi parler) qu'ō ne meurt
 iamais de la premiere : car si on mouroit cette
 fois là, on ne seroit plus saigné : & par cōsequāt
 telle saignée ne seroit propremāt ditte premie-
 re, ains vnique : d'autāt q̄ premier et relatif au
 segōd, & aus autres ansuiuās. Mais q̄ la premie-
 re sauue la vie, comme ayāt plus de propriété,
 c'est vn erreur de ja fort decouuert par longue
 experiāce, qui enseigne le cōtraire. Car on an
 voit tous les iours mourir de diuers accidans,
 ausquels la premiere saignée n'ha pu reme-
 dier : & mille personnes guerisset de fort etrā-
 ges maladies par la phlebotomie, qui ont sou-
 uant v̄sē de cē remede. Cette opinion est par
 trop dangereuse & prejudiciable, d'autāt que
 les maus sont petis à leur commencement : &
 pour lors peu de malades se desiet de la gue-
 rison. Or ceus qui suiuet telle fantasie, refu-
 set la saignée aus premiers iours, la voulans re-
 seruer à plus grand' maladie, & à l'extreme ne-
 cessité. Ce pendant l'occasion (que Hippo-
 cras à bon droit appelle soudaine & prompte)
 nous echappe : & puis quand le paciant, fan-
 tant l'extremité, commence de s'y accorder, il
 n'est plus à propos. Touchāt à l'accoutumance,
 tant s'en faut qu'elle puisse porter dommage,
 que plu-tost elle nous y sert de beaucoup. Car
 celuy qui est coutumier à se faire tirer du sāg,
 pourueu que la force n'an soit euidammanē

*Aph. 1.
 liu. 1.*

Ap. 49.
liv. 2.

diminuee) il l'andurera plus gayement qu'un autre: tout ainsi que les maus ordinaires & ja accoutumés, sont moins facheus: suivant l'Aphorisme d'Hippocras, que ceus qui ont accoutumé des trauaus, cōbien qu'ils soient foibles & vieux, ils les portet mieus que les robustes & ieunes. Donques il ne faut pas tant priser la premiere saignée, & la saignée an general ne doit estre ainsi suspecte au peuple, quād vn sauant & sage medecin l'ordonne, puis que ce remede nous et ansegné de Nature, & et fort aysé, seur, & profitable à plusieurs fortes de maus.

QUATORZIEME CHAP.

Qu'on peut saigner les fames grosses, les enfans, & les vieux.



E peuple ha su quelque fois des medecins, qu'il et dangereux de saigner les fames acointes, les enfans, & les vieux. Maintenant si le medecin le veut faire, on estime que ce soit vn acte nouueau, temeraire, & hazardeus: & si il auient que le malade meure, ce remede sera non seulement reprouué, ains reproché bien aigrement: nonobstant que le mal, & nompas le remede, ait fait mourir le malade. Si

on s'en trouue biẽ, c'est (à leur dire) plus de cas fortuit, que de bonne conduite. Dequoy il ne se faut ebyr, puis que noz peres ont eu cete mesme opinion, & l'ont persuadé au peuple. Je dis, noz peres, les medecins qui ont esté depuis deus ou trois sans ans. Ils antandoient, que Hippocras & les autres anciens, auoient enseigné, que c'estoit vne grand' faute: & combien que souuant la saignée leur sembla necessaire, ils ne l'osoient pas ordonner. Mais s'ils eussent bien leu les liures de ceus qui ont de plus pres suiuy les premiers Medecins, & sont presque au milieu d'Hippocras & de nous (quant au tams de leur vie) Grecs & Latins, jans rares an fauoir, & cõsommés an methodique experiance, ils eussent mieus antandu l'auis de noz bons auteurs, qui souloient an peu de parolles creuẽmãt ecrire leurs reigles. Car pour finifier, que la force du paciãt et sur tout requise au fait de la saignée, ils ont dit, que les vielhars & les ansans an doiuet estre exans: & ont ancor de plus pres limite l'age qui la peut andurer, de quatorze iusques à soissante ans: pource que ceus qui demeurent dessous ce terme, ou qui le surpasset, communemãt n'ont pas les condicions que y sont requises. L'ordonnãce et an general: de laquelle on peut dispanser & disposer particulieremant, sans contreuenir à l'intancion de ses auteurs, comme si on rancontre (ce qui auient bien souuant) vn enfant de bonne

94 De saig. an tout age, & fam. gro.
charnure, ferme & epaisse, etant fort & vigou-
reus, ou vn vielhard robuste, lesquels ayet
grand besoin de saignee, à cause de leur mal.
Galen nous a fait antandre, qu'il ne se faut tant
arreter au nombre des annees, qu'à la vertu: la-
quelle on peut comprandre du pous egal, ve-
hemant, & grand, comme d'un signe tresueri-
table, & qui ne faut iamaïs de temogner assu-
remant la force. Et pourtāt aus septuagenaires
qui ont samblables pous, il permet la saignee, si
le mal la requiert: pource (dit-il) qu'il y an ha
d'aucuns fort sanguins & robustes an l'age de
septante ans, comme il y an ha d'autres à soif-
sante qui ne la pourroint supporter. Quant aus
ansans, il n'ha iamaïs permis qu'on les phlebo-
toma: nompas craignant de leur foiblesse (car
ils ont plus de force vitale & naturelle, qu'ils
n'auront à vint ou à trante ans) ains pour l'ai-
see dissipation de leur sustance, etans de ma-
tiere ancor tandre, molle, rare, & fort resolu-
ble. Toutesfois on ha eprouué, que souuant la
saignee leur et profitable, voire aus moindres
de sis ans, comme plusieurs temognet, & nous
l'auons quelquesfois heureusement eprouué.
Auenzoar escrit, auoir fait saigner son sis qui
n'auoit pas trois ans, dont il se trouua bien. Et
pourquoy an seroient ils du tout forelos, si mes-
mes etant à la mamelle, quelquesfois ils sai-
gnet fort du nez, sans qu'il leur an prenne mal?
Si Nature de son mouuemāt se decharge quel-

*Liv. de la
cur. par
phlebo.*

que fois du sang aus ansans, le medecin qui n'et que son ministre & imitateur, ne l'osera il antreprendre ? Vn ieune ansant saignera plus d'un coup de poin au nez, que nous n'an tire-rons du bras à vne fois : car il faut auoir egard sur tout à la quantité, & auiser de ne leur an oter beaucoup. Dôt à bon droit on pourra excuser nottre Galen, qui ne leur permet la saignée : pource que de son tams ils la faisoient fort grande : car pour vn iour on eut tiré quatre liures de sang, & il dit an auoir veu sortir iusques à sis liures, au proffit du malade. Au iourd'huy c'et beaucoup d'an auoir trois ou quatre paletes (qui sont dis ou douze onces) d'un ieune homme qui soit robuste: & des ansans, an proporciō. Ancor antandōs nous, que tels ansans soient habitués de la charnure dessus mancionnee: outre ce que leur mal an doit faire instance. Touchant aus fames grousses, Hippocras a escrit, que la saignée les met an dāgier, nōpas de leur personne, ains d'auortif-
semāt, melmes si l'āfant et grādet, pource qu'il et frustré de sa nourriture. Ainsi dit il etre im-
possible, que le fruit soit bien sain, quād la me-
re ha ses fleurs an bōne quātité, durāt la grois-
se. Mais quād on voit q la repleciō outree, cau-
see de grād' oisueté, avec abōdance de viures,
& bōté de nature, menasse d'etouffer l'ansant,
ou le cōtraindre à deplacer (cōme il auient à
quelquesynes, qu'à faute d'etre saignees, passés

Aph. 31.
liu. 5.

Aph. 61.
liu. 5.

96 De saig. an tout age, & fa. gr.

les trois ou quatre premiers mois, s'affoület de leur vantree) pourquoy n'otera l'on du sang qui et trop abundant & dommageable? Si la mesme abondance, ou bien moindre, par vne fièvre ardante et echauffee outre mesure, & cōmance à boullir, faisant presque rompre les veines, n'oserons nous (pour respect de la grosse) vuidier vn peu de sang, & euäter la veine, quād la fame grosse brule de fièvre? Hippocras dit, qu'vn mal aigu, tel que i'ay proposé, et mortel an la fame anceinte. La raison et qu'il y cōuient faire grād' abstināce, laquelle tuera l'anfant: ou si on luy permet grand' nourriture, la fièvre s'augmantera, pour les faire tous deus mourir. La saignée ne fait pas plus de mal, que la grand' abstinence: & ne peut causer que l'a-uortissemāt, cōme dessus et dit. Or il et moins mal d'an perdre vn que deus: mais le plus souuāt tout et preseruē, Dieu mercy. Et comment pourroit estre sain l'anfant dans le brasier de sa mere? Quel alimāt luy dōnera le sāt qui boult? Il faut par tous moyēs etaindre ce grand feu, pour soulager la mere & l'afāt. Hippocras no^a permet de purger vne fame grouffe, depuis le quart mois iusqu'au settieme: à quoy tous noz docteurs cōsantet. Si dōc la fame anceinte peut sans aucun dōmage, andurer la purgacion, laquelle agite, trouble, & ebrāle le cors sans cōparaison plus que la phlebotomie) mesmemāt les fortes medecines, desquelles vsoit Hippo.)

Aph. 30.
lin. 5.

Aph. 1.
lin. 4.
Aph. 29.
lin. 5.

pourquoy n'oserons-nous vser de la saignée,
quand il an sera de besoin : mesmes considéré,
que c'est vn des remedes le plus seur & aisé?
Car on sort tant de sang qu'on veut, & nom-
plus: comm'etant en nostre puissance de l'arre-
ter à chaque goutte, ce que ne pouuons pas des
medecines, quand elles vuidet plus que nous
ne voulons. Mais que repondrez-vous à ce, que
plusieurs fames continuet d'auoir leurs fleurs,
durât toute la grosse, sans qu'elles ou leur fruit
an valhe moins? Outre ce nous voyons souuant
qu'une fame grouesse, saignera beaucoup du
nez, ou d'une playe, sans auorter ou rapporter
aucun mal. Ce sont experiances qui auiennent
iournellemant, desquelles on pourroit meshuy
conclurre, que la saignée n'est pas si domma-
geable aus fames grouesses, qu'on ha par cy de-
uant cuidé. Toutesfois afin qu'on ne pense, que
cette opinion soit nouuelle, & des ians d'au-
iourd'huy, Celse (qui fut du tams d'Auguste, il
y a plus de mille & cinq cens ans) ha fort bien
remoutré, qu'il ne faut rien plus cōsiderer, que
la vertu de ceus qu'on doit saigner, disant: De *Lia. 2. c.*
tirer du sang aus fames qui ne sont pas ansein- 10,
tes, & aus ieunes personnes, cela et vieus: d'e- "
prouuer le mesme aus anfans, aus vielhars & "
aus fames grouesses, il et nouueau. Car les anciēs "
ont estimé, que le premier & dernier age ne "
pouuoit andurer tel remede: & s'estoint persua- "
dez, que la fame auorteroit d'estre ainsi traitce "

98 De saig. en tout age, & fa. gros.
» durant la groisse. Depuis l'usage ha demoustré,
» que ces reigles ne sont generalles & sans exce-
» pcion, ains qu'il y faut aionter quelques melheu-
» res obseruacions, auxquelles soit adressé le inge-
» mant du guerisseur. Car il ne se faut pas arreter à
» l'age, n'à ce qu'on porte, mais aus forces tant
» seulemât. Donques si la personne ieune se trou-
» ue foible, ou la fame qui n'et pas grouisse a peu
» de force, on fait mal de leur tirer du sang: parce
» que la vertu qui reste, an languit & se meurt.
» Mais vn enfant bien ferme, vn vielhard fort ro-
» buste, & la galharde fame anceinte, an peuuet seu-
» remant guerir. Toutesfois an ce cas, l'ignorant
» Medecin peut aisement faillir, d'autant qu'il y
» ha volontiers moins de force an ces ages là: &
» que la fame grouisse a besoin de sa force, apres
» la guerison, non seulemant pour soy, ains aussi
» pour l'enfant. Parquoy le principal de l'artifice,
» requerant discours & prudance, git an cela, de
» ne conter point les annees, & de ne regarder à
» la seule conception, ains estimer la force, & d'i-
» celle comprendre s'il an pourra souuer pour
» soutenir l'enfant, le vieus, ou ansamble deus
» cors an vne fame. Par ces doctes propos on peut
» antandre facilemant, an quel erreur ont versé
» noz peres depuis anuiron trois cens ans, ius-
» ques à notre tams, que les sciances ont reprins
» leur ancienne dignité, par l'ouuerrure des bons
» liures, que l'ignorance auoit tenus cachez. Et
» pouons dire comme Celse, que nos ancestres

ont frustré de la saignée les fames grosses, les anfans, & les vîeus, sans aucune distinction: depuis l'experiance guidée de raison, ha fait cognoître aus plus suffisans de cet age, qu'on les peut bien saigner, quand le mal le requiert, & on le peut supporter. Donc, que le populaire, qui a été mal instruit, cesse mes- huy de faussement calomnier les bons & sages Medecins, qui avec grand respait & meure deliberacion, amployet ce remede, quand il an est besoin.

QVIN ZIEME CHAPITRE.

*Contre ceus qui temerairement & trop sou-
uant vset de la saignée.*

E QV E ie viens de remontrer au precedant chapirre, pourroit an- tretienir l'erreur de ceus qui trop volontiers vset de la saignée, sans aucune discrecion. l'an voy plusieurs, qui pour peu de mal qu'ils se san- tent, soudain veulet estre saignez: & il y a des barbiers outrecuidez, qui sans auis de Mede- cin, vsurpet ce remede à tout propos. Il et fort singulier, quand on le fait accommoder: mais le seul Medecin (comprenant sous ce nom, le docte Chirurgien) an doit auoir la char- ge. Car il faut estimer la force du malade, & la

100 De saig. avec grand' discretion
grâdeur du mal, presant ou auenir : qui sont les
deus condicions concluâtes à la saignée. Or c'est
vn grand dommage, de saigner indiscrettement
& sans besoin : parce qu'à la necessité on n'y
peut recourir, le cors étant plus epuisé qu'il ne
deuroit, & affoibli par le gast des esprits : les-
quels se perdet & verset an quantité notable,
quand on vuide beaucoup de sang. Dont il a-
uient, que le cors étant refroidy, les operacions
naturelles sont mal executees. Parquoy Galen
disoit bien, qu'il n'est expediant de saigner plu-
sieurs fois l'annee. Celse parlât an general, don-
ne ce conseil, qu'on doit estre auisé, de ne con-
sumer an santé les remedes qui apartienet aus
maladies. Ainsi an tams de pais il ne faut gater
les prouisions & municions de guerre, de peur
d'an auoir faute au besoin. Le sang et tresor de
Nature, lequel on ne doit ietter hors, que pour
sauuer le demeurant: comme quand le mal est si
grâd & impetueus, qu'il peut tout faire perdre.
Ainsi les marchans en l'extreme fureur de la tē-
peste, & des orages sumergeans, ne font pas dif-
ficulté de perdre leurs richesses, pour allegier la
nef, & sauuer leurs personnes. Il n'est pas per-
mis de saigner, que la grandeur du mal presant
ou auenir (comme nous auons dit) ne le suade:
& que la force y cōsante, étant suffisante à sou-
tenir le cors apres la phlebotomie. Si l'un des
deus y mâque, c'est mal fait de saigner: veu mes-
memant que la seule repleccion & abondance

*Au liu.
de la sca-
rif.*

Liv. I. c. I.

de sang (sinon qu'elle menassat de quelque facheus accidant) ne suffit à persuader ce remede. Car à vn cors autremant sain, l'abstinence, le flux de ventre, le bain souuant reiteré, la grande friction, ou le seul exercice, y peut assez remedier, cōme Galen a bien deduit. De saigner vne personne, pour la seule chaleur excessiue du foye, ce n'est pas touiours à propos: veu qu'il y ha prou de maus causez de chaleur, esquels l'usage des choses froides conuient trop mieus, que la phlebotomie. Outre les deus susdittes condicions (qui seules indiquet la saignee) il y a plusieurs egars particuliers, qui nous seruet de circonstances, & sont compris sous la force de celuy qu'on veut saigner: lesquels il faut diligemment obseruer, & ne tirer du sang indiffremment à toutes personnes, an toutes regions, & an toute saison: ce que le peuple n'antand pas. Les ians maigres à grosses veines, ont beaucoup plus de sang que les gras, qui par cōsequant ne supportet si aisement la saignee. Ez pays frois les ians sont grans mangeurs & beuteurs (mesmemant de chair & de vin) abondans an nourriture: dont il auient, qu'ils angeandret beaucoup de sang, & peuuet supporter la saignee, plus que ceus des regions contraires. Car la chaleur dissout l'vnion de noz forces, & alanguit le cors: outre ce qu'elle dissipe notre substāce, & ne permet faire prouision de beaucoup d'humeur. Voila pourquoy les ians sont

*Meth. liu.
2. cha. 6.*

102 De saig. avec grand' discrecion.

fort petis & grailes ez regions plus chaudes, & ne peuet (sans prejudice de leur santé) andurer la saignée, ny beaucoup, ny souuant. Touchant à la saison, si c'est pour preuenir les maus.

*Aph. 55.
lib. 7.*

Hippocras nous enseigne, qu'on doit saigner au printemps: parce qu'adonc le sang abonde, & la force est plus grande, à cause de l'air tamperé. Mais si an autre tans on a besoin de saignée, il n'an faut faire difficulté: pourueu qu'on ait ce respait, d'y estre plus chiche, & sur tout an été. Anquoy se falhet lourdemant les Ampiriques, qui sans discrecion saignent prodigalemant ez sieures ardâtes, qui regnet sous la Canicule. Je diray ancor cela pour conclusion, qu'il ne faut moins de iugement & suffisance à bien ordonner la saignée, que la purgacion: veu mesmemant que la purgacion affoiblit moins le cors, quand la vertu de la medecine, & la force du pariant, sont bien cognues, & les humeurs bien preparez. Car les fautes qui an peuet auenir, ne sont de telle importance, que celles de la saignée. Aussi faut-il qu'elle soit diligemment obseruee, & prudemment dispancee, comme plus grand remede que la purgacion. Car Galen a priue les enfans, auxquels toutesfois il permet les medecines. Donques il n'an faut vser si familiarement, comme i'an voy plusieurs, qui se font saigner comme par gayeté de cœur: & le Magistrat deuroit interdire aus barbiers, d'exccuter cela sans l'ordonnance des Medecins.

103
SEIZIEME CHAPITRE.

*Que la purgacion peut conuenir à toute saison,
voire durant les iours Caniculaires.*

LE peuple ayant ouy souuant
mencionner au Medecins, les
iours caniculiers, pour suspects,
facheus & ineptes à la purga-
cion, suivant l'opinion des an-
ciens, cuide parfaitemēt que c'est mal antrepris,
de donner aucune medecine durant telle sai-
son, nonobstant qu'elle soit autrement neces-
saire. Noz precesseurs ont mal fait, de leur alle-
guer telles raisons, qui meritent grande distin-
ction. Car les idiots, ayans retenu la reigle ainsi
pure & simple, comme leur ha esté prononcee,
sans la sauoir limiter, auioird'huy veule de-
batre contre les Medecins, de ne purger durāt
la Canicule, au moins ils trouuet fort estrange,
& an murmure, si quelqu'un l'antreprād. Pour
les oter de cet erreur, nous ferons contrains de
leur interpreter l'aphorisme d'Hippocras, où
est le fondement de ce propos. Il dit, que l'vsa-
ge des medicamans laxatifs et moleste & diffi-
cile, dessous & auiron le Canicule: signifiant,
qu'il y a des autres tams plus conuenables, &
que cetuy-cy et le pire. Qui sainement antan-
dra ces paroles, il ne conclura pas tout soudain,
que le purger soit condamné & banny de telle

*Aph. 5.
lib. 4.*

104 De purger an toute saison

faison, tellemât qu'on ne le puisse quelque fois introduire, quand il et de besoin: ains qu'il apporte plus d'incōmoditez, & fache dauantage, que deuant ou apres la Canicule: & c'est à cause de l'air inflammé. Car durant la Canicule, nostre cors brule, & fond tout de chaleur. Les medecines purgatiues ont certaine forceur (mesmemant celles des anciens, violantes extremement) qu'il n'est possible d'andurer sans desplaisir & grand' peine, outre le dangier qu'il y a de allumer vn plus apre feu. Dont il auient, que pour estre iugez inconsideremant durant telle saison, plusieurs tombet an fieure, comme dit Galen. Outre ce, nostre force deja foible & abbatue par la chaleur de l'air, deuiét ancor plus lache par les medicamans. De sorte que nous pouuons dire, tel tams estre peu conuenable à purger nostre cors: & qu'il ne le faut antreprandre, sans que le mal nous y contraigne. Car qui auroit à prandre medecine vne fois l'an (cōme doiuet faire ceus, qui ordinairement apres vn grand amas d'humeur pernicious, tombet an quelque maladie) il feroit mal de choisir ou attendre les iours Caniculaires. Le prim-tams y et plus propre, ou bien l'automne, selon que ces maus coutumiers sont familiers au tams d'hyuer, ou à l'été. Quant c'est pour la precaucion (c'est à dire, pour preuenir aus maladies) & non pas pour guerir le mal presant, nous vuidons la matiere long tams au parauant, & elisons le
mois

*En com.
du susdit
aph..*

mois, le iour, & l'heure qui mieus s'accordet à
notre intancion : c'est que le ciel se trouue
clair & serain, l'air temperé, & le tams frais.
Mais quand on est de fait malade, & la purga-
cion y est requise, il ne faut rien differer, ne re-
garder à autre chose, qu'à la force du paciant
& à la sorte des medecines. La vertu est plus,
forte aus premiers iours du mal : l'occasion qui
se presante à noz remedes, et fort soudaine, & il
la faut prandre par le front (comme on dit au
commun prouerbe) où elle ha des cheueus.
Ceus qui attendent l'andemain an toutes de-
liberacions, vienent souuant mal à propos, aug-
menter par accidant le desordre, & causent vne
grand' ruine. Donques si la necessité requiert
& desire instamment vne purgacion, nous
ne deuons auoir egard au tams, sinon pour y
approprier la medecine. Car si c'est au tams d'æ-
té, il la faut plus benigne, & sur tout quand l'air
brule dessous la Canicule. L'hyuer supporte
mieus les fortes, le tams moyen demande les
moyennes. Avec ceste limitation, nous faisons
aueuir noz drogues à toutes les saisons de l'an,
au profit des malades. Parquoy il ne faut plus
abuser de la fantance d'Hippocras, laquelle se-
ra touiours veritable: c'est, que durant les iours
Caniculiers, nos cors supportent moins facile-
ment d'estre purgez, qu'an autre tams: & pource
les medicamans doiuent estre fort benignes, quand
l'espece du mal en requiert l'vsage. Et quoy?

L

si i'ay besoin de vuidier la cholere, qui fait la fièvre tierce, ou l'ardante fort dangereuse, voyant que nous sommes deffous la Canicule, faudra-il quei'attâde melheure saison? Si on ne purge l'humeur, la maladie fera rage de tourmenter le cors, elle abbatra de sorte les forces de nature (assez affoiblie de la saison) qu'elle ne pourra rien vuidier de la matiere, qui au fin l'accablera. Lairrons-nous mourir le malade, à faute d'un peu d'ayde, alleguans l'incommodité des iours Caniculiers? Ancora si c'estoit vn mal qu'on peut trainer hors de ce tans là, il y auroit quelque couleur d'impetrer vn delay. Mais quand il faut, ou guerir, ou mourir dedans ce terme, si on void que la purgacion soit à propos, il n'an faut faire difficulté? & si le malade meurt, c'est du mal violent, & nompas du remede. Qui ordonneroit la medecine autant forte, qu'aus saisons les plus propres à supporter les laxarifs, lesquels arrachent de tous coutez & defracinet la matiere qu'ils ont choisie, il se trouueroit frustré de son intancion, & le dommage qu'il causeroit, passeroit de bien loin la commodité pretendue. Car Hippocras tient pour suspectes les medecines, durant la Canicule, à raison de leur vehemance, n'ayant eu le bon homme an vsage, que celles dont nous faisons auioird'huy doute d'vsar, mesmes an hyuer, & an personnes fort robustes. Qui voudroit interpreter son aphorisme, des mede-

cines qu'il vsoit nous pourrions bien tenir an-
cores cette conclusion, qu'il ne faut du tout
rien purger deffous la Canicule. Car noz cors
sôt deuenus de peu à peu si delicats & foibles,
que nous ne sommes que d'anfans, aupres des
hommes du tams passé. Qui de nous pourroit
andurer la saignee iusqu'à sis liures, pour vne
fois, comme ha veu Galen an ceus de son age:
qui toutesfois n'estoit plus tant robustes, que
du tams d'Hippocras? Leurs medecines an pro-
porcion etoit si violentes, qu'ils nous font
presque horreur d'an ouyr parler, tant s'an faut
que nous les accommodions aus iours Canicu-
liers. Ancor ne les defandet-ils pas totallemât:
car ils diset seulemant, que la purgacion est
pour lors mal aisee. S'ils eussent eu l'vsage de
notre casse, du sené, rhabarbe, manne, syrop ro-
sat, & autres legieres medecines, qui ne font
point de violence, ils n'eussent pas trouué mau-
uais, de purger durant les grans chaleurs, quād
les maus nous an sollicitet & importuner. Il faut
donc ainfi dire, concluant à la verité, que pour
double raison la sântance donnee par Hippo-
cras, ne fait point contre ceus qui purgent au-
iourd'huy regnant la Canicule: veu qu'il ne
defand pas absolument la medecine laxative,
ains remoutre seulemant, qu'il an faut sobremât
vser: & que nous abstenons des siennes, con-
fessans que ce seroit mal fait de les exhiber à
noz malades, ez iours Caniculiers.

208 De purger an route saison.

Liv. I. l. 3.

I'ajouteray icy pour le plaisir des fames, qui contrerollent plus cela, que les hommes (antreprenant de remoutrer aus Medecins, qu'ils ne doiuent purger durant la Canicule) vn cōseil tres-profitable à la santé de leurs maris. C'est, que la copulacion charnelle, n'est moins suspecte durant la chaleur de l'été, que la purgacion. Que plus et, le jeu d'amours doit estre suspendu antierement, où la medecine ha souuant lieu. Car on purge pour recouurer santé, & dame Venus la ruine. Celse dit, qu'an été [s'il est possible] il an faut du tout abstenir, & le commun prouerbe ansuit telle opinion, disant qu'an été on doit moullher le bec, & auoir le mambre sec. Les autres diset, tous les mois qui n'ont point de R, laisse la fame & prans le verre. Mais ie ne suis pas tant rigoureux: ie n'ordonne que certains iours suspects à la besogne. Ce sont lesdits Caniculiers, qui consumer assez le cors, le lassent & enervet prou, sans qu'on trauaille dauantage à l'appetit des fames. Ils commencer anuiron le vintieme de Iulhet, & durent quarâte iours. C'est le carefme ou quaranteine des mariez, qui doiuent lors abstenir totallemant de l'œuvre de la chair. Et voila ce que les fames ont principalement à soigner [faisant refus de leurs personnes, si elles s'an peuuet deffandre] & n'ont pas contredire aus Medecins touchant la purgacion, ou autres remedes qu'ils fauet bien accommoder à la saison, pour peu qu'ils ayent de iugement.

109

DIS ET SETTIEME CHAP.

Comment il se faut gouverner le iour qu'on prend medecine. Si on peut dormir apres : De l'heure du bouillon lauatif : Des repas qui conuienet à ce iour-là : Et pourquoy on ne doit sortir de la chambre.

L me samble que ce sera biẽ fait d'instruire le vulgaire, comment il se doit gouverner le iour qu'il prend medecine, sur tout an estat neutre, quand il n'est pas malade au lit, & an plein pouuoir du Medecin : lequel an ce cas le doit conduire de pas an pas, comme il cognoit estre de besoin, selon la nature du mal, & la condition du malade. Car ie ne veus mettre ma faucille an la moisson d'autrui. Ie n'antans parler qu'à ceus qui n'ont aupres d'eus que leurs seruaus ordinaires, & qui ne sauent comment il se faut traiter ou gouverner, quand il leur conuient prendre, ou qu'ils ont pris medecine. Or tels soint auertis, qu'il faut auoir legierement souppé le soir auparauant, afin que sur le matin, apres auoir bien dormy, l'estomach se trouue vuide. Autrement, la vertu de la medecine, detrampce de la viande ancores indigeste, se romt & affoiblit. Ainsi l'on dit vulgairement, que le iour de la medecine est vne grand' feste : parce qu'il faut ieuner la velhe. Pour la prendre plus

L iij

110 Regime pour vn iour de med.

aisement, & sans guieres apercevoir sa mauuaise faueur, il est bon de macher au parauant vn peu d'ecorce de citron, ou d'orange, ou vn peu de girofle: de quoy la bouche etant preoccupee & chauffee, n'aperçoit tant le gout du medicament. Et pour ne sentir l'horrible odeur, il faut bien couvrir le verre ou le gobelet, d'vn linge trempé en bon vinaigre rosé: lequel sera meilleur etant musqué, si on hale de quoy, & que ce ne soit vne femme suiette à la matrice. Pour empêcher le vomissement, il n'y a rien de meilleur, q̄ soudain apres auoir bien rincé la bouche de vin trempé, ou autre liqueur agreable, humer vne gorgée dudit vin, ou de l'orge mondé, ou de la pisanne, du bouchet, ou quelque boulhon. Car par ce moyen on laue le gosier & l'œsophage (c'est le canal de la viande & du breuuage, depuis la bouche iusques à l'estomach) où la trace & impression de la medecine s'arreste fort long tamps, & se represente à la bouche. Dont est causé vn dedain, & le vomissement: nommément si l'orifice superieur de l'estomach (qu'on appelle le cœur) n'est laué & nettoyé de la qualité odieuse du medicament. Car de là il se rauerse à vomir. C'est ainsi que ie le pratique, auers ceus qui craignent de reietter la medecine, cōme ils ont de coutume: & peus bien assurer, qu'à peine en ay-je veu de sant vn, qui se faisant, l'ait vomie. Il ne me chaut quelle liqueur ce soit, pourueu qu'elle s'accorde avec la

medecine, comme les su-nommees, esquelles on ne feroit difficulté de tramper vn laxatif, quand il seroit ainsi plus agreable à la personne. Il y ha d'autres remedes pour ampescher le vomir: comme de macher vne pomme, poire ou autre fruit, & an aualler vn peu du suc: flairer du vinaigre, tramper les mains dans l'eau froide an vn bassin, ou les couvrir d'un drap mouillé de vinaigre trappé, qu'on appelle oxycrat: ne parler, ne cracher, ou toussir, n'autrement agiter le cors: & se tenir an son seant quelque tams, & puis se promener. Vn des melheurs remedes et aussi, d'anelopper le cou d'un linge bien chaud. Et voila commant on peut euter le vomissement: qui est trop odieus, tant parce qu'on ha double peine, l'une à prendre la medecine, l'autre à la rendre: & de ce qu'on n'ha rien auancé: car il faudra recommancer, si on ne la retient au moins vne heure, ou auiron. Ce terme passé, il ne se faut autremant contraindre à ne vomir point: d'autant que la medecine ne fera pas guieres moins, que si on la gardoit plus long tamps: & par le vomissement on reiette quant & quant beaucoup d'excremans, qui se vuident ainsi plus aisement, au profit de la personne: & de se contraindre dauantage à retenir cela, apporte souuent de grans inconuenians, foiblesse de cœur, euanouissement, sueur froide, grand passion d'estomach, comme fil deuoit creuer. Puis que la matiere incline an haut

112 Regime pour vn iour de med.

etant assamblee dans l'estomach, permettez que
elle vuide par là: c'est vn beau dechargement.
Et quand la medecine qu'on reiette ansam-
blemant, ne feroit autre chose, ce n'est peu de
profit. Mais (comme i'ay dit) elle ne lairra pas
de chasser les autres humeurs par le bas. Car sa
qualité & vapeur se versant bien tost par tout
le cors, fait la principale (sinon totale) opera-
cion. Quant à dormir apres, ie ne le defans ia-
mais, an etant persuadé tant de la raison, que
de l'experiance. De ceus qui la defandent, les vns
craignent que la medecine agitée de la chaleur
naturelle (qui se ranforce au dedans par le som-
meil) an deuienne plus forte & furieuse. Et que
ne l'ordonnet-ils si foible, qu'avec le sommeil
(fort agreable aus preneurs de medecine, &
sur tout du rhabarbe) icelle deuenant plus ga-
llarde, fasse le deuoir qu'on an pretend? Les
autres au contraire, ont peur que le medica-
mant diminue de sa vertu, etant affoibly de la-
ditte chaleur. Et que ne l'ordonnet-ils d'autant
plus fort, qu'ils pansent qu'il perdra de sa vertu
par le dormir? Ou pourquoy tous d'un accord
le permettent-ils, voire l'ordonnet, sur les pil-
lules? On dit, qu'icelles etant fondues, &
leur vertu excitée par la chaleur naturelle, o-
perent plustot & mieus. Et n'est-il pas aussi bon,
que la vertu d'un potus, d'un bolus, ou d'un
ne tablette laxative, soit tantot excitée, af-
fin qu'ils besognent sans grand delay, annuyant

l'estomach & tout le cors de sa presface? Quelques vns craignent, que les vapeurs de la medecine ne mōtet au cerueau: qui et ce qui les inuite ainsi à dormir quelque fois de si grād' force, qu'il y a extreme peine de s'angarder: & les personnes an sont infiniment annuyees, d'etre contrains d'an abstenir. Et que peut nuire cette vapeur? Mais au contraire, elle et fort profitable, quand nous voulōs purger le cerueau. Car telle vapeur y antrant, elle an retire ou chasse les humeurs que nous voulōs euacuer. I'accorde bien, que quand la medecine commande à operer, il ne faut plus dormir: sinon qu'on voulut arreter son operaciō, ainsi qu'il et quelque fois de besoin: car le dormir fait cesser toute euacuaciō, exceptée la sueur. Dōt Hippocras dit tresbien, Quād tu voudras que l'hellebore purge dauantage, remue le cors: & quand tu voudras que la purgacion cesse, fais dormir & non mouuoir. Il y an ha qui osent bien dire, que la medecine par le dormir se cōuertit an nourriture (dōt nous sommes frustrēs de notre intancion) mesmes si elle et debile: comme de la casse, manne, tamarins, sené, rhabarbe, & samblables. O la grand' viande pour deieuner! Et il possible que le medicamāt deuienne alimant, veu qu'il et estrangier à notre nature, & non familier an substance, pour an durer telle metamorphose? Ils ne sauisset pas, q̄ ha eté par bōne astuce, q̄ noz ancetres ont

*Aph. 15.
lin. 4.*

114 Regime pour vn iour de med.

persuadé au peuple, que les medecines, quelque fois se conuertisset an nourriture: affin que si elles ne produiset l'effet pretendu, le patient n'an soit marry, fache & depité, comme si elle deuoit apporter quelque dōmage. Car c'est la plus belle & fauorable excuse du monde, de dire, que la medecine (qui n'ha eu assés de force à operer) se soit cōuertie an aliment. Outre ce, ie n'accorde pas, que l'estomach ait plus de force à digerer par le dormir, ainsi que ie panse auoir suffisamment prouué an mes

Dec. 1.

Parad. 8.

Paradoxes. Mais ie m'oublie: il samble que i'an veulhe aus medecins, ausquels ie n'antans parler an ce traité, ains à toutt' autre sorte de jans, iusques aus apoticaire: qui nonobstant noz auettissemās, oset bien dire quelques fois aus malades que nous traitons, qu'il ne faut dormir apres la medecine. Parquoy souuant ie suis contraint d'ecrire au bout de mes ordonnances, & *superdormiat*, c'est à dire, qu'il dorme apres. Quelqu'un pourroit bien repliquer à ce que ie viens de dire, & soutenir contre moy, que l'on peut estre nourry de poison: cōme il et escrit d'une vielhe d'Athenes, nourrie des son anfance à la Ciguë: & de la ieune Indienne, anuoyee au Roy Alexandre le grād, nourrie de Napel. Combien plus aysemant pourra se conuertir an nourriture vn medicamāt purgatif, lequel n'et tenu que moyen antre le venin & le cors humain, ainsi que Galen

Obiectiō.

remoutre au cīquieme de la vertu des simples medicamans? Il et aisé de repondre à telle objection: c'et, que la poison ne peut iamais estre alimant, de sorte qu'elle soit conuertie en la substance de nostre cors: Mais que le cors se peut bien accoutumer à sa qualité, qui s'imprime de peu à peu aus esprits, humeurs & parties solides. Ainsi se peut on accoutumer au froid, à l'ardeur du Soleil, à la moulheure, au vant, au trauail, à tout desordre, y procedant de petit à petit, de sorte qu'on n'an sera point offancé. Ainsi plusieurs sont tant accoutumés au malaise, & à quelques maladies, qu'ils n'an sent rien, si l'objet ou sujet n'est excessif. Ainsi quelques vns s'accoutument tellement aus clysteres, medecines, & autres drogueries, qu'à la fin ils n'an sont aucunement emeus, ou fort peu, sinon qu'on les rande plus fortes. Car la qualité de l'organs accoutumee n'excite aucune passion, mouuement, ou alteration au cors. Mais que les choses ainsi qualifiees, se conuertissent en nostre substance (qui est autant comme dire, qu'elles nourrissent) il ne le faut pas croire. Touchant au boullon qu'on prend avant dîner, il est nommé lauatif, finissant son usage: qui est de nettoyer & lauer l'estomach & les boyaus des restes de la medecine. Parquoy il ne doit estre prins, tandis que la medecine séjourne en l'estomach. Car en la detrampant, il luy feroit perdre sa force, comme si on mettoit

Reponce.

116 Regime pour vn iour de med.
beaucoup d'eau sur vn peu de vin : dōt elle ne
pourroit aduenir à l'opperacion pretādue. Or
de limiter le terme du seiour que la medecine
fera dās l'estomach, c'et chose impossible : veu
que la mesme chose an mesme personne, quel-
que fois ira plus vite, & quelque fois plus tard,
selon qu'elle r'ancontrera diuerses occasions.
Combien plus grād' diuersité an effet, doit on
attandre de diuers medicamās an diuers cors?
Pourtant on ne peut dire iustemāt, qu'il falhe
humer le boullon à tāt d'heures apres la me-
decine, comme l'on fait vulgairement : ains le
terme doit etre presis par cette coniecture, la-
quelle finisse que la medecine (au moins pour
la plus part) ha passé outre l'estomach. C'et,
quand elle ne reuiert plus à la bouche par sa
vapeur, & qu'on sent l'estomach dechargé,
apres quelque remuemāt au vautre : qu'on ha
bien vuidé outre son ordinaire, comme de la
medecine: & qu'il y a notable tams qu'on l'ha
prise. Adonc, quell' heure que ce soit, & non
plu-tost, il faut humer le boullon. Depuis ce
boullon (qui et plus pour lauer, cōme dit et,
& faire dessandre les restes de la medecine,
que pour nourrir, combien qu'il y serue au-
cunement) iusques au diner, il faut interposer
le terme du sejour, que le boullon peut faire
dans l'estomach: car on le veut lauer & rincer
principalement, à ce que la viande suruenante
rancōtre l'estomach net, & non infet de la me-

decine: d'autant que les viures an feroient cor-
rompus. Donques il faut differer, iusques à tāt
que cette rinceure & laualhe an soit dehors, &
que le diner ne rancontre ledit boulhon. Au-
tremant il an auiendroit, comme qui rincerait
vne pinte, & y laissant la rinceure, y mettroit
de bon vin. Or ce boulhon, soit an grande ou
petite quātité ne sejourne dās l'estomach plus
de deus heures, comme fait bien la moindre
chose qu'on aualle. Dont ie ne puis approu-
uer ce qu'on ordonne communement, de di-
ner demy' heure, ou vne heure apres le lauatif.
Vray et, qu'il n'est possible de limiter iustemāt
le terme du diner, nom plus que celuy dudit
boulhon, mais par coniecture, & à peu pres, on
rancontrera l'heure. C'est, quand il y a ja long
tams qu'on ha prins le boulhon, & on sent l'e-
stomach vuide, comme ayant appetit. Pour
lors il faut diner, quelle heure que ce soit: &
c'est volontiers bien tard. Car vne medecine
prise à cinq ou sis heures du matin, à peine et
elle hors de l'estomach à neuf ou à dis. Lors il
faut prādre le boulhon: lequel sejournera dās
l'estomach deus ou trois heures, tellemāt que
le diner echerra sur le midy ou vn' heure. Et il
ne faut pas craindre, que ce pendant celuy qui
se purge an andure quelque foiblesse. Car si le
cors auoit besoin de nourriture, il an aura pris
du boulhon assés pour attādre son repas. D'al-
heurs, il faut dōner loisir à la medecine de fai-

118 Régime pour vn iour de med.
re son deuoir: & ne detourner pas Nature, qui
coopere (voire fait le principal) an toute pur-
gacion. Car si on mange auant que la plus part
soit executee, Nature s'amusant à digerer la
viande, ne fauorise plus tant la medecine: la-
quelle se trouuant presque seule, n'a pas grād'
force. Aussi c'est l'un des moyens que Mesuë
nous anseigne, pour arreter le cours d'une me-
decine, quand ell' est trop farouche. On attri-
bue cela au Mechoacan particulierement, &
comme d'un priuilege: mais cela est commun
à tout laxatif, que son operacion est affoiblie
ou rompue, si on mange ou boit quelque cho-
se qui le puisse rancontrer. J'ajouteray an-
cores cette raison, que l'estomach abhorre & de-
daigne la viande, tant qu'il y a du reliqua de la
medecine: & si on le contraint de receuoir le
diner, plustost que d'estre bien laué, remis, &
reposé, il ne fera son profit de la viande, ains
en fera plus traualhé que sustanté. Pour cette
mesme cause le diner doit estre fort legier, d'au-
tāt que l'estomach n'est pas bien à soy, tout an-
nuyé du passage de la medecine. Et parce que
elle echauffe & desseiche aucunement (dont il
auient communement qu'on en altere) il
faut vser de choses humectantes & raffraichis-
santes, à peu pres comme si on auoit la fièvre.
Parquoy le bouilly sera plus conuenable que
le roty, & vn potage de laitues, pourpie, ozeil-
le, borrages, & samblables. Il faut aussi tramper

fort son vin, qui soit rouge vn peu couuert, & bien meur : & abstenir de tout fruit mol & fuyart, de peur qu'un flus de vautre ne succede à la purgacion. Mais pour dessert et permise vne poire de saueur brusque, cuitte & couuerte de fenoul dous, & ancor plus le coin ou codignac, pour resserer & ranforceer de leur astriccion, les parties que la medecine & les humeurs an passant ont debauché. De souper, ie ne luy trouue pas grand lieu à tel iour, qui et fort rompu, & l'estomach detraqué : de sorte qu'on ne le peut ranger aus heures ordinaires de ses repas: sinon qu'on eut prins la medecine à deus ou à trois heures apres minuit : qui n'est pas incōueniāt, si on n'a riē soupé, ou fort peu, le soir auparauāt. Car ainsi pourroit bien auenir, qu'on feroit pret de diner à dis ou onze heures, & soupper antre sis & fet. Il y auroit aussi plus de lieu, de dormir sur la medecine, cōme on fait volontiers iusques au iour. Mais d'autant que la plus part des malades, & autres qui ont à prādre medecine, veulet que l'Apoticaire mesme la leur baille: & qu'il et trop incommode à l'Apoticaire de sortir auant l'aube ou pointe du iour, sans autre necessité, l'on ha pris cett'heure pour la pl^e cōmune. Dont c'est anuiron les iours æquinoccials (lesquels nous supposons, parlās absoluemāt du iour : & aussi q'et le tams plus propre aus purgaciōs choisies, & non contraintes) la pointe du iour et

120 Regime pour vn iour de med.
à cinq heures : & on ne peut diner auât onze
heures, ou midy: suiuant le comte que i'ay fait.
Dont ie conseilhe volontiers, que ce iour là on
ne soupe pas autrement que d'un coulis, ou
orgemondé, fait du boulhon de chair, ou de
lait d'amandes: ou bien de manger vne rotie
au sucre. Ce qu'on peut prâdre lis ou set heu-
res après diner: puis se coucher de là à vn' heu-
re, ou deus, pour dormir an plus grand repos,
que si on auoit fort souppé. Et si on et altéré,
on peut boire vn peu de vin fort trâpé. Voila
commant i'ordonne le regime à ceus qui sont
an ma charge, pour vn iour de medecine, s'ils
me veulet croire: & cōme i'an vse an mon an-
droit, & des miens: & c'et le vray *regimen artis*,
que nous antandons à la fin de noz receptes.
Quant à l'autre mot, qui et *custodia*, ie l'expli-
queray maintenant.

Le vulgaire panse, que nous ordonnons l'ar-
ret dans la chambre, seulesmât à cause que l'air
exterieur peut offancer celuy qui a prins me-
decine. C'et bien vne de noz raisons: mais il y
an ha d'autres que ie deduiray cy apres. Et
quât à l'air, il y faut vser de cette distinction,
s'il et diuers ou samblable. Car s'il et de mesme
tamperature, & dedans & dehors la chambre
(comme il et volontiers an saison tamperee)
commât peut nuire l'exterieur, plus que celuy
de la maison? Quand l'air des ruës et vanteus,
pluuiens, plus froid ou plus chaud que celuy
de

de la chambre, lequel nous requerons tamperé, ou de soy ou par artifice, vrayement il y a bien grand' raison, de condamner celuy qui ha prins medecine, à ne sortir de la maison. Car le froid, le vant, ou la pluye, surprenant les pores, & penetrant au cors emeu, ouuert, & lache au moyen de la medecine, l'offance grandement. Le chaud aussi, rancontrant vn cors plus ouuert & echauffé de la medecine, peut causer fieure, grand' alteracion, lassitude, foiblesse, & autres facheus accidans. Il faut se cōtenir dans vn air tãperé, tel qu'on peut faire an tout tams, pour ceus qui ont des cōmoditez. Mais si l'air et de soy bien moderé par tout, & tant dehors que dedans la maison, il ne peut nuire au paciãt: & peut on pour ce respait, tenir les fenestres ouuertes. Mais il y a autre chose qui le defand: c'et, que l'obscurité sert à la purgacion, autant que les humeurs se randet plus aisement au dedans, & vers le santre du cors, an tenebres: etans au contraire inuités de la clarté & lumiere, de se presanter au dehors. Parquoy si on ha grand' clarté, & mesmes que les fenestres etãt ouuertes, on ait l'aspect d'vn lieu plaisant, ou qu'on voye dans la chambre quelques belles couleurs, tableaux, peintures, & autres ouurages, cela peut detourner secretement l'operacion de la medecine. Et ainsi il vaut mieus que tout soit fermé, iusques aus vitres, & qu'on allume de la chandelle, se con-

M

122 Regime pour vn iour de med.

tendant ainsi tout le iour à l'obscur: & n'auoir point de visite, pour ne se cōtraindre rien, ne se rejouir extraordinairement. Car cela aussi detourne l'operacion, ou la rend moins galharde.

1. Les autres raisons, pourquoy il ne faut sortir de la chambre, sont premieremāt, que si on va par ville, an tel androit on peut auoir besoin de vuidier le vātre, qu'on n'an aura la commodité: & les excremans agités, quād ils sont retenus par force, causet beaucoup d'inconuenians, outre le mal de vātre & les facheuses
2. tranchees. Secondemāt, l'aller par ville & tracasier, echauffe le cors mal à propos, an dangier d'exciter vne fieure: veu que d'alheurs le cors et communemant echauffe & alteré de la
3. medecine. Tiercemant, si on negocie quelque chose (dequoy on ne se peut bonnemāt abstenir, si on ha liberté de sortir) on trauaille l'esprit, qui ha plus besoin de repos, quand le cors et an peine. Ce sont des poins qu'il faut bien obseruer. Ancor ne suffit il pas, de se reposer & se cōtenir le iour qu'on ha prins medecine: il le faut continuer iusques au landemain apres diner: & se retirer de bon' heure dans la maison: c'est à dire, auant soleil couché.


L'ay eté vn peu prolixé à discourir le regime de l'art, que nous disons deuoir etre obserué, quand on prend medecine: d'autant que l'on commet cela volontiers aus Apoticaire, auxquels s'adresset noz ordonnances pour les

executer: & la plus-part d'iceus antandet mal
ces poins: dont il s'ansuit, que le peuple an et
plus mal seruy. Les famez qui traitet ou gou-
uernet ceus qui prennent medecine, sont ancor
plus ignorantes. Dont il m'ha fallu instruire le
vulgaire, affin que chacun pour soy antande
commant il s'y faut gouverner. Car la mede-
cine n'est chose de petite importance, ains qui
peut nuire ou profiter grandement, selon que
on an vse bien ou mal. Il ne faut oblier les trā-
chees, que donne souuāt la medecine: auquel-
les nous remedirons avec des draps chaus,
qu'on applique sur le ventre. Ce sont des van-
tositez, ou gros flegmes, qui causet ces dou-
leurs: sauoir et, les vātositez excitees de la ma-
tiere emeue, lesquelles anflēt & tandet les
boyas, tout ainsi qu'an la colique. Les gros
flegmes ne peuuet antrer des orifices, ou extre-
mitēz, des veines mesaraiques, dans les boyas
(ainsi qu'il faut, s'ils vienēt de pl' loin) sans dō-
ner quelques extorsions. Nous voyons sou-
uant des flegmes fort epais, randus par les der-
nieres selles, qui n'etoient pas dans l'estomach,
ne dans les boyas. Car ils n'eussēt tant sejour-
nē là, sans q̄ la medecine les eut ravis & ampor-
tēs. Ils vienēt donques de plus haut: & faut
qu'ils passēt par les bous des petites veines me-
sereiques, non sans faire grand' douleur: jasoit
qu'ils n'y passēt autant gros, q̄ nous les voyōs
au bassin. Car ils filet prim au sortir, & depuis

124 Que les plus chers meur. le plus
se ramasset. Les draps chaus fondet & liquefiet
ces gros humeurs, & les font couler plus dou-
cement : la chaleur aussi consomme & dissipe les
vantosités. Ainsi les tranches cessent de tour-
manter le paciant.

DIS ET HVITIEME CHAP.

*D'où vient communement, que les plus
chers meurent le plus souuant.*

 N void souuant auenir, que le ma-
ry fort chery de sa fame, & mignar
dé à toute outrance, mourra plu-
tost (le reste demeurant samblable,
quant à la maladie, age, condicion & force du
paciât, la saison, le lieu, les commodités requi-
ses, & autres particularités) que celuy duquel
la fame voudroit bien estre vaiue. Comme aussi
la fame, de qui le mary sera tât amoureux, qu'il
samblera an estre assoté, mourra plu-tost, que
telle q son mary aimeroit mieus an terre q an
pré. On void de mesmes au fait des peres &
des meres à l'androit de leurs ansans. Car ils
perdet le plus souuât ceus qu'ils aiment le plus.
Le ne dis pas q cela soit d'ordinaire, mais qu'il
auient fort souuant: de sorte que le vulgaire
s'an plaind, comme si l'excessiue (& quelque
fois desordōnee) amitié, estoit cause de la mort.
Ce que ie ne veus pas reprouuer, sachant que

Dieu peut estre offancé, & se courroucer de l'extreme affection, qui transporte les personnes ainsi passionnées, & les detourne de son seruice (qu'il requiert de tout le cœur, de toute la pensée, & de tout l'antandemant) & les ampeche de s'accorder humblemât à sa sainte volonté. Dont souuant il nous ote, ce que nous auons de plus cher an ce monde, comme vn fis vnique, bien né & de grand' esperance, affin que nous plaissions moins an cette valee de miseres, & desirions la fruicion de l'objet digne de l'excellance de noz ames. Touttefois parlant ancores humainemât, & cōme il nous appert au sans, i'ose bien dire, que l'excessiue amitié que l'on porte aus siens, jointe à indiscrecion & ignorance, et souuant cause de la mort de ceus qu'on cherit le plus tandremant. Car de ceus qu'on n'ayme pas tant, on an laisse volontiers le pansemant & la charge totale aus medecins, & aus personnes soigneuses de leur seruice: lesquels souuât on appelle & amploye par maniere d'aquit, plus q̄ d'affection, pour euitier ce reproche, d'auoir laissé mourir sans secours, son mary, sa fame, son anfant, ou autre parant sien. Or à ceus-cy le medecin fait libremât ce qu'il cognoit estre requis, sans que personne luy contredise, ou contrerolle ses accions, & il pratique bien à son ayse: de quoy il ressoit plus d'honneur, que de gré. Mais quand c'et pour vn qu'on ayme fort,

126 Que les plus cher. meur. le plus
quelque fois trop & indiscrettement, le vul-
gaire des parans, alliés, ou amys (desquels la
plus part sont presomptueux, outreuidez, &
panset sauoir plus que maitre Mouche) veut
antandre & sauoir tout ce que on ordonne au
patient: il conteste, debat & marchande pres-
que an toutes choses, ignorât de ce qu'il con-
uient faire: tient an peine & an crainte le me-
decin, l'arguant à tout propos, ou de l'exces, ou
du defaut. Il se veut faire à croire de la quan-
tité, & mesmes de la qualité des viures, des
heures & du nombre des repas, ou des prises
du potage, de l'ordre, de l'air, de la couuerture,
& autres appartenances du regime. Il attri-
bue tous accidans qui suruienet, iusques à ceus
qui sont ordinaires, & la procedure du pauvre
medecin: & aus remedes il fait tant de scrupu-
le, que le medecin craintif, n'ose ordonner la
moytié de ce qu'il feroit autrement, pour bien
tost guerir le malade. Car si nonobstant son de-
voir, & sa bonne procedure, il suruiet quel-
que grief symptome inopiné & non predict (cō-
me il y an ha plusieurs, qu'il n'est possible de
preuoir) ou bien la mort, on attribuera tout le
desordre au medecin: & il sera grandement
blamé ou calomnié, s'il ha fait quelque chose
contre l'avis du vulgaire, & des assistans. Car
le peuple ha vsurpé cette tyrannie sur les me-
decins: auxquels il deueroit totalement s'accor-
der, accommoder, obeyr & soumettre, pour le

seruice du patient: nompas les tenir aucune-
mant an crainte & defiance, ains les laisser an
pleine liberte & autorité souueraine. Autre-
mant, le plus suffisant du monde n'et pas di-
my-medecin, & ne peut rien faire d'excellent,
ayant perdu la hardiesse, tresfrequise à comba-
tre le mal. Dont contrainct de flechir, complai-
re & assuiettir à ceus qui contrerollet tout,
ou qui iettet des mots piquans à la trauersse, il
n'ose presser (moins contraindre ou conuain-
cre) par raison, ce qu'il estime etre melheur.
Ainsi plusieurs meuret bien pauurement, &
d'vn mauuais menage, à l'appetit de ceus qui
les aymet desordonnement. N'et ce pas grand
pitie, que le vulgaire ignorant tienne le me-
decin (qui ayme son hōneur & sa reputacion,
plus que chose du monde, ou il et indigne de
cet etat) an telle subieccion & seruitude, qu'il
n'ose & et craintif, mesmes à l'androit des siēs,
pour peu qu'il y ait de doute & difficulté?
Car si la fame, son anfant, ou autre parant, et
panse & traite de luy, autrement que les idiots
presumet sauoir & antandre, il sera soupson-
né, ou de n'aymer pas beaucoup, ou d'etre mal
auise, hazardeus & temeraire. De sorte q̄ nom-
pas à soy mesme, s'il croyoit le vulgaire, il ne
feroit bon medecin. Ne voila pas vn grād des-
ordre, & horrible cōfusiō, que celuy qui doit
etre obey, voire admiré, sans aucune defiance,
ou de sa preud'hommeie, ou de sa capacite, soit

M iij

128 Que mort n'est sans regret,
contraint de s'assuïetir au plaisir des plus igno-
rans du monde : & que cela redonde au detri-
mant & preiudice des pauvres malades, les-
quels seroient beaucoup mieus secourus, &
plus artificiellement traités, si les assistans an-
etoient mieus soucieux : ie dis nom plus, ne au-
tremant, que le Medecin l'ordonne.

DIS ET NEUVVIEME CHAP.

*Contre ceus qui diset, que mort ne
fut iamais sans regret.*



Le propos est trop general, & faus
pour la plus part. Car ceus qui
meurent d'extreme vielhesse, &
comme vne chandelle qui se-
taint, la meche n'ayant plus de
suif, ou de cire, meurent sans regret d'aucune
procedure tenuë an leur regime ou traite-
ment. Car il faut ainsi antandre le regret, an
ce propos icy. De mesmes, ceus qui sont ble-
cés à mort ineuitable, & que chacun tient
pour mors dez leur blessure. Car comme on
n'espere qu'ils puissent guerir, aussi n'ha on
aucun regret à ce qu'on y ha fait. Restet ceus
qu'on iuge guerissables dez le commence-
ment, lesquels an fin mourans (quelque fois
comme à la derobee) laisset vn grand regret à
leurs amys, qui ne s'an peuuet contanter. Or

le regret peut estre de deus sortes, & la chacune raisonnable, mais nompas ordinaire, ou toujours veritable, an ce qui touche les Medecins: comme veulet antandre ceus, qui vset volontiers de ce langage à tout propos. L'vne et, des grans fautes que commettet les malades, ou leurs amis, quand ils ne pouuoiet bien & soudain au commancement des maladies, d'un bon & fidelle Medecin, ansamble de toutes choses requises au recouuremant de la santé. Quelque fois on aura le secours pres, & on le meprisera, comme on meprise la maladie: laquelle ampirant, & an fin conduisant à la mort sans qu'on y puisse remedier, cause vn extreme regret. On fait aussi mille nullitez par ignorance, ou pour complaire au paciant, qui coutet bien cher, & laisset vn grand regret, quand on cognoit depuis à veüe d'œil, que cela ha causé la mort. On ne sauroit expliquer, la grande diuersité des fautes que commettent les malades, ou ceus qui les gouuernet: dont il s'ansuit finalemant, le regret de la mort suruenue. C'et assez d'auoir remoutré par ces trois condicions, de l'extreme vielhesse, des naurez à mort subite, & des fautes que commet le vulgaire, qu'il n'y ha touiours regret fondé sur la procedure qu'aura tenu le Medecin: qui et l'autre sorte de regret, des personnes qu'on pansoit guerissables. Ie ne veus icy maintenir, que nul meure de la faute des Medecins. Car ie ferois tort aus plus suffisans,

130 Que mort n'est sans regret
doctes, & bien auisez, si i'estimois tous ceus qui
se meslet de nostre etat, d'une mesme fasson ir-
reprehensibles. Aussi ie fay bien, que les igno-
rans, & les nonchalans Medecins, font de si
lourdes fautes, que les cimetieres an sont bos-
sus: & comme dit l'ancien auteur, la terre cou-
ure les erreurs des Medecins. Mais pour cer-
tain les plus sauans, prudans & diligens, sont
fort souuant calomniez, & à grand tort soup-
fonnez ou accusez, de la mort des personnes
qu'ils ont pansé. Car, combien que ie confesse,
qu'aucuns meuret d'un mal qui n'estoit, ou ne
sambloit, premierement mortel, si et-ce que le
Medecin an doit estre excusé, s'il n'y a rien ou-
blié, & s'y et porté diligemment, avec toute
curiosité & deuë obseruacion: d'autant qu'il y
ha si grande diuersité de cors, & de maus, que
l'imbecilité humaine ne peut toujours auenir, à
comprendre iustement, ou leur nature, ou la
grandeur d'iceus. Et quand Dieu veut appeller
quelqu'un à soy, il ote tous moyens d'ampe-
chemant: de sorte qu'on n'aura pas mesme l'a-
uis d'appeler au secours le Medecin à tams op-
portun: ou le Medecin ne pourra bien iuger
du mal, & de la portee du paciant: ou les re-
medes n'auront point d'efficace an cettuy-cy,
comme ils ont d'ordinaire. Il ne faut donques
reietter la coulpe sur le Medecin, quand quel-
qu'un vient à mourir, duquel il auoit bien es-
peré dez le commancement: ny auoir regret à

sa procedure (pourceu qu'il soit sauant & expert, homme de bien & diligent, affectionné au malade, cōme il doit) ains se resoudre chretienement, que Dieu an ha ainsi disposé à sa volōté, laquelle seule est raisonnable. Ou qu'on ha regret de quelque chose, qu'on la supporte humainemāt, comme cas fortuit, & qu'on n'ha peu preuoir pour l'euitier. Car ainsi auient-il an tous affaires, aus plus accors & prudās, au quels succedet mal plusieurs bonnes antreprises, sans qu'il y ait de leur faute, si ce n'et faute de deuiner: ce que l'esprit humain ne peut comprendre, par moyens ordinaires & legitimes.

VINTIEME CHAPITRE.

Contre ceux, qui pour auoir le vantage lache, marchent piés nus sur vn lieu froid: ou boiuet de l'huile en quantité: & qu'et-ce, qu'auoir bon vantage.

Let euidant & certain, que le froid des piés cause plus de vantage. La source et, que le cerueau, source de tous les ners, se morfond & refroidit, quand les extremitiez du cors (parties fort nerueuses) sont refroidies. Et c'et, à raison de la continuacion qui et antr'elles, & le cerueau, au moyen desdits ners. Or le cerueau fait part de son morfondement à l'estomach, & ha tout le vantage

132 Commant on se fera bon ventre
inferieur, auxquels il et fort allié par la sisième
couple des ners. Dont il auient, que les antralhes
de mesme refroidies, ne retienent assez long
tams la viande, pour la cuire & digeter. Par-
quoy il s'an ansuit indigestion & deuoyement
d'estomach, qui cause vn flus de ventre. Et cela
et-il sain? Non vrayement. Il vaudroit beau-
coup mieus garder sa constipacion: ou bien de
raffaichir tant seulemant les reins, & le foye
par dehors, afin que la matiere fæcale ne fut
ainsi recuite: dequoy procede, qu'on ne la peut
bien libremant vuidier. Et à cela suffiroit l'on-
guant rosat commun, & ancor plus le violat,
que i'ay mis en mon Dispanfaire. Mais de se fai-
re venir vn deuoyement de ventre par froidure
de piés, c'et tresmal auisé, d'autant que l'esto-
mach, les boyaus, & autres parties du ventre,
s'an affoiblissent. Et de fait, c'et vn trait de po-
ste ou frippon de colhege, qui afin d'auoir oc-
casion d'etre ranuoyé à sa maire pour quelques
iours, essaye de se faire malade. Tel flus de van-
tre, quand on an fait la vraye cause, se guerit à
force de verges. Et si on craint de decouurir les
fesses, pour ne morfondre dauantage le cu, ou
pour n'attirer ancor plus les matieres à l'an-
droit qu'elles ont prins leurs cours, il faut tref-
bien fouëtter le doz: & cela seruira d'vne bon-
ne reuulsion. Toutesfois le fouët sur les fesses,
rechauffe tellement ces parties là, qu'il fait bien
passer tel morfondement.

Il y an ha d'autres, qui boiuet vne eculee d'huile d'oliue bien douce à deieuner: les autres prenet vn boullon fort gras, ou manget force beurre. Cela offance l'estomach, de trop grande laxité: dont il deuient plus foible, & ne digere pas si bien. Car sa force consiste an restriccion, pour se bien reserrer contre la viande, qu'il doit embrasser & toucher de tous coutez: autrement il y a fluctuacion, qui fait ouyr vn cloc, cloc, dans l'estomach: dont la digestion ou concoction an et moins assuree. La mediocre laxité et plus seante aus boyaus, qui font mal leur deuoir quand ils retienet long-tams les excremans. Dequoy il s'ansuit degoutemant, pesanteur de taitte, chagrin, & annuy sans autre occasiō. Dequoy il vaudroit mieus, q̄ cet huile, ce boullon gras, ou ce beurre copieus, fut ietté dans les boyaus par vn clystere, sans passer par l'estomach, à ceus qui se plaignet de la constipacion du ventre. Car (cōme nous auons dit) l'astriccion et bonne à l'estomach, & la mediocre laxité aus boyaus. Ce qu'on peut heureusement pratiquer par diuers moyens, comme en prenant à la fin des repas quelque fruit astringeant, & se faisant donner quelque fois la semaine vn clystere bien remollissant. Tel sera d'une eculee de boullon de mouton fort gras, avec demy eculee d'huile bien dous, ou vn quarteron de beurre frais: deus ou trois moyeus d'œufs, & vne dragme de sel. Ce clystere et aisé à retenir, & si on ha vn peu

134 **C**omment on se fera bon vautre
de paciance, il pourra demeurer au vautre plus
d'une heure: pourueu qu'on l'ait prins etant
couché sur le costé gauche (ainsi qu'il faut tou-
iours) & que de là à vn demy quart d'heure on
se couche sur l'estomach, & puis sur le costé
droit, & finalement sur le doz, le tout de demy
an demy quart d'heure: & ainsi faisant la reuo-
lucion des boyaus, le clystere se logera bien au
large, dans l'intestin colon, où il fera tel seiour
qu'il conuiendra à detráper les excremans gros
& recuis. Outre ce, il humectera, remollira, &
randra glissant ledit boyau, tellement qu'il n'y
aura plus aucune constipacion de trois ou qua-
tre iours.

Reste à sauoir, qu'est-ce qu'on appelle bon
vautre: si c'est le plus mol, ou le plus dur. On dit
mol, pour lache, detrampé, & qui vuide sonnât
matieres pen liees: & au contraire, dur. Si cela est
en mediocrité, on le dit *benefice de vautre*, & ie
panse que tel proprement et appelé bon vautre,
comme toute chose bonne consiste en medio-
crité. Mais tout ainsi q' des vices qui tienent les
extremitez, l'un retire plus à la vertu que l'autre
(cōme la prodigalité samble plus approcher
de la liberalité, que ne fait l'auarice) samblable-
ment le vautre plus lache et dit meilleur que le
constipé: & sur tout et naturel, conuenable &
bien scant aus ansans, & à tous ceus qui māget
beaucoup. Voila pourquoy les nourrices disent,
l'enfant auoir bon vautre, quand il fait la ma-

tiere fort molle, & les anfans qui ont le vâtre lache, sont plus sains de beaucoup que les autres. Ceus qui sont cōstipez, ne viuet pas lōguemāt, & sont fort suiets à plusieurs maladies: sinon qu'ils chāget de cōdicion, ou d'eus-mesmes, ou par art. Et souuant il auient, que (suiuant la fantance d'Hippocras) ceus qui an ieunesse ont le vâtre humide, ils l'ont sec an vielhesse, & au cōtraire. Mais le plus ordinaire, et le vâtre dur aus personnes d'age: qui les rand bien souuāt suiets aus hemorrhoides: cōme aussi les fames anceintes. Le susdit clystere seruira à euitier telle indisposiciō, fort deplaisante & nuisante à plusieurs: mais il ne faut pas que les fames grosses an vser, pour peu qu'elles soint suiettes à s'affouler, sinō an fort petite quantité. Car an remollissant les boyaus, il pourroit aussi remollir la matrice, & lacher ses ligamans, au preiudice de l'anfant.

*Aph. 20.
liur. 2.*

VINT ET VNIEME CHAP.

Sauoir-mon si les huitres, & les truffles, randet l'homme plus galhard à l'acte Venerien.



DZ huitres en ecalhe, qui sont les plus estimees, & desquelles principallement on antand ce propos, il faut considerer l'eau contenue dans leur ecalhe, & l'hui-e qu'on māge. La susditte eau

*Liv. 3. de
la facul.
des alim.*

et de la marine, attirée de l'animal pour sa refec-
tion, ou certaine fruicion : laquelle autant que
salee, donne quelque eguilhon à l'amour, com-
me le sel mesme, & toute salure. Dont les ber-
giers font manger quelque fois du sel à leurs
ouailles, non seulement pour leur donner ap-
petit de manger, ains aussi pour les rendre fe-
condes. Aussi les Poetes feignent pour cette
occasion, que Venus fut angeandree de l'écume
de la mer. D'alheurs il faut antandre, que la
chair de l'huitre ha vn suc salé, comme Galen
temogne : à raison duquel aussi, elle peut egui-
lhonner. Mais tout cela et peu à rendre vn hom-
me galhard, & moins (s'il n'y a autre chose) que
les anchoyes, ou sardes salees, ou vn iambon. Et
ie panse, qu'il n'y ha autre chose de la part des
huitres, qui excite à l'acte venerien, sinon (par-
avanture) les vantositéz qu'elles produisent, &
qui naissent de la pituité, an laquelle tel alimant
se cōuertit pour la plus-part, ainsi elles ne peu-
uent causer grand effet au ieu d'amours, comme
si des huitres s'angeandroient beaucoup de se-
mance : ce que le vulgaire panse, & croid par-
faitement. Mais c'est vn abus trop euidant. Car
rien ne fait beaucoup de semance, que l'alimant
fort nourrissant, & qui deuient sang louable.
Ce que ne font pas les huitres, ains plustost vn
bon chapon, & autres chairs delicates, le ieune
mouton, le veau, les pigeonneaus, les œufs mol-
lets, les pigeons frais, bon pain, bon vin, & sam-
blables,

blables, en mediocre quantité. L'antans qu'à Venise on mange les huitres à l'heure du coucher, pour deuenir plus galhars à faire l'amour: anquoy ils s'abusent ouuertement. Car il faudroit au-moins, que telle viande fut digerée & conuertie en semance, auant que venir au ieu: ce que ne peuvent estre les huitres mangées apres souper, de trois ou quatre iours. Car il faut premierement, qu'elles soient conuerties en sang: & que les vaisseaus spermatiques l'attirent du foye, ou de la veine caue, apres auoir trauersé beaucoup de chemins. Puis il faut qu'il sejourne quelque temps aus testicules, ou pres d'iceux, dans lesdits vaisseaus spermatiques, lesquels on nomme aussi præparans. Ce n'est donc pas pour cette nuit là, que pourront seruir les huitres, à randre plus galhard le compagnon. Car elles n'ont pas la vertu piquante des cantharides, & autres tels medicamans, eguillhons de Venus. Et si elles doient seruir de là à quelque iours, apres auoir de foy produit beaucoup de sperme (ainsi que cuide le vulgaire) il vaudroit mieus les prendre parmy les autres viandes: & ancor mieus à deieuner, comme font la plus-part des ians an noz quartiers. Car les viandes prises à part, & mises dans l'estomach vuide, retienet mieus leurs qualitez, vertus & facultez, comme il est aisé à antandre. Mais tant s'en faut, que les huitres angeandrent beaucoup de semâce (qui est vne cōdicion pro-

N

chap. 33.

pre aus alimás de grand substance) qu'elles n'angeandret que phlegme gros & visqueus, comme Galen remontre par tous ses liures, où il traite des viandes : & particulierement au troisieme, de la faculté des alimens, où il dit, que les huitres lachet plus le vâtre, qu'elles ne nourrisset. Je say bien qu'on m'objcera l'experiance, & le commun vsage à cet effet-là : à quoy ie repons, que si on et plus inuité au coët & congrez pour auoir mangé des huitres, ce n'et que des grosses vapeurs & vantositéz, qui font tandre la verge, sans grand exploit, à faute de municion qui y reponde. Autant en feront bien les herbes vsuelles, à ceus qui an mangent quantité : & plus ancor les legumes, pois, faines, fauerols ou phaseoles, & samblables, qui outre la vantosité, conferer plus de nourriture au cors, que ne font pas les huitres. Ancor plus les charagnes, qui randent fort salaces tant hōmes que fames : dont il vient plus de nourrices des montagnes, que d'autre-part, à cause de telle nourriture. Le Vulgaire pense, que les huitres sont chaudes, & que cela suffit à la galhardise d'amour. Mais il s'abuse grãdemant : car elles sont manifestemāt froides, & on les fait telles dās l'estomach, mesmes quand on les ha māt es cruës, & sans poiure, qui et leur viaye conditure ou assaisonnement : tout ainsi que les truffes, lesquelles sont aussi fort ignoranimāt estimees chaudes, & par ce conuenables à l'acte Venerien. Si on ne veut

que s'y echauffer, que ne prend-on plustost de bonne epicerie, ou de l'hippocras, de la moutarde, ou des aus, qui echauffet si euidamment que rien plus (comme aussi le vin fort vapoureux, sutil, & penetrant) sans s'amuser aus huîtres & aus truffes, qui ont besoin d'estre echauffees par l'addicion du poiure? Le ne m'arrete pas icy à la plus grande ignorance [oserois-ie bien dire stupidité, à faute de sans naturel ou animal?] de ceus qui tienet, que le poiure refroidit: ouy, comme le feu. Et ne santez-vous pas, vne grande ardeur à la bouche & au gosier, si vous en auez prins vn peu largement? L'ardeur et elle de froid? S'il faut ainsi parler, & changer les appellacions des choses, nous dirōs que le froid brule proprement. Car ie say bien, qu'on le dit improprement, d'autant qu'il produit quelque fois vn tel effet que le feu, an apparance de son vestige. Si donc le poiure et le vray correctif des huîtres & des truffes (comme chacun m'accordera facilement) & le poiure et fort chaud au iugement du sans, auquel il s'an faut antierement rapporter: il s'ansuit necessairement, que les huîtres & les truffes sont froides. l'ay dit des huîtres selon Galen: Voicy que il dit des truffes. Elles n'ont aucune qualité notable: & pourtant ceus qui an vsent, an vsent pour leur faire prandre & receuoir les assaisonnemens, comme l'on vse des autres choses insipides & fades, qu'on nomme aigueuses. Auquel-

*Liv. 2. de
la facult.
des alim.
chap. 63.*

„ les routes et commun, que la nourriture qui an
 „ et departie au cors, n'ha aucune vertu notable,
 „ ains et froidelette, & crasse à leur mode: sauoir
 „ et, plus crasse des truffes, plus humide & liquide
 „ des courges, & des autres an proporcion selon
 „ leur naturel. C'est bien loin de produire beau-
 coup de sperme, ou d'exciter à l'acte venerien
 de sa propre chaleur, quand la truffe est compa-
 ree à vne courge. Il me souuient de ce que dit le
 Parasite, an la comedie Italienne, intitulee Ca-
 landra: *L'amore è simile à le tartuffe, lequali fanno à i
 giouani ri* *Xar quella cosa: & à i vecchi tirar corregie.*
 Et de fait, ce ne sont que vantositez & grosses
 vapeurs, qu'elles peuuent angeandrer & produi-
 re, tout ainsi que les huitres. Ce que peut bien
 randre les personnes salaces, mais n'ompas fœ-
 condes, ny pres de là. I'an craindrois plustost la
 sterilité: comme aussi de vray, les plus salaces
 sont moins d'anfans. Je pourrois discourir plus
 amplemant, sur la vertu des huitres & des truf-
 fes, mais ie reserue cela à mes MATINEES DE
 L'IL'ADAM, où ie traite bien au long de la
 qualité & vertu de tous les alimens vitez an
 France, & la maniere d'an vser sainement: œu-
 re autant requise à l'antretien de la santé, &
 guérison de plusieurs maus, qu'autre qui soit
 ancor diuulguee. Ie l'intitule ainsi, pour l'auoir
 commancee & fort auancee à L'Il'adam, cheus
 monseigneur le Duc de Mommorancy, Pair &
 premier Marechal de France. Dieu me fasse la

grace de pouuoir bien tost paracheuer, ce peu que m'an reste, afin de contanter plusieurs, qui ne cesset d'interroguer les Medecins quand ils sont à table, cecy et-il bon, cela et il mauuais, ou mal sain? que fait cecy, que fait cela? de sorte que le pauvre Medecin, qui souuant ha bon appetit, et coup à coup interrompu & detourné, pour satisfaire à ces demandes, & se leue de table à demy repeu. On pourra desormais ranuoyer ces interrogateurs (i'excepte les Seigneurs, & autres qui ont les Medecins pres d'eus pour leur santé) à la lecture des MATINEES DE L'IL'ADAM, où ils seront satisfaits de toutes ces curiositez. Je les nomme ainsi: car la plus-part de ceus qui an demandet, ne se souciet pas d'observer ce que le Medecin an dira, mais ils prennent plaisir à ce deuis, & d'etre ainsi antretenus, ou d'antretenir le Medecin: qui s'an passeroit aussi bien, que le moyne, auquel on auoit dressé vne telle partie. Mais il an sortit autant à son profit qu'honnestement, ne respondant iamais que par monosyllabes: ouy, non, blanc, noir, verd, gris, bis, long, court, bon, trop, sec, mol, froid, chaud, rien, bien, tard, loin, & samblables. Vn iantilhomme sy depaitra aussi bien d'un autre, qui le vouloit antretenir sur la condicion des huitres. Ce iantilhomme s'etoit amusé à seruir la compagnie, à laquelle il donnoit à diner. An fin, quand il commançoit à manger, ayant bon appetit, vn autre se met à

sinformer de luy, sur le propos des huitres
(qu'ils auoient an main) commant leur coquille
se fermer si iustement & ont si iuste prise, neant-
moins elles s'ouurent bien aisement au feu: si
l'huitre et yn poisson vrayement animal: com-
mant & dequoy elle vit: où et sa bouche: si ell'
et viuante tant que sa coquille et fermee, & par
consequant si nous la mangeons viue, & des-
sand toute viue an l'estomach, quād on l'aualle
antiere: que deuient-elle puis apres, &c. Le seul
iantilhomme luy repondoit, comme ayant le
principal soin d'antretenir ses conuiez. Mais
quand il s'auisa que cela duroit trop, & que
d'vne question cetuy-là (qui etoit deja sou) ve-
noit à l'autre, de sorte qu'il ne pouuoit manger,
il luy dit, Par ma foy, Monsieur mon amy, ie ne
say rien de tout cela: ie ne fus iamais huitre.



A M. FRANC. IOVBERT,
CHEVALIER DV S. SEPVLCHRE
de Hierusalem, Conselher & maistre des Re-
questes ordinaire de l'hotel du Roy de Na-
uarre, luge-mage de Valance. Christophle
de Beau-chastel, son tres-humble neveu,
Salut.



MONSIEUR, voyant que M. Barte-
lemy Cabrol, ha bien osé publier &
faire imprimer quelques chapitres des
Erreurs populaires & propos vulgai-
res, discours par M. IOVBERT
(votre tres-cher Fraire, & mon tres-honnoré Oncle)
comme à la derobee: me l'ayant communiqué toutes fois,
& de mon consantement: j'ay pansé de luy en fournir
encores quatre (pour faire un quarteron) lesquels j'ay
trouué parmi les broulhars de l'Auteur. Ce sont qua-
tre propos, discours autrement qu'ils ne sont au pre-
mier liure de la premiere partie. Je ne say s'ils ont esté
composez premiers ou derniers: mais il me samble qu'on
les trouuera aussi bons, ou melheurs, que ceus que leur
auteur ha fait luy-mesmes imprimer: outre ce, que la
diuersité et agreable. Ainsi on apprette une viande en
plusieurs façons: & en la chacune elle est trouuee bien
sauoureuse. D'auantage, ayant veu le Catalogue que le-
dit M. Cabrol, faisoit imprimer des propos vulgaires &
Erreurs populaires, qu'on ha anuoyé à M. IOVBERT,
ie me suis auisé de faire le samblable, & publier un
ramas des autres que j'auois en main: desquels la plus

N iij

part ont esté fournis par M. Ian Momin, docteur en médecine de l'université de Montpellier : homme fort studieux. Je say bien qu'il y en ha beaucoup de discours par M. IOVBERT: qui outre ce ha toutes prestes les cinq autres parties promises de son œuvre, diuisee en trante liures: mais ie ne say quand on les pourra auoir. Ce pendant on passera le tams à voir ce qu'on luy adresse de toutes pars, & chacun sera inuité à faire de mesme, suivant son exhortacion promise à la premiere partie, Au Lecteur d'esprit libre & studieux. Et si par fortune quelqu'un vouloit traiter vn tel suiet, il est prié d'abstenir au moins des propos qui luy sont ià vouez. M. Cabrol s'est adressé à Monseigneur de ville-Roy: pour faire que mondit sieur & oncle ne fut marry & courroucé de son antreprise: à mesme fin ie m'adresse à vous, qu'il respecte & honnore singulierement, comme son fraire ainé, & pour les rares vertus qui vous illustret, & font tres-digne successeur des principaux biens de vos maisons paternelle & maternelle, des IOVBERS ET GENAS. Prenez donc (s'il vous plait) & soutenez la deffiance de cette mienne antreprise: & s'il y a du mecontantement, ie vous supplie de faire mon appointement, comme il vous sera tresfaisé, ie m'an assure: & ie prieray Dieu que vous augmente ses graces, en toute prosperité. De Paris ce 15. iour de Feurier, 1579.

VINT-ET-DEVZIEME CHAP.

Contre ceus qui iuger de la suffisance des medecins par le succes, qui et deu souvant à l'heur, plus qu'au saoir.

NL n'y a estat plus sujet à calomnie que celui du medecin, pour la dignité de la vie & santé, que l'on prise & chérit sur toutes choses du monde. Aussi n'y a il estat de qui plus de jans se veulhet meler, qui ait plus de contrerollenrs, & duquel chacun veut cognoitre pour iuger de la suffisance de ses professeurs. Or le plus iniuste jugemant et du succes, qui souuât et d'un bon heur & rancontre, nompas de la suffisance ou bonne procedure du medecin. Car on void quelque fois guerir le malade, auquel on aura ordonné tout au rebours de ce qu'il falloit. De sorte que la force du paciant aura resisté, & au mal, & au desordre du medecin. Comme quelque fois les malades echappet, ayans fait quelque grand' faute, qui ne les a pu accabler. D'alheurs, il y ha des medecins tant heureux, que communement ils rancontret des malades guerissables, & ne sont appellés pour ceus qui ont à mourir: qui et un grand heur, mais nompas ordinaire, & pour y fonder iugemant. Donques il

146 Iugement de la suffis. des Med.
an faut venir au soir, & à la diligence, accom-
pagnez de preudhommie, prudence & fidelité. Car le succes bon & mauuais, ne font distinction du sauant medecin à l'ignorant: veu qu'au melheur medecin du monde il peut mal succeder, apres auoir fait tout deuoir. Mais s'il et autrement heureux (qui et de n'etre communemāt appellé pour les mortels) on an vera de si beaus & frequans effais, qu'on pourra iuger de sa suffisance. A ce propos ie dis volontiers, quand on meprise quelque sauāt medecin, pour auoir fallu à son iugement ou dessein, & qu'on vante vn ignorant, ou de peu de valeur, pour auoir mieus rancontré au mesme fait, ou samblable, que les fautes du sauant sont de bon comter, tout ainsi que les beaus fais de l'ignorant. Et pourtant cettui-cy les preche ordinairement, car on les peut aisement reciter, & ses fautes sont innombrables. Du sauant, tout au contraire: les calomniateurs repeteront souuant ses fautes, ou vrayes (car le bon Homere somelhe quelques fois) ou pretādues. Aussi ses braues cures sont infinies. Le peuple ingrat met facilement an hobly les benefices, qu'il aura souuant ressus, & dōne lieu an sa memoire aus plus legieres fautes. Mais pour moutrer euidammāt l'abus, de iuger par les succes, de la suffisance des medecins, ie ne veus autre argumant, sinon qu'un mesme personnage sera dit bon & mauuais medecin (chose contraire,

& partât impossible) a cette preuue là. Car de samblable mal, an mesme tams, & toutes circonstances parelhes, de deus malades l'un guerira, & l'autre mourra, etans traittez de mesme medecin : d'autant que le mal sera plus vehemant, & la vertu moindre an l'un, qu'an l'autre: ou que l'on n'aura amployé samblable deuoir à tous deus. On ne peut donc iuger de la suffisance du medecin par le succes, qui bien souuant et deu plus à l'heur, qu'au sauoir.

VINT-ET-TROIZIEME CHAP.

Que le vulgaire n'estime rien, si on ne guerit contre son opinion: que les derniers remedes ont tout l'honneur: & bien heureux le medecin, qui vient à la declinacion du mal.



omme il n'y a plus iniuste & de-
raisonnable que l'ignorant, auf-
si n'y a il rien de plus ingrat ou
mecongnissant. Car l'ignorance
aueuglit tant, qu'on fait mau-
uais gré du bien ressu : & on se tient pour o-
bligé du contraire. An la curacion des ma-
ladies, le vulgaire (iuge incompetant) esti-
me peu ou rien, si on ne guerit contre toute
esperance; ou plutost & plus aysemant que
il n'auoit comprins. Autremant il dit, que c'est
tout de l'effort de nature, que la jeunesse luy

a bien serui, que les bons potages, coulis & autres alimens, ou le bon seruice des gardes l'ont gueri. Brief le medecin n'y aura part ne quart, ains aura fait plus de mal que de bien : & dira on bien souuant, que s'on n'y eut rien fait, le malade fut plu-tost gueri : & autres samblables absurdités, que le peuple ignorant degoule. Mais si on tient le malade pour mort, & puis il vient à guerir, quand bien ce ne seroit du bõ ordre qu'y aura dõné le medecin (pourueu qu'il ayt continué à le visiter, & faire toujours quelque chose, ou bien ou mal, sans l'abandonner aucunement) on estime qu'il ha tresbien fait, & que c'est vne belle cure, voire miracle, ne plus ne moins que s'il l'auoit ressusité, ou absout de la mort, à laquelle on l'auoit condamné. Samblablement aus douleurs vehemantes de teste, des yeus, des orelhes, de la colique, nephritique, goutte, & samblables, si les remedes ne les otet ou diminuet soudain, ils ne sont riẽ prisés : & dit on, qu'il falloit bien que à la fin le mal s'an alla ainsi qu'ainsi, & les medicamans n'y ont de rien seruy : combien qu'ils soient cause que la douleur s'est appaisée, mais non si tost qu'on eut bien desiré. Car les remedes, comme toutte autre chose naturelle, requieret tams à produire leur effet. Y a il rien au monde plus actif que le feu ? toutesfois si vous luy voulez faire consumer & mettre ansandres vn gros bois verd, ou fondre du cui-

üre à vn instant, vous serés desraisonnable. Et
 qui dira, que ce pendant il ne fait rien? C'est
 pourquoy le peuple veut, qu'on chäge d'heu-
 re an heure de remedes, cōme si celuy qu'on
 ha ordōné & appliqué ne faisoit rien. A quoy
 le prudent medecin ne se doit accorder, si le
 medicament et propre & bien institué: suiuať
 l'Aphorisme d'Hippocras, que s'il ne succede *Aph. 52.*
 selon raison, à celuy qui fait tout par raison, il *liu. 2.*
 ne faut passer à autre remede, tant que perse-
 uere ce qui ha samblé dès le commencement. „
 Ceneantmoins, affin de contanter & amuser „
 le paciant, on peut bien de mesme matiere or-
 dōner vn autre forme de remede, & cōtinuant
 an la qualité ou geandre des medicamans, chan-
 ger souuant de forme & composition. Et voi-
 cy vn autre erreur, qui se decouure: c'est qu'ō
 attribue la guerison au dernier appliqué, ia-
 soit qu'il ne fut differant des autres an vertu,
 & que tous les precedās y ayt leur bōne part.
 Ainsi quant au centieme coup de hache vn ar-
 bre tombe, ce n'est pas le centieme qui ha tout
 fait, ains le chacun des nonante & neuf y a fait
 sa rate porcion. Le peuple voudroit (& il n'a
 pas tort de le vouloir, ou desirer, comme il ha
 bien tort d'an importuner le Medecin) que
 comme on romt vn rayffort, & que l'on coupe
 vn filet, ainsi on tranche le mal: qui et quelque
 fois aussi roide & anraciné qu'vn vieus ches-
 ne, lequel resistera à mille coups auant que de

tôber. Mais de peu à peu tout se fait, & pl⁹ seu-
 remant, que par grand violence: comme l'eau,
 qui et molle, vse & rôt la pierre par frequance
 de gouttes. A ce propos reuient, ce qu'on dit
 communement, Heureus le medecin qui vient
 à la declinaciõ du mal. Car il et impossible, que
 le paciant meure de la maladie qui diminue,
 puis qu'il ha eu la force de resister à l'effort de
 la vigueur du mal, comme Galen nous ense-
 gne. Dont ceus qui dõnet sus la queuë du mal,
 où il n'y a guieres de resistance, n'ont pas grãd^r
 besogne à faire. Et ce pendant ils acquieret
 (mais à mauuais titre) reputacion d'auoir sau-
 ué la vie au paciant, & que les autres medecins
 n'y ont rien fait que valhe. C'et pour reuenir
 toujours à nostre proposicion, que le vulgaire
 n'estime pas beaucoup, si on ne guerit contre
 son opinion. Car an la vigueur du mal tout et
 si debordé, par inquietude, veilles, reuerie,
 soif insaciabie, & autres tels accidans, que le
 vulgaire n'an attend que la mort. Si vn Mede-
 cin arriue là dessus, & le malade meurt, les pre-
 miers an sont accusez ou soupsonnez. S'il gue-
 rit (comme apres vne tintamarre d'accidans,
 le mal va an declinât, s'il et guerissable) le der-
 nier l'aura sauué. Et voila comment on recom-
 pance d'ingratitude, ceus qui ont eu la plus
 grand peine. Dequoy i'excuse ancores le peu-
 ple ignorant, nompas les Medecins presom-
 ptueus & vains, qui arrogamment & impu-

damnant l'attribuet l'honneur de la guerison: cōbien que (s'ils ne sont ignorās & frasqueus) ils s'achet bien, que cela ne leur appa, tient pas de droit. Car etans venus sur la fin, ils n'ont fait que voir le fruit du labeur d'autrui, ou quelque effort inopiné de Nature.

VINT ET QVATRIEME CHAP.

Des importuns & soupsonneus, qui calomniet les procedures du medecin. Des outrecuidés & presomptuens, dangereux aupres d'un malade.



LE Medecin n'ha faute de besogne, quand outre le mal qu'il doit combatre, il trouue resistance du couté du malade, des assistans, ou de ces deus ansamble. Car comm' il combat l'enemy, qu'il se met & propose au deuant, il et assally ou detourné par derriere, & de toutes pars, de l'importunité de ceus qui interpretet tout an mal, & rapportet les accidās, avec la lōgueur de la maladie, aus procedures du medecin. Car sil auient, q̄ les acces de la fieure soint plus grās apres la saignee, ou la purgacion, ils murmure et reprochet q̄ lesdits remedes an sont cause. Ils ne l'auient pas, q̄ tout mal va an augmātāt iusqu'à vn certain etat: apres lequel, si le mal et guerissable, il commāce à decliner:

152 Des importuns & outrecuidés,
& n'antandet pas, que les acces feroient ancor
plus vehemens, & auroient plus long accroisse-
ment, si telles euacuaciōs eussent esté omises. Ils
ne s'auiset pas aussi, que souuant les maus reci-
diuet pour diuerses occasiōs: que quelque fois
ils dōnet des traïues, puis font plus forte guer-
re qu'au parauant, selon que les humeurs se re-
muet & rebellet, faisans sedicion les vns apres
les autres. Quelque fois il auiedra par vn mal-
heureus rancontre, que la medecine sera suiuite
d'un flus de vātre iusques au sang. Ce flus estoit
à la porte, & on l'attribuera à la medecine, qui
n'an peut mais. Souuant auient de soy mesme
quelque douleur de teste, vomissemant, alte-
racion, tranches de vātre, inquietude, faute
de dormir, & autres facheus accidans, qui n'e-
toient dez le commencement de la maladie: cō-
me le plus souuant les maus cōmancet de peu,
simples & legiers. Que diront ceus à qui tout
et suspet, & causet mal les accidans? Cecy et
aueu depuis le clystere, ou depuis l'epithe-
me, l'onccion, la poudre, le potus, & autres re-
medes qu'on aura amployés. Il sera bien vray
que c'est depuis, mais nompas que le precedant
an soit cause. Ou ie diray samblablement, cela
et aueu depuis qu'il ha prins du boullon, ou
qu'il ha dormy, ou parlé à quelcun, &c. Don-
ques ces choses an sont cause. Il n'y a que le
medecin expert, & sutil à l'investigacion des
causes, & diligant obseruateur des effais sur-
uenans

uenàs aus maladies, qui puisse vrayement dire d'où partet ces accidans: & si c'est de la nature & essence du mal, ou de l'erreur du malade & des assistans, ou des choses externes. Ce pandât le Medecin et chargé de tout: & si on ne luy an fait plainte ou reproche, c'est par crainte de l'annuyer, voyât qu'on ha besoin de luy. Mais on ne laisse pas d'an murmurer, & d'auoir regret à tout. C'est grâdissime peine au medecin, de se voir ordinairement interroguer & ergotiser, d'où vient cecy, d'où vient cela? il ne l'auoit pas hier: c'est depuis telle chose. Je disois bien, que cela luy ameneroit quelque accidât: & autres tels reproches piquans & aigres, tresdifficiles à supporter ou dissimuler au medecin qui ha bon cœur, & s'amploie fidellemât au secours du malade: qui ha tous ses esprits bādés & tādus comme les chordes d'une epinette, à inuanter & accorder les moyens de surmonter le mal: & ce le plustost que luy sera possible, le plus seurement, & avec la moindre facherie q̄ faire se pourra. Et qu'et ce (ie vous prie) ainsi l'importuner à tout momât, & mettre toutes choses au doute & soupçon, sinon que par vne opinion de defiance, ou de sa volonté, ou de sa suffisance, luy faire perdre courage, & la hardiesse qu'il doit auoir à bien faire sa charge, etât fauori & acouragé de tous les assistâs? lesquels ne se doiuent etonner d'aucun accidant, tât que le medecin plus clair-voyât



154 Des importuns & outrecuidés

1. Aph. 1.
li. 2. ch. 6

les an assure. l'accorde bien toutesfois, que
luymesmes y et souuât trompé, comme le iu-
gemant des maladies et difficile & incertain,
suiuant la protestacion du grand pere Hippo-
cras. Car (ainsi que Celse ha tresbien remou-
tré) la Medecine et art coniecturel: & la rai-
son de la coniecture et telle, que quand elle
aura souuant repondu, quelque fois nous abu-
se. Mais si aucunes fois & à peine, au millesie-
me cors nous y sommes trompés, cela n'est pas
notable, veu qu'elle repond bien & rancon-
tre an infinies personnes. Ce que ie dis, non
seulemant an ce qui et dangereux, ains aussi an
ce qui et salutaire. Car souuant on et frustré
de son esperance: & tel meurt, duquel le me-
decin an premier s'assuroit: & les choses in-
uantees à guerir, quelque fois font ampirer le
mal, ce que l'imbecillité humaine ne peut eui-
ter, an si grand diuersité de cors. Il y a toutes-
fois creance à la Medecine, veu qu'elle proffi-
te le plus souuant, & à beaucoup plus de per-
sonnes. Il faut tenir cela pour resolu, que tant
qu'il plait à Dieu (auquel il faut toujours re-
mettre le principal, voire le tout) nous pre-
uoyons à peu pres l'auenir, par ce qui et pre-
sant, & ce qui et passé: de quoy nous assurōs,
ou nous desions de la guerison des malades.
Mais il y suruiēt des cas si inopinés & fortuis,
que les plus auisez du mōde ne s'an pourroint
douter. Et que feries vous là. Il n'y a personne

Chap.vint-&-quatrieme. 155

qui puisse repondre, de tant mille succés que nous obseruons an diuerſes maladies. Car nature ha interieurement des ſecrets mouuemés, & quelque fois des erreurs de ſon impuiſſance : deſquels ne ſe préſentent à nous aucuns indices qu'on puiſſe remarquer, iuſques à tant que l'on void le deſordre auenu, & au decouuert. Lors le vulgaire ignorant, & plein de ſouſſon, le rapporte à quelque choſe de celles qui ont été faites pour le meilleur. Et voila vn blâme au medecin. Il le faut bien prandre autrement, & juger ſainement, que nonobſtât la bonne procedure, infinis accidans peuuent auenir : & que c'et du naturel de la maladie, qui continuellement fait nouuelles ſorties, & aſſaut du coté qu'on ſe doute le moins. Quelque fois on paſſe auoir acheué, & c'et à recommencer. La maladie n'et pas vn ennemy qu'on voye à l'œil, & duquel on puiſſe comprendre tous les deſſeins, pour les rôpre ou preuenir. C'et bien beaucoup de reparer toujours les ruines qu'elle fait, & finalement la cōtraindre à quitter la place. An ces antrefaites ſuruiennent mille & mille accidans ou inconuenians, qui troublent & peruertiffent la curation. Il faut prãdre le tout an bonne part, & ſans moleſter les medecins (qui an ſont autant fachés q̃ perſonne qui ſoit) eſtimer, qu'on n'y ſauroit donner autre remede, que celui qu'on pratique.

Nous auons taxé les importuns & ſouſſon-

O ij

156 Des importuns & outrecuidés
neus, qui ne cesset de contreroller les accions
des medecins, & les troubler de mille doutes.
A presant nous parlerons des outrecuidés, te-
meraires & presomptueus, qui ont opinion de
sauoir quelque chose au fait de la Medecine
& des maladies, ou par obseruaciō, ou par vsa-
ge: & aucuns pour y auoir estudié quelque
peu. Ce sont personnes fort dāgereuses, & qui
traualhet infiniment vn bon medecin. Les sim-
ples ignorās & non outrecuidés, n'antrepren-
net que ce qu'on leur commande pour le ser-
uice du paciant, sans y aiouter ou diminuer,
emeus d'vne sage crainte de mal faire. Au con-
traire, ceus qui cuidet sauoir, & n'an ont au-
cun fondement, glosent toujours sur le *Magni-
ficat*, & n'estimet rien que ce qu'ils s'imaginet,
iugeans le medecin fort suffisant, s'il s'accorde
à leur propos. Autrement, il est rhabarbatif, ha-
zardeus, rude, & non amy de nature. De telles
jans parle Terance bien au vray, disant, qu'il
n'y a rien plus inique ou iniuste, que l'hom-
me ignare: car il n'estime rien bien fait, que ce
qu'il fait. Donques il ne faut aupres des ma-
lades, pour les seruir, traiter & gouuerner, ou
auiser de leur affaire, que les medecins bien sa-
uans, & les seruans ou seruantes qui ne sacher
rien, sinon executer proprement ce que leur
sera commandé, & qu'ils peuuet comprendre.
Car ceus qui sauet à demy, ou panset sauoir
sans raison, sont merueilleusement dangereux.

Chap. vint-&-quatrieme. 157

Ils ne sont ne chaus, ne frois, ains tiedes: parquoy on les doit vomir, c'est à dire, ietter hors de la chambre des malades. Or i'approuue les ignorans, pour assister aus malades, nompas qu'ils soint lourdaus & bestials, ains qui antâdet seulemât le seruice requis: comme de bien faire potages tels qu'ordonne le medecin, cuire les viandes, fassonner le lit, leuer & coucher le malade, vser discrettement de toutes choses ordonnees, comme leur sera dit, mesmes de l'apotecaire, ansuiuant l'ordonnance du medecin: Lesquels sâchet bien raconter ce qui est passé, ou de iour ou de nuit, obseruans toutes choses fort curieusement. Je trouue bon aussi, qu'ils proposet quelques doutes au Medecin, comme l'auertissant de ce qu'il peut moins s'auiser, n'estât toujours presant & d'ordinaire. Car cela le met an chemin bien souuant, de tenir autre procedure.

VINT-ET-CINQVIEME CHAP.

Que ce n'est le proffit des malades, d'auoir plusieurs Medecins d'un ordinaire.

LE vulgaire s'abuse grandement, an ce qu'il cuide auoir plus de secours, tant plus il ha de medecins: côme à la guerre, le grand nombre de jans, fait plus de force. Il est vray, que plusieurs de bon accord,

O iij

158 Des importuns & outrecuidés
ne font qu'un ; mais comme il est tres-difficile,
de rancontrer personnes qui ayent mesme aui
an toutes particularités, bien souuant la mul-
titude est dommageable : comme eprouua le
bon empereur, qui dit au mourant, *L'antree de
plusieurs medecins m'a perdu.* Je trouue fort bon,
que à la moindre difficulté d'importance, on
appelle au cōseil quelque nombre de person-
nes doctes & expertes : mais à executer la re-
solucion, & regir le malade ordinairement, il
n'en faut qu'un surintendant à toutes les par-
ticularités, lequel de sa prudence & discrecion
ajoute, diminue, chāge, auance, retarde, dispan-
ce, inuante & ordonne chaque chose par le
menu. Autrement, on n'auance pas grand be-
sogne, l'un se reposant sur l'autre, ou bien con-
tredisant de chose qui ne vaudra presque le
parler. Ce pendant mille belles occasions se
passent & perdent : dequoy le pacient au souf-
fre, lequel s'atand à la discrecion de ses gou-
uerneurs. Un autre incommodité bien gran-
de est, quād les medecins ne sont expres cheus
un malade & d'ordinaire, ains le visitet par vil-
le, c'est qu'estans plusieurs au part, il ne se ran-
contre pas de pouuoir toujours s'y trouuer à
mesme heure : & si l'un attend l'autre, il perd
tams, qui fait bien besoin à d'autres malades.
S'il ne l'attād pas, il n'y aura comunicacion
auec discours, ainsi que le malade ou ses parās
desiret. Cela est merueilleusement incommo-

de aus pacians, & mesmes aus medecins. Dont ie dis volontiers, que qui veut etre mal secouru, ayt plusieurs medecins. Voicy commant il faudroit faire: dez le commencement an appeller quelque nombre, affin de consulter & conclurre ce qui et à faire, pour mettre le malade an bon train de guerison. Puis retenir ce-luy de tous qui sera plus agreable, auquel seul on remette la discrecion de tout. Et quād il suruient quelque accidant nouueau, ou que le mal et opiniatre, ou qu'il se presante occasion de panser à autres remedes, r'appeller le conseil, lequel sera depuis executé par le medecin ordinaire.

*RAMAS DE PROPOS VVLGAIRES,
& Erreurs populaires, avec quelques proble-
mes, anuoyés de plusieurs à
M. IOVBERT.*



Es barbiers de village ne veu-
let point de chemises de fame,
pour faire de la charpie, des
plumaceaus, tantes, compres-
ses & bandages: ne aussi du
lin, ou etouppes de lin, à pan-
ser les playes, vlceres, contusions, & fractures.
2. On auertit ceus qui ont le carboncle, de ne
passer l'eau, sur pont, ou sur bateau, ne an sorte
que ce soit.

O iiii

3. Pourquoi deuient on anroué, d'etre veu premierement du loup?
4. D'où vient, que si on trampe du salé, chair ou poisson, d'as l'eau de mer, il se dessale mieus & plu tost, que si il trampe an eau douce?
5. La graisse de poisson offance elle plus l'estomac, que toute autre graisse?
6. Le poisson, puisque il et vn coup hors de l'eau, il ne la doit iamais toucher.
7. Les chiens anraget de iuner.
8. Commant et ce, que de velher on deuient fou, si on y ha quelque inclinacion?
9. D'où vient, que tant plus on dort, tant plus on veut dormir, & au contraire?
10. Apres le boire & le repas, le dormir sain ne trouueras.
11. Commant peut on auoir le foye chaud, & l'estomach froid?
12. Et il vray, q les couchos & les agneaus, tant plus ieunes sont, tant moins sont bons à mager: & au contraire les cheureaus & les veaus?
13. La laine de la brebis, arrachée de la gueulle du loup, angeandre force pous.
14. D'où viêt, qu'o ha plus de froid, ou de douleur au bout des dois, que ez autres parties?
15. Que la chair de la beste, qui et morte d'un seul coup, et plus tandre qu'autrement.
16. Contre ceus qui diset, que les malades guerisset plu-tost, si on les laisse viure & faire à leur appetit.

19. D'où vient qu'un cors bien sain, ne peut par son atouchement guerir le malade, comme le malade peut infecter celui qui est sain?
18. Pourquoi dit-on que ceux qui sont frais en été, sont bien sains: & au contraire, ceux qui sont chaus en hyuer?
19. Faut-il que les maladies facet leurs cours?
20. Pourquoi et plus dangereux, le changemant du chaud au froid, que du froid au chaud?
21. Pourquoi n'est-il pas bon, que les petits enfans regardet la clarté fort attantueement?
22. Pourquoi dit-on, Il iase, il ha les piés chaus?
23. On dit, que la petite orelhe et marque de bon esprit, & de malice aussi, sur tout aus fames.
24. Ceux qui ont la veine du front grosse & apparante, fort aisee à s'anfler, sont malicieux.
25. S'il faut boire le plus grand trait au commandement du repas: & qu'il soit plus ou moins trappé, que les autres d'apres.
26. D'où vient que les chapons sont plus & plus tost gouteus que les coqs, si la castracion et remede à la goutte?
27. Comment peut la palhe conseruer la neige, & la glace, veu qu'elle fait meurir les fruis, & le fromage?
28. Que les premiers & derniers frois, sont les plus dangereux.
29. D'où vient, que le soleil de Mars et plus catartheus, qu'un autre saison: & qu'on eternue plus au soleil, qu'on ne fait aupres du feu?

30. Que le malade doit dormir quand il peur,
s'il ne peut dormir autrement à propos.
31. Qu'il faut croire au malade, du dormir, de la
soif, & de la douleur.
32. Et-ce bien dit, ce dont couuert an hyuer as
eté, ne le depoulhe en été?
33. Quatre sont les mauuais boccons, peiches,
figues, melons, & champignons.
34. Pourquoi dit-on, qui ha la fieure au mois
de May, tout l'an demeure sain & gay?
35. Qui nait le Dimanche, iamais ne meurt de
peste, quoy qu'il an soit attaind.
36. On dit, que la plus-part des gelines, & des
lieures, sont ladres.
37. Il et sain comme vn poisson, & ha l'esto-
mach chaud cōme vne calhe. Il pourroit man-
ger des charrettes ferrees, que ne luy feroient
point de mal.
38. Si l'haleine du punais peut suffoquer vn an-
fant dans le vantre de la mere, & si la punaisie
peut causer diuorce an mariage.
39. S'il est possible, que le poil croisse au per-
sonnes mortes, & les ongles aussi.
40. Et-il vray, que l'on croit touiours, tant que
on ha des recidiues?
41. Male semaine, mal an, mal touiours.
42. Fat vn iour, fat vn an, fat touiours.
43. Oeuf d'une heure, pain d'un iour, chair d'un
an, poisson de dis.
44. Et il possible de prandre la verolle, pour

aller à ses affaires sus la chaire percee d'un verolé, qui n'an fait que partir?

45. S'il et plus sain, de chauffer le linge des malades au feu de sarmans, & le parfumer de son.

46. Si le persil nuit à la veuë, & si le ius des rai-fins vers l'eclaircit.

47. Comment on peut estre nourry de clystere.

48. L'hippocras beu au soir cause anrouëure, & quelquefois la squinance.

49. La Hyacinthe fait reuer plaisamment : & l'Emeraude donnee du mary à la fame, se romt aussi tost qu'elle romt son mariage:

50. De nouueau tout et beau, de saison tout et bon.

51. Un mal ne vient iamais seul, & mal sur mal n'et pas santé.

52. Tard medecine et apprettee, à maladie anracinee.

53. D'où vient, que le vin nuit aus parties nerveuses prins par dedans, & leur profite appliqué par dehors?

54. Comment toute beste venimeuse porte son contreuenin : & si la beste morte et mort le venin.

55. Pourquoi dit-on, que depuis l'inuention du rondre, & de porter des mules, les medecins ne vont plus tant sur mules?

56. Dequoy sert prandre de l'acier pour les pailles couleurs, & si les poulles qui boiuet de l'eau des forges se trouuet sans ratelle : comme les

brebis qui brouter le tamaris pres d'une certaine riuere?

57. Et-il vray, qu'il faut touiours boire quand on ha soif, & manger quand on ha faim, & dormir quand on ha sommeil : & qu'on ne se doit garder de manger, sinon des charretes ferrees?

58. Pourquoy dit on, que si l'enfant peut passer neuf iours, il est hors de dangier : & à cela on cognoit, qu'il est de terme legitime, & par tams?

59. Y a-il quelques maladies, desquelles passez certains iours, le paciant ne peut mourir?

60. Si le potage froid, ou pris apres le repas, engraisse plus qu'autrement.

61. A vn cors bien tamperé, l'appetit de manger, & de dormir, vient-il touiours à mesme heure : comme on se reuelhe volontiers à mesme heure?

62. D'où vient, que quelques vns se leuans fort matin, ont tout le reste du iour mal de teste?

63. Pourquoy apres vn grand exercice, il ne faut boire ne manger incontinent, ny quand on sue?

64. Qu'on attribue souuant la conualeissance au changemant de l'air, qui n'est pas moins deuë au changemant de l'eau.

65. Pourquoy dit-on, que les sandres sont medecine : & que le pain moisi eclarcit la veuë?

66. Si le manger des aus fait angeandrer des enfans males : & s'ils sont bons à la peste, dont on les nomme, *la theriaque des rustiques*.

67. Si les fleurs blanches ou rouges des fames augmantet, quand elles prennent chemise blanches: & si au contraire, an la rogne & an la peste il faut changer souuant d'habits.

68. Si les fleurs blanches sont contagieuses, de sorte que l'homme an puisse prandre la pisse-chaude.

69. Pourquoi anueloppe on celuy qui est tombé d'anhaut, d'une peau de mouton ecorché sur le champ: & si la mumie ampesche le sang de se calher an l'estomach: ce qu'on dit aussi de la presure.

70. Pourquoi sont les hommes plus echauffez à l'amour durant l'hyuer, & les fames durant l'été?

71. Si coucher avec vne vielhe, rand vn ieune homme sterile.

72. D'où vient que l'homme s'annuye tost à la luitte amoureuse, iamais la fame: & qu'un coq suffira à treize poules, mais vne fame à quatorze hommes?

73. Vne rotie apres le past, ou vne croute de pain, ou boire vn peu d'eau fraiche, sont ils bons contre le mal de teste?

74. Que la viande bien machée, et demy digeree.

75. Pourquoi dit-on, ieune barbier, & viel medecin?

76. Beau à vint ans, fort à trante, sage à quarante, riche à cinquante, vieus à soissante.

77. Et il bon, que les ansans mangent beaucoup de pain sans viande?
78. Que l'eau mielee, dit'hydromel, nourrit autant ou plus que le vin.
79. Que toute nostre vie, n'est qu'une maladie.
80. Que l'acte venerien n'est pas necessaire à la conseruacion de santé.
81. Que la langue noire au commencement d'une maladie, n'est pas toujours mauuais signe.
82. Contre ceus qui diset, que les ansans de set mois n'ont point d'ongles.
83. Que l'eau extremement froide, & claire, et plus vicieuse que louable.
84. Si la gelee est bonne & saine, tant aus sains, qu'aus malades.
85. Apres la figue, vn verre d'eau: apres le melon, vn verre de vin.
86. Vn pan, se garde vn an.
87. Et il vray, que si la fame consoit au croissant de la lune, ce sera vn fis: & si au décroissant, vne filhe?
88. Qu'il ne faut pas craindre tout ce qui peut auenir, combien que puisse à tous auenir, ce qu'auient à quelqu'un.
89. Et-il vray, qu'il n'y ha rien de sain, qui ne soit sain toute l'annee?
90. De ceus qu'on enterre vifs, pansant qu'ils soient mors.
91. Et il vray, que la langue du chien soit me-

decinale, guerissant les vlcères?

92. Catholicon, eau benite de medecine, & de tauerne.

93. Qui retient plus longuemant son vrine, l'homme ou la fame, & pourquoy?

94. D'où vient, que les dans basses croisset plustost aus anfans, que celles d'enhaut?

95. Qu'et-ce que, faire aller la medecine à cloche-pié?

96. Si c'et bien dit, lauer souuant les mains, raremant les piés, & la teste iamais.

97. An la peste il ne faut pas souffler sa soupe: & il conuient parler plus souuant à Dieu, qu'aus hommes.

98. Qui n'et pas sain, n'et guieres sage: car le mal contraint à beaucoup d'imperfections.

99. Pourquoi dit-on, de ceus auxquels le vantage groule, qu'ils ont des grenoulhes dedans?

100. Et-il mauuais de se chauffer le vâtre apres le repas, comme si cela pouuoit ampecher la digestion.

101. S'il et melheur d'estudier le soir apres souper, ou le matin: & à quelle sorte de ians.

102. Si vn homme ne veut manger qu'une fois le iour, à quelle heure doit il prandre son repas?

103. Si boire de l'eau fait bien au foye & aus yeus: & s'il nuit à l'estomach & à l'amarry.

104. Et-il vray, que la fieure quarte s'an va par excez, ou yurongnerie: & qu'elle ne fait iamais sonner campane: & qu'un homme an et plus sain

tout le reste de sa vie?

105. D'où vient, que si l'on passe l'heure accoutumée de son repas, on en perd l'appetit?

106. Si de trop boire, on peut piffer le vin: & de trop embrasser, le sang.

107. Que le vin immodéré accourcit la vie, comme la chaus mise au pié d'un arbre.

108. Si la lumière de l'huile est meilleure pour l'étude, que celle de la chandelle.

109. S'il est bon à un rogneux de se lever matin, pour s'aller pourmener.

110. Si au tans de pluye il faut peu manger, peu boire, & faire grand exercice dans la maison.

111. Et-il vray, que ceux qui ne mangent beaucoup, ne sont pas robustes au trauail?

112. Si le pain de froment oppile, le pain de seigle lache, & guerit les hemorrhoides: celui d'avoine ou de mil, constipe: & le pain de maison est plus sain, que celui du fournier: & si un peu de son parmy le pain, lache le ventre.

113. Ceux qui ont les poulmons, ou le foye gatzé, aymet fort le vin pur: & d'où vient que quelques uns pissent au lit, s'ils mettent de l'eau au leur vin?

114. D'où vient, que le vin musquat anyure pluost, & plus longuemant, si on y met de l'eau?

115. Et-il bon, de boire de l'antree de table un trait de vin pur, auant manger, pour auoir le ventre lache?

116. Pour;

116. Pourquoy est-ce, que plus de ians meurent la nuit que le iour?

117. D'où vient, que le serain de la Lune et plus catarrheus, que celuy du Soleil: & que le matin et plus frais que la nuit, ancor qu'elle soit plus elognee du Soleil?

118. Pourquoy dit-on la goutte et la maladie des riches, & la rougne des gueus: & neantmoins qu'il n'appartiët pas aus belitres, d'auoir si grãd plaisir qu'on ha de se grater?

119. Pourquoy sont les ladres plus palhars que sains, & moins suiets aus pous, aus fieures, à la peste, & autre contagion?

120. Si ceus qu'on appelle en Gascogne Capots sont vrayement ladres: & quelle et leur origine.

121. Si quelqu'un peut estre ladre, sans en auoir les marques au visage, où l'on constitue les signes vniuersels.

122. Pourquoy la grosse verolle va au declinant, & maintenant se guerit mieus que du commencement?

123. D'où vient que les goutteux, verollez, & ceus qui ont eu quelque os rompu, sentent le changement de tams?

124. D'où vient, qu'ez lieux où croiffent les bons vins, il s'y en boit moins qu'alheurs?

125. Pourquoy dit-on, l'Espagnol mäge, l'Allemand boit, & le François s'accommode à tout: & on le nomme le singe des autres nations?

126. Que le dormir sur le calhé et poison, & sur l'yurognerie et medecine: mesmemant si l'yurogne ha vommy, ou si on luy ha ietté vn seau d'eau aus parties honteuses.

127. Et-il au pouuoir d'une fame, d'etre malade & guerrie quand elle veut, suiuant le vieus ditton?

128. Pourquoy dit-on, aus & oignons pour les Gascons, tripes & boudins pour les Limosins?

Et qu'un Limosin est grand mägeur de pain, vn Bourdelois de chair, l'Espagnol de salade, l'Italian de fausses, & vn Seuenaut de chastagnes.

129. D'où vient cela, qu'il y a tant de goutteus à Bordeaux, tant de hernieus à Mōpelier, de goitreus an Sauoye, de fous an Bearn, de fats aus anuirōs de Mōpelier (où ils les apellet bauchs) d'epileptiques an Toscane, mesmemant à Floreñce, d'escrouëlleus an Espagne, de phthifiques an Portugal, & tant de ladres an Limosin?

130. D'où vient, que de tenir la teste trop couuerte, fait venir le poil chenu: & si le froid de la teste nuit à la memoire?

131. Et-il vray que le frequent coït, & l'vsage des medicamans, anuielhit les personnes?

132. Commant et bonne contre le rheume, l'vrine des petis ansans?

133. Se peut-il angeandrer vn venin dans notre cors: & si l'Incube et quelque esprit?

134. Ceus qu'on saigne vne fois l'an pour precaucion, faut-il qu'ils continuet cela toutes les

annees, à peine de s'en trouuer mal?

135. Et-il bon à ians gras, replez, & andormis, de se courroucer fort souuant : & aus impudans d'etre contristez : & si l'acointance des famies est vtile aus melancoliques?

136. D'où vient qu'une maladie contagieuse se prend plustost d'un vieus à un ieune, qu'au contraire?

137. Vaud-il mieus laisser viure un homme suivant sa coutume, ancor qu'elle soit mauuaise, que la changer tout à coup?

138. Et-il vray que les eaus des puis sont plus chaudes an hyuer, & froides an æté : ou si elles le samblent estre tant seulemant?

139. Et il bõ de laisser aller les enfans teste nuë : & si on faisoit bien iadis an Angleterre, qu'on les plongeait dans l'eau glaccée?

140. Et-il vray que ce qui plait à la bouche, est bon à l'estomach?

141. D'où vient, que les famies parlet plus que les hommes, & sont comunemant plus belles?

142. Et-il vray, que les famies sont moins ingenieuses, & moins vitales que les hommes, plus auares & tetues?

143. Et-ce bien dit, aile de perdris, cuisse de chapon, queue de poisson, teste de saumon?

144. Pourquoy disoit un grand Medecin, que les perdris angeandret des pous?

145. Que la chair aupres les os, et la melheure : & le roty et comunemant plus dur q le bouly.

146. Que le sucre aus ansans garde d'angeandrer vers: mais s'il sont angeadrez, il les emeut.

147. Iamais sucre ne gata fauce.

148. Pourquoy craind-on, que de trop crier les enfans se creuet, mesmemant s'ils sont males?

149. Si c'est bon signe, que l'ansant tette bien, quand il pisse beaucoup.

150. Et il vray, que les sages fames puissent faillir les mambres des ansans, quand ils naissent: & les randre stupides, an leur pressant le crane: ou les faire souuant choir an syncope & vomissement, an leur comprimant la bouche de l'estomach?

151. Et il vray, que les abilhemens qui pressent, ampecher les ansans de croistre: & qu'à ceus qui baissent fort la teste, il faut bien anfoncer le chapeau sur les yeus, pour accoutumer de la hausser?

152. Et-il vray, que la chair froide met an appetit: & le porage chaud au cōmancement du repas le diminue? Que le vin pur epargne de manger: & l'eau au contraire, rand les ians affamez.

153. Pourquoy dit-on, il ha vn Almanach an la teste, de celuy qui sant le chāgement des tams?

154. Et il vray, que de serrer fort les iarretieres le sang monte au visage, & qu'on an deuient rouge?

155. Que les phlegmatiques vivent long tams, mais ils sont suiets à maintes maladies: & au contraire, les bilieus.

156. Faut-il manger pour antree de table les viandes plus faciles à digerer, excepté quand l'estomach et bilieus?

157. Et il vray, qu'un homme bilieus sera plus tost ampoisonné, qu'un autre?

158. D'où vient, que les enfans de huit mois ne vivent point.

159. D'où vient, qu'un homme an sa cholere, ou erant an frenesie, et plus robuste qu'etât apaisé, & an bon sans?

160. Pourquoy dit on, vin de pourceau, vin de lyon, & vin de finge?

161. Le poisson et-il melheur cuit au beurre, ou à l'huile?

162. Pourquoy se couure-on tant an dormant? & pourquoy dit-on, robbe velours, vantre de bureau?

163. Pourquoy aime-on changer de viande, & du pain on ne s'an fache point?

164. Pourquoy dit-on, pain changé, & vin accoutumé?

165. Pourquoy dit-on, pain d'un iour, vin d'un an, & farine d'un mois?

166. D'où vient, que le coin pris au commencement de table, serre. & pris à la fin, lache le vantre?

167. Pourquoy dit-on, antre deus petis un glorieus, & antre deus grans un lourdaut?

168. Pourquoy dit-on, que ceus qui mangent debout, ou an se pourmenant, mangent dauan-

rage: & si la coutume des anciens estoit louable,
qui mangeoit sur le lit, ou à terre?

169. Commant et-ce, que la graine de laitue
prise dans vn œuf durant trois matins, fait auoir
du lait an abondance?

170. D'où vient, que la recheute et plus dange-
reuse, que la premiere maladie?

171. D'où vient, qu'aus fieures tierces, le vautre
et coutumieremant constipé?

172. D'où vient que le premier & le dernier age,
sont plus suiets à maladies que les ages moyès?

173. Pourquoi les oiseaus boiuet tant peu, & le
loup mange tant.

174. Pourquoi tous les ans naittent la teste
grosse, & camus.

175. Pourquoi ceus qui vôt fort serrez de cein-
ture, sont plus anclins à palhardise.

176. Si les os sont insensibles, d'où vient que les
dans sentent si grand douleur?

177. D'où viét, que les animaux procreez de di-
uerse espee, comme la mule, sont steriles?

178. Dequoy peuuet seruir les fronteaus au mal
de teste?

179. Pourquoi les males croissent plustost dans
la matrice, & les femelles hors de là.

180. Pourquoi tout animal fuit le coït en sa
grosse, & an certain tams, fors que la fame.

181. Pourquoi n'et il bon de parler beaucoup
en mangeant?

182. Commant sert la panade au flux de vautre.

183. L'homme et il inferieur aus bestes, de ce qu'il ne fait naturellemant aucun remede à ses maus, comme faient les autres animaux?

184. D'où vient, qu'on appelle le vin dous, vin de commeres?

185. Pourquoy dit-on, deieuner de elers, diner d'auocas, gouter de commeres, souper de marchans, & reuelhon de nourrices?

186. Pourquoy dit-on, que le melancholique mange, le bilieus boit, & le pituiteus dort?

187. D'où vient, que les ansans mangent beaucoup, boiuet peu, & ne cesset de trotter?

188. D'où vient, qu'ayant beu du vin, soudain on le fant à la playe, ou à la goutte, combien qu'il soit ancor dans l'estomach?

189. Que ce n'er pas grand meruelhe de voir que l'Otruche digere le fer, veu que les poules n'an font pas moins.

190. Que le rire, & estre ioyeus, ampeche de deuenir vieus.

191. D'où vient, que les dans font mal, si on fait grinser avec vn couteau vne assiette, ou autre chose?

192. D'où vient, que de se bagner aus riuieres, on deuient affamé?

193. Pourquoy dit-on de celuy à qui puet les piés, qu'il er bien sain?

194. Pourquoy ceus qui ont grand foye mangent beaucoup, & ceus qui ont le cœur grand ont timides, & ont le pous petit?

195. Boire de l'eau quand on se va coucher, fait-il dormir?

196. Pourquoi sont les vajues & les nonnains plus suiettes à suffocacion de matrice, que les mariees : & sert-il de flairer les mauuaises senteurs, pour reuenir de ce mal?

197. D'où vient que les ansans sont plus suiets à la rogne, aus vers, & à l'epilepsie: les ieunes aus fieures & hemorrhagies, les vieus à la tous & à la goutte: les fames à mal d'estomach & de teste?

198. Et-il vray, que ceus qui se mouchet fort sont plus sains, que ceus qui crachet beaucoup?

199. Et-il vray, que la melheure chair et pres des os, & du poisson la queuë, de la perdris l'aile, & du chapon la cuisse, de la becasse la merde?

200. Cuisses sont bonnes, quand ailes sont mangees.

201. Les gemeaus se font-ils d'un mesme coit, ou de diuers (suiuant Hippocras) par superfæcation : & si vn ansant peut estre de cinq mois, comme le grain ietté an terre croit plustost l'un que l'autre?

202. An tams de peste, vaut-il mieus qu'il vante, que s'il fait calme?

203. Pourquoi et tant mauuais le dormir sur iour, ou au serain, ou incōrinant apres le repas?

204. Pourquoi les ians gras, & les maigres, sentet plus au bouquin, que les autres?

205. D'où vient, que ceus qui boiuet de l'eau

& ceus qui velhet ou trauailhet, manget plus:
ceus qui boiuet beaucoup de vin, ne manget
guieres?

206. Pourquoy se passera on plustost de man-
ger, que de boire?

207. Pourquoy dit on, de la pāse vient la dāce?

208. Le medecin peut il guerir ies passions de
l'esprit, veu qu'il et seulemant pour le cors?

209. D'où vient, que quelques vns an dormāt
parlet & cheminēt : & pourquoy s'effrayet
souuant les anfans an dormant?

210. Pourquoy dit on, de celuy qui et magna-
nime & genereus, il ha grand cœur : veu que
ceus qui ont le cœur petit, sont les plus hardis?

211. Pourquoy dit on à quelques vns, qu'ils
ont les yeus plus grans que le vautre?

212. Pourquoy dit on, les poires sont pierres,
la nois gate la vois, le vin fait sang, l'eau amai-
grit, contantemant angraisse, & le sommeil
nourrit?

213. Ne faut il point guerir la rongne, qui viēt
à la teste des anfans?

214. S'il faut laisser faire son cours au rheume,

215. Et il vray, que les fames pales sont plus af-
fectionnees au coit, que les rouges, & les mai-
gres que les grasses: & que les petites sont plus
secondes que les grandes, les maigres que les
grasses?

216. D'où vient ce qu'on dit, Parisien foireus,
Champenois peteus, filhe pisseuse, vicus chaf-

sieus, anfant breneus?

217. Pourquoy sont tant difficiles les jans vious, & ne louët que le tams passé?

217. D'où vient, que les poissons commencent à se corrompre par la teste, & les autres animaux par le ventre.

219. Faut il manger beaucoup au tams de peste, ou faut il s'extenuer.

220. Pourquoy vne mie de pain mise dans le lait, le fait devenir aigre.

221. S'il est vray, qu'un des vers qui luisent de nuit au été, ampeche le lait de se calher, s'il est dans la maison.

222. Et il vray, que l'homme boit plus qu'un tout autre animal, & que sa fiente est la plus puante, pour la diuersité de ses viandes?

223. Et il vray, que les animaux qui mangent de la chair de leur espèce, deviennent ladres: & qu'il en auientroit de mesme à l'homme?

224. Pour ne sentir tant de faim, et il bon d'estre ceint etroitement: & pour etancher la soif, de macher du papier?

225. Pourquoy dit on, qu'un tams de guerre il ne faut manger, ne semer, de la mante?

226. Pourquoy parlet les oiseaux, plutost que les autres bestes?

227. Pourquoy la bise est contraire à la poitrine, & le vent austral au cerueau.

228. Pourquoy le vin nouveau anyure tant, & comment sa fumee peut suffoquer vne per-

sonne, tandis qu'il boult.

229. Et il vray, que l'huile et melheur au cō-
mancement, le vin au milieu, & le miel à la fin?

230. Et il melheur signe aus fieures, que les
vers sortet vifs, que mors?

231. Pourquoy l'homme et plus sujet aus mala-
dies, que les autres animaux: & qu'il vit moins
que le courbeau, la corneille, le cerf, &c.

232. D'où vient, que les bestes santet plustost
le changement du tams, que les hommes: &
les plantes, que les bestes?

233. Pourquoy et ce, que l'vrine tant plus elle
et retenue, plus elle put: & au contraire de la
fiante?

234. D'où vient, que les ladres ne sont point
tant sujets à fieure, ne prenet si tost la peste, &
n'ont point tant de pous, que les autres?

235. Les autres animaux songet-ils comme
l'homme?

236. Les songes viennent-ils, de ce que nous a-
uons autrefois veu & ouy, ou de ce que nous
desirons, ou de la condieion de noz humeurs,
ou par diuine inspiration?

237. Et il vray, que le vin pur altere d'auanta-
ge?

238. Pourquoy ceus qui sont mutilés de quel-
que membre, deuient plus gras au reste du
cors.

239. Vaut il mieus manger peu, & souuant, que
autrement?

240. Et il melheur de boire peu, & souuant, comme font les Allemans, ou à grans trais cōme font les Fransois? & vaut il mieus tramer le vin, ou boire le vin à part, & l'eau apres, à la mode des Grecs?
241. Le feu, l'amour, & la tous, se cognoisset par dessus tous.
242. Pourquoi dit on, qui me veut mal, me fait blanchir: & qui me veut bien, me fait rougir?
243. Et ce bien dit, vetés chaudement, mangés echaufement?
244. Que le sepulchre, la vulue, la terre seiche, la mer, & le feu, ne diset iamais c'est assez?
245. Que veut dire, pour vn plaisir mille douleurs? & si la consolacion des mal-heureus et, d'auoir compagnie?
246. Pourquoi dit on, mateur comme vn arracheur de dans?
247. Pourquoi dit on, au confesseur, au medecin, & à l'auocat, il ne faut rien celer?
248. Pourquoi dit on, sain comme vn poisson?
249. Pourquoi et ce que les ansans, les vielhars, & les malades, ne peuet angeandrer?
250. Et il vray, que l'homme soit vn petit mōde: & que toutes les bestes sont an luy, quant à la forme, & aus meurs, ainsi que moutre la physionomie?
251. Et il vray, que les hommes ansuiuet le naturel des cheuaus de leur païs?
252. Pourquoi dit on, que force ansans et la

richesse des pauvres jans?

253. Pourquoy les fames sont plus grosses de la ceinture ambas, & les hommes de la ceinture an haut: & presque toutes les fames sont sans iarretieres?

254. D'où vient, q̄ de retenir le soufflé on oit mieus, & que de fermer vn œil, on void mieus de l'autre?

255. Et il vray, que le vin trampé cause vomissement?

256. D'où vient, que les males sont plus grans que les femelles, & ont plus grand vois, fors que la vache?

257. Que les betes ne perdet leur semance an dormant.

258. Que les gemeaus communement ne sont point tant fors que les autres.

259. Pourquoy et ce, que les vielhes jans voullâs regarder quelque chose, l'elognet de leurs yeus?

260. Pourquoy dit on, fame barbue de loin la salue, avec trois pierres à la main?

261. D'où vient, que l'amour rand vn couard hardy, vn melancholique ioyeus, vn lourdaut bien disant?

262. Pourquoy et ce, que le vin blanc fait pisser, plus que l'autre?

263. Pourquoy et ce, qu'apres auoir mangé de la salade, ou du fruit mol, on trouue le vin de mauuais gout?

264. Et il vray, que ceus qui aiment fort le vinaigre, & le sel, sont mal sains, & ont le foye brulé?

265. Et il vray, que pour auoir mangé des pigeons on parle gros?

266. Pourquoi dit on, qui parle du loup il auoit la queue?

267. Si le boire auant manger, et fort mal sain.

268. Qu'il n'y a plus beau fard, que l'ambompoint.

269. Que le vinaigre et la mort de la cholere, & la vie de la melancholie.

270. Que l'eau d'un puis souuât tirée, deuiet meheure.

271. D'où vient, que le plus souuant les batars sont de melheur esprit, que les legitimes: item plus fors, plus mechans, & gauchiers pour la plus part?

272. Pourquoi dit on, que les fames ont visage d'ange, teste de diable, & œil de basilic?

273. La nourriture trop delicate, corromt elle le bon esprit?

274. Le sang de taureau et il venimeus?

275. Que la seule odeur d'une medecine peut purger iuffisamment.

276. D'où vient, que les ansans aprennet bien tost par cœur, mais ne retiennet pas longuement: & les vieux au contraire?

277. Pourquoi et ce, que les ansans aymet

fort les lardons, & ne font pas les vieus?

278. D'où vient, que ceus qui ont bon iugement, n'ont pas grande memoire: & au contraire?

279. Et il vray, que la morsure de tous animaux, voire de l'hōme, et venimeuse: & pourquoy celuy qui et mordu du chien anragé, samble voir le chien dans l'eau?

280. Dequoy sert de mettre du beurre à la semelle du pié des anfans, avec des etoupes cōtre le rheume: & de leur mettre des patenotres de coral au bras & au cou, ancontre le venin?

281. Commant l'Aconite chasse le venin hors du cors: mais s'il n'y an ha point, il ampoisonne.

282. Pourquoi oit on mieus la nuit, que le iour?

283. Pourquoi les animaux de mer sont plus sains, que ceus de terre.

284. Que les animaux sont tous medecins.

285. Que veut dire, le vantre n'ha point d'oreilhes?

286. Et il vray, qu'il ne faut point mettre de sel au potage des malades, s'ils ont fieure: ny des herbes, s'ils ont flus de vantre: & s'il et permis d'y meler vn peu de lard, ou de beuf, pour oter la saueur?

287. D'où vient, que les bestes chatrees ont la chair plus tandre & saoureuse?

288. Pourquoy les fames sont plus choleres
que les hommes : & les malades que les sains.
289. D'où viêt, que la cigue ne peut faire mal,
si on boit du vin apres : & si on la messe avec
du vin, ell' et plus y enimeuse?
290. D'où vient que les cors tués de la foudre
se gardet long tams sans corrompre?
291. Pourquoy change on de couleur, plutoft
au visage, qu'aus autres parties?
292. Se faut il contraindre de manger, si on n'a
point de faim?
293. Pourquoy les fames s'anyuret mal-aise-
mant, & les vielhars facilemant.
294. Si les raisins sont melheurs, apres auoir
eté pandus, que frais.
295. D'où vient, que quelques vns ne vont à
selle, qu'apres le repas?
296. Qui et plus necessaire pour la vie humai-
ne, le feu ou l'eau?
297. Pourquoy et melheure l'eau des fontai-
nes, qui regardet le leuant?
298. Comment l'vrine des chauue-souris, & la
fiente des arondelles, peuuet faire perdre la
veue.
299. Si les fruis nouueaus font raiuer, & les
faiues aussi.
300. Comment les habilhemans refroidisset
an æté, & echauffet an hyuer. Et comment le
souffle refroidit, & echauffe de mesme.
301. Si vn homme fain ha besoin de medecin.
302. Pourquoy

302. Pourquoi mange-on plus an Automne
que an autre saison?

303. D'où vient, que ceus qui nauiget vomis-
set?

304. Commant l'odeur des roses peut oter le
mal de teste: & la santeur des fleurs garde
d'anyurer.

305. Apres le repas, qui et le melheur, le pour-
mener, ou reposer?

306. L'enfant respire-il dans le vantro de sa
mere?

307. Et il vray, que la tristesse ampeche les fa-
mes de concevoir?

308. Et il plus sain, d'habiter hors la ville, que
dedans?

309. Si le vin doit estre chassé par le vin.

310. Et ce bien dit, viure faut selon raison, non
selon l'appetit?

311. Pourquoi se lasse on plus, an cheminant
par vn lieu plain & droit, que s'il et inegal?

312. D'où vient, que les bestes ne sont sujettes
qu'à certaines maladies (comme le chien à la
rage, la brebis à la rougne, le pourceau à la le-
pre) & que l'homme et sujet à mille sortes de
maus?

313. Pourquoi et ce, que les fames craignent tât
l'eau froide au visage?

314. Et il possible, de randre par le bas quel-
que chose à l'instant qu'on l'a prise, & de pis-
ser à mesure qu'on boit?

Q

315. Quand on s'est brulé, et il bon d'approcher du feu la partie brulée?

316. Pourquoy et ce, que l'eau du puis donne la colique, plustost que celle de fontaine?

317. Pourquoy l'homme ha il plus de cruelle, que tout autre animal?

318. Et il vray, q̄ la fame et an plus grand dangier, quand elle ha auorté, que quand elle ha porté à tams?

319. Pourquoy dit on, il et alteré comme vn trespasé, & il boit comme vn tamplier?

320. D'où vient, que les chiens ont toujours le nez froid?

321. Et il vray, que de manger des croutes de pain, & des nerfs ou parties nerueuses, on deuient fort?

322. Et il vray, que le vin fait le bon sang, & le bon sang fait le bon antandemant?

323. Pourquoy dit on, viande bien departie ne fit iamais mal?

324. Pourquoy dit on, les faiues sont an fleur, il doit auoir belle peur?

325. D'où vient ce qu'on dit, il jase, il ha les piés chaus?

326. Et il vray, que les chataignes crues angeandret des pous?

327. Pourquoy dit on, iamais on ne mange fourmage, que l'on n'y ayt honte, ou dommage?

328. Pourquoy dit on, Medecin d'eau douce

& propos vulgaires.

187

329. S'il est bon de dormir sur le lait, l'orge mondé, boullon, consumé ou preparatif, & autres choses que l'on prend au matin.

330. Et ce bien dit, plus de rhabarbe & moins de regime?

331. Pourquoi dit on, que la merde soutient?

332. Pourquoi dit on, de ceus qui ont les yeus vers, que toutes bonnes choses leur sont contraires?

333. Et il plus sain de se leuer matin, que de dormir la grasse matinee?



Q ij





A TRESVERTVEVS ET

VENERABLE SEIGNEVR,

M. ESTIENNE DE RATE, con-

seiller du Roy, & General en la

souueraine Cour des aydes,

à Montpellier, Ian Imbert

compagnon Apoti-

caire, salut.



ONSIEVR, i'ay fait comme
le Cinge du medecin de Môt-
pellier, duquel M. IOVBERT
fait le comte en son traicté du *Lin.3.*
Ris. Ce cinge voyât que tous *ch.14.*
les seruiteurs du Medecin,
estant à l'article de la mort, desroboint l'argêt
& autres meubles, il se va saisir du chapperon
doctoral. Ainsi quand i'ay veu que M. Cabrol
d'un costé, & Beauchastel de l'autre, faisoient
imprimer quelques chapitres & roolles des
Erreurs populaires dudit sieur IOVBERT, à
la desrobee (comme ils confessent euf-mesmes
librement) i'ay pensé d'en faire autât de quel-
ques petits cayers que i'ay peu crocheter, cō-
cernants les remedes translatez ou metapho-

Q iij

riques, & ceus qu'il nomme extrauagans. Desquels i'auois tousiours esté fort curieux, & il m'auoit fait cet honneur de les me communiquer autresfois. I'ay trouué parmy cela vne liasse de certaines phrases & locutions vulgaires, touchant les maladies, & autres propos de la Medecine: où il recherche les sources de ces termes. Item, quelques propos fabuleux, desquels le peuple est en erreur. Je mets tout en lumiere, sachant qu'autant crie mal batu que bien batu. Aussi tost aura-il pardonné à trois qu'à deus. Nous passerons tous sous vne mesme grace. Pour mon regard, ie n'en fais aucun doubte, sachant le credit que vous auez enuers M. IOBERT, votre singulier amy, & affectiōné seruiteur: cōme il se dit par tout, & en public & en priué. Dōques ie vous donne & dedie ma part du butin: vous suppliant, Monsieur, l'accepter de bon cœur, & de croire que ie pense m'eltre adressé à celuy, qui me pourra bien remettre en bōne grace, si besoin est: me recommandant treshumblement à la vostre.

De Paris, ce 20. de Feurier. 1579.

EXPLI-

EXPLICATION DE QUEL-
QUES PHRASES ET MOTS VUL-
gaires, touchant les maladies prin-
cipalement.

*Fleurs, Flus, Flus menstrual,
Mois, Menstrues, Perdemant,
Rhodais, Chemise, Doit auoir,
Son cas, Malade, Male semaine,
Tams, Cardinal, Marquis.*

LE s *Fleurs* d'une femme, sont dites *Fleurs.*
à la similitude des plantes qui
fleurisset communement, avant
que produire leur fruit. Car les
femmes qui sont pour auoir fruit
(ainsi appellons nous vulgairement, l'enfant
qui est dans la matrice, comme d'une grosse)
doit et tant abonder en sang, qu'il verse par
fois, temoignant qu'un autre cors en pourroit
bien estre nourry. Quand on void ce flus, on dit
que la femme a ses fleurs, & elle promet fruit, si
elle vient à la conionction. Et au contraire on
dit, de celles qui n'ont ce perdemant (& par
consequant sont steriles) *qui non fleuris, non gra-*
ne. Car aussi les plantes qui ne fleurisset iamais,
comme la feugiere, & les herbes capillaires,
iamais ne portet graine ou semence: dont elles

Q iij

192 Explication des phrases

Flus. sont nommees de grecs *Agones*. Peut estre aussi qu'on dit fleurs, d'un mot corrompu pour dire *Flus*. Car le sang flue & se verse au dehors.

Flus mēstrual. Mais aussi on dit, le flus de la fame, & le *Flus menstrual*; par ce qu'il flue tous les mois, si la fame est bien disposée. Par mesme raison on

Moys. l'appelle aussi absolument, les *Moys* de la fame, ou les *Menstrues*, au suppleant ce mot de purgacions. Il y en a qui appelle cela *Perdemant*, d'autant que c'est un sang qui se perd, & ne profite à rien. Le peuplisme de Languedoc

Rhodais. dit au jaserie, *Ell' et de Rhodais* (qui est la principale ville du pais de Rouergue) pour signifier, que la fame a ce perdement. Et ie pense, que c'est un mot retenu du Grec, *Rhein*, qui veut dire fluer. Duquel aussi la rose est dite *Rhodon*, à cause de la grande odeur qui en deflue & sort. Ou parauanture on dit, estre de *Rhodais*, par ce que le terroir d'alentour de ladite ville est communement rouge. On dit plus honnestement, ell' a la *Chemise*, au suppleant ces mots, *tachée de sang*. Item, ell' a ce que *Doit auoir* une fame. Car cela est naturel à la fame, & ne se peut bien porter, ne porter des enfans, qu'elle n'ait cette purgacion naturelle & spontanée. Les autres disent, auoir *son cas*. D'autres disent, elle est

Son cas. *Malade*: combien que ce flus ordinaire, quand il est modéré, ne soit au nombre des maladies, n'est pas mesmes des affections contre nature: mais parce que les fames se sentent plus fachees

durant cette purgacion, que deuant ou apres, elles se diset honnetement (pour couvrir cette infirmité, ou necessité naturelle) estre malades. Pour cela mesme on dit, auoir sa *Male semaine*: *Male semaine.* d'autant que cela va par semaines, comme la *Lune*: & à plusieurs fames, telle purgacion ne dure guieres moins d'une semaine. A cela mesme reuient ce qu'on dit, elle ha son *tams*: com- *Tams.* me si on disoit, Elle et au terme de la purgaciō. Les autres disent, auoir son *Cardinal*, pour la *Cardinal.* couleur rouge: & les autres son *Marquis*, d'au- *Marquis.* tant que cela marque les chemises & linceus.

Auorter, Affouler, Bleffer, Dessarrier, Gater.

Auorter, et du mot latin *Aborter*, qui signifie preuenir la naissance, ou maturité limitée de Nature: ou priuer l'enfant de son *Ortus*, & legitime naissance. Notre vulgaire dit, *Fouler*, & *Affouler*, le mal qui et de contusion: comme par cheute, coup de baton, de pierre, ou autre coup orbe. Et d'autant que telle et la plus commune cause de l'auortissement, on dit *s'affouler*, pour auor- *Affou-* *ter.* De mesme et ce qu'on dit en France, *Bleffer*: *Bleffer.* car il samble qu'une fame et blessée & naurée, quand elle auorte: d'autant qu'elle ha beaucoup de mal, & perd beaucoup de sang, par vn moyen contre nature. An autres pays on dit, *Dessar-* *Dessarrier,* quasi deserrer le ventre, qui estoit ser-

Gater.

ré, clos & tandu : maintenant il lache & se debande mal à propos. Les autres diset *gater*, comme de toute autre chose qui ne vient à aucun profit.

Desuerdiat, Desantourat, Desourat, Deflorer.

Desuerdiat.

ON dit cela des plantes, & metaphoriquement des filles qu'on depucelle trop ieunes. Aus plantes *Desuerdiat*, & quand on cueil leurs fleurs ou fruis mal à propos : ou quand on les contraint par fumier, chaus, ou eau chaude, de porter auant leur saison. Dont elles acheuet bien tost leur vie, & ne gardent longuemant leur verdeur, vigueur, & galhardise. Cela et proprement *desuerdiar* : comme on diroit, *Deuerdir*, ou priuer de sa verdure. Samblablement *Desantorat*, et dit d'un mot grec, *Anthos*, qui signifie fleur : comme si on vouloit dire, *Desanthorat*, priué de sa fleur, & tel qui ne portera point de fruit. Ainsi on dit, *Deflorer* vne filhe : c'est luy oter son pucelage, & sur tout quand l'age n'y et competant. Dont elle n'et depuis si vtile au mariage : comme i'ay remoutré à la fin du second chapitre du second liure des Erreurs populaires. Ainsi les fruis cueillis auant leur maturité, ne sont de si longue duree, & se flettrissent plus que les autres. Quelques vns appellet cela *Desourat*. *Desourat*, qui et comme preuenir *L'oure* : c'est à dire, cueillir auant heure.

*Desantorat.**Deflorer.**Desourat.*

C'Et vn Iuif, ou vn Turc, qui a quitté sa religion : que les siens nommet depuis *Retalhat*, comme nous disons *Reuolté* : mais c'est an *Retalhat*, autre sans, & pour autre occasion. Sauoir et, que le Iuif & le Turc, ayant été circoncis, quittant depuis ce party-là, & desirant n'en auoir plus la marque, il se fait recouurer la teste du membre viril. C'est vne chirurgie anseignée de Paul Aeginete, & autres bons auteurs Grecs & Arabes, pour contrefaire vn prepuce. Il faut inciser la peau du membre viril, contre sa racine, tout à l'entour. Quand elle ha ainsi perdu sa continuité, on la tire de peu à peu ambas (comme on depoulhe vn baton de saule, pour faire vne trompe) iusques à tant que la teste an et couuerte. Puis vers la racine, là où manque autant de peau, on fait vne cicatrice qui tient sa place. Voila comment il et *Retalhè* : c'est à dire, vne autre fois, ou derechef talhé. Car on le talha premierement quand on le circoncit : & depuis on le retalhe, pour couurer le defaut du prepuce. Le Latin l'appelle *Recutit*, comme *Recutit*, ayant recouuert sa peau, qu'on nomme *avant-peau*.

C'Et ce que les Medecins appelle, Suffocation de matrice: quand l'amarry ou matrice (qu'on appelle aussi maire, d'autant qu'elle produit les enfans: comme la terre et nommee, la maire commune de tous) s'anfle de quelque vant ou vapeur, & presse tant les parties voisines, que les boyaus comprimans de mesme le diaphragme & la poitrine, il s'ensuit vne suffocation. Dont le cou de la fame quelquefois angrossit, & s'anfle euidamment: autresfois sans apparence externe, elle suffoque & perd la respiration pour quelque tams, avecques la parolle. Aucunesfois tous les santimens & mouuemans luy defalhet, comme an l'Apoplexie. Mais il y an ha au contraire, qui criet, & riet, & ne font que parler.

Dysanterie, Eprensas, Seintegne, Cague-sangue.

Dysanterie.

LA *Dysanterie*, et vne doulenr de vantre, à raison des boyaus ecorchez par dedans, tellement qu'il an sort des raclures, & du sang, quelquefois de la bouë, ou pus. C'et vne douleur trescruelle, qui inuite souuant d'aller à selle, &

Eprensas.

on n'y peut rien faire, ou bien peu. Dont le malade s'epraint fort: & de là on appelle ce mal an

Esprema-

Dauphiné, *Eprensas*, & an Gascogne, *Esprema son.*

Xon.

Seintegne. An Languedoc et nommé *Seintegne*, du mot

Nephritique, Phrenetique. Colique vanteuse,
nephritique, & pierrense.

Colique
pierreuse

quelque androit que ce soit. Il et bien vray, qu'il y a des douleurs coliques (c'est à dire, du boyau nommé *Colon*) prouenant de pierre, angeandree dans le boyau : comme les anciens temognet, & nous l'auons veu de nostre tams. Mais ceus qui parlet de la fasson susditte, l'antander autrement. Car ils veulet, que *Colique pierreuse*, soit douleur à cause de la pierre, qui et au rognon.

Colique, Masclon, Colique d'estomach.

IL y ha vn des plus grans boyaus, qui se nomme *Colon* : & parce qu'il et plus suiet à douleurs, qu'autre boyau qui soit, on appelle *Colique*. vulgairement *Colique*, toute douleur de ventre, ancor qu'elle ne soit à l'intestin *Colon*. An *Masclon*. quelques pays on l'appelle *Masclon* : d'autant que les males (qu'on dit *mascles*) y sont plus suiets, que les femelles : lesquelles ont par contre, la subieccion au mal de maire, qui et leur *Colique* selon le vulgaire. Car tout mal de ventre aus fames, et de la maire, & aus hommes du *masclon*, selon leur auis. On dit aussi improprement, *Colique d'estomach*, parce que la douleur et an l'estomach, samblable à celle du *Colon*, son prochain voisin.

Colique d'estomach.

*Goutte, Dessante, Rheume, Catarrhe,
Goutte naturelle.*

Goutte et le mal des iointures, avec inflam-
macion, que les Grecs nommet *Arthritis*,
du mot *Arthron*, qui signifie article ou iointu-
re, c'est à dire, conionccion de deus os pour le
moins. La tumeur ou inflammation douloureuse,
se fait par fluxion des humeurs, qui decou-
let à ces parties là goutte à goutte : & pour-
tant le mal a été nommé *Goutte*. Il y en a qui
l'appellent *Dessante* pour le commencement, ou
Rheume, ou *Catarrhe* : d'autant que le nom de
Goutte et fort odieux, sur tout à ieunes ians.
Quelque fois on dit, *Goutte naturelle*, pour faire
entendre la commune, & qui est le plus souuent
hereditaire : à la differance des Gouttes de la
grosse verolle, que chacun acquiert pour soy :
combien qu'elles puissent venir aus heritiers.

Goutte.

Dessante.

Rheume.

Catarrhe.

Goutte

naturelle.

Sciastique.

C'est vn mot corrompu, pour dire *Ischiati-*
que : qui signifie la goutte an la hanche, ditte
an Grec *Ischion*, là où la cuisse s'amboëte,
& ha son mouuement de la partie superieure.
De là et ditte *Ischias*, an Grec, la goutte de cette
iointure : des vulgaires medecins *Ischiastique*,
passion: du peuple ignorant *Sciastique*.

Squinance et vne inflammation au gosier, anu-
 tron le larynx (qu'on dit vulgairement le mor-
 ceau d'Adam) laquelle etrangle & suffoque le
 paciant. Les grecs la nommet *Cynanche*, & *Sy-
 Synanche* nanche, qui signifiet lasset ou licol, à etrangle vn
Squinance chien, ou autre animal. Dequoy on ha pris ce
Morceau mot corrompu de *Squinance*, pour dire *Synanche*.
d'Adam. Quant au morceau d'Adam, c'est la teste de la gar-
 gamelle, composee de trois cartilages ou tan-
 drons: laquelle et fort prominante à quelques
 vns. A tous elle et bien maniable, & parce qu'on
 la trouue dure & ronde, les bonnes ians diset,
 que c'est le morceau de la pomme, qu'Adam ne
 voulut aualer, se repentant dez aussi tost qu'il
 l'eut au gosier, & la retenant avec la main, dont
 elle s'arreta là: & depuis an et demeuree la mar-
 que au mesme endroit à ses successeurs. Mais si
 cela etoit vray, les fames n'auroint cela mesmes
 comme elles ont toutes: & quelques vnes plus
 apparant, qu'il n'et à plusieurs hommes.

Noli me tangere.

ON appelle ainsi le chancre au visage, d'au-
 tant qu'il ne le faut traiter tant soit peu ru-
 demant, parce qu'on l'ampireroit. Il an et
 de mesme du chancre des autres parties: mais au
 visage on l'estime plus dangereux, à cause de la
 beauté

beauté qui an diminue : & pour le dangier imminent, à cause du cerueau qui an et fort voisin, dequoy la mort s'an peut ansuiure.

Saigner du nez.

ON dit volontiers cela, de celuy qui et failli de cœur: comme ayant antrepris ou promis quelque chose, laquelle il n'ha courage de tenir ou executer. On dit, *il saigne du nez*, ou *il ha saigné du nez*. C'et que la saignée affoiblit le cœur, quand elle et copieuse. Car les forces consistet au sang & aus esprits, qui se perdet ansamblemant: & de cette perte, le cœur etant refroidy, deuiet craintif, & on n'ose antreprandre ou executer, ce où l'on void quelque peu de dangier?

Migraine.

C'Et la douleur d'une moitié de la teste: mot corrompu du grec *Hemicranie*, qui finifie demy-test. On ha dit premierement, an corrompant le mot, *Micranie*, puis *Migranie*, & puis *Migraine*: qui finifie vne grenade an Languedoc: fruit ainsi nommé, pour la pluralité des grains, excellans à raffraichir & desalterer. Il y a vn de Royaumes d'Espagne qui an porte le nom: ou bien, ce fruit ha prins son nom de là.

R.

LEs Grecs nommet *Seleniaques* (c'est de mot à mot, *Lunatics*) ceus qui au defaut de la Lune sont egarez de leur sens. Et maines tous maus qui suiuet fort euidamment le cours, & les faces de la Lune, sont dits, *Seleniaques*. Comme le mal caduc, dit au Grec *Epilepsie*, & quelque espeece de folie, ditte *Melancholie*. Ainsi dit-on communement, que les fames tienent de la Lune, d'autant que la Lune definit les mois: & les fames se purget tous les mois. Dont leur purgacion est ditte *Mois*, & *Menstrue*. Puis donc qu'elles sont regies & conduites de la Lune, on dit qu'elles *en tiennent*, suppleez (afin de sauuer leur honneur) le principal point de leur santé, et de la fecondité. Autrement on dit, *Tenir de la Lune*, pout dire estre inconstant & variable, comme la Lune, qui change tous les iours de face. Ce qu'on attribue volontiers au sexe feminin: toutesfois c'est vn reproche d'honneur, autant que cela procede d'une grande pureté & simplicité de matiere, qui rend les fames legieres & mables, comme le ciel. De-

Tenir de la Lune.

au chap. 6. part. 2. quoy ie louë leur condicion, contre l'opinion vulgaire, au mes Erreurs populaires.

*Mal caduc, Mau de terre, Mal S. Ian, Mau de
las passeras, Haut-mal.*

C'Et le mal qu'õ dit an Grec *Epilepsie*: lequel mot signifie, surprise ou retancion de tous les sentimens. Dont il auient que l'homme chet à terre, sil n'est soutenu. Car il perd tout à vn coup la veüe, l'ouye, & autres sentimens, comme par vne syncope, vulgairement dite *Euanouyssemant*: ou comme par vn *Apoplexie*. Mais il y a grand difference: an ce que par l'*apoplexie*, & par la *syncope*, il n'y a non plus de mouuement, que de sentiment: & an l'*epilepsie*, le cors se demene fort roidement, trauallé de conuulsion. an Grec dit *spasme*. On l'appelle *Mal caduc*, de tomber & choir à terre: Comme vn homme fort vieus, & dit caduc, quand il est courbé inclinant vers la terre, & qu'il ha[come on dit vulgairement] vn pié dans la fosse. Pour mesme raison [à mon auis] on appelle ce mal an *Lāguedoc*, *Mau de terre*, à cause qu'il iette par terre celui qui an est atteint pour robuste qu'il soit: comme si on luy auoit donné vn coup de masse sur la teste. On le nomme aussi *Mal de S. Ian*, pource [parauanture] que la teste de sain Ian Baptiste cheut à terre, quand il fut decapité: puis mise dans vn plat, à l'appetit d'Herodias. An Gascogne on l'appelle *lou mau de las passeras*, c'est à dire, des passereaux: d'autant que les moineaus y sont fort fructs. Le commun des François l'appelle *Haut-mal*.

Mal caduc.

Mau de terre.

Mal de S. Ian.

Mau de las passeras.

Haut-mal.

mal, pour sa grandeur & vehemance: on pour les susdites raisons, qu'il fait tomber l'homme de son haut.

Mau loubet.

C'Et vne des imprecacions du vulgaire de Languedoc, comme le sudit *Mau de terre*. Je pense qu'ils signifiet le loup, qui est vn chancre ulceré aus cuisses & aus iambes (mal incurable de vraye cure, sinon par extirpacion) comme celuy du visage et dit, *Noli me tangere*. Et au diminutif ils l'appellet *loubet*, qui signifie petit loup. Car ils diset *loub*, *loube*, & *loubet*, pour loup, *louue*, & *louueton*.

La male bosse, la Ghiandozza.

Ghiandozza.

C'Et vne troisieme imprecation du mesme pays, qui signifie la peste: sauoir et, la tumeur ou bosse pestilentielle, laquelle (sans doute) est male & mortelle. Ainsi les Italiens (comme dessus auons noté) disent *La ghiandozza*, par imprecation. Car la peste proprement ditte, est vne bosse ou tumeur & anfleure au quelque glande (*ghiande* au Italien) de celles qui sont au cou, aus aisselles, & aus aines.

Canne et la gargamelle, ou le sifflet par où nous respirons. Ceus qu'on etouffe & estrangle, sont priuez de leur canne: & par consequant ils sont *Ecanne*, que le Languedogeois (amy des SS) prononce *Escannats*.

Qualisque, Euanoyr, Spasme, Pasmaison.

Avalir an Languedogeois, et se perdre & disparoir, de sorte qu'on ne le void plus, comme si le diable l'auoit amporté, ou qu'il fut abimé. Nottre vulgaire de Mompelier, ha ce mot fort frequent an la bouche, & le dit quelque fois an risée & familierement. On le peut dire an François *Euanoyr*, signifiant se perdre an l'air, & au vant: comme quand on dit, cela se *uanoyt*, & ne fait-on qu'il deuient. Mais autre chose et *Euanoyr*, qu'on dit autrement tomber an *Pasmaison*. C'est quand soudain toutes forces defalhet, que nous disons an terme grec *Synco-* *son.* *piser*. Spasme et vn autre mal, duquel l'epilepsie et espece: mais on abuse vulgairement dudit *spasme.* mot, pour denoter l'euanouissement & foiblesse de cœur.

R. iij

*Deiunner, Boire, reſſiner, Gouter, Souper,
Demantir.*

Deiunner.

DEiunner et proprement rompre le ieune. Car on et à iun iusques au premier morceau que l'on mange: & la syllabe *De*, et icy priuatiue, comme en *Dedire, Demordre, Defaire, Dedier, Denouer, Desalterer, Desopiler, Desanyurer, Deployer, Desannuyer, Demembrer, Demeubler, Depriser, Desobeyr, Debrider, Desangager, Deshonnorer, Dechausser, Debander, Detandre, Decrouter, Decroulher, Deserrer, Decoudre, Decourrir, & samblables.* Ainsi *Demantir*, et oter la manterie: comme quand quelqu'un mant, & vous luy dites qu'il ha manty, c'est *Demantir*, qui signifie oter où se priuer, exempter & vindiquer de la manterie. Ainsi et *Deiunner*, priuacion de iune. Dont ceus-là abuset fort du mot, qui diset, i'ay deiuné au iourd'huy deus fois, trois fois, &c. Car on ne peut deiunner (qui et à dire, rompre le iune) qu'une fois le iour: & c'est au premier morceau. Car on n'est plus à iun, pour peu qu'on ait mangé. Que les autres repas soient appelez comme on voudra, le premier sera touiours le deiuner, quand ce seroit bien à midy, voire au soir: & lors on dira, l'ay iuné iusques au soir. Et si on ne fait que deus repas, qu'on appelle Diner & Souper, le diner et vrayement deiuner. Si on en fait trois, le premier etant au matin, s'appellera Deiuner: & le segond, Diner. Mais si le premier

Demantir.

et assez tard, on le nommera Diner, le second
 sera le Gouter, ou Resser, & le tiers, Souper. *Souper.*
 Lequel samble estre dit de la Soupe, que l'on
 mangeoit au soir, plus qu'à autre heure. Gouter *Gouter.*
 et dit de sa petitesse: d'autant que c'est comme
 vne collaciō, an laquelle on goute & tate quel-
 que fruit, ou l'on ne fait q̄ boire, avec vn mor-
 ceau de pain. Le boire absolument et dit pour *Boire.*
 le Deiuner, à cause que les Anciens, auteurs de
 ce repas, ne faisoient que tramer du pain au vin
 pur, & beuoient cela, qu'on disoit *Acratisma.*
 Ainsi an Languedoc, on n'vse que du mot Boi-
 re, pour le premier repas, que les François ap-
 pellet Deiuner: & le mot Deiuner et prins tout
 au contraire, pour dire, iuner & abstenir. Ainsi
 l'Italian dit, *Io son digiuno*, pour dire, le suis à iun.

Grasse matinee.

LE matin, n'est ne gras, ne maigre: toutes-
 fois on dit communement, Dormir *La grasse*
matinee, parce que le dormir du matin an-
 graisse fort. Car, comme ainsi soit, que la pre-
 miere coction (action du vantricule) et plus
 tardive la nuit & an dormant, que n'est pas le
 iour & an velhant: & que le dormir fauorise
 plus la seconde concoction, qui et generative
 du sang, duquel (etant plus copieux & dous)
 prouient la graisse: il est certain, que le dormir
 tard, comme la matinee, angraisse & fait l'am-
 bopoint. Dequoy sont communemāt priez

R. iiij


Panser vn malade.

C'Et vne phrase & faſſon de parler vulgai-
re, pour dire, auiser, pourvoir, & instituer
ce qu'il faut au malade, & de fait y mettre
la main, ſi la Chyrurgie y ha lieu. Ainſi dit-on,
panſer les cheuaus : qui n'est pas les imaginer, &
auoir an panſee ou cogitation, ains les etrilher,
frotter, bouchonner, nettoyer leurs piés, don-
ner à manger & à boire, leur faire bonne littie-
re, &c. C'est donc vn ſoin & panſemant avec ef-
fait, de ce qui et neceſſaire au malade, quand
les medecins ou chirurgiens le panſent : com-
me ſi on diſoit, panſe au malade, & pourvoir à
ce qui luy faat.



209
REMEDES METAPHORI-
ques & extrauagans.

*Pour la multiplicacion de semance,
& la fecondité.*

 N tient, que l'vsage du poisson an-
geandre beaucoup de semâce. Il fau-
droit donc, qu'il nourrit mieus que
la chair: car la semance n'est que superfluité de
bonne nourriture. Il est bien vray, que l'vsage
du poisson excite plus au coït, d'autant que la
semance qui en prouient, et plus sereuse ou ai-
gueuse, & piquante: dont elle sollicite la ver-
tu expultrice. Et de cela on peut estre abusé,
comme si le poisson faisoit à la multiplicacion
de la semance, telle qui ne pecha sinon en qua-
rité. Peut estre aussi, que l'abus viét, de ce qu'on
voit les poissons plus feconds sans cōparaison
qu'autre sorte d'animaus: tesmoin l'infinité des
œufs qu'ils produisent. Dont quelqu'un s'est pu
persuader, que le manger du poisson, fait en
nous samblable habilité, ou aptitude. Pour
cette raison aucuns recommandent fort la Car-
pe (mais sur tout la langue, comme partie plus
friande) pour deuenir plus galhard à l'acte ve-
nerien, & faire beaucoup d'anfans: d'autant
que la Carpe fait des œufs cinq ou sis fois l'ā-
nee, & toujours vn' infinité. Mais il faut an-
tandre l'abus de la transacion: C'est qu'il ne

sanfuit pas, si vn animal et fort fœcond, que pour an manger l'homme deuienne tel: ains pour cet effait il conuient vser des viandes qui nourrisset beaucoup, pour angeandrer quantité de louable semance. Ainsi (parauanture) et-il de ce qu'on escrit, que de manger des moyneaus ou passereaus l'homme et plus galhard à l'amour, parce que le moyneau et fort palhard. Mais il faut (à mon auis) que ce soit des ieunes, qui n'ont ancor fait folie de leur cors. Autrement, comme les passereaus viuet fort peu, il faudroit aussi dire, que l'homme vfant de moyneaus abregeroit sa vie, d'autant que le moyneau l'ha fort courte. Et au contraire, qui mangeroit des corbeaus, des corneihes, & des cerfs, viuroit infiniment. Car on dit, que le corbeau peut viure trois sans ans, la corneille neuf ages d'homme: & qu'on ha vcu Cerf qui auoit vecu cinq ou sis sans ans. Par samblable raison, qui voudroit deuenir fort agile & dispos, il deuroit manger des Cinges. A ce propos, il me souuient d'une Dame, qui repliqua de fort bonne grace, à vn medecin, lequel auoit ordonné à son mary l'vsage du lait de chieure, pour deus ou trois mois: & quoy, Monsieur? on dit que ceus qui an vset longuemant, deuiennet si remuans, qu'ils ne font que sauter, danser, monter & courir, tellement qu'on ne les peut tenir an vn lieu. Mon mary n'ha pas faute de cela: & ie ne voudrois

pas qu'il eut plus de galhardise. On dit aussi, qu'il y auoit vne filhe à Paris, laquelle pour auoir toujours esté nourrie d'une chieure, toujours vouloit grimper, & sauteler.

Pour anfanter plus aysemant, & pour
ampecher l'auortissement.

NOz fames appliquet à l'une des cuisses (selon qu'elles panset l'enfant estre, male ou femelle) ou à toutes deus, pour ne fallir point, vn ayment, quand la fame et au trauail de l'enfant, pour en auoir melheur' deliurance. Et durant la groisse, si on craind l'auortissement, on l'attache à l'un des bras, ou à tous deus, pour la sudite raison. Car l'aimant (qui est dit *Calamita* an Italian, & *Aïmant* an Languedoc) tire à soy le fer: & de là on transporte le remede à l'enfantement: comme s'il pouuoit ancor miens tirer à soy l'enfant. Voire mais, l'enfant n'est pas de fer: & l'Aïmant n'attire pas la chair, ne les os. Ce n'est pas à dire, que s'il tire le fer, il tirera bien autre chose. Car cela est de sa propriété, & n'ompas d'une force animale: Comme on diroit de l'homme, ou de quelque beste, que s'il peut tirer ou porter vn quintal de fer, il portera bien trante liures de chair. Ancor la comparaison ne reuiet pas du tout: car il s'en faut beaucoup que le petit aimant qu'on applique au bras, ou aus cuisses,

puisse tirer autant gros de fer que l'anfant et, A peine tireroit-il vne grosse egulhe, ou feroit hausser vn poinçon. Mais il y a du mystere & secret an cette fasson de faire, que les anciens Medecins ont ordonné (car ce n'est pas de l'inuancion des fames) pour quelque bon respect, qu'il n'est licite d'expliquer au vulgaire. L'antans que plusieurs fames vsent aussi de l'aimant, à prouoquer ou arreter le flux menstrual: à quoy leur seruira la mesme remoutrance.

Pour rompre la pierre dans le cors.

PArce que la poulalhe digere les pierres, & le grauiier, de là on ha prins opinion, q̄ la peau interne du gisier ou perier (ainsi dit, des pierres qu'on y trouue souuant) peut rompre & fondre les pierres de l'homme. Mais on ne comprend pas, que c'est la forte chaleur (auec propriété toutesfois, de l'estomach bien charnu de la volalhe) qui fait que la volalhe digere les choses dures. Ce qui est commun à tout oiseau. Dont il ne se faut autremât ebyr, de ce que l'Otruche digere le fer. Item, parce que le jus de limon fond les perles, qui sont bien dures, on ha pansé, qu'il romproit aussi bien les pierres de la vescie & des reins. Et d'autant que le sang de bouc talhe le Diamât, qui est plus fort & dur qu'aucun autre rocher,

de cela on infere qu'il romproit ancor mieus la pierre du cors humain. Mais il faut voir, si c'est point d'une antipathie, & singuliere propriété, que le sang de bouc romt le Diamant, & non autre espece de pierre. Il n'est pas toutesfois à mespriser, quand il est préparé comme il faut: car nous en vsons bien heureusement, à dissoudre & mettre en pieces le calcul de l'homme. C'est, quand on a nourry le bouc, âgé de trois à quatre ans, durant les iours Caniculiers, de toutes les herbes saxifrages (c'est à dire, rompantes la pierre) qu'on luy peut faire manger, l'abreuuant de bon vin blanc, & le faisant tous les iours fort courir. Son sang amprunte, acquiert, & retient la vertu desdittes herbes, tout ainsi que le moust vineus, qu'on prepare à mesme effait. Mais il y a plus de vertu audit sang, comme souuant nous auons eprouué. Du jus de limons y a autre raison, par laquelle il peut aussi rompre ou dissoudre les pierres du cors humain: ou pour le moins les remollir, comme le vinaigre rand molle la coquille d'un œuf. Mais sa qualité ainsi tranchante, nuit grandement à l'estomach & aux boyaus, si on en vse quantité: comm' il faudroit pour dissoudre la pierre. D'ailleurs, le fait n'est pas samblable, autant qu'on met la perle dans le jus de lymon, ayant son antiere force: & le jus de lymon pris par la bouche, et fort affoibly & rompu du sejour qu'il fait

dans l'estomach, & plusieurs autres parties, par où il luy conuient passer : esquelles il rancontre toujours quelques humiditez, qui detrampet & debilitet sa force.

Contraire à la memoire.

ON tient pour suspect à la memoire, l'usage du cerueau de Connil : parce que cet animal ha la memoire (qui cōsiste au cerueau) si courte, que ne se souuenant du dangier qu'il vient de passer, il ne laisse de retourner au gîte d'où il s'est leué vn peu au parauant. Mais on peut auoir autant suspect tout autre cerueau : d'autant qu'il angeādre sang pituiteux, lequel offance grandement la memoire : comme on void par le mal dit *Letharge*, qui signifie, obliuiscence & nonchaloir.

DES REMEDES SUPER-

sticiens ou vains, & cerimonieus.

IL y a mille superstitieus remedes, qui n'ont aucun fondement an raison, ny an experiance : ia soit que plusieurs s'abusēt, an croyant qu'ils soient bien eprouués. Leur erreur procede, de ce qu'il auient quelquefois, qu'on guerit pour lors, & durant qu'on an vse : tout ainssi qu'il auient de guerir apres plusieurs choses prises, appliquees, faites, ou dittes, auxquelles

on attribue toute la guerison. De tels reme-
des vains, & ineptes moyens, i'an reciteray
quelques vns, qui m'ont esté communiqués de
diuerſes perſonnes, pour grans ſecrets. Il eſt
bien vray, qu'an aucuns il y a quelque myſte-
re, & qu'ils gueriffet, nompas de foy, ains par
accidant: comme ie pourray expliquer apres
les auoir propoſez. Toutesſois le peuple et an
erreur, de ce qu'il ne fait la vraye cauſe, & at-
tribue tout l'euenemât, à ce qui lui appert, ſoit
fait, ſoit dit, ou appliqué.

Pour arreter tout flux de ſang.

IL faut auoir vne egulhette rouge, qu'un
marié ait donné le iour de ſes noces. Serrés
an fort le petit doit de celui qui ſaigne: &
que ce ſoit de la main qui repond à la partie
ſaignante. Le ſang tantost ſ'arretera. de quel-
que part qu'il verſe, & fut ce d'une playe.

Item, la pierre du cerueau d'une carpe, mi-
ſe contre le ply du petit doit, repondant à la
partie qui ſaigne, arrete le flux de ſang, le plus
impetueux qui puiſſe eſtre.

Item, mettre vne palhe an crois ſur le doz
de celui qui ſaigne, etant vetu, & qu'il n'an ſa-
che rien. Ou le faire ſaigner ſus vne palhe an
crois.

Contre la iauniſſe.

TRouués du plantain qui naiſſe ſus vne
maison. Que celuy qui ha la iauniſſe, piſ-
ſe deſſus par pluſieurs fois, tant que la plante
an meure. A meſure qu'elle mourra, la iauniſ-
ſe ſe paſſera.

Contre la goûté grampe.

FAut porter toute la nuit aus piés, contre
les cheuilhes, vn iazerant, comme des braſ-
ſelets, fait de letton vierge.

Pour faire ſortir plu-toſt les dans aus petits anſans.

PRenés le tuyau d'une plume, rampliſſés
le d'Alum, ſoit bié bouché des deus bouſ-
& que l'anſant le porte pandu au cou.

Pour ne vomir point ſur mer.

MEttés du ſel ſur vottre teſte, quand vous
Mantrérés au vaiſſeau.

A faire perdre le lait.

QVe la ſame alhe ſauter trois fois, ou du-
rant trois matins, ſur la ſauge du iardin
d'un pretre.

Contre

Contre toute fièvre.

POrtés vne araigne viue dans vne nois, pandue au cou.

Contre la fièvre quarte.

QV'un fraire mandiant la vous demande pour l'amour de Dieu : vous la perdres, & il la prandra.

Pour faire perdre ses verrues.

TOuchés an la robe d'un que vous sachiés bien estre coqu: an quelque androit de son abilhemât que vous le touchiés, sans qu'il s'an auise, voz verruës se perdront. On dit aussi, que si voulât trancher vn leuraut, conuil, perdris, volalhe, &c. vous etes ampeché à trouuer les iointures, pãsez à vn cocu, & vous les trouueriez.

Item, pour perdre les verrues, faites les cõter à vne personne qui soit plus ieune q̃ vous: elle les prandra, & les pourra aussi dõner à vn autre plus ieune, par samblable moyen.

Item, faites les toucher avec autant de pois, à qui que ce soit, & il les vous prandra.

Item, prenez vne pognée de sel, & allez tout courant le ietter dans vn four, & les ver-

S

Pour guerir de l'hydropisie.

IL faut piffer durant neuf matins sur le mar-
rube, auant que le Soleil l'ait touché : & à
mesure que la plante mourra, le vantage se
desanflera.

Contre le masclon.

POrtés vn anneau de letton au petit doit.
On dit que ce remede est bon aussi contre
le haut mal.

Contre le mal de maire.

IL faut porter au doit vn anneau, qui soit de
trois filets antortilhés : l'un d'argent, l'autre
de letton, & le tiers de fer.

Coniuracion de l'amarry delouée,
an langue Agenoise.

Maïre maïris, que as cinquante dos rasits,

Et vno maïs que l'on non dits:

Tiro te das coustas.

A qui non son pas tous estas.

Tiro te de las esquinas;

A qui non son pas tas esinas.

Tiro te del fon del ventre:

A qui non te podes estendre.

Mais bouto te a l'ambounil,

Là on la vierge [Mario] portet son [car] fil.

Cric croc, Mairo torno te al loc.

*Pater noster. Aue Maria. Faut reiterer
cela par trois fois.*

C'est à dire an Fransais.

Amarry merrasse, qui as cinquante & deus racines,

Et vne plus que l'on ne dit,

Tire toy aus coutés:

Ce ne sont pas là tes etres, ou places.

Tire toy vers l'echine:

Yci ne sont pas tes aises.

Tire toy au fond du vautre:

Yci tu ne te peux etandre.

Mais bouto toy au nombril,

Là où la vierge [Marie] porta son [cher] fis.

Cric, croc, mairé retourne à ton lieu.

Pater noster, &c.

PROPOS FABVLEVS.

LE peuple erre an plusieurs propos des animaus, lesquels il n'ha pas inuâté, ains les tient des anciens: qui ne les ont pas bien antâdus, ou expliqués, ou (parauature) ont expressement feind telles choses, pour quelque

S ij

bonne raison : comme les sages & diuins poëtes ont anseigné la vertu aus hommes bestials, par fables & inuâcions plaisantes. Ce que leur a esté & sera toujours permis, nonmoins que aus Peintres, ainsi que temogne le jantil Horace, disant:

Toujours egal pouuoir & hardiesse ont i,
Le poete & le peintre, an ce qu'ils ont voulu.

Quant aus peintres, voyés commant ils representet vn Ange an forme de iuuanceau, reuetu d'une etolle blanche ceinturee, la teste nue, ayant des ailes comm' vn oiseau: Et l'Ame de l'homme comm' vn petit anfant tout nu: Le diable avec des cornes, & vne queuë. Toutesfois ce ne sont qu'espris sans cors, lesquels ne ressamblent à aucune creature visible. Ainsi l'âfer, qui n'est qu'un lieu, et figuré comme vne grand gorge. La mort, qui n'est sinon priuation de vie, comme l'ossement d'un trespassé, tenant vne faus an sa main. Ainsi l'amour, qui n'est que passion & accidant, ne subsistant aucunement de soy mesme, et peind & representé comme vn anfant nu, & aucugle, ayant des ailes, vn arc, & vn carquois garny de fleches. Les vans, qui ne sont que l'air emeu & agité, sont peins comme testes d'hommes ayans les ioues fort anflees, ainsi qu'un sonneur de trôpette. Et quand les Astrologiens se sont voulu seruir des peintres, pour instruire les ignorâs, ils ont fait représenter les douze signes du Zo-

diague (qui ne sont que certaines etoilles, disposees an diuerses figures) l'vn de la forme du Belier, l'autre du Taureau, le tiers de deus enfans gemeaus, & cæt. Ainsi les images du ciel qui sont hors du Zodiaque, l'vne an Ourse, l'autre an Aigle, les autres an riuere, an Harpe, an chien, dragon, &c. Puis les planettes, qui ne sont qu'etoilles ou astres, Saturne, Iuppi-ter, Mars, Mercure & Venus, an personnages de diuers habis & contenance. Le Soleil autremant, & autremant la Lune. Les peintres ont toujours retenu, la figure des etoilles à cinq rayons, denotans leur brillante lueur: jasoit que toutes n'etincellet pas ainsi: & on fait bien, que toutes sont de figure ronde, sans pointes, ne rayons corporels. Quant aus elements, ils peignent le feu (qui est inuisible) comme nostre feu artificiel: ce que n'est trop mal à propos. L'air ne peut estre peint, nom plus que le ciel, cors diaphanes & transparans: mais on les represente de couleur bleüe. L'eau est figuree à ondes, & la terre an globe, comme vne boule. Des animaux, ils an contrefont quelques vns fabuleusement: comme la Salamandre, qui n'est pas telle qu'on la peint, ny le Dauphin aussi, comme on le met an deuises & armoiries. Nompas mesme la fleur de lys, qui est assez vulgaire. Et le cœur, soit de l'homme, ou d'autre animal, n'est pas de la figure que les peintres le font. On peint le Pelican, ayant le

bec aigu tourné contre sa poitrine, qu'il be-
 quette pour an sortir du sang à nourrir ses pe-
 tis, tant qu'il an meurt : & toutesfois nous
 voyōs, que le Pelican ha le bec mouffe, plat &
 large, iustemāt à la fasson des sparules d'apoti-
 caire: tellemāt qu'il n'an peut blecer sa poitri-
 ne. Aussi le nom Grec Pelecan, sinifiant vne
 hache ou doloire, moutre bien q̄ son bec doit
 estre plat. Ioint qu'on dit, q̄ le paire bat les pe-
 tis, comme à coup de soufflets, tant qu'ils sont
 presque morts : & q̄ la maire se blesse pour les
 restaurer de son sang. Or les soufflets se don-
 net de quelque chose plate, & non d'un bec
 pointu. Le Phœnix, qu'on represante, se brulāt
 au feu qu'il s'est préparé, et ancor plus fabu-
 leus. Mais tout cela et permis aus peintres &
 aus poetes (cōme nous auōs dit) pour quelque
 bon respekt & secrete raison, qu'il n'est besoin
 d'expliquer an ce lieu: où ie veus seulemāt fai-
 re manciō de certains propos fabuleus, que le
 vulgaire tiēt pour tref-certain & veritables.
 An quoy il est fort excusable: car plusieurs grās
 philosophes & medecins anciens, ont soutenu
 telles opinions.

De la Vipere.

C'Et vne fort ancienne opinion, que la Vi-
 pere se conioint à son male, an receuant
 dās sa bouche la teste d'iceluy, à faute d'autres
 parties genitales : & que la femelle, du plaisir

qu'elle an grand, serre si fort ses dans, qu'elle tranche la teste à son mary, dequoy elle deuïet anceinte. Puis quād ce vient à la deliurance, les petis n'ayant autre yssue, & cōme pour vāger la mort de leur paire, ronget le ventre & les flācs de leur maire, laquelle an meurt. Et voila pourquoy on dit du posthume, duquel la maire meurt an le faisant, *Il et comme la Vipere, qui ne vit onc paire ne maire.* Et il y a vn Embleme, q̄ Ian de Tournes, imprimeur (des melheurs de la France) ha pour anseigne, avec cette deuise, *Quod tibi fieri non vis, alteri ne feceris.* Tout cela et faus, & mal auancé, à faute d'auoir bien antandu ce que dit Aristote. C'et, que la vipere cōsoit des œufs, lesquels s'eclouet dans son ventre, & deuïenet petis viperons. Ils naissent tous formés, s'etant depoulhés de la membrane ou taye qui les cōtenoit dās l'amarry. Et c'et leur arrierefais. Mais les derniers, meus d'impaciāce, ronget cette mēbrane, pour sortir plus hātieuemāt. Car la maire an porte plus de vint, & n'an fait qu'vn tous les iours. Cela rād les derniers impacians, & les cōtraint de ronger leur tunique ou mēbrane, mais nompas les coutés, ou le vātre de leur maire. On se peut etre fally sur l'origine & etymologie du mot, cōme si vipere etoit ditte, *quasi vi pariens*. Mais c'et de, *uiuum pariens*. Car il n'y a aucun serpāt qui fasse les petis an vie, q̄ la vipere. Les autres font des œufs, qui hors du vātre sont cōuertis an serpās.

Du Bieure, dit Castor.

*Liv. 3. ch.
23.*

ON tient vulgairement, que cette beste arrache ses testicules à belles dans, quand elle se sent poursuivie des chasseurs: ayât naturellement cognoissance, qu'on la recherche pour cela. Dont on pense, que ce nom *Castor*, luy ha esté donné, parce qu'il se chatre, & par consequant devient chaste. Cela et faus: car, cōme iadis ha escrit Dioscoride, il ne peut toucher ses testicules. Ce ne sont pas les deus tumeurs qu'il ha aus aines, comme apostemes pleines de matiere graisseuse, ditte *Castorium*: lesquelles aussi il ne s'arrache pas. Et n'est point dit *Castor*, du chatrer ou de la chasteté, ains du mot Grec, *Gaster*, qui signifie ventre, parce qu'il est fort vantru: & il n'y a eu que changement de la lettre *G*, en *C*. Voyés la dessus la tres-docte histoire des poissons de M. Rondelet, au dernier chapitre du second tome.

De la Salamandre.

*Liv. 2. ch.
56.
Liv. 3. des
semper.*

IL y a aussi grand erreur sur le naturel de cet animal, qu'on dit viure dās le feu, & l'estaindre. Dont fut prise la devise du grand Roy François, premier de ce nom, paire des ars & fiances, *Nutrisco & extinguo*. Dioscoride avoit bien remoutré le contraire, & Galen aussi, di-

fant : que la Salamandre resiste quelque tams
 au feu, mais elle se brule y demeurant long
 tams. Toutesfois on ha mieus aimé se tenir avec
 Aristote, disant, que la Salamandre n'est pas
 brulee du feu, ains s'y pourmene dessus, etai- *Liv. 5. de*
 gnant flamme & charbons. L'experiance (qui *l'hist. des*
 et plus forte que toutes les autoritez des plus *ant. c. 19.*
 sauans du monde) nous enseigne, qu'il n'an
 faut rien croire. Quant à la figure, la Salaman-
 dre qu'on peind est fabuleuse, & controuuee
 des peintres, qui se la sont imaginee telle : fai-
 sans aussi moutrer la beste plus grande qu'elle
 n'est. Elle ressamble assez aus petis laizardeaus,
 qui hantent les muralhes, an Languedoc nom-
 mez *Langroles*, an Dauphiné *Larmuses*. La Sala-
 mandre et vn peu plus grande, marquee de
 plusieurs taches. Son cors et farcy d'un suc
 blanc, & epais comme lait, qu'on fait sortir par
 les pores du cuir, an le pressant. Ce lait et tant
 froid, que la Salamandre peut resister quelque
 tams au feu, mais nompas guieres sans se bru-
 ler, rotir, & an mourir: comme nous auons veu
 plus d'une fois. C'est bien loin de l'estaindre,
 & ancor plus d'y viure, ou d'an viure, comme
 le Chamæleon vit de l'air, si et vray ce qu'on
 an dit. Je n'an ay point ancores veu de vif, pour
 le verifier.

De l'ours.

ON dit que l'Ours n'enfante qu'une piece de chair, sans forme d'animal : & que depuis il laiche tant cela, qu'il le fassonne & luy donne sa forme. C'est une maniere de parler hyperbolique : pour dire, que le faon est fort lourd de premiere naissance, tout couuert de baue, en telle quantité, qu'il ne semble qu'un loupin de chair, sans aucune distinction de parties. La mere le nettoye incessamment de cela, en laichant ces morues longuemant. Dont le faon paroist depuis en forme d'animal. Ainsi qui verroit sortir un chien (ou autre beste parfaite) de la bourbe fort gluante, il ne sauroit cognoistre que c'est d'un premier rancontre. Apres qu'il en est nettoyé, on recognoist toutes ses parties distinctement.





A MONSIEVR MON-
SIEVR IOVBERT CONSE-
lher & Medecin ordinaire du Roy, &
du roy de Nauarre, Chancelier de
l'Vniuersité an Medecine de Mom-
pelier, à Paris.

L et bien raisonnable, Monsieur &
tres-honoré paire, que ie vous rande
raison de mes etudes, tant pour obeyr à
votre commandement, que pour de-
montrer par quelque bon effait (com-
me ie desire toujours) le progrez de mon petit sauoir,
depuis votre depart. Monsieur Girard, mon bon mai-
tre & tresmethodique precepteur, m'a balhè ces iours
passez à traduire pour mon exercice, deus de vo^r Para-
doxes: & ayant approuuè ma version (apres l'auoir
vn peu corrigee) il ha bien voulu, que i'antreprinse
de la vous anuoyer: comme pour montre de ce que ie
say faire. Ma-damoiselle, & tres-honnoree maire, con-
tinue avec nous tous vo^r ansfans, le melheur porte-
mant qui se peut an votre absance: laquelle nous
etant griene, nous diminue autremant la bonne che-
re. Mais nous esperons vous reuoir an brief, ayant

acheué de seruir ce quartier cheus le Roy, ainsi que promet-
 tettez par toutes vo^z lettres. Dieu nous en face la
 grace, & vous maintienne toujours en bonne prospé-
 rité. Nous vous baisons tous les mains, saluans tres-
 humblement vo^z graces. De vottre maison, ce premier
 iour de Ianuier (pour estraines) 1579.

Votre tres-umble, tres-affectionné, &
 tres-obeissant fis, I S A A C.



SI ON PEVT LIMITER

QUE LES POISONS NE PEVVET
estre balhees à certain iour, ne faire mourir à certain
tams : au tres-renommé Docteur en Medecine, M.
 PIERRE PERREAUV, le ieune.

*C'est le
 dernier
 Parad. de
 la 2. De-
 cade.*



Ombien que vous puissiez beau-
 coup plus proprement & plus ex-
 actement expliquer ce doute, tres-
 docte PERREAUV, toutesfois
 puis qu'il vous plait d'an ouyr
 aussi mon auis, sur la limitacion & efficace des
 venins à iour presis, ie vous diray an brief ce
 que i'an pense. I'ay bien touiours estimé absur-
 de & ridicule, ce qu'on affirme vulgairement,
 que les venins soient limitez des ampoison-
 neurs à certain tams. Car comme ainsi soit, que
 des medicamans, voire qui sont vriles, la vet-
 tu (de la notice de laquelle on limite à cha-
 cun sa quantité & dose) ne peut estre apprise,
 que par longue & frequante experiance, &
 icelle etant cognue, ne nous laisse ancor vn art
 certain, ains coniectural : ie ne voy point par
 quelle raison, les ampoisonneurs ayent vn tams
 prescrit à l'efficace de leurs venins. Car il n'est
 pas loisible de les eprouer sans danger, ne
 mesme sans punicion, tout ainsi qu'on experi-
 mante l'action des medicamans salubres. I'ay
 opinion qu'ils essayent les leurs sur des bestes,
 chiens, porceaux, & oiseaus : & que de là ils se

constituet des reigles, ayant obserué diuers
tams de mourir, selon la nature des venins.
Comme si les natures, de l'homme (le plus
tamperé des animaux) & des autres, n'estoit
fort differantes. Outre ce, qu'il et beaucoup
plus facile, qu'une heure certaine & precise de
l'euenement, auient aus bestes, qu'aus hom-
mes. Car les animaux priuez de raison, ont fort
peu de diuersité chacun an son espee, pais-
sans le mesme pasturage, & n'estans adonnez à
diuers etudes (ou occupacions.) Dont il s'an-
suit, que des mesmes choses les bestes andu-
rent presque samblable passion. Mais les hom-
mes, ia-soit qu'ils conuiennent an vne espee,
toutesfois ils sont tant differans, que iamais
vous n'an trouuerez deus samblables [de fa-
ce.] Et de diuerses complexions, condicions,
& occupacions, combien de milliers an trou-
ue l'on? Certainement ie panse, qu'an la seule
espee des hommes, il y ha autant de differan-
ce antre les particuliers, qu'il y ha d'espees
diuerses au reste du geantre des animaux. Et
pourtant il faut estimer totallement abusue
& non ferme, la coniecture des ampoison-
neurs: comme il et aisé à antandre, de ce que
j'ay à dire incontinant. Commançons donc
notre besogne.

Plusieurs cuidet & tiennet, que Theophraste (tres-graue & approuuè Philosophe) soit auteur de cette opinion, parce qu'il escrit ainsi de l'Aconit. On dit, qu'on le compose de telle sorte, qu'il peut faire mourir à certain tams: fauoir et, dans deus mois, trois mois, sis mois, vn an antier, & quelque fois an deus ans. Et dit-on, que ceus-là meurent plus miserablement, qui y peuuet plus long tams resister. Car il faut que leur cors transisse petit à petit, perissant d'une langueur diurne: & ceus qui meurent soudain, ont la mort plus facile. Mais l'autorité de Theophraste ne nous doit rien emouuoir, veu qu'il escrit cela, plus de l'opinion d'autrui que de la sienne, comme les mots recitez declaret tres-euidamment. Et si quelqu'un requiert la cause de cette persuasion, il la trouuera double. La premiere et l'astuce des hommes, qui se flatet trop, & mignardet leurs vices. Car combien en trouuera l'on, qui ne portet plus paciamment, qu'on leur reproche vn mal auenu de cause externe, que si on le disoit auoir eu source de la mauuaise tamperature de leur cors (ou de leur intamperance.) Car ia-soit que nul puisse estre dit cause de sa premiere constitution, & que par consequant le reproche de son imperfection ne touche pas à luy, toutesfois parce qu'elle et nostre, nous la couurons, & luy fauorisons outre mesure: tellement que sil arriue quelque faute de la

L'ignorance des causes introduit fort souvent, le faux soupçon le poison, & sorcellerie.

part de nostre imperfection, nous craignons qu'elle nous soit reprochee. Dont il auient, que nous accordons plus volontiers, la cause du mal proceder de quelque chose externe, que de l'interieur. Les exemples en sont plus manifestes, en ceus qui ont moins de savoir, ignorans les bons ars & sciences, transportez du simple iugement de l'amour de soy-mesme. Comme sont les vieux, & le surplus des idiots: auxquels on ne peut rien dire de tant receuable, que si on rapporte la cause de leur mal, ou à vn saint, ou à la poison secrettement donnee, ou à l'aspet forceleus d'une vielhe. De là procedet les plaintes, desquelles Virgile en dit vne:

*Je ne say pas quel regard mal-veulhant,
Va mes agneaux tandre & ansorcelant.*

Car ne pouuans mantir probablemant, que presantement, ou vn peu au parauant on ait donné de la poison, on controuue plus seurement, qu'on l'ha balhee long tams y a. L'autre cause de cette opinion et, la deprauée interpretation des theoremes astronomiques. Car comme ainsi soit, que les Astrologiens constituent (ce qui est vray) les diuerses manieres des affections ou passions des cors inferieurs, et de la diuersé conionction, opposition, & aspet rechangé des superieurs, le vulgaire ignorant ha prins de là occasion, d'establiir & fonder la varieté des effais, sur les moindres differances qu'il

qu'il peut observer aus cors celestes. Comme quand il constitue, quelque plante auoir efficace à l'ancontre des fieues, pourueu qu'elle soit cueillie auant Soleil leué. Or cet erreur et allé fort auant. Car non seulement de ces differances (certainement fort legieres) les hommes construiset communement la diuersité des effais an espee, ains aussi veulet que les accidans de ces effais soit diuers, pour la mesme raison : comme et, le tams de manifester l'efficace des poisons. La reuerie dequel ecriuant Theophraste dit, que la mort suruient en autant de tams, que la plante ha esté cueillie Recherchons donc la vraye solution de ce probleme par raison, plustost que par la relation ou temoignage d'aucun. Ce que nous ferons tres-commodement (si ie ne m'abuse) commanceans par la definition de venin ou poison : à celle fin qu'on antande plus aisement, qu'et ce dequoy nous antreprenons la dispute.

Nous disons proprement estre venin, tout ce que prins dans le cors, repugne tellement à la nature du cors, qu'il n'an peut estre surmonté : ains au contraire, il change le cors, ainsi que le cors change coutumierement ses viandes. De tous venins il y a deus sonneraines differances. Car, ou ils sont ennemis de la nature humaine, à raison de leur qualité manifeste, ou ils luy sont aduersaires de toute leur

*Ainsi et-
il des her-
bes cueil-
lies la ve-
lle de la
S.lan.*

substance. D'auantage, les vns peuuet tuer plu-
tost, les autres plu- tard, de leur propre naturel.
Ceus tuet soudain & an peu de iours, ou dans
peu d'heures, qui sont incontinant portez au
profond du cœur. Tels venins sont extreme-
ment chaus, & pour la plu-part corrosifs ou
putrefactifs, des grecs nommez *septiques*, douez
de parties tres- subtiles. Car les frois & grossiers
sont paresseus, & s'insinuent tard aus veines &
arteres. Il y an ha qui infectet & detruiset noz
cors de leur seule vapeur, ou exhalacion inui-
sible: autres lesquels tiennet le principal lieu
d'atrocité & malice, certains venins artificiels,
qui ont la vertu tant futile, qu'an ayant oint ou
frotté les etrieus, ils penetret les bottes de
l'homme à cheual, iusques à paruenir aus plan-
tes des piés nues: & de là antrans au cors, par
les soupirals de la peau, corrompet tous les
mambres. On an infecte aussi les selles & brides
des cheuans: & sont depuis introduits de la
chaleur naturelle, aus veines & arteres de ce-
luy qui et à cheual, par les pores des mains &
des cuisses. Finalement on an ampoisonne les
abilhemans, lits & couuertures. A ce geante
peuuet estre rapportez ceus qui tuet par la seule
veuë, ou par l'odorat, & qui seulemant goutez
(sens estre aualez) soudain precipitet l'homme
an ruine, sans aucun retardement. Tous ces ve-
nins apportet avecques eus vne mort presante:
de sorte qu'il ne reste aucun tams de secours

aus miserables qui tirent à la mort. l'antans que
telles poisons sont an frequât vſage aus Turcs,
& autres nations ſauuages. De ceus-cy differēt
les venins groſſiers, qui ſont plus pareſſeus &
tardifs à faire leur action: mais an fin ils brulet
bien fort, ronget, manget, tourmantet, & du ſe-
iour aquieret plus grandes forces & plus de ma-
leſice. Or il n'y a pas ſeulement differante effi-
cace ez poisons de diuers geandre, mais auſſi il
leur auient grande varieté du terme de nuire,
ſelon la conſtitucion & tamperament de ceus
qui an ont pris. C'et, que les vns ſantet plu-
toſt ou plu-tard la nuifance, que les autres, ac-
cablez de la poiſon: quelques vns auſſi an e-
chapet. Car il auient aucunesfois, que la for-
ce venimeuſe et mitiguee & vaincue, de la
complexion de celui qui ha prins le venin: ou
qu'elle ſoit de ſoy aſſez robuste, ou qu'elle ſoit
ranforcee par le moyen de la contrepoiſon.
Ainſi de ceus qui habitent an vn mairne air pe-
ſtilant, il y an ha qui ne ſont attains de peſte:
& de ceus qui an ſont malades, les vns meurent
ſoudain, les autres plu-tard, les autres an fin
an rechapet. S'il et ainſi, il ſemble totallement
ridicule ce qu'on affirme, qu'il ſoit poſſible de
balher de la poiſon, laquelle à iour preſis & an
certain tams faſſe mourir: & que ce ſoit de la
condicion du venin. Auquel erreur ſemble fa-
uorir vn autre, que nous auons ranuerſé dez
long tams: ſauoir et, que les medicamans pre-

Decad. I. net de noltre chaleur, le commencement de leur mutacion, comme Galen anseigne. Dont il sansuit, qu'estant pressez grossierement, ils produiset plus tard leur effait. Mais ancor que ie leur accordasse cela, toutesfois ils n'auientdront pas à ce qu'ils affermet icy, si ce n'est capricieusement. Car si quelqu'un argumante ainsi: Cette drogue deploie ses forces plus tard que cette-là, donques il le fera à certain tams: l'argumantacion sera fausse, & est nommee d'Aristote, *Elanche au consequant*. Ne plus ne moins que si quelqu'un disoit, La chieure et vne beste, donques la Chieure et vn Ane. Car *faire tard & faire à certain tams*, sont especes diuerses de ce qui fait ses actions an quelque tams. Or que telles ians ne regardet qu'à la seule condicion des poisons, cecy le preuue assez, que vous ne les oyez faire aucune distinction des cors, ains seulement feindre l'espece de la poison, à laquelle ils mettet la limitation du tams, & nompas de la complexion des hommes. Mais on ha veu souuant, qu'ayant balhé d'une poison au maim poise, & à maim heure, à plusieurs qui banquetoint ansamble, les vns moururent soudain, les autres apres quelques iours, & qu'à aucuns elle ne fit guieres de mal. Nous voyons tous les iours auenir le samblable des medicamans purgatifs: lesquels étant donnez an maim tams, maim mesure, & pareille preparacion, à diuerses personnes, ils vuidet les vns fort

vite, les autres tard: & les vns bien fort, les autres peu ou rien: & outre ce, les vns vuidet sans facherie, les autres avec grande difficulté, grieues tranchees, & frequante foiblesse de cœur. Et qu'et il de besoin alleguer diuers hommes, quand à vn mame le mame medicament ne produit touiours maimés effais? Puis donc que selon la diuerse & nomparelhe complexion & conformation des cors, nous voyons telles choses auenir pour la plu-part: & d'ailleurs qu'on ne peut iustement comprendre la propre tamperature de chaque homme: comment saura quelqu'un, combien de tams pourra la chaleur naturelle resister au venin? Quand i'accorderois bien, que quelqu'un fut si expert a poisonneur, qu'il pesat d'un certain iugement le pouuoir de sa poison, autant exquisement qu'on pese le musc à la balance: toutesfois ie n'admettray iamais, qu'on la puisse tant exactement limiter, au naturel de celuy qui la doit prandre, qu'elle ne falhe aucunement de la fin, ou du terme qui luy et proposé. Car la Medecine maimes et tenue pour (siance) fondee an coniectures, quant et de prescrire à chaque homme la quantité & la propre qualité de ses remedes. D'autant que on ne sauroit aucunement ecrire ou dire le iustement propre, comme dit Galen, au troisieme de la methode, troisieme chapitre. Et vn peu pres: An l'art de Medecine il n'y a chose, ou “

remede (dit il) qu'on ne puisse nommer an
espece : mais ce qu'on ne peut dire, n'ecrire, ne
ordonner antierement, c'est la quantité pour vn
chacun. Il repete cela bien souuant aus propos
qui s'ensuiuet, enseignant que chaque homme
ha sa propre curacion, & que la propriété na-
turelle et indicible, & incomprehanfible d'une
exacte fiance. Le vulgaire des medecins ap-
pelle *Idiosyncrasie*, la propriété naturelle, com-
me Galen remoutre. Et parce que tous confes-
set, qu'on ne la peut comprandre, on attribue
le vray art de medecine à *Æsculape* & *Apol-
lon*. Car le principe, & comme fondement, de
la Medecine parfaite ou accomplie, & infail-
lable (laquelle Galen nome, *l'art de vraye medecine*)
et la particuliere cognoissance des naturels.
Dont il ajoute : Si ie sauois recognoitre iuste-
ment la nature de chacun an particulier, ie pan-
serois vrayement estre tel, que ie consoy an mon
antandement auoir esté *Æsculape*. Mais d'au-
tant qu'il ne se peut faire, i'ay deliberé de m'e-
xercer tant, que i'an approche le plus pres que
peut l'homme : & i'exhorte les autres de faire
comme moy. Donques si la medecine est con-
iecturelle, & non certaine, de la partie qui or-
donne à chacun ses remedes, & que cela ne
peut estre aperçu, sinon finalement par vne lon-
gue obseruacion & experiance, qui se pourra
persuader cela des venins? Car si an l'art de me-
decine l'experiance est dangereuse, comme sa-

gemant nous auertit Hippocras: il et aisé à pan-
 ser combien et incertaine la preuue des poi-
 sons: parce qu'il n'est pas loisible d'experiman-
 ter leur vertu, sans danger & sans punicion, ain-
 si que des medicamans salubres, an diuerses per-
 sonnes. Et ce que peut quelqu'un auoir obserué
 aus bestes brutes, j'ay dit par cy deuant, qu'il et
 inepte de le vouloir accommoder à l'homme:
 d'autant que les naturels des hommes & des
 bestes sont grandement differans, maimes par
 cette preuue, que les etourneaus vinet seure-
 ment de la ciguë, & les calhes de l'hellebore,
 qui nous sont medicamans & poisons. Nous pou-
 uons an fin colliger de ces raisons, qu'il faut es-
 timier fort erronee & peu ferme, l'art (si art sa
 peut dire) & la coniecture des ampoisonneurs:
 veu maimement, qu'un venin produit son acciõ,
 autresfois hative, autresfois tardive: & ce non
 tant à raison de soy, que pour la nature & com-
 plexion du cors, la chetè ou étroitesse des passa-
 ges, force ou foiblesse de la chaleur naturelle,
 & le beaucoup ou le peu des excremans sam-
 blables, ou diuers. Car la force du venin de-
 meure quelque fois vaine, ou fort rabbatue:
 comme ez cors de ceus qui ont les facultez de
 l'ame robustes, à raison d'une tresbonne tram-
 pe. Aussi Galen panse, que le batimant & la
 composition du cors, et cause que la ciguë tue
 l'homme, & nourrit les etourneaus. A quoy il
 ajoute, la force de la chaleur menuisante &

*Aph. x.
 Liu. 1.*

subtiliante : à raison de laquelle il pense , qu'il aient aussi, que les venins froids demourent plu-tost & mieus leur force, à l'endroit des natures chaudes . Ce qui pourra sambler paradoxe à plusieurs : mais ayant esté tres-ouuertement demoustré par ledit auteur, i'an omets la preuve à mon eciant . Quant au naturel des excresmans, ils affoiblissent les actions des venins, repugnantes à leurs qualitez . Car s'il y a aus antralhes de la pituite an abondance, la force du venin chaud en sera grandement rabbatue : & au contraire, l'humeur chaud hatera l'accion de vn tel venin. Ainsi la cholere copieuse, rebouche & romt le narcotique qu'on ha prins : & la pituite le fauorise . Ce que peuuet sauoir ces mechans ampoisonneurs, n'est guere autre chose, sinon qu'ils cognoissent, quels venins font mourir seulement de l'euidante condition de leurs qualitez, & qu'ils nuisent de toute leur substance. Tels sont ceus qui tuent par pourriture ou corrosion, auxquels il aient de se ranforcer avec le tams, comme dit Galen : an lieu que les autres s'affoiblissent par leur retardement . Car tous ceus-là pourrissent avec le tams, & de tant plus, que le lieu sera plus humide & plus chaud. Donques ceus qui agissent an pourrissant, le tams augmente leur accion : parce qu'il augmente la pourriture : & veu qu'ils ne cessent de se pourrir, reciproquement ils pourrissent (le cors.) De là procede, qu'ils font

mourir long tams apres, principalemant les
venins qui sont de substance grossiere & terre-
stre. Voila (dis ie) que les ampoisonneurs
peuet auoir apris par longue obseruacion:
de forte qu'ils sachet distinguer les venins qui 1.
tuet de leurs insignes qualitez d'auec les au-
tres qui font mourir de toute leur substance.
Itē, que ceus cy aportet de leur nature à quel 2.
homme que se soit, vn mal plus soudain: & que
ceus là ne deployet leurs forces, sinon an plus
long tams. Et outre ce, que de toutes les deus 3.
sortes, ils tuet plutost ou plutard (sans auoir au-
cun egard aus cors) selon qu'il y an ha plus 4.
grand, ou moindre quantité. Ils peuet bien
aussi faire, que tous venins soient tamperés à
leur plaisir, & randus plus dous, ou plus apres,
à ce qu'ils tuet plus vite, ou plus tard: ce qui et
sans aucun secret ou miracle de nature. Car
nous aussi coutumieremant vsons de tel artifi-
ce aus drogues purgatiues, aguifans les plus
pareilleuses, & leur donnans comme des epe-
rons: & au contraire, retenans la trop hatieue
penetration des autres, an y melāt de ceus qui
sont naturellemant plus tardifs & grossiers.
Mais qu'on limite les effais des poisons à cer-
tain iour, & à point nommé, nous pansons etre
absurde & du tout ridicule: d'autāt que la na-
ture de chaque homme ne peut etre parfaite-
mant cognue (ainsi que nous auons cy dessus
suffisamment demoustré) d'où procede le tref-

incertain terme de chaque venin, à faire mourir l'homme. Car toute accion naturelle rancôte diuers effais, selon la diuerse disposition, tant de ce qui agit, que de ce qui endure. Et cela auient, non seulement à raison des qualitez euidâtes, ains aussi des occultes & propres: dequoy procede aussi, que a vne autre nuit beaucoup, ce que profite à cetuy cy. Pierre de Abano (lequel on nomme Conciliateur) là où il explique cette question, propose qu'il se peut faire, que ayant cognu certainement la duree de la vie d'un homme, par la quantité mesuree de son humeur radical, on balhe vne poison, qui le consume an dis ans. Dont il collige, quelques vns estre ampoisonnés, qui vont toujours an desseichant (on les appelle an vulgaire [Italien] *herbati & strigati*) & qu'on peut faire aucunes fois, que la poison soit limtee. Mais ce qu'il presupose de l'Astrologie, a-peine peut estre bien deuiné. Je confesse, que tous ceus qu'on void transir de peu à peu, etans ampoisonnez, ils ont vn mal long, mais il est pour amporter l'homme an tams à nous incertain. Pline ne dit pas vn terme plus certain, de la mort, qu'apporte l'vsage du lieure marin (poisonneus) quand il dit: Les hommes qui son vngent santet au poisson: & de ce premier an maaperçoit ce venin. Au reste, on an meurt sine onnt d'heures, que le lieure ha vecu. Car, an autainera l'age de ce lieure, affin de pouqui deu

uoir predire l'heure ordonnee à mourir? Et quand bien ie donnerois cela, qu'on peut sa- uoir combien de jours ha vecu le lieure, toutesfois ie n'accorderay pas, que tous hommes an meuret à mame tams, veu qu'une mame poison agit fort diuersement, selon la diuersité des cors, ainsi qu'il ha esté plus que assez prou- ué. Tellement qu'il ha esté dit plus veritable- ment (ce que le mame Plin ajoute) ledit ven- nin estre à tams incertain, comme disoit Licinie Macer.

C'est, P E R R E A V, tres-amy & tres-docte, ce que me samble deuoir estre tenu de la veri- té de ce Probleme. Pardonnés moy, si i'ay esté vn peu prolix à l'expliquer: & sachez que ie l'ay fait, pour l'amour de quelques ecoliers an Medecine, qui par fortune sont suruenus quād ie le pourpansois. Car ils m'ont prié de leur donner la copie de ce Discours. Ce que ne pouuant refuser honnetement, il m'ha fallu traicter la question plus au long, affin de m'ac- commodér à leur capacité. Vous, excellant an sauoir & antandement, eussies facilement com- prins an beaucoup moindre propos, mon auis là dessus, comme vous l'aués desiré.

QV'IL Y A RAISON, QVE

C'est le se-
gōd Para-
doxe de la
premiere
Decade.

QUELQUES VNS PVISET VIVRE

*sans manger, durant plusieurs iours & an-
nees : au tres-renommé Iurifconsulte, M.*

IAN PAPON, conseiller du Roy,

*Iuge & lieutenant general au
Balliage de Forest.*



A Religion chretienne nous
anseigne, qu'il faut soudain a-
jouter foy aus propositions
Theologales qu'on oyt reci-
ter, & que ez choses nullement
sujettes à preuue, la fiance &
le ferme consantemāt, et tres-agreable à Dieu:
veu que c'est luy qui peut rompre les lois de
nature. Mais aus disciplines, qui meritet d'e-
tre appellees Mathemates, & vrayemāt scian-
ces, d'autāt qu'elles expliquet tout par ses cau-
ses, d'affirmer quelque chose sans demonstra-
tion, & an ordōner comme fait vn legislateur,
nous estimons cela ridicule. Car il n'y a rien
qui samble plus absurde, que le consantemant
precipité, sans cōseil, & temeraire: anuers ceus
mائمement, qui cognoisset l'esprit humain
tres-auide & tres-apre à rechercher la verité.
Toutesfois vous an voyez beaucoup, qui si
plusieurs autres ont dit de maim, ils n'y con-
trediset pas: & ne panset point à cecy, s'il et
plus licite de dire vray, ou au cōtraire de man-

De viure sans manger. 245

tir, d'une cause commune. O qu'il vaudroit
bién mieus s'arreter là, & douter des choses que
l'esprit ne peut comprendre! Ce que j'ay ac-
coutumé de faire: & à raison de cela, plusieurs
qui sont de temeraire constant, m'appel-
let incredule. Car ie me suis proposé dez long
tams, n'admettre aucune chose comme vraye,
de celles qu'on peut comprendre par raison &
discours, pour grâde que soit l'autorité de ce-
luy qui la propose. Je cōfesse bien, que la cau-
se de tout ce que l'experiance nous temogne,
n'est pas ancores trouuee & cognue de nous:
comme aussi ie tiés pour tres-vrayes plusieurs
opinions, qui sont Paradoxes au commun, n'e-
tant ancor persuadees. Mais comme ie ne veus
pas, q l'on croye aus miennes sans raison, ainsi
me soit-il permis de n'accorder les autres, auât
que j'aye aprins de leurs auteurs les causes de
tels effais, ou que ie les puisse comprendre an
raisonnant moymaïne. Qu'il soit libre à tous,
de n'ajouter foy aus propos sans demonstra-
cion. Car ceus-là samblet peu auisez & (que
plus et) fort lourdaus, qui ressoiuet les admi-
rables affirmacions, emeus de quelque vaine
opinion du diseur. Telle et celle que ie pro-
posois hier, tres-renommé Presidât: que quel-
ques vns peuuet viure sans manger, non seule-
mant plusieurs iours, ains plusieurs mois &
annees. Vous avez prudamment dit, que vous
ne la receuriez pas, ains que ie l'eusse prou-

uee: d'autant qu'elle vous samble la plus paradoxique, de toutes celles qu'aués ouy de moy. Touttesfois ell' et tres-veritable, cōme les autres, & desormais vous n'y cotredirés pas. Car vous ne douterés point de venir an mon opinion, veu qu'ell' ha pour fōdemāt des raisons tres-euidantes, prises des choses naturelles. Je ne diray pas de l'auoir obserué, mais ie confirmeray qu'il se peut faire. S'il falloit prouuer le fait par temoins, nous en produirions quelques vns, irreprochables & de grād' autorité. Hippocras limite à vne semaine, le iune mortel de l'homme. Mais Plinē dit, qu'il n'et pas mortel d'vne semaine, veu que plusieurs ont duré plus d'onze iours. P'antans qu'il y a pour le presant an Auignon, vn homme de soiffante ans, qui mange fort peu souuant, & par longs interualles, de cinq, sis, dis, & plusieurs iours. Ce que Albert escrit, et samblable: qu'il y auoit vne fame, laquelle passoit quelque fois vint iours sans manger, & bien souuant trante. Il dit aussi, auoir veu homme melancholique, lequel vequit set semaines sans manger, ne beuant que de l'eau vn iour & autre non. Athenæ raconte, que la tante paternelle de Timon, se cachoit touttes les annees dans vne cauerne, cōme les Ourses, l'espace de deus moys, viuant sans aucun alimant que de l'air, à demy-morte, de sorte qu'à peine la pouuoit on recognoistre. Personnes graues rapportet, auoir

*Liv. 2. des
dipno-
soph.*

De viure sans manger. 247

eté veüë an Espagne vne filhe, qui ne māgeoit rien, & antretenoit sa vie ne beuuant que de l'eau, & auoit deja vint & deus ans. Plusieurs ont veu an Languedoc vne garse, qui demoura trois ans, & nous sauons par ce qu'an ont escrit quelques bons & doctes personnages, qu'il y an ha eu vn' autre à Spire an Allemagne, qui vequit autant d'annees sainemāt, sans autre viande ou breuuage que de l'air. Guillaume Rondelet atteste, d'an auoir vu vn' autre, qui de parelhe maniere de viure, paruint iusqu'à dis ans: puis quād elle fut grāde se maria, & eut de beaus ansans. Ian Bocace escrit d'vne Allemāde, laquelle vequit trant'ans, sans manger aucunemant. Pierre d'Abano (qu'on nomme Cōciliateur) racōte d'vne Normande, qui ne mangea rien de dis & huit ans: & d'vn autre qui dura trāte & firs ans sans manger. On tient pour certain, qu'à Romme vn praitre vequit quarante ans de la seule inspiracion de l'air: cela etant bien obseruē, sous la garde du Pape Leon [disieme] & de plusieurs princes, & fidellemant temognē par Hermalao Barbaro. Mais pourquoy m'arrete-ie tant à reciter ces miracles, qui peuet sambler pures fadaizes, iusqu'à tāt que ie les aye expliquēs par raison? Certainemant l'autorité & l'obseruacion des autres et de tresgrand pois: mais ce ne doit pas etre assēs, là où il n'y a faute de raison à cōfirmer son dire. Je suis bien aise, q̄ vous n'ayez

voulu receuoir sans cela ma proposition, afin que ie puisse commodement exercer mon esprit, à rechercher sa cause, ainsi que i'ay de l'ogtans desiré.

1. C'est vne fantâce ferme & ratifiée, que tous cors viuans, soient plantes, soient animaux, viuent à raison de la chaleur qu'ils ont enclose en eux: au moyen de laquelle ils attirent l'alimant, le cuisent, l'an nourrissent & soutiennent, croissent & angeandret: outre ce que les animaux sentent & se meuuent: & tât plus parfaites sont telles ceuures, tant plus et abondante la vertu & la substance de la chaleur. Pour ce Aristote, qui ha défini la mort par l'extinction de la chaleur, ha laissé pour memoire (comme chose fort remuée & diuulguée) que la vie et contenue de la seule chaleur: & que sans la chaleur ne peut viure, ne animaux, ne plantes. A son imitation tous les philosophes d'un consentement, définissent la vie par chaleur, & la mort par extinction de chaleur. Car pour petite que soit la chaleur, le cors qui en ha, iouit de la vie, & produit lesdites actions de soy, ancor qu'elles soient obscures. Cette chaleur est nourrie & entretenue d'un humeur gras & aéré, qui inferé dans la substance des parties similaires, et du tout inuisible. C'est le premier (ou principal) humeur, commun à tous viuans, auquel sied premierement & par soy l'esprit, muni de chaleur: tellement que ne l'esprit, ne la chaleur
peuet

De viure sans manger.

249

peuet estre, ou durer longuemant, sans l'ayde dudit humeur. Donques la vie, & la duree des choses animees, git au consantemant & accord de ces deus, chaleur & humidité. Cette-là est tenue pour ouuriere de toutes accions: cette-cy luy est sou-mise, affin que laditte chaleur dure plus longuemant. Et tant que cette humidité vtile & agreable, peut nourrir la chaleur vitale, autant vit l'animal ou la plante. Dont il auient, que ceus ont plus longue vie, qui ont plus d'humeur naturel, ou iceluy plus epais & plus resistant à dissipation. Car il est de nature gras, huileus & gluant, affin que la chaleur (qui an estant anueloppee, an gate & consume tout bellemant de petites porcions) l'eboiue & absorbe plu-tard. Toutesfois auant que cela auienne, l'animal rand l'ame à Nature, luy estant otee sa propre matiere, languissant sans l'esprit & la chaleur. Or puis que le cors des viuans s'ecoule & diminue ainsi toujours, si vne substance samblable à l'ecoule n'est restituee, certainemant il s'euaporera & dissipera tout. Mais il n'y a dequoy remettre, an lieu de l'humide substantific (comme on l'appelle) consumé, ie ne dis pas autant qu'il s'en diminue incessamment, ains seulement vn petit brin de tel. Car il ha toute son origine de la semance, & des principes de nostre generation: & nous ne voyons pas, qu'on puisse aiou-

V

ter à noz cors aucune telle chose. De là procéde la mort ineuitable: parce qu'il n'y a aucun artifice de reparer, ce que seul retient la chaleur. On restitue bien la substance charnue, epuisee du transiffement: l'humide primitif, iamais. Et veu que sa pature etant consummee, la chaleur quand & quand, si ell' et cause consumant sa pature (comme certainement ell' et) il s'ensuit incontinant, que la chaleur mame et cause de sa mort. Il nous reste seulemant, que puis qu'on ne peut totalemant detourner la cause de nostre mort, à tout le moins nous la retardions & rebouchions, etant trop hatee & precipitante (s'acheminât vite de son naturel à l'ysue de la vie) affin que l'animal ne s'etaigne si tost. Ce que peut estre fait, au moyen des alimens: quand par addicion de quelque plaisante humidité, on arrouse la naturelle, affin qu'elle resiste d'avantage à la voracité de sa chaleur. Car ell' et ainsi plus long tams cōservee, quand la chaleur naturelle ne peut librement exercer sa force sur le sujet humide: parce qu'elle et aucunement rebouchee, quand elle agit an la masse charnue, & aus humeurs nourrissans, dont ce pandât elle cōsume moins de l'humour radical. Touttesfois il s'an consume toujours quelque petite porcion, mais moins quand il y a de l'autre an quantité suffisante. Et à ces fins Nature, non seulemant aus

animaus, ains aus plantes aussi, ha donné dez le
commancemant certaines vertus, d'appeter
continuellemant ce qui leur defaut & märke,
affin que tout se preserua de mort, le plus lon-
guemant que faire se pourroit. Car tout ce qui
et angeandré, & tient de la Nature, desire ex-
trememant d'etre prorogé tref-longuemant,
& subsister au monde. Pource les animaus
n'ont iamais aprins d'aucun à manger, boire,
& respirer: ains dez le commancemāt ils ont
des facultés, qui parfont cela sans precepteur.
Dequoy il appert, comme ie panse, que l'vsa-
ge des alimās et necessaire à tout ce qui ha vie,
non pour autre chose, que pour antretenir cet
humeur interne (familier, & vrayemant vni-
que pature de la chaleur naturelle) affin qu'il
ne soit si tost cheu. Et tant que nous le pouuōs
faire, & que l'humidité primitiue et de reste,
an suffisante quantité pour conseruer la cha-
leur vitale, nous sommes autāt de tams an vie.

2. De cecy on peut colliger (pour la seconde
proposicion, que nous auons à expliquer) que
il ne faut beaucoup de nourriture, à ceus qui
ont la chaleur moindre & plus languide: par-
ce qu'elle ne s'ambie auoir grād' efficace à cō-
sumer son humidité. Tout ainsi que le petit
feu, ne peut porter beaucoup de boys, ains et
de peu antretenu: mais le grād feu s'etaind in-
cōtināt à faute de pature, si vo' n'y ajoutés vn

Aph. 13. grand amas de boys. Et pource les vieux andret facilement le iune, comme dit Hippocras : an segond lieu, ceus qui sont au plus fort de leur age : moins les adoleffans : le moins de tous, les anfans, & antre autres ceus qui ont l'esprit plus vif, & sont plus vigoureux. Car *Aph.* 14. ceus qui croisset, ont beaucoup de chaleur naturelle : dont ils ont besoin de beaucoup d'aliment : autrement leur cors se consume. Les vieux ont peu de chaleur : pourtât ils n'ont besoin de grans viandes, d'autant qu'ils an suffoquent. Car comme la flame des lampes (dit Galen) iasoit qu'elle ayt l'huile pour aliment, toutesfois si on l'y met tout à vn coup, ell'an sera plus etainte, que nourrie : samblablement aus vielhes jans, & autres qui ont la chaleur plus remise, l'abondance des alimens leur nuit, an suffoquant la chaleur, & l'accablant de sa multitude. Ceus qui ont beaucoup de chaleur (comme les anfans & les adoleffans) se plaifent à l'abondance des viures : parce que la masse de leur cors se consume fort, & leur chaleur vorace dissipe antierement la naturelle humidité, si elle n'est bridee & retenue par addicion d'un familier suc. Donques la proporcion & mesure des alimens est ordonnee, à raison de la chaleur, sans autre ansegnement que de Nature. Car la faim ou l'appetit, qui suit la necessité naturelle des alimens, et sa reigle certaine : tel-

De viure sans manger.

253

lemant que ceus ont besoin de copieus & plus frequent aliment, qui ont plus souuât & [plus] grād appetit : ceus qui n'an ont point, ou peu, & moins souuant, n'ont pas affaire qu'on leur donne aliment, sinon fort peu, & par longs interuales. Les laboureurs, artisans, & autres qui trauailhet tout le iour aus fortes besongnes, sont contrains d'vser grand' quantité de viandes, & de repas coup à coup reïterés, pour la faim qui les presse : d'autant que la qualité de la chaleur naturelle, deuient plus acree, & consume plus, par l'exercice: de sorte que ceus qui s'adonnet totallemant au trauail, ne peuuet iuner, sans tresgrand' perte de leur santé & force. Ainsi Galen remoutre, que aus *picrocholes*, c'est à dire bilieus, l'abstināce et tres-nuisante: & que de iuner longuemant, ils tōbet an tres-piquantes & tres-aiguës fieures, desquelles il est aisé de venir aus hectiques, & an outre de celles-cy au marasme roty. Les sanguins anduret plus facilement le iune, parce que l'humide sustantifique redonde an eus, & l'alimātaire aussi. D'auantage, leur chaleur est plus remise & moins aiguë, comm' etant grommee de l'humidité. S'ils ne prennent aucun plaisir à l'exercice, ains sont toujours an repos, paresseus & andormis comme glirons, ils ont peu d'appetit, & tard: ils deuïennet phlegmatics, & le plus souuant se mettet à manger sans necessité, seulemāt par

V iij

coutume, aus heures ordonnees. Ceus-cy ont vrayement la chaleur plus remise & cōme angourdie, laquelle il seroit meilleur d'exciter & aguïser par trauaus: affin qu'estant dissipée, la grand' quantité de l'humeur superflu, elle approchant de la moderee, fit sentir l'appetit: lequel n'est autre chose, que naturel desir de ce qui defaut & manque à chaque particule, et l'aliment, qui soit substitué au lieu de la substance, qui s'ecoule perpetuellemēt par la vertu de la chaleur. Quand donc il n'y a point d'appetit, il est vray semblable, que la chaleur agit an autre humidité, laquelle est excrementeuse & non naturelle: la consommation de laquelle n'estant point dommageable, qu'est-il de merueille, si sans nuisance ou douleur le desappetit perseuere, tandis que cet humeur superflu amassé resiste à sa dissipation: maimement veu que la chaleur languissante d'oïsiuete, ne peut guieres consumer? C'est la seconde raison, pourquoy les vielhars portet le iune plus aisement, & sans incommodité: sauoir et, d'autant, que outre la petitesse & foiblesse de la chaleur, ils ont à raison de cecy vn grand amas d'excremans pituiteus: & que leur cors lourd, pigre, & tardif, et tres-inepte à tous mouuemens & exercices. Pourtant il leur auient, de n'auoir besoin de beaucoup d'alimās: veu que leur chaleur, par beaucoup de raisons, dissipe

fort peu de la masse du cors. Or ce que nous auons anseigné estre aus vieus, cela maime conuient iustemāt aus naturels samblables : car si quelcun et, ou de cōplexion naturelle, ou de sa maniere de viure, plus humide & plus froid, il aura peu d'apetit, & se soulera aysemāt de peu de viande : parce qu'il luy manque de la chaleur, qui puisse consumer grand sustance. De là vient, que les bestes exangues (des Grecs dites *anaimēs*) auxquels le froid et tref-offansif, à cause de leur petite chaleur, se cachet tout l'hyuer, & viuet sous terre ez lieux plus tiedes, sans alimant. Cela et aprins de l'experiance, à laquelle cōsant bien la raison. Car si le besoin des alimans et, pour reparer ce que perpetuellemāt s'ecoule, affin que l'humeur primitif (pature de la chaleur naturelle) ne soit si tost consumé : ceus auxquels rien ne s'ecoule, & il n'y a presque point de chaleur (au moins par quelque tams) n'ont aucun besoin ou prouffit de la viande. Or les serpens, laizars, & leurs samblables, sont frois de nature. La chaleur qu'ils ont fort petite, ne dissipe guieres, & durāt l'hyuer ancor moins q̄ d'ordinaire : parce que adōc elle deuient plus lāguissante, de la violence du froid. Pource il n'y a cōme point d'effluxiō ou dissipaciō, la peau etāt epaissie & exactemāt cōstipee de la force du froid hyuernal. Et tout ce qu'il y a de fuligineus excremāt, suscitē de leur

Lin. 6. de
l'archi-
tect. ch. 1.

amette languissante, il s'amasse au cuir : lequel
an fin deuenât plus sec & plus rude, se depoul-
he & separe de la peau sujette, sans faire mal
au cors. C'est ce qu'on appelle, la depoulhe du
serpant, de laquelle il se deuettit au milieu ou à
la fin du printams. Puis quand le Soleil reue-
nant à nous, excite leur chaleur, ayant chassé
l'angourdissemant, lesdittes bestes deuienet
plus remuantes, & reprenet leur premiere agi-
lité : car la chaleur conduit & fait les mouue-
mans. Dont Vitruve disoit : Les serpens se re-
muet terriblement, quand la chaleur ha epuisé
le froid de leur humeur. Durant les petis jours
" an tams d'hyuer, ils sont sans aucun mouue-
" mant, angourdis du froid, qui prouiet du chā-
" gemant de l'air. Que les glirons, & les rats de
" montaigne [dis marmotans] non seulement
s'abstiennet tout l'hyuer de manger, & ne sont
que dormir, ains aussi qu'ils an deuienet plus
gras, il et autant merueilleus, que confirmé de
vraye experiance. De là et fort, ce que dit
Martial du Gliron, an ses Distiques :

*Durant l'hyuer ie dors,
Et suis plus gras alors,
Que nourry suis de rien,
Sinon de dormir bien.*

Vous repondrés, que les petits animaux se

De viure sans manger.

257

peuet passer quelque tams de la viande, mais
nompas les plus grans. Surquoy ie produiray
le Crocodil (baite sauuage, de fort grand' ta-
lle) duquel seul on ha opinion, qu'il croit tant
qu'il vit: & il vit longuemant. Or Pline escrit,
qu'il passe touiours quatre mois de l'hyuer à
iun, dās sa cauerne. On affirme aussi, que l'Ours
peut viure tout l'hyuer sans manger. Donques
comme les vielhars, à raison de leur froideur,
n'ont pas grand appetit, & n'ont besoin de gran-
de nourriture: ainsi toutes les complexions, qui
ont plus de froid que de chaud, durent long
tams sans viande. Et qu'ont besoin de nouuel-
le pasture, ceus auxquels la naturelle ou l'appli-
quee ne se consume point? Et que consumera
la chaleur languissante? Si elle consume quel-
que chose, & il y ha abondance de ce qui luy
resiste, on ne sentira pas ce besoin incontinant,
ains apres vn long tams. A la dissipacion del'hu-
meur naturel, resiste quelque fois l'alimentaire
humidité, quelque fois l'excrementeuse: sur
laquelle s'exerceant la chaleur naturelle, & la
dissipant, fait ce pendant moins de dommage à
l'humour naturel.

On peut tirer d'icy la troisieme proposi- **III.**
cion, qui seruira de preuue à la conclusion
proposee: sauoir et, que la seule petite cha-
leur, ne rand pas l'abstinence plus facile, ains
aussi l'abondance de l'humour superflu, qui

amuse la chaleur naturelle. Car ce que fait l'aliment toujours epars, arroufant les parties, & abreuant l'humeur naturel, cela mame fait quelque fois le copieus humeur excremanteus accumulé an noz cors: quand il rebouche l'acrimonie & force de la chaleur, & l'ampeche de consumer vne melheure sustance, iceluy se presantant à estre consumé. Pource le vantricle etant plein de pituite (sinon qu'elle fut aigre) nous n'auons point d'appetit, & dedaignons les viandes: & (à mon iugement) nous n'auons [grand] besoin d'aliment, iusques à tant que le ventre ait digeré cette matiere-là, ou qu'il l'ait ietté autre part. Il peut bien estre, que tandis que l'estomach refuse les viandes (parce qu'il n'ha besoin de nouvelle pature) les autres mambres andurent [leur] faim naturelle: laquelle n'est pas sansible, dont ils languisset & famaigrisset, si on ne leur otroye de la nourriture. Parquoy souuantes fois il vaud mieus, presanter de la viande à l'estomach, sans attendre qu'il soit venu à bout du reste. Toutesfois il vaudroit mieus au prealable (si faire se peut) artificiellement auoir purgé le ventre, afin que la viande ne s'y corrompe. Si tout le cors vniuersellemant estoit plein de mame humeur que l'estomach, chaque partie n'appeteroit nomplus que luy, & n'auroit besoin d'autre aliment, tandis que tel

De viure sans manger. 259

humeur suffiroit à la chaleur. Mais l'estomach
le plus souuant et sou, parce qu'il ressoit pre-
mier tout, & sa cauite et plus ample. Il auient
moins souuant, que tout ce geante d'excre-
mant s'epande par tout le cors. Ce qui arriue
toutesfois aus vielhars, & aus autres frois de
nature: parce que la petite chaleur ne peut di-
gerer l'aliment ordonné à chaque partie, ains
laisse par tout beaucoup de crudité. Ces hu-
meurs sont pituiteus & dous, conuenables à
nourrir la chaleur, s'ils sont plus elaborez. Car
les Medecins enseignent, que la pituite se parfait
de la chaleur dedans les veines, où elle se cuit
à loisir, & se conuertit en sang louable. Car
(comme ils parlent) le phlegme n'est que sang
moins cuit: lequel seruira à nourrir les parties,
apres qu'il aura esté sogneusement elaboré. Il
faut donc permettre, que la chaleur s'exerce à
vne si louable ceuvre: ce que la viande conti-
nuellement aualee detourne. A cela profitent
les iunes, fort sains à ceus qui ont abondance
d'humeur pituiteus, ou dous, ou insipide, accu-
mulé en tout le cors. Dont Hippocras conse- *Aph. 61.*
ille bien la faim, à ceus qui ont les chairs humi- *lib. 7.*
des: parce que la chaleur vse plus plaisamment
des humeurs, ancor qu'ils soient crus, que de la
viande nouuellement receuë. Car la viande est
beaucoup plus elognee de la forme du sang, &
de la nature des parties, qu'en est la pituite: &

la chaleur aura plu-tost appreté l'humeur ja fait, que de la viande. Et s'il ne le fait, d'autant qu'on luy fournit toujours nouuelle matiere, il et force que tout se corrompe, & que tout deuienne excrement. Lequel etant retenu au cors, par tout pullulet des maladies familiares à tel humeur, cedemes, vitiliges, alphas, scirrhes, loupes, neus, & [autres] infinis maus de la classe des phlegmatics: lesquels celuy eutera, qui permettra à la chaleur, de parfaire & exactement elaborer cet humeur froit, an ne prenant aucune viande, ou pour le moins an prenant plus tard & rarement. Car comme ainsi soit, que la chaleur se doie toute occuper an cet affaire, elle an et detournee par la nouuelle matiere, laquelle et inutile, & ancor dommageable. Mais quand la chaleur ha consumé, ce qu'elle ha trouuè plus commode, pour l'vsage des parties qu'il falloit nourrir, dès-lors chacune d'elles commence d'auoir bon appetit, & de faire antandre leur indigeance, par mutuelle comunicacion iusques au ventricule. Toutesfois, comme nous disions par cy-deuant, quelque fois l'estomach n'appete rien (à cause qu'il et plain d'humeur) ja soit que les autres parties iunet: & au contraire, l'estomach etant vuide & affamé, les autres parties peuuet etre rassasiees. Adonc, etans contrains de la facheuse faim, de prandre de la viande, nous

tachons par autre moyen, de decharger les autres parties de leurs humeurs, afin que la chaleur ne soit accablee de leur trop grande quantité. Mais si la replecion et commune à tout le cors, de sorte que l'on sente le vantricule, ansamble toutes les autres parties, pleines d'humeur pituiteus, lors qu'il n'y ha aucun appetit, la chaleur tampussee etant occupee an beaucoup de matiere, pendant qu'elle fait cette autre besogne, il n'y ha pas necessité de viande. Car la chaleur ha prou besogne, & peu de force: dont elle ne fait pas euidente consommation de l'humidité naturelle des parties, tandis qu'elle iouyt d'une autre qui luy et tresplaisante, comme et la douce pituite. Cecy fait bien pour ceus, qui demeurer à jun trois ou quatre iours, & plus long rams. Car que faut-il presanter des viures, quand tout le cors verse d'humeur froid, & malaisé à dissiper, si nous auons appetit de manger, seulement lors que la premiere viande et depechee? Quoy? si quelqu'un dedaigne les viandes, & luy font mal de cœur à les voir, n'est ce pas vn certain indice, qu'il n'ha [grand] besoin de viande: de laquelle c'est Nature mame qui nous an ha donné l'appetit, sans ansegnement de personne? Et de qui pourrions-nous antandre l'heure du manger, & la quantité, voire la qualité? An ces choses nous suiuous de nous-maines, l'incli-

nacion naturelle, & le desir exant de toute raison. Parquoy celuy qui abhorre totallemant la viande, il n'an ha pas [grand] besoin: veu que c'est vn appetit naturel, & nompas volontaire, ne qui obeisse à la raison. Il et donc ja plus que assez confirmé par noz raisons, ce que l'experience atteste: qu'aucuns ont vecu par plusieurs iours sans manger, & ce sans aucun dommage de leurs forces & santé: ains (que plus et) on croid, qu'ils ont preueni des maladies qui les menassoient, ou qu'ils sont echappez des presantes. Car les maus menacet, ceus qui sont ainsi sous, & ont grande replecion de tout le cors, si vous y mettez toujours de la viande: parce qu'il et force, que le tout se corrompe. Dont Hippocras dit, tant plus tu nourriras les cors mal neis, tant plus tu les offanceras. Du mal presant excité de cacochymie echappa la filhe Allemande, qui iuna trois ans. Car on raconte, qu'elle etoit douce & benine, taciturne, oisive, & andormie, pleine de pustules & rognés, à raison de l'abondance de l'humeur pituiteus gros & visqueus. Elle ayant soutenu, de son propre mouuement, vn si long iune, an fin les humeurs etans consumez, & la matiere de son mal otee, elle remise an santé, commancea d'auoir appetit. Cecy ne doit sambler absurde, veu que l'esprit comprend facile nant, que non feulemant il peut ainsi auenir, ains aussi qu'il se

*Aph. 19.
lin. 2.*

fait tres-sainement. Peut estre que cela et dur, de admettre que l'action de la chaleur naturelle, perseuere deus ans ou plus, à la consomption des humeurs vne fois assamblez. Vous accorderiez bien, que le plus long terme de iuner, soit limité à vne semaine ou deus, ainsi qu'ont dit Hippocras & Plin. Mais ie feray, que la longueur du tams ne vous retiendra pas, de venir de piés & de mains à ma santance. Moy certainement, qui suis moins à condamner du vice de credulité, que d'aucun autre, ne me suis persuadé telles choses sans raison. Et vous considererez (s'il vous plait) d'où ie collige que cecy peut estre fait, apres que vous aurez acheué de lire, ce peu qui nous reste encore à dire.

Quand l'humeur pituiteus abreuant le **IIII.** cors, & soulant plaisamment les parties, et copieus, telle nourriture suffit long tams: quand il et an petite quantité, la matiere an brief erant consumée, soudain l'appetit reuient. Or si l'humeur n'et pas seulement copieus, ains aussi gros & visqueus, qui doubtera ancores, que la vie ne puisse estre prolongee longuemant, sans qu'on y aioute aucun aliment? Soit an outre, la chaleur petite & languissante, ou de nature, ou par accidant: elle ne pourra pas dissiper beaucoup d'humeur: & pourtant il luy resistera fort long tams. An vn vielhard, vne filhe, vn prestre, la chaleur et moindre & plus remise, à cause de

*Liu. 2.**chap. 67.**Li. 8. c. 33.**Liu. 7. c. 2*

l'age, du sexe, & du repos. Et l'abondance des humeurs gluans, peut estre si grande an iceus, que la chaleur naturelle n'an fera moins agreablemant antretenue de son accointance, que de l'abord d'un autre aliment nouveau & journalier. Cela continue, tant qu'on luy fournit d'humeur an abondance: & il an et fourny longuemant, quand à raison de son epaisseur, viscosité & froideur, il an et fort peu dissipé de la chaleur, laquelle n'est vehemante ny acre. Et combien qu'elle ait esté quelque fois telle, au moins elle et maintenant rebouchée. Ainsi nous auons eprouué, la Salamandre (que l'on croit vainement n'estre brulée du feu, comme Dioscoride dit) mise sur le feu, pouoir longuemant resister à la brulure, & etaindre le feu s'il estoit moindre: parce qu'elle et toute plaine d'humeur froid, epais & comme lait, an lieu de sang. De samblable matiere (à mon auis) sont farcis les cors, de ceus qui abstienent des viandes durant quelques annees. Et ie me doute aussi, que tel et le naturel du Chamæleon, si ce qu'an écrit Plin et vray: que luy seul d'antre tous animaux, vit la bouche toujours beante, sans manger & sans boire, n'vser d'autre aliment que de l'air. Car ce que luy mame narre des Astomes [c'est à dire, jans sans bouche] lesquels viuent de la seule exhalacion, & des odeurs qu'ils tiret par le nez, se fait par un autre moyen, si vous receuez

receuez le tres-ingenieus raisonnement de Mar-
file Ficin, qui et tel: On dit, qu'an certaines
regions chaudes, & qui flairet par tout de grand
odeur, plusieurs de graile stature, & d'estomach
debile, viuet quasi seulemant des odeurs. C'et
(paratanture) d'autant que la nature du lieu, re-
duit an odeur presque tous les suc des herbes,
des grains, & des fruis mols: & la maimie natu-
re resout an espris, les humeurs des cors hu-
mains. S'il et ainsi, quel ampechemant y a-il,
qu'ils soient nourris seulemant de vapeur, veu
que tout samblable et nourry du samblable?
Mais ceus qu'on ha obseruez viuans sans vian-
de an l'Europe, ont ete pleins de suc froid & vis-
queus. Nous pouuons ajouter aus sudittes con-
ditions, le reserremant des pores de la peau, le-
quel Alexandre Beniuen ha cognu, auoir grand
pois an cecy: quand parlant d'un, qui a Venise
iuna quarante iours continuels, n'ha pas seule-
mant noté, qu'il fut de mambres frois, conte-
nans au dedans du phlegme gros & cru, ains
aussi que les pores du cuir etoint serrez. Or s'il
m'et loisible de conduire cecy, des animaux aus
plantes, i'ay an main plusieurs experiances. Car
l'ognon, l'al, & le fromant, plusieurs mois apres
qu'ils sont separez de la terre (qui leur fournis-
soit d'alimant) non seulemant viuent, ains ger-
met aussi: parce qu'ils ont vn humeur gros &
copieus, qui resiste beaucoup au flaitrissemant

*Lin. 2. de
la triple
vie, c. 18.*

& secheresse, antretenant la chaleur naturelle, mame sans ayde d'aucun humeur nouuellemant ressu. Ainsi la Ioubarbe, herbe nommee *Semperuiue*, l'Aloë [dit perroquet] & celle qu'on appelle vulgairement *Faba inuersa* (on pense que ce soit *Telephion*, des Latins nommé *Illecebra*, & des boutiques *Crassule maior*) etans arrachees de terre & pandues [an l'air] viuet fort longuemant : parce qu'elles ont du ius visqueus, & abondant an leurs feulhes bien epaisses. Et quel besoin ont-elles de frequent ou continuel alimant, puis qu'elles ont vn suc tant gluant, qu'à peine il peut finalement estre consumé par les grandes chaleurs? Et afin que personne ne se moque de ce discours (par lequel ie compare les plantes aus animaux, an ce que concerne la facile abstinence des viures) ie veus bien qu'on sache, qu'il et beaucoup plus malaisé, que les plantes demeurent quelque tams viues sans nourriture, que les animaux. Car, pourquoy faut-il que les plantes soient toujours attachees à leurs racines, sinon afin qu'elles attirer continuellement du suc, qui leur et necessaire à tout momant de tamps? Nature ha donné mouuemant aus animaux, parce qu'il ne leur conuenoit pas chercher des viandes, sinon par quelques interualles. Et pource vous voyez, que les animaux priuez de viande, viuet au moins quelque iours: & les plantes presque

toutes se flétrissent, aussi tost que nourriture leur défaut : & sur tout la race des herbes. Toutes-fois celles qui ont beaucoup d'humeur, & la substance serrée & épaisse, sont de plus grande durée, & viuent quelque temps après qu'elles sont arrachées. Car elles retiennent vne portion de l'humeur gluant, auquel l'ame est conseruée, qui suffit à plusieurs iours. Ainsi de plusieurs arbres les rameaux retranchez, meurent tard. Ainsi des bestes insectes, les parties decoupees se remuent: parce que l'humeur tenace et difficile à dissiper, retarde leur ame comme anuelopée & ampetrée, qu'elle ne s'en vaise tost. Cela m'aime fait, que les bestes exangues puissent (comme cy deuant nous auons remoustré) viure fort longuemant, sans l'usage des viandes.

Je pense que rien n'empêche plus, que ie V.
ne conclue estre vray (comme tres-bien prouué)
que telle abondance d'humeur gros & gluant,
se trouue quelque fois amassée en vn cors
froid, que la chaleur naturelle ne fera autre
chose durant plusieurs années, sinon le consu-
mer. Ce pendant le cors n'a besoin de nou-
veau aliment: dequoy le sçait et, qu'il n'a point
d'appetit. L'expérience nous l'a premierement
enseigné: la raison prouue cela m'aime, avec la
comparaison de plusieurs choses samblables.
S'il vous plait examiner cecy plus attantiue-
mant, tres-renommé P A P O N, vous n'y pour-

rez plus contredire, ains soubſcrivez à noltre a-
uis: & vous emeruelheriez (comme il et bien-
ſeant à tout homme d'eſprit) commât des prin-
cipes les plus petis, & vulgairement notoires,
ie vous ay tiré à l'opinion que vous iugiez tant
rejetable. C'et la force des demonſtracions
deſquelles les Geometriens (beaucoup plus
certainement que les autres) inferet leur con-
cluſions, de ſuppoſicion confeſſees & cognues
du vulgaire. Car ils ne parlet premierement que
de lignes, de poins, de ſuperficiés, quarres, an-
glez, cercles, & ſemblables: puis ſoudain ils de-
duiſent tellement l'un de l'autre, qu'an fin ſans
aucune capcion ou habilité ſophiſtique, ains de
neceſſaire conſequance, ils conduiſet de main
en main leur diſciple, à meſurer la grandeur des
cieus, la diſtance des aſtres, la maniere des eclyp-
ſes, & autres choſes fort cachees. Pareillement
celuy qui et expert an Phyſique, & és choſes
naturelles, ſachant trouuer par certaine metho-
de les principes & cauſes de tout, peut facile-
ment affirmer des propoſitions paradoxes (tres-
veritables toutesſois) & les prouuer de ce que
le ſans & l'vſage confirmet. Cecy ſuffira à vous,
qui etes bien verſé an toute diſcipline, & non
tardif, pour confirmation de mon propos: le-
quel du commencement vous auez paſſé, n'e-
tre pas ſeulement vray ſemblable. l'an deba-
trois avec vn autre plus au long, ſi ces demon-

stracions ne luy faisoient rien : mais vous y con-
santez deja (ie le say bien) & y aioutez vottre
suffrage.

Ayant paracheué cecy, i'ay rancontré for-
tuitement vn lieu d'Auicenne l'Arabe, qui con-
firme nostre opinion par le phlegme : lequel e-
tant plus copieux, il pense pouuoir auenir, que
nous viuions longuemant sans manger, parce
que telle matiere tient place de viande. Il ne nie
pas aussi, que cela ne puisse auenir aus hom-
mes sains. Je suis bien aise, de ce qu'un si grand
auteur approuue mon opinion, laquelle ie pan-
sois n'auoir esté traictee de personne.

*Ce qui s'ensuit et traduit de la seconde partie des
Opusculs de M. IOVBERT. pag. 136: où
il est noté, pour ajouter à ce Paradoxe.*

OR ie preuoy facilement, que deus sortes
de gens se peuuent emouuoir, ou du seul
suiet de ce discours, ou de ses preuues. Les vns
sont ignorans de la Philosophie naturelle, & de
la Medecine, personnes venerables pour leur
simplicité & pieté: comme le menu peuple, &
tous ceus qui n'appliquent leur etude à exami-
ner les causes de chaque chose. Les autres sont
diaboliques, qui poursuiuent de calomnie tres-
impudante, ce qu'ils sauent estre bien dit. Je ne
m'arreteray point à ceus-cy, parce qu'ils n'at-

Obiectiō.

tandet pas l'explicaciō [de mon dire] & qu'ils
 depraue & infectet de leur poison, tout ce qui
 et ressu de leur pansee impure. Aus autres il
 me samble qu'il conuient satisfaire benigne-
 mant & synceremant. Le voy qu'on me pour-
 roit obietter cecy : Les iunes de quarāte iours
 antiers, lesquels IESVS CHRIST, Elie &
 Moyse ont soutenu (ainsi que temognet les
 saintes Escritures, dictées par le saint Esprit) ne
 seront plus tenus pour miracles, si par quelque
 raison naturelle on peut andurer le iune, voi-
 re par plusieurs mois & ans. Certainement il
 seroit vray, si on ne recognoissoit, que cela eut
 esté donné totalement contre les lois de Natu-
 re, à des hommes parfaitement sains, par cer-
 tain priuilege, comme nous croyons piement.
 Car il leur fut diuinement ottroyée, exam-
 pcion de l'infirmité de la chair pour vn tams:
 de sorte que leur cōdicion estoit pour lors, au-
 tre que celle du gēre humain. Mais ceus que
 nous auons aprins des histoires prophanes,
 auoir vecu durant quelques années sans man-
 ger (si elles diset vray) il faut qu'ils ayent tous
 esté mal sains, & pleins de beaucoup de suc
 froid, duquel le cors ha pu estre nourry lōgue-
 mant : comme i'ay demoustré amplemant par
 ce Discours. Ainsi nous aprenons de ce qui
 auient iournallement, que plusieurs malades
 n'ont point d'appetit, à cause que leur vantri-

Reponce.

culé et farcy de mauuais humeurs: & ils prenent moins de viande en vne semaine, qu'ils ne prennent chaque iour quand ils se portoint bien. Mais qu'un homme de cœur tressain, puisse passer seulement un iour [ou deux] sans viande, & n'auoir pas faim, cela excède les bornes de Nature, & est un miracle diuin. Combien plus et il admirable, qu'un tel homme iune quarante iours entiers, de sorte qu'il ne sente point de faim, n'ait à combattre la conuoitise de manger, & n'appete la viande ou le breuuage, non plus que l'un des anges? Nous croyons que IESVS CHRIST ha eu le cors extremement tapperé & pur, ja-soit qu'il fut sujet à maladies, selon la condition de sa nature humaine. Nous recognoissons samblablement, que Moysé & Elie, quand ils s'abstindrent durant quarante iours de manger & de boire, estoient parfaitement sains, pour lors (par certaine prerogative) exempts de la commune vie des hommes. Dequoy il s'ensuit, qu'à bon droit on estime cela illustres miracles, par lesquels l'autorité de ces prophetes, & de IESVS CHRIST, fut établie. Or ce n'est pas chose nouuelle, que samblables effets auient, par l'ordre des choses que Dieu tres-bon & tres-grand ha prescrit à Nature, & par un miracle euidant contre les lois de la même nature. Car telles fieures, & plusieurs autres maladies, que les Sains ont guery, les medecins otent aussi. Mais les moyens desquels ils vset,

y apportet tres-grand' differâce. Car les Sains de leur seule parolle, ou de leur attouchemât, defaisoint (moyennât la grace de Dieu) les causes de tels effais, avec la necessité imposee à Nature. Les medecins ne font autre chose, que opposer aus causes naturelles d'autres samblablement naturelles; par lesquelles, si la vertu des remedes donnee du Createur, et plus puissante, & qu'il ne veulhe que pour lors elle soit vaine, la cause qui fait le mal et effacee. **I E S V S C H R I S T** guerit parfaitemât le sang mēstrual inueteré, du seul attouchemant de la frange de sa robbe. Nous par art medicinal, duquel luy-maime (cōme pāire benin, ayant pitié de la cōdicion humaine) et auteur & vray instituteur, remedions à samblable mal par certains medicamans. Ainsi certainement, l'humeur phlegmatic plus copieus, peut induire [naturellemât] le iune, comme il a esté aus su-nommés se portans bien, de la seule volonté du tres-haut Dieu. Mais outre ceus-cy, il y a infinis miracles qui excedet nostre antandement, lesquels ne l'art humain, ne la Nature maime fait imiter en aucune maniere. Telle et la guerison de l'aueuglement naturel: de chasser les esprits immondes du cors humain: resusciter les mors ja à demy-pourris, & samblables, qui confirme l'autorité de Dieu tout puissant. Je panse qu'il appert de cecy, que les choses qu'ō dit auenir

par certaine loy de Nature (ia-soit que rare-
 mant) ne reprouuet point les vrais miracles,
 ou ne diminue leur certitude: & q̄ celuy ne
 contredit à la foy chretienne, qui examine di-
 ligeamment les causes de tels euenemens. Ains
 plu-tost: n'an confirme l'on pas mieus, la ve-
 rité des miracles non fains: an otant quand &
 quand l'occasion des impostures, affin qu'el-
 les n'abusent facilement le peuple mal expert.
 Car si quelcun de ceus qui viuet sans manger,
 à cause de leur intēperature froide, & l'abon-
 dance de phlegme, vouloit contrefaire le Pro-
 phete inspiré de Dieu, combien de mille hom-
 mes precipiteroit-il an tref graues erreurs, &
 ruine? Certainement celuy et impie, & igno-
 rant de la vraye (c'est la diuine) philosophie,
 quiconque pansant à ces choses, & les estimāt,
 prononcera estre impie & tref-irreligieus, de
 vouloir distinguer par raisons non fardees, les
 œuures & (comme les nôtres parlet) miracles
 de Nature, des miracles diuins. Ce que tous
 jans de bien & de pitié cōfesseront librement,
 conuenir fort à vn homme de bien, religieus
 & notamment charitable.

*Ce qui et entrelasé au texte, par ces marques
 [], et de l'auteur, apres auoir reconnu & ap-
 prouué la version de son fis.*

F I N.



P. REVEILLES, SVR LE
TRAITE DES ERREURS POPV-
laires, expliqués ou refutés par
M. IOVBERT.

Tu as fait, mon IOVBERT, que tout le mon-
de honore,

Faisant preuve de toy, tes si doctes escrits.

Et mesme as estonné les plus rares esprits,

Dont le lustre divin nostre siecle decore.

Icy, tousiours plus grand, ainsi comme l'Aurore

Disipe de son taint les brouillars obscurcis,

Tu chasses les erreurs dont le vulgaire espris,

Populaire ignorant, comme un Oracle adore.

Tu fais que maintenant on voit à descouvert,

Ce qu'un masque trompeur auoit pieça couuert,

Embrouillé dans l'obscur de mille resueries;

Courage donc, IOVBERT, tu rabbatras l'effort

Du temps qui range tout, tu rabbatras l'enuie,

Et, hôte du tombeau, viuras apres la mort.

D V M E S M E.

IE louangeroy bien le cours d'une riuere,
Qui d'un calme sourcil, douce, se va roulant:
Mais ie m'embrouille alors que ie vay louangeant,
Le reply mutinè de l'onde marinere.
Ie lou'roy bien aussi la science ordinaire,
Qui fait que le commun est estimé scauant:
Mais la tienne qui va les autres surpassant,
Me fait demeurer court, accablé de matiere.
Car qui pourroit louer le scauoir si exquis,
Et les graues discours qui ornet tes escrits,
Et font qu'un seul IOVBERT soymesme se sur-
passe?
Il faut donc mieus me taire, affin de ne sembler
Vouloir de tes honneurs les louanges embler,
Par un chant trop soumis de ma rime si basse.
P. Reueilles.

VOZ plumes deormais (ingenieux esprits)
N'v'ez, pour enrichir d'une eternelle gloire,
Le nom de mon IOVBERT. Il l'ha par ses
escripts
Graué au haut du chœur du temple de memoire.

I. Heroard.

EXTRAICT DV PRIVILEGE
DV ROY.

PAR grace speciale & priuilege du Roy, donné à Poitiers, le 30. iour d'Aoust, 1577. il est permis à M. Laurens Ioubert, premier docteur regent, & Chancelier en l'vniuersité de Medecine à Mompellier, de choisir tel imprimeur & libraire, que luy plaira, pour imprimer toutes ses œuvres & liures: avec inhibition & deffence à tous autres, de quelque qualité & condition qu'ils soient, de ne les imprimer, vendre, ne distribuer, durant le temps & terme de dix ans, apres la premiere impression de chascue œuvre, & liure. Le tout à peine de confiscation des liures, d'amende arbitraire, & de tous despens, dommages & interets: comme plus à plein est contenu par les lettres patentes dudit priuilege. Signé HENRY. Et plus bas. Verifiees & enregistrees au siege presidial d'Agenois, le 7. No- uembre, 1577.

Ledit M. Laurens Ioubert, ha permis par sedulle signee de sa main, à Lucas Breyer libraire, &c. d'imprimer ou faire imprimer vne seconde partie de son œuvre des Erreurs populaires & propos vulgaires, touchant la me-

decine & le regime de sante' (qui luy ha ete
baillee par M. Berthemy Cabrol, chirurgien
de Mompellier) pour le temps & terme de
cinq ans, à conter du dernier iour de l'impres-
sion.

Donné à Paris le moys de Feurier,

1 5 7 9.



